

閩書

第五冊

福建人民出版社

〔明〕何喬遠 編撰



〔明〕何喬遠 編撰

廈門大學 古籍整理研究所
歷史系古籍整理研究室
《閩書》校點組 校點

閩書

第五冊

福建人民出版社

MIN SHU

閩 書

(第五冊)

〔明〕何喬遠 編撰

*

福建人民出版社出版發行

(福州得貴巷 59 號)

上海傑申電腦排版有限公司排版

福州七二二八分廠印刷

開本 850×1168 毫米 1/32 26.5 印張 4 插頁 627 千字

1995 年 12 月第 1 版

1995 年 12 月第 1 次印刷

印數:1—2000

ISBN 7—211—02472—0

K·187 定價:49 元

書中如有印裝質量問題,可直接向承印廠調換

第五冊目錄

卷之一百二十四 英舊志弁翰

福州府閩縣	懷安故縣	連江縣	永福縣	三七〇五
泉州府晉江縣	南安縣	……	……	三七〇八
建寧府建安縣	甌寧縣	建陽縣	崇安縣	……
浦城縣	松溪縣	……	……	三七〇一
延平府南平縣	將樂縣	……	……	三七一七
汀州府長汀縣	武平縣	清流縣	連城縣	三七一九
興化府莆田縣	仙游縣	興化故縣	……	三七二四
邵武府邵武縣	泰寧縣	建寧縣	……	三七二七
漳州府漳浦縣	長泰縣	海澄縣	……	三七二八
福寧州	福安縣	寧德縣	……	三七三〇
卷之一百二十五	英舊志闕析	……	……	……
福州府閩縣	侯官縣	長樂縣	福清縣	三七三六
泉州府晉江縣	惠安縣	安溪縣	同安縣	……
永春縣	……	……	……	三七三九

建寧府建安縣 甌寧縣 建陽縣 崇安縣

浦城縣	松溪縣	……	……	三七四三
延平府順昌縣	尤溪縣	……	……	三七四六
汀州府清流縣	連城縣	……	……	三七四七
興化府莆田縣	仙游縣	……	……	三七四八
漳州府龍溪縣	漳浦縣	南靖縣	平和縣	三七五二
福寧州	寧德縣	……	……	三七五四
卷之一百二十六	英舊志韋布	……	……	……
福州府閩縣	侯官縣	懷安故縣	古田縣	……
閩清縣	長樂縣	連江縣	羅源縣	……
永福縣	福清縣	……	……	三七五八
卷之一百二十七	英舊志韋布	……	……	……
泉州府晉江縣	南安縣	惠安縣	德化縣	……
安溪縣	同安縣	永春縣	……	三七八四
卷之一百二十八	英舊志韋布	……	……	……

建寧府建安縣 甌寧縣 建陽縣 崇安縣

浦城縣 政和縣 松溪縣……………三八〇六

卷之二百二十九 英舊志韋布

延平府南平縣 將樂縣 尤溪縣 順昌縣 三八三二

汀州府長汀縣 寧化縣 上杭縣 武平縣

清流縣 連城縣 永定縣……………三八三七

興化府莆田縣 仙游縣 平海衛……………三八四五

卷之一百三十 英舊志韋布

邵武府邵武縣 光澤縣 泰寧縣 建寧縣 三八六一

漳州府龍溪縣 漳浦縣 龍巖縣 長泰縣

漳平縣 平和縣 詔安縣 海澄縣

鎮海衛……………三八七一

福寧州 福安縣 寧德縣……………三八八四

卷之三十一 英舊志閩巷

福州府閩縣 侯官縣 懷安故縣 古田縣

閩清縣 長樂縣 連江縣 羅源縣

永福縣 福清縣……………二八九九

泉州府晉江縣 南安縣 惠安縣 德化縣

安溪縣 同安縣 永春縣……………三九〇九

建寧府建安縣 甌寧縣 建陽縣 崇安縣

浦城縣 政和縣 松溪縣 壽寧縣……………三九二二

延平府將樂縣 沙縣 尤溪縣 順昌縣

永安縣 大田縣……………三九三六

卷之一百三十二 英舊志閩巷

汀州府長汀縣 寧化縣 上杭縣 武平縣

清流縣 連城縣 歸化縣……………三九四四

興化府莆田縣 仙游縣 興化故縣……………三九五四

邵武府邵武縣 光澤縣 泰寧縣 建寧縣 三九六〇

漳州府龍溪縣 漳浦縣 龍巖縣 長泰縣

平和縣 詔安縣 海澄縣 鎮海衛……………三九六八

福寧州 福安縣 寧德縣……………三九七七

卷之一百三十三 英舊志僑寓

福州府閩縣 古田縣……………三九八八

泉州府晉江縣……………三九九〇

建寧府建安縣	建陽縣	崇安縣	三九九二
延平府尤溪縣	順昌縣		三九九五
汀州府長汀縣			三九九六
興化府莆田縣			三九九七
邵武府邵武縣			三九九八
漳州府龍溪縣	漳浦縣	長泰縣	三九九九
鎮海衛			四〇〇一
福寧州	福安縣		

卷之一百三十四 英舊志裔派

福州府閩縣	侯官縣	連江縣	福清縣	四〇〇四
泉州府晉江縣				四〇〇九
建寧府建陽縣	崇安縣	浦城縣		四〇一一
汀州府長汀縣	寧化縣			四〇一四
興化府莆田縣				四〇一五

卷之一百三十五 方伎志

福州府閩縣	侯官縣	懷安故縣	長樂縣	四〇一九
福清縣				四〇二四
泉州府晉江縣	南安縣			

建寧府建安縣	甌寧縣	建陽縣	崇安縣	四〇二六
浦城縣				
延平府將樂縣	沙縣	永安縣		四〇三〇
汀州府長汀縣	寧化縣	武平縣	連城縣	四〇三二
歸化縣				

興化府莆田縣	仙游縣			四〇三四
邵武府邵武縣	建寧縣			四〇三五

漳州府龍溪縣				四〇三六
--------	--	--	--	------

福寧州	福安縣	寧德縣		四〇三七
-----	-----	-----	--	------

卷之一百三十六 方外志釋納

福州府				四〇四一
-----	--	--	--	------

卷之一百三十七 方外志釋納

泉州府				四〇六六
建寧府				四〇八四
延平府				四〇八七
汀州府				四〇八八
興化府				四〇八九

邵武府……………四〇九三

漳州府……………四〇九五

福寧州……………四〇九八

卷之一百三十八 方外志仙道

福州府……………四一〇二

泉州府……………四一〇五

建寧府……………四一〇六

延平府……………四一〇七

汀州府……………四一〇一

興化府……………四一一二

邵武府……………四一一三

漳州府……………四一一六

福寧州……………四一一六

卷之一百三十九 宦寺志

福州府閩縣……………四一一八

泉州府同安縣……………四一一八

延平府南平縣……………四一二〇

卷之一百四十 閩閩志

福州府閩縣 侯官縣 懷安故縣 古田縣

閩清縣 長樂縣 連江縣 羅源縣

永福縣 福清縣……………四一二二

卷之一百四十一 閩閩志

泉州府晉江縣 南安縣 惠安縣 德化縣

安溪縣 同安縣 永春縣 泉州衛

永寧衛……………四一六〇

卷之一百四十二 閩閩志

建寧府建安縣 甌寧縣 建陽縣 崇安縣

浦城縣 政和縣 松溪縣 壽寧縣……………四一九二

延平府南平縣 將樂縣 大田縣 沙縣

尤溪縣 順昌縣 永安縣 延平衛……………四二二〇

卷之一百四十三 閩閩志

汀州府長汀縣 寧化縣 上杭縣 武平縣

清流縣 連城縣 歸化縣 永定縣……………四二三八

興化府莆田縣……………四二四七

卷之一百四十四 閩閩志

興化府莆田縣二 仙游縣 興化故縣…… 四二七四

邵武府邵武縣 光澤縣 泰寧縣 建寧縣

邵武衛…………… 四二九一

卷之一百四十五 閩閩志

漳州府龍溪縣 漳浦縣 龍巖縣 南靖縣

長泰縣 漳平縣 平和縣 詔安縣

海澄縣 寧洋縣 漳州衛 鎮海衛…………… 四三〇七

福寧州 福安縣 寧德縣 福寧衛…………… 四三〇九

卷之一百四十六 島夷志…………… 四三四八

卷之一百四十七 靈祀志

福州府閩縣 侯官縣 古田縣 長樂縣

連江縣 永福縣…………… 四三六四

泉州府晉江縣 南安縣 惠安縣 德化縣

永春縣…………… 四三六八

建寧府建安縣 甌寧縣 建陽縣 崇安縣

松溪縣…………… 四三七〇

延平府南平縣 尤溪縣 永安縣…………… 四三七三

汀州府長汀縣 寧化縣…………… 四三七四

興化府莆田縣 仙游縣…………… 四三七五

邵武府邵武縣 光澤縣…………… 四三七七

漳州府龍巖縣…………… 四三七八

福寧州寧德縣…………… 四三七八

卷之一百四十八 祥異志

福建布政使司…………… 四三八二

福州府…………… 四三八五

泉州府…………… 四三九〇

建寧府…………… 四三九四

延平府…………… 四三九九

汀州府…………… 四四〇二

興化府…………… 四四〇四

邵武府…………… 四四〇八

漳州府…………… 四四一〇

福寧州…………… 四四一六

卷之一百四十九 舊志

福州府	四四二一
泉州府	四四二二
建寧府	四四二三
延平府	四四二五
汀州府	四四二九
興化府	四四三〇
邵武府	四四三〇
漳州府	四四三一
卷之一百五十 南產志	四四三四
卷之一百五十一 南產志	四四六七
卷之一百五十二 舊志	
福州府	四四八七

泉州府

卷之一百五十三 舊志

建寧府	四五〇八
延平府	四五一六
汀州府	四五一八
興化府	四五一九
邵武府	四五二六
漳州府	四五二七
福寧州	四五三一
卷之一百五十四 我私志	四五三五
校點後記	四五四一

閩書卷之一百二十四

英舊志 弁輅(二)

福州府 閩縣 懷安故縣 連江縣 永福縣(三)

閩縣(三)

唐

楊復光 張謹 黃礪

楊復光 有武力，少養於內常侍楊玄价，以節誼自奮，玄价奇之。宣宗時，稍遷左神策軍中尉，累監諸鎮軍。乾符初，佐平盧節度使曾元裕擊賊王仙芝，敗之。僖宗罷宋威，以兵與復光，詔鄭紹業爲荆南節度使，以復光監忠武軍，屯鄧州遏賊右。衝帝西幸，召紹業見行在，復光更引彥謨爲荆南節度使。其後，忠武周岌受賊命，夜宴，召復光，左右曰：「彼既附賊，不必利公，不如毋行。」復光固往，泣謂岌曰：「丈夫所貴，感恩與義耳，公奮匹夫，封侯，乃捐十八葉天子，北面臣賊，何恩義利害昧昧邪？」岌流涕曰：「吾力不足，陽合而陰離之，故召公計。」因持盃盟曰：「有如酒。」卽遣子守亮斬賊使於傳舍。秦宗權據蔡州叛，岌、復光以忠武兵三千人人見，宗權卽遣部將王淑持兵萬人從復光定荆襄。師次鄧，淑逗遛，復光斬之。

并其軍，進攻南陽，賊將朱溫逆戰，大敗，遂收鄧州。會母喪，班師。俄起爲天下兵馬都監，總諸軍。京師平，封弘農郡公。卒，贈觀軍容使，謚忠肅。復光御下有恩，軍中聞其死，皆慟哭。而諸子多爲將帥者。

張謹 沉雄英發，累官招討使。黃巢寇閩，謹率師迎賊，多所衝陷。後遇於政和之鐵山，連戰九合，殺傷甚衆。賊以奇兵遮挾絕道，不得前，士卒乏食疲困，謹意氣自如。其偏將郭榮，字景華者，赤頰長髯，能挽五石弓，舉千斤，謹與榮及諸校江、李、曹、葛、許、蔣等十八人，持刃突陣，直貫左右，呼聲震山谷，斬首數百級。賊披靡，欲解去，探知兵矢且盡，乃蟻附奮擊，自旦至晡，十八人俱死，榮亦死。謹被創甚，遂廢握刀，箕踞瞠目大罵，爲賊所害。妻子及榮妻，皆罵賊死。政和人廟祀之。

黃碣 初爲閩小將，喜學問，有志向。同列有假其筆者，碣曰：「他日吾將以此筆斷大事，寧可假邪？」後戰安南，有功，高駉表爲漳州刺史，徙婺州，治有績。劉漢宏遣兵攻之，兵寡不可守，棄州去。客蘇州，董昌爲威勝軍節度使，表碣自副。及昌反，碣諫曰：「昔桓文不敢侮周，曹操不敢危漢。大王拔田畝，位將相，不能盡忠王朝，乃擅嬰一城，妄自尊大，誅滅無種矣。碣不能見王之及也，請舉族先死。」昌怒，斥出之。碣移書幕府李滔曰：「針可爲稍邪？」昌聞益怒，斬首抵瀕中，夷其家百口，坎鏡湖南瘞焉。僖宗中，詔錢鏐討昌，滅之，贈碣司徒，求其後，不得。

五代

盧光

盧光 仕南唐，爲守將。王審知建國，光避地尤溪。王氏亡，李仁達據閩，使陳臣弼攻尤溪，光拒之。

於東廓水亭，戰甚力，邑人得以奔竄，多光之功。

皇朝

林觀

林觀，遇知成祖於潛邸，以靖難功，累陞錦衣衛都指揮僉事。成祖嘉其篤實，命署禮部郎中。奉使朝鮮，悉卻餽贐，成祖聞，賜綵衣麟袍，寵之。仁宗卽位，勅鎮陝西，進階昭勇將軍。宣宗登極，念觀舊勳，馳驛召還，仍掌衛事。卒，訃聞，遣官諭祭，護喪歸葬。子斌，世襲錦衣衛都指揮僉事。

懷安故縣(四)

宋

陳旦

陳旦，嘉定中武舉正奏，授忠翊郎、江州統領，歷知霍丘縣。紹定中，從陳韓平建、邵寇，沒於王事。南劍州祠祀之。

連江縣(五)

皇朝

陳第

陳第，字季立。少爲諸生。講業清漳，門徒響集。以才略爲俞都督大猷所器，盡得其輜鈐方略。壯

游京師，大猷薦於本兵譚襄敏綸，遂棄子衿，授鞬鞍，累薊鎮游擊將軍，和戢虜酋，邊賞快其意。薊鎮總督縱其親，嬖行賈鎮下邊鎮兵，勒買，而第持之，總督不悅，遂拂衣歸。第慷慨任意氣，棄官後爲五嶽游，考古讀書，有《意言》、《謬言》、《毛詩古音考》、《伏羲先天圖續》。秣陵焦弱侯竑最重之。

永福縣〔六〕

宋

陳表臣

陳表臣 乾道中武舉，知宜州。經略張侂諤韋文仲等六十四人寇邊，欲置之死。表臣按獄，知其非辜，必欲活之。當其忿爭未決時，賦詩見志，兼以諷張，無辜遂活，時稱宜陽曠見。

泉州府 晉江縣 南安縣〔七〕

晉江縣〔八〕

宋

楊友 廖叔政 林宗臣 王大壽

楊友 政和二年武舉及第。紹興初，歷知欽州。先是，交趾越境，與前守爭地，謀舉兵。友至，使來通好，友宴交使於天涯亭，語及地界，友植鐵鎗於庭曰：「能鏖戰耶？」使者悚息退，謀遂寢，郡人呼爲「楊

鐵鎗」。改知廉州。故事：貢珠，令民水取，多溺死者。友市他州充貢。所得恩澤，先奏兄子焉。

廖叔政 慶元二年武舉，歷上林、興寧令、瓊管。寇作，帥命督捕，輒以捷報。復勦古縣猺寇，臺閩上其功，辟守吉陽，改高州，就除邕管。逾歲，以祠歸里。里有海寇之警，與寓公儲襄募集民船，掩獲其酋。郡守真德秀薦守金州，命未下，卒。

林宗臣 乾道八年武舉第一。歷襄陽機宜，擢閤門舍人，輪對，言泉、漳、汀三州經界不行之弊，激切有所指，朱文公亟稱之。出知欽州，條奏邊備甚悉。

王大壽 爲泉左翼隊將。紹定五年，海盜王子清犯圍頭澳，守真文忠調大壽領卒防遏，疾馳至，倖與遇，賊徒推牛大嚼，而官軍猶未朝食，將官邵俊以下俱有蓄縮之意，大壽獨控弦進，斃其十餘人，群兇奪氣。俊引軍稍退，大壽挺立罵曰：「趙官家平日養得好人，見賊便走！」其時，惟隊將秦淮軍兵朱仙、陳捷、吳慶、尹政、李從五人隨大壽，遂與仙、捷、慶、政皆死之，獨李從兩奪賊稍免。海瀕居民望見者，咸嘆息泣下。文忠自爲文遣祭，厚恤其家，收刺其子弟，士卒競勸。未幾，遂有沙海洋之捷，俘獲賊首林添二等正殺大壽者，文忠令剖心祭之，請於朝，贈官，恤其家。

元

劉益 鄭壽

劉益 帥義兵從帥府討山寇呂甫，以軍功補官。至正中，授晉江尉。饋餉大都，陞南昌簿。西城那兀納等據泉，炮烙州民索賄，益悉捐家貲贖之。被活者飯僧西峰爲益祈福。

鄭壽 讀書能文，蚤孤，事母盡孝。繇千戶，陞宣武將軍上萬戶。至正間，萬戶賽甫丁阿迷里可作

亂，荼毒郡民，壽謀討之，機泄遭害，一門死者數人，第宅盡燬，子孫流竄，泉人傷之。

皇朝

薛天申 王有麟 林武莛

薛天申 晉江縣學生，從軍爲冠帶把總。嘉靖中，賊犯興、泉，天申與泉州衛舍人周岳鎮隨指揮歐陽深禦之，陷伏中俱死。事聞，贈天申爲指揮僉事，附祀鄉賢，蔭其子冠帶總旗，陞岳鎮子一級。

王有麟 登萬曆甲戌武榜。初任雙海把總，善治兵，有戰功，耻媚事常路，屢起屢蹟，官至參將。歸，闔門讀書，所著有《蓄德編》、《百將傳補遺》、《古今戰守攻圍兵法》六十卷，曰：「叨國家厚恩，無以報，努力爲此，卽不獲用，他人用之，亦所以報朝廷也。」

林武莛 萬曆二十二年武進士，授泉州衛鎮撫，陞廣西永福守備。屬五山猺夷作亂，調移潯州，安反側，撫流移。諸夷盜劫武緣庫，求之不得，武莛以計掩捕其毛子用、索帝學二人，而失庫盡得。府江叛猺鵠張，破城堡，殺邑令。朝命征之，當事檄武莛鎮杜廖鎮。武莛斬棘爲營，吸瘴而餐，晝夜警備不弛懈，竟中瘴卒。事聞，詔加贈驃騎將軍、都指揮使。子欲棟、欲楫，并舉進士。

南安縣(九)

宋

黃甫弟旦合傳。甫子葵。(二〇)

黃甫 與弟旦并居右庠。甫有疾，旦刺股療之，疾愈，終不自言及。旦疾，甫燃臂扣天，旦亦尋愈。

甫、旦俱淳熙八年武舉。甫，知吉陽軍。旦，官至武經郎，知欽州。子夔。

夔 以蔭補官，歷知貴、鬱、林、宜等七州，所至稱廉惠。宜溪蠻僭卒爲暴，部刺史辟爲守。夔至州，殲其酋魁，諸峒納款。事聞，遷三秩。

建寧府 建安縣 甌寧縣 建陽縣 崇安縣 浦城縣 松溪縣(一一)

建安縣(一二)

五代

陳誨

陳誨 生數月，趨捷能馳走，其父異之，名曰阿鐵。初爲王延政裨將。唐師攻建州，傳其城，誨數出挑戰，先鋒使王建封克其外郭，擒誨，將斬之，已解衣伏鎖，忽脫身絕馳，追者數十百輩，莫能及。因自歸於唐將查文徽，文徽駭其材用，爲戰掉指揮使，使領故部曲，從攻福州馮延魯。戰敗，諸營皆潰，死者萬計，委棄軍資戎器，不可勝算，誨獨殿後，收所棄金帛二十萬以歸。文徽鎮建州，數表其能，授劍州刺史。諜者告吳越戍兵棄福州遁歸，文徽卽率誨以進，誨以戰艦入閩江，適秋雨，水暴漲，一夕七百里，抵城下，與吳越水軍遇，遂戰於江中。誨素善水，没人江，鑿壞吳越樓船，沉之。乃以木爲蛟龍形，湧出江面，吳越兵驚潰，遂大敗之，獲其將馬先進，以功遷建州節度使，進侍中。誨訓兵積穀，隱然爲大鎮，朝廷名其軍爲「忠義軍」。在鎮十年，以疾求罷，乃以其弟劍州刺史謙留後，召誨還都。卒，封閩國公，謚忠愍。子德誠。

亦有勇略，壽春之役，諸將多逗撓，唯德誠力戰，未嘗挫衄，拜和州刺史。

宋

謝勳子激附。

魏勝

謝勳 領武舉，累歷邊徼。徽宗時，任黃州首領，舊志作「咸淳十年武舉」，誤。黃安俊叛圍辰州，諸志作「黃」，誤。知州張建侯死之，近臣薦勳才武可任，召對稱旨，令會兵進擊安俊，斬之。轉右武大夫、邊郡團練使。歿，贈威德將軍、節度使，加贈少師。子激，以父任入官。靖康中，母喪，家居。金人執二帝北去，激詣郡守請剡章赴元帥府勸進。後領祠卒，終朝請大夫。

魏勝 幼無賴，膂力絕人，隸軍籍，爲市游徼。嘗宿永安寺門下，夢金剛神謂曰：「烏棲吾耳，爲我去之，當與爾一指力。」覺，從其言，勇力頓增。靖康初，從禁旅戍滑臺，軍帥令軍中曰：「挽弩十碩者，補指揮使。」勝躍然應命，帥詣教場引試，萬衆聚觀，且下令曰：「若挽不及格者，死。」至勝，弦斷弩折，一軍皆驚，補本軍指揮使。未幾，歸建州，爲威果指揮使。部下卒葉儂輩謀反，指勝爲主。時變起倉卒，賴勝彈壓，方議招降，衆疑勝欲害之，勝曰：「請決之神。」因決神曰：「令勝與諸軍異心，今日令勝死。聽從諸軍反，不服，則神兆之凶。」令諸軍自與勝異心，勝原與諸軍同心，則神兆之吉。」兆得吉，衆帖伏，開城納降。部使者奏勝功，補承信郎，權本州兵馬監押。

甌寧縣〔一三〕

唐

童猛

童猛 有武勇。乾符間，舉爲節度副使，練兵備盜，討黃巢，歿於陣。

建陽縣（一四）

五代

林仁肇

林仁肇 初仕王延政，爲建州裨將。文身爲虎，軍中號「林虎子」。閩亡，未有所附，會周人攻南唐淮南，南唐中主遣使人福建募勇士，得仁肇及陳德誠、鄭彥華，皆拔爲將。仁肇爲南唐援壽春，復濠州水柵，累有功，授淮南屯營應援使。時周人正陽浮橋初成，扼援師道，仁肇率敢死士載芻蕘往燒絕之，爲反風所拒，火不得施，戰合稍卻，單騎殿後。周駙馬都尉張永德援臂善射，追仁肇射之，矢直指其口，仁肇忽俛，矢遂上越。永德使人覘之，仁肇也嘆曰：「彼自良將，豈易圖哉？」拜潤州節度使，移鎮武昌，又徙南都留守。宋開寶初，密言於後主曰：「宋淮南諸州，戍守單弱，而連年出兵滅西蜀，平荊陽，今又取嶺表，還往數千里，師旅罷敝，此在兵家有可乘之勢，請假臣兵數萬，出壽春，渡淝、淮，據正陽，因思舊之民，以復故境。兵起之日，請以臣反告宋，事成，則國家饗其利，不成，族臣家，明陛下不預謀。」後主懼不能從。宋太祖謀取江南，兵將憚仁肇據上游，師未即出。時後主弟從善質於宋，太祖令人密往武昌僧院，竊仁肇畫像歸，懸之別殿，召從善入，指問曰：「卿識此人否？」對曰：「不識，然有似江南林仁肇。」太祖曰：「然。近有表併進此像，言欲歸朝，將遣人迎之。」從善以爲信，亟遣人間行歸白，後主疑而燒之。仁肇素見知陳

喬，喬常曰：「仁肇將外，吾掌機務，國雖迫蹙，未易圖也。」仁肇死，喬嘆曰：「國亡矣。」

宋

王諤 熊安上

王諤 父保宜，檢校尚書兵部郎中。晉開化元年，諤以蔭補將仕郎，後佐宋太祖定天下有功，賜鐵券，其辭云：「卿倚朕如山，朕倚卿如石。山、石之固，永焉不摧。」太平興國四年，遷右羽林將軍。

熊安上 唐熊袞八世孫也。大觀己丑，中武科第一，累官信德府兵馬鈐轄，權通判軍州事。後遇北狩之變，死節邊疆，追贈武義郎。

皇朝

陳善安 王雅

陳善安 沙賊鄧茂七倡亂，勢甚猖獗，掠至建陽，善安鳩衆奮力殺賊，有功授鎮撫。

王雅 字文質。與陳善安同糾衆殺賊，授鎮撫。

崇安縣（一五）

唐

李材兄弟

李材 兄弟三人：孟曰材，仲曰楫，季曰槐。唐季，屢立戰功，遷指揮使。乾符間，黃巢入寇，兄弟共率所部兵擊賊，敗之。後追賊至建陽，衆寡不敵，因爲所縛。賊欲釋而用之，俱不屈死，越七日，容色不

變，人相與斂葬之。

宋

詹標 王佐才

詹標 少英猛，精騎射，爲本路提刑司將領。建炎初，韓世忠追捕苗傅、劉正彥至浦城，統制馬彥轉次官塘，爲賊伏所斃。世忠挑兵轉戰，正彥就擒，傳與愛將程政詭稱賈人，匿武夷山南之建峰，而標居在焉。標與憲司林杞謀，生置之於世忠所，既就械，政中途欲逸去，爲監送者所殺，遂獨送傅世忠軍。世忠喜曰：「還朝論功，當首公等。」後杞坐謗被竄，標亦就逮，人多冤之。已，同郡呂正言祉爲直於朝，標始得擢。

王佐才 少游邑庠，有聲，善談兵，尤精弧矢。建炎間，范汝爲竊發，佐才總義兵禦之。後建陽弓級王延勝等衆剽掠，佐才爲先鋒討平之，以功補承信郎。後爲吉州水軍統領，與賊首胡義戰，中流舟壞而歿，吉人廟祀之。

浦城縣（一六）

宋

練山甫 黃夷行

練山甫 兄亨甫，見縉紳。山甫學武，能挽強弓，補國子生，後補武學，因論弓箭法，忤神宗，罷歸。有旨，還本舍。後於徐衡榜登第，調涇源路總管，司教閱官，以功累官武德大夫。

黃夷行 父革，宣和間武舉，官至武功大夫。夷行用蔭補官，調監分寧酒稅。丁父憂。故事：小使臣喪制只百日，夷行懇請持服。嘗建論委將帥訓舟師及銓選人利害，會有以其說聞者，孝宗召對便殿，因言：「臣束髮讀書，愛司馬微對劉備之言曰『儒生俗士，豈識時務？識時務者，必在俊傑』。異時倘備使令，不敢愛一死。」孝宗嘉之，翌日降詔獎諭，特授閣門祗候。尋假泉州觀察使，知閣門事。使金既還，主管左右春坊事，東宮甚器重之。除閣門宣贊舍人，躡進七秩，前所未有。後以疾丐閑，囊無遺貲，東宮馳賜不絕。光宗初，召除左武衛將軍。人覲，凡所開陳，無不嘉納。紹熙改元，北使來聘，秘監楊萬里迎客，復以夷行副之。後轉武功大夫，領貴州刺史，賜宅於寶蓮山。卒，命有司棺斂，出內帑錢三百恤其家。

松溪縣（一七）

元

黃昌元

黃昌元 幼孤，長勤稼，事大母以孝聞。至正間，海內盜起，江西、福建并被寇迫，大府屯兵邵武以禦之。時本縣達魯花赤阿思蘭被大府檄軍前聽調，縣賊猝來攻，昌元急出資物，人龍泉、青田招募壯勇，得金十、五義、吳祥一等二百餘人，合舊部民義，聲勢復振。乃命伏西隅民家，自將寡弱迎戰，交綏而退，賊追而人西隅，伏起，賊衆大敗，俘馘甚衆。賊益衆復至，昌元命潘伯正守縣治，取民家門戶、床凳塞諸巷口，期日聞砲出擊。卽引兵二百伏塘下，俟賊入發砲，伏兵皆起，內外廩擊，賊衆大敗。會浙東追還金十、五義等，賊勢復逼，潘伯正父子皆遇害。昌元將死，士部出屯溪，塹上郢，擊走賊帥王驢，而阿思蘭自浦城

歸，賊遮之余嶺，昌元整衆奮擊，俘賊帥虎，阿思蘭始克入縣。賊又至乾竹洋，塹山營寨，昌元分兵四出，攻潰之，俘賊帥李冬、黃莽。而有二萬戶者，領兵來護，士卒剽掠，謬語曰：「二萬戶謂杉溪人黨賊，少長皆殺之矣。」昌元入見二萬戶力爲杉溪人解，於是杉溪千二百戶皆得安業。其明年，浦城降賊細承檄爲松溪主簿，細父在政和山後，兄惠在浦城南岸，皆爲賊首。細亦集黨類將應之，期日舉逆謀，邑人大恐。昌元攜得其私書，密與縣定計，乘夜發兵執細，殺之，及其黨七十餘人。阿思蘭以昌元隄備白嶺。又二年，山後賊連五義攻破政和縣，阿思蘭復請昌元爲總督，昌元糾合縣衆，得萬有三千餘人，分屯待之。賊盡銳來攻，昌元擊之，每出必捷，不敢復至。青田山後賊來攻松溪，至梓亭，昌元引兵屯巖下，輒敗走之。至正末，省府以建寧路同知阮德柔總制各縣義兵，征邵武，昌元爲參謀官，授本縣簿，賞不酬功，人皆惜之。

延平府 南平縣 將樂縣（一八）

南平縣（一九）

元

陳君用

陳君用 少負氣，勇猛過人。元末，汀寇騷動，集壯士保鄉里。尋從征討，屢獲賞。海寇陸梁，討平之。紅巾寇閩，帥府授君用南平尹，君用益出私財募士，無不一當十。每戰先登陷陣，悉復先後陷賊縣

邑，以功授建寧路同知。紅巾圍福州，君用自建寧來援，大敗其衆。廉訪僉事郭興祖佩君用明珠虎符，使權同知副都元帥，遂引兵踰北嶺至連江，阻水而陣，率壯士六十人，徒涉斬殺。賊稍潰，既而復合。君用大呼轉戰，中槍死。事聞，贈懷遠大將軍、同知浙東道宣慰司事、都元帥。追封潁川郡侯，謚忠毅。

將樂縣(二〇)

唐

廖汾

廖汾 有膂力、謀略，繇武舉，授九江團練使，討黃林兒賊有功，拜金吾大將軍。

宋

廖如篴 湯鸞

廖如篴 有文武才，繇武舉，初任驍騎都尉，與番落戰得捷，陞左軍都虞侯。

湯鸞 紹興二十一年武舉狀元，授瓊州路南安軍，時南洞王利學叛，鸞討平之，民立祠祀焉。

元

吳克忠 吳按攤不花

吳克忠 至正間，漳寇李志甫反，父文讓散儲募兵往擊之，與戰死。克忠誓不共戴，罄貲率衆血戰，殲之。事聞，授福建宣慰司都元帥府元帥。

吳按攤不花 性剛直不阿。元末，紅巾寇據邵武路，募義兵克復之。事聞，授福建行省左參政。

汀州府 長汀縣 武平縣 清流縣 連城縣(二)

長汀縣(二)

宋

伍全 曾先

伍全 狀貌雄偉，膂力過人，里人號爲黑龍。紹興間，齊述嬰贛城叛，時募勇敢士討捕，全以土豪應命，與陳敏等協力圍城。述堅壁以守，全疊被鎧甲，獨攀緣登城，持鐵戟百斤轉戰，萬夫披靡，遂入城啓關，諸軍爭赴，大破之。擢廣州摧鋒軍第十七將。後金虜犯順，有驍將挑戰，制帥察軍中惟全可以當之，全復舉鐵戟前擊，虜將應手斃。事聞，轉十官，賜金甲、名馬，賞賚優渥。虜人識其旗幟，見皆辟易。終武顯大夫。

曾先 少剛鷺好俠，因交亡命，拘囚。朝旨下汀，募義鏖手戍邊，時畏縮無敢行者，先獨倡勇應募，得千餘人，郡守傅康嘉之，俾部押以往隸黃州屯駐。尋以功累遷至武顯郎，知南軍兼權瓊管。

元

羅良 鄭從吉 魏淳

羅良 字彥溫。負俊才，善謀略。至正四年，漳賊李志甫圍漳城，守將戰敗，良傾家募兵，從江浙平章百花討平之，以功授長汀尉。十一年，龍溪獄囚反，殺元帥月魯帖木兒，掠財焚舍，良出兵擒之，帥府版

署漳浦主簿。已，賊吳仲海等殺千戶福留，陷南勝等縣，又平之。鎮將舉授南劍淮土翼千戶。是年夏，徐壽輝將詹天驥陷龍巖等地，逼取帥府郡縣印綬，良哀所部兵巷戰，斬天驥等三人，殺賊無算。帥府上功，署漳州新翼萬戶。十三年，福賊康子政圍逼省城，帥、憲兩府以禮致良，良遂募兵千人，沿海夜進，直抵城下，與賊死戰入城，夜復引敢死士縋城殺賊營，往返數日，賊見藥箭，驚曰：「此漳州羅萬戶軍也！」各駭散，圍解。奏授印符，俾長萬夫。十四年，安溪賊李大等焚柳營江，陷長泰等縣。良潛濟江，出不意，四出追殺，一賊莫竄。繼又南勝賊夏山虎攻漳，聲勢甚急，良率兵出戰，賊之。長泰、龍溪賊相繼生發，皆平之。州守遂引同攝州事。十八年，南勝賊李國祥挾潮賊王猛等陷南詔屯府，又平之。朝廷以爲漳州總管，子安賓襲萬戶。二十年，徐壽輝將林國庸又攻漳之近縣，良畫策，遣府判柴十二等掩擊，敗去，一時龍巖諸縣皆復。二十一年，漳浦賊陳世民陷漳浦近地，良遣同知劉君玉、萬戶帖木兒海牙等，水陸並進擊，世民走潮，賊衆自殺其首請降，遂以功拜福建行省參知政事兼守漳州。二十三年，潮賊金營殺江西省平章朶列不花，據城叛。良遣同知劉文遠入潮諭之，賊盡獻所獲印符。潮之蟹艘，出沒海嶼，暴掠尤甚，檄同知劉君玉禦以舟師，賊懼威滅跡。海外番夷，仰良政化，亦浮驛聽命。轉資政大夫，陞本省右丞，兼廣東道宣慰司都元帥，仍守漳州。尋命與江西省右丞迭理必實合兵復潮，潮賊陳國珍搆合紅巾以拒，良大發兵，遣同知劉君玉率都事鄭衍等軍民職官數千人，兵數萬，水陸分進。裨將張德、趙璋戰沒，軍士憤激，連拔其寨三十，追至潮陽。國珍因奔人海，良伏兵襲殺之。先是，梅州偽指揮倪蘭與潮賊犄角，良版授義士侯召卿率鄉兵要截賊道，執其帥以降。良每擊賊，專以設伏取勝，藥弩挫敵，遠近畏其名。爲政節用，養士不吝財賞。民有控訴，覈情剖理，庭無留獄。定賦必均，課農必慎。漳始置屯田，無府署，每歲

漳、泉鎮將率兵耕穫，歲終更代，甚爲民病。良奏立萬戶府，置千、百長，選吏給印，分田賜牛，人耕出戰，軍無多取，人無遠輸，食足兵強。有流來者，撫而衣食之。故雖亂世，漳則熙怡，民樂爲用，各盡其力。每歲，遣僚佐具舟，從海運糧抵遼東，以給行在官軍，貢方物以資國用，舉朝嘆異。元主嘉其忠，解衣賜之，特授光祿大夫，進封晉國公。先是，二十二年，陳友定爲福建省參政，復汀州，遂有據福之志，威迫平章燕只不花，所收郡縣倉庫悉爲家資，不順者，輒加殺戮，威振閩中。元既加友定平章，作威益甚，發兵諸郡，令其獻城，率投款，無敢與角。獨良堅守自如，貽書責之曰：「足下向爲參政，國大臣也。汀州之復，是乃職耳。可自恣耶？燕只平章，足下僚長也，足下迫之。郡邑之長，出自朝命，足下竄之。百司，朝廷之役，足下臣妾之。足下所收復郡邑，得其倉庫，人爲家貲，口言爲國，心實身耳。跬步之間，真偽甚明，不審足下將爲郭子儀，抑爲曹孟德？不佞恐足下不爲君誅，將有天罰。」友定得書大怒，益發兵攻漳。良使三千人操強弓毒矢，伏江東險處待之，且誡曰：「倘有他警，切勿輕移。」一夜，友定以兵千餘人攻海倉寨，佯言奪海舟趁潮直下。警至，千夫長張石古等違良節制，悉兵赴之。友定兵遂渡柳營江，士卒驚駭星散，良迎戰馬岐山，敗績。兵遂圍城，連攻旬月，矢石殆盡，約儲蓄可三日。父老人見，請曰：「江南道絕，天子萬里，孤城無援，破在朝夕，元帥守此，欲爲誰耶？」良曰：「天子命我，當與此土共存亡，第與公輩死守耳。」先時，有百夫長廬積者，因行軍失律，良以法誅之，其子善征驍勇，復取而置之幕下，使領北城兵，因引賊人，良與巷戰死。其弟田屯萬戶羅三，亦罵賊死之。妻陳，自盡而死。安寶將兵救父，衆散，亦自刎。壯士從死者百餘人。友定義良忠節，不掠其後。按《龍飛紀略》叙良事，謂我太祖爲余闢立廟，以爲忠於所事之勳。雖良之死，惜無以聞，坐令祀典闕焉。而《連城志》稱，太祖御極，詔立公廟於漳州，至今御葬存焉。未知孰是。

鄭從吉 勁直勇敢，膽略過人。上杭境內數被寇，民不聊生，元末復發，衆推從吉，托以捍禦，從吉慨然與衆約曰：「必殺賊乃已。」賊聞，懼而退。乃闢荒蕪，置縣治，招撫流亡，爲一邑保障。行省聞之，辟攝上杭事。

魏淳 至正中邵、汀翼萬戶府千戶，建寧賊應必等陷邵武諸郡，淳與吳按攤不花率兵討之。

武平縣〔二三〕

宋

雷三益

雷三益 少有勇略。景炎初，應文信公召，署爲部運長，從信公至潮、梅，以勞瘁卒軍中。裔孫得昌，見閭巷。

皇朝

練廷相

練廷相 諸生也。素閑武略，爲當道所知。嘉靖丁巳，因擒賊功，授冠帶。戊午冬，統義民羅勳、賴應緯、鍾國俊等，領兵漳、泉，征倭有功，還駐南安。適遇生倭蜂集，率衆挺戰，孤兵無援，與勳等赴水死。

清流縣〔三四〕

唐

伍昌時

伍昌時 父夢授，事閩王審知，官至左僕射。昌時生而英武多謀，屢征伐有功，爲偏將軍。自審知據汀州，昌時隨之，遂居於寧化之麻蒼，則今清流縣地也。

連城縣(二五)

宋

鄧晉

鄧晉 有材武，好讀書。從其婦翁彭孫平劇賊詹遇，謀略居多，論功擢皇城使。性忠勇剛毅，遇下有恩，與士卒同甘苦。熙河久叛，畫策收復之，就命爲都統。每歲陷陣先登，竟死王事，終武功大夫。四子以父蔭補官，後皆通顯。

元

宋景輝 李文慶

宋景輝 元初寇攘未定，景輝招集義勇，有功防禦，授北團寨巡檢司頭目，鄉邑以安。至元間，率衆殺賊帥李三十九、殿帥王大王并其黨三十餘人，復捐家貲犒義士，攻破偽永興帝巢穴，射中左脇，取其首，并獲偽印。累授武略將軍，終臨江路治中。

李文慶 至元間，爪哇屢寇福建，世祖遣福建行省平章政事亦黑迷失、史弼、高興等將兵三萬伐之。時爪哇國王爲鄰境葛郎國所殺，其婿士卒必闡耶迎弼求救。弼等遂并取葛郎國王以歸。旣而，士卒必闡

耶復叛，世祖大怒，招將復征。文慶統義兵一千，輔高興等同伐之，收伏士卒必闇耶以歸。世祖嘉文慶功，除授總管。

興化府 莆田縣 仙游縣 興化故縣〔二六〕

莆田縣〔二七〕

宋

陳淬 李富

陳淬 字君銳。紹聖初，呂惠卿帥鄜延，淬下第後挾策西游，衣戎衣，叩惠卿門請見。惠卿問：「何求？」淬曰：「大丈夫求見大丈夫。」補三班奉職。與西人接戰於烏原，手殺千餘人，擒其砦主。奏爲左班殿直、鄜延路兵馬都監，累遷武經郎。宣和四年，召赴闕，授真定路分都監，兼知比砦河北第一將。尋拜忠州團練使、真定府路馬步副總管。七年，金人人真定，淬以孤軍禦之，妻孥八人皆遇害。建炎元年，辟諸軍統制。宗澤命擊金人於南華，敗之，兼大名府路都總管、兵馬鈐轄，擢知恩州。王善者，金種落也，擁兵十萬，長驅兩河，遂襲恩。淬與長子仲剛拒戰，賊飛刃及淬，仲剛以身蔽刃，死之。明年，善復圍陳州，淬大敗之，拜宿州安撫使。李成叛，詔以淬爲御營使、六軍都統、淮南招撫使討之，三戰三捷。未幾，金人犯采石，又檄淬回援建康。淬將中軍，戚方將前，王燮將後，淬曰：「彼衆雖多，然止有二十艘，一艘不過五千人，每至不過千人。吾伏兵葭蘆、翳蒼間，俟其旋濟旋獲，前後不相知，訖濟，當盡獲矣。」杜充不從，

金兵遂犯板橋，諸軍皆潰，淬獨與戰，勢窮力盡，據胡床大罵，刃交於胸而色不動，與其從子仲敏俱死。詔贈明州觀察使，官其一子一婿。

李富 唐游擊將軍尚炅之裔，避武氏亂來莆，前後捐金錢累鉅萬，爲郡人修學舍，造橋梁，治亭障，築堤岸，以祝母壽。建炎初，粘罕犯順，率義兵隸韓世忠麾下，以材略稱，授承信郎。宣使張淵辟充殿前統制司幹官，以母老辭弗就。後母年九十八。子廷輝、廷耀、廷麟皆爲官。

仙游縣(二八)

宋

葉顥 林師益

葉顥 顥之兄。政、宣間，與顥并隸太學。金虜人寇，朝廷始試武藝謀略科，顥首中其選，授承節郎，隨大將劉延慶，爲京城東北守禦官。金兵攻圍日急，顥謂顥曰：「忠孝難兼，爾其歸養，吾登陣死戰矣。」因相對涕泣而別，顥遂力戰死之。

林師益 父豫，見縉紳。師益以父任奏補三班借職，授樞密院宣差、鷄澤縣尉。上書論邊防利害，議切時政，留京師聽旨。金虜深入，臣僚以師益所論可采，差充京畿第十四副將。虜犯京師，充京畿第一副將，訓練馬步軍，陳留縣駐劄。楊時在講筵，奏師益曉達軍政，可使專督訓練。授京畿第一正將，守禦鄭州、原武，虜至，不克攻，去。既虜自滑州渡河，再犯京師，諸將皆遁，惟師益孤軍守原武不動。劉韜爲丞相何栗謀，亟召師益兵入援，師益行次方丘，遇虜迎戰，大破之。明日，虜大至，師益謂其副曰：「不敵矣，

此吾致命之秋。」奮戰而死。一男若淵，甫晬，一女九歲，妻葉氏與乳母襁負流離，凡五六載，抵家。若淵稍長，痛父暴骨原野，刻木招魂，葬歸仙嶺。弟師臯，通直郎，亦歿王事，朝廷特官其一子。

皇朝

龔騰霄

龔騰霄 武試三捷。嘉靖四十二年，倭攻仙游城，騰霄被軍門取用，設策督兵，穿圍救守，城賴保全。

興化故縣（二九）

宋

陳齊鵠 薛奕子安靖。

陳齊鵠 仕陳洪進，爲指揮使，勸洪進歸宋，爲忠順之國。梟孫從龍，弱冠通輜略，入武學，紹熙元年，以累舉推恩擢第一，監邕州稅。

薛奕 字世顯，利和從子。利和，見縉紳。奕，熙寧間武舉第一，授鳳翔府都監，遷正將。元豐中，銀川寨之役死之，贈防禦使。子安靖。

安靖 以父死事，補官。靖康元年，假河北制置使，京城失守，安靖降金，知海州事。紹興初，乘間殺其守將王企中，舉郡來歸。高宗遣吏部侍郎傅崧卿獎以璽書，賜會稽田十頃，以宗室女妻之。紹興五年，除葉州刺史，閩門宣贊舍人，知全州。

邵武府 邵武縣 泰寧縣 建寧縣〔三〇〕

邵武縣〔三一〕

唐

余汝程 上官泊

余汝程 字千里。松溪未縣之時，名松源鎮，汝程咸通中蒞鎮，屢與吳戰，爭小梅關，卒鎮所，民廟祀之。

上官泊 乾符末，爲邵武鎮將。黃巢起浙東，掠江西，破饒、吉、虔、信等州，乘勝鑿山開道，直趨建州。泊與子蘭領兵勤王，〔三二〕誓曰：「不收黃巢，九泉之下不敢見先君。」直趨建昌拒賊，力戰死。子淵，亦歿。事聞，俱贈將軍。

元

魏留家奴

魏留家奴 元季領兵守邵武，僞漢陳友諒遣將攻之，城陷，奔建寧。其將康泰率兵圍城甚急，攻破南水門附堞上，留家奴領數騎開門迎戰，生擒其梟將僞名花太子者，賊勢稍却。復大戰於大洲，殺獲甚衆，泰夜遁。

泰寧縣〔三三〕

宋

丁從龍

丁從龍 有勇好義。紹定二年，率鄉兵擊賊，以功授保義郎。端平二年，領兵淮安城下，與敵大戰，攻破土城，敵兵奔潰，克復淮安，轉忠翊郎。其年遇盜於梧州懷集縣，戰死。朝廷褒贈，廟祀之。

建寧縣〔三四〕

唐

謝望

謝望 爲黃連鎮將，屯兵將屯寨。子彥斌，黑面長鬚，禦寇有功，人以「鐵龍」目之，累官招討使。

漳州府 漳浦縣 長泰縣 海澄縣〔三五〕

漳浦縣〔三六〕

元

陳君用

陳君用 宋陳景肅裔孫。至元中，劇賊李志甫、黃二使作亂，萬戶張哇哇、守將槃思監與戰，俱不

利。君用率從子進卿等，設伏烏泥洞，殺志甫，擒二使。授本路總管同知。後北洋海賊入境，君用募弓手，乘潮進戰，擒賊將，追降其餘黨。又破汀賊羅天麟、鄧師公於白花嶺。及潮寇夏山虎倡亂，逼汀、漳，聞君用董師，望風降附。朝議以君用屢建大功，勅以開屯南詔守汀漳正萬戶宣武將軍，進階南勝伯。卒，謚忠潔侯。

長泰縣(三七)

宋

蔡君澤

蔡君澤 咸淳間有賊突攻瀛山，君澤慮逼縣城，倡義糾族保石高寨以遏之。賊攻寨，君澤擣於神，夜昏暗莫辨，時若有火光、雷炮聲者，君澤率衆隨擊之，賊驚駭敗走，城賴以全。事聞，授武德將軍、泉州治中。

元

蔡淳

蔡淳 以蔭補香洲務官。至正五年，賊萬貴與嘉禾千戶何迪立叛，寇漳、泉二郡。漳州路高指揮薦淳武勇，與兵三千人，遣與賊戰。賊益兵圍之三匝，總管遣兵赴援，淳從衆夾擊，大破之，餘黨悉平。行省上功，陞攝長泰尹事。十四年，寇李角車叛，淳單車諭之，皆歸款。事聞，封正尹，世襲。

海澄縣〔三八〕

皇朝

林以靖

林以靖 嘉靖壬戌武進士，授漳州衛鎮撫。饒寇犯漳，以靖領兵從參將楊縉禦於長泰之渡頭，衝鋒殺賊，遂亡於陣。

福寧州 福安縣 寧德縣〔三九〕

宋

王褒

王褒 政和四年建寇猖獗東下，群盜相挺起，褒率鄉人團義兵守禦。紹興初，范汝爲據建州，侵掠旁邑，至縣境，知有備，遂取道古田、政和以歸，長溪聞并晏然。事聞，與其佐王傑皆補官有差。

元

陳端孫

陳端孫 元末以福建宣慰使出鎮福清州。陳友定勒兵侵州境，端孫率衆拒之，中流矢墜馬，被執。友定脇之使從，端孫大憤，罵，友定怒殺之。其妻孫氏抱幼女投井死。

福安縣〔四〇〕

宋

繆德綏

繆德綏 以武舉授鄂州副將，愛人禮下，兵政整肅。後詣闕告歸，衆留之，德綏曰：「志有所適，弗可強也。」遂歸隱。

寧德縣(四一)

宋

黃裳 李時興 黃石孫 林仲虎 孫應龍 姚望之

黃裳 少魁岸，有奇節。淳熙二年，武舉魁南宮，守長軍。夷酋得願，得丙等攻清平寨，裳遣兵同熟夷骨紹等大破之。歷典三郡，俸人多以給親舊，任子恩必先其兄子。子師旦，能詩，忱恂謹厚，終知邕州。

李時興 淳熙八年，武舉擢第，當路交薦其才名，除武學教諭。明年，除博士。宋重儒臣之選，右科爲博士自時興始。終知南雄軍。

黃石孫 淳熙十四年中武舉。丞相趙汝愚見其姿貌魁偉，議論英發，以一世人物許之。以黔陽尉授興州機宜文字，遷闔門舍人。開禧丙寅，朝廷選知兵才望之士護師江澣，與林仲虎同日被命，累知高郵軍。

林仲虎 兄仲麟，見縉紳。仲虎，慶元二年以武舉魁漕選及廷試。嘉泰初元，檢詳林楠使虜，辟爲屬，虜邀私覲，仲虎力辯不屈。開禧間，以禮部侍郎李壁充賀生辰使，仲虎復副之。既渡河，或傳有變，衆

惶惑，仲虎條三策：「不爾，有死而已。」後卒無他。虜廷賜宴，值宣仁后忌日，仲虎辭飲，虜不能奪。歸言：「樂因循者，狃於私意，銳進取者，病於寡謀。爲今之計，當重發而必成，不可輕出而苟且。」疏奏，忤用事者，出守浮光。時虜圍和州，馬帥戚繼光與仲虎不協，徑自歷陽移戍采石，仲虎以主人護江力請於朝，乞令司馬策應。得強弩千餘人應援，虜遁去。有《百將詩》及《出疆酬唱集》。

孫應龍 開禧元年應武舉，廷試時，大臣始開邊隙，策士及之，應龍對，首以「兵興啓釁，輕舉妄動」爲言。有司奇之，欲置首選，或詆其不合時好，猶居鼎魁。歷官五典邊郡，一總戎輅，深爲魏了翁所重。

姚望之 寶慶二年武舉，從軍京口，會恢復三京，趙葵辟爲幫書都錢糧官。王師抵汴，乘勝復西京，望之以汴河糧運不繼，請休養士卒，濬治池堞，以備不虞。未幾，歿於王事。

元

袁天祿

以武功薦授主簿。至正十七年，擢本州同知。屢獲大功，官至江西行中書省參政，不之任，惟圍義兵守州境。至正十八年，太祖親帥師取婺，天祿知天命有在，納款降。賜書褒譽。

皇朝

劉天俸

劉天俸者，謝福寓也。嘉靖中，爲劉都督顯贊男，因改姓名。以武生從征倭浙，直搗徐明山、汪五峰賊壘。繼勦張璉賊於江廣，殺倭於興化，鏖山賊陳明光於尤溪。隆慶中，以總旗攻打貴州阿洛堡四樓寨、二層岡、并壩陽、愷孟、響洞、慨憐等處蠻獠，又征勦四川九系都、凌霄城、都都寨、貓兒巖，追斬蠻王阿富，

生擒酋惡阿甲、阿飄。萬曆中，以守備征勦建昌宰裸鐵口叛番。仕終四川行都司指揮使司都指揮。

何子曰：宋有右庠以養武士，其求士則有武科。我朝絀矣，惟世胄之爲重，士繇武科舉於鄉者，一不中會試，去之如平民。比者稍重進士選，而三舉於鄉者，亦得赴會試矣。文士遠遼尺寸，不失爲賢公卿大夫，而武士自非一心忠義，安能忘軀捨妻子，視死如歸哉？然而智勇之士，身名俱全焉。子曰：「必也，臨事而懼，好謀而成」者也。

贊曰：越六千人，名君子軍。韎韐附注，其稱亦云。躑躅跳躍，旣鼓舞、賁。沉鷺周詳，不墮妖氛。道先致身，義不後君。恍恍桓桓，奕世令聞。

〔校記〕

- 〔一〕「英舊志弁輪」，各本原作「弁輪志」，據本書體例改。
- 〔二〕「懷安故縣 連江縣 永福縣」十字，各本原脫，據本書體例補。
- 〔三〕「閩縣」二字，各本原脫，據本書體例補。
- 〔四〕「懷安故縣」上，各本原衍「福州府」三字，據本書體例刪。
- 〔五〕「連江縣」上，各本原衍「福州府」三字，據本書體例刪。
- 〔六〕「永福縣」上，各本原衍「福州府」三字，據本書體例刪。
- 〔七〕「南安縣」三字，各本原脫，據本書體例補。

〔八〕「晉江縣」三字，各本原脫，據本書體例補。

〔九〕「南安縣」上，各本原衍「泉州府」三字，據本書體例刪。

〔一〇〕「甫子葵」，〈黃甫傳〉及本傳作「甫子葵」。

〔一一〕「甌寧縣 建陽縣 崇安縣 浦城縣 松溪縣」十五字，各本原脫，據本書體例補。

〔一二〕「建安縣」三字，各本原脫，據本書體例補。

〔一三〕「甌寧縣」上，各本原衍「建寧府」三字，據本書體例刪。

〔一四〕「建陽縣」上，各本原衍「建寧府」三字，據本書體例刪。

〔一五〕「崇安縣」上，各本原衍「建寧府」三字，據本書體例刪。

〔一六〕「浦城縣」上，各本原衍「建寧府」三字，據本書體例刪。

〔一七〕「松溪縣」上，各本原衍「建寧府」三字，據本書體例刪。

〔一八〕「將樂縣」三字，各本原脫，據本書體例補。

〔一九〕「南平縣」三字，各本原脫，據本書體例補。

〔二〇〕「將樂縣」上，各本原衍「延平府」三字，據本書體例刪。

〔二一〕「武平縣 清流縣 連城縣」九字，各本原脫，據本書體例補。

〔二二〕「長汀縣」三字，各本原脫，據本書體例補。

〔二三〕「武平縣」上，各本原衍「汀州府」三字，據本書體例刪。

〔二四〕「清流縣」上，各本原衍「汀州府」三字，據本書體例刪。

〔二五〕「連城縣」上，各本原衍「汀州府」三字，據本書體例刪。

〔二六〕「仙游縣 興化故縣」七字，各本原脫，據本書體例補。

〔二七〕「莆田縣」三字，各本原脫，據本書體例補。

〔二八〕「仙游縣」上，各本原衍「興化府」三字，據本書體例刪。

〔二九〕「興化故縣」上，各本原衍「興化府」三字，據本書體例刪。

〔三〇〕「泰寧縣 建寧縣」六字，各本原脫，據本書體例補。

〔三一〕「邵武縣」三字，各本原脫，據本書體例補。

〔三二〕「子蘭」，下文作「子淵」。

〔三三〕「泰寧縣」上，各本原衍「邵武府」三字，據本書體例刪。

〔三四〕「建寧縣」上，各本原衍「邵武府」三字，據本書體例刪。

〔三五〕「長泰縣 海澄縣」六字，各本原脫，據本書體例補。

〔三六〕「漳浦縣」三字，各本原脫，據本書體例補。

〔三七〕「長泰縣」上，各本原衍「漳州府」三字，據本書體例刪。

〔三八〕「海澄縣」上，各本原衍「漳州府」三字，據本書體例刪。

〔三九〕「福安縣 寧德縣」六字，各本原脫，據本書體例補。

〔四〇〕「福安縣」上，各本原衍「福寧州」三字，據本書體例刪。

〔四一〕「寧德縣」上，各本原衍「福寧州」三字，據本書體例刪。

閩書卷之一百二十五

英舊志 關柝

福州府 閩縣 侯官縣 長樂縣 福清縣(二)

閩縣(二)

宋

曾升 周勣

曾升 以人粟補吏。靖康中，部士卒戍楚州，至昭信縣，與金人合戰，奮前死，昭信賴以全。事聞，贈五官，與一子恩澤，廟祀之。

周勣 張浚帥福建，辟爲幕官。時趙鼎貶潮州，人莫敢相顧，勣獨沿檄往明州，爲挈官，寓居福之外邑，坐貶封州。

元

張良材

張良材 尉貴溪，有武勇。壬辰之亂，集義兵保障一邑。一夕，賊大至，圍營數重。良材馳匹馬，揮

雙刀前殺賊，伏尸二十餘里，境土以固。自後，以兵巡邏，遇敵誘人采阻，伏發兵敗，殺其數人，馬驚死之。

皇朝

林祐 吳復 黃寧 周恂 蘇夢陽

林祐 十歲刲股愈父。弱冠，憲司奇其材，召爲掾。事官長，治獄訟文書，未嘗任苛刻。民坐出私物貿易海外，繫獄蔓延，祐曰：「長官直之。」長官執不可，祐不懾威勢，力辯以免，卒不自言。永樂初元，例召京師，從豐城侯出鎮江西。還，選入內府，授寶鈔提舉，陞通政司經歷、驗封司郎中。宣德初，告省先墓，賜鈔，給驛舟，寵異之。祐歷官皆在內府，供事三十餘年，小心謹慎。性剛直，不存城府，與人交重然諾，尚氣義。朋友有過，聞必斥之，既帖服能改，即待如初。赴人急難，死喪雖捐資財，無所靳，近水火，不退轉。鄉前輩若黃中美、王孟陽、高廷禮、陳仲完、林巡，皆與交好。

吳復 永樂間知印，授太平府豐濟倉大使，擢海鹽簿，改吳縣，以才擢其令。歷工部郎。景泰初，起拜通政，轉工部侍郎，遣治河決。還報稱旨，命督易州柴炭廠。天順七年，以老乞骸，易州吏民詣闕奏留。復屢上疏，屢爲所留，乃乞歸省墓，朝廷知其意，下其前章，遂得謝。大學士李文達爲文贈之。

黃寧 宣德十年以掾丞奉化，勤儉有威，不自營地。令有欲爲未就者，悉爲就之。參政俞士悅行縣清軍，見其冊籍整叙，大加稱賞，布式諸郡。

周恂 正統中丞雲和。先是，閩寇作耗，騷動本邑，恂統率民快勦絕其害，百姓安業。

蘇夢暘 萬曆中爲南刑司獄官，聞前官有孫一謙者，善其職，遂踵一謙所爲，稽察撫恤，戢獄卒毋患苦諸囚人，料囚未有餘，白諸曹郎，請爲櫟以待死者。未幾，轉粵東吏目。去時，署尚書者，大中丞丁公寶，知夢暘貧，資遺甚厚。郎中沈琬，指獄戶曰：「此故生地獄也。蘇司獄去，吾不敢繫人矣。」

侯官縣〔三〕

皇朝

胡鼎

胡鼎 洪武間游鄉學。既爲掾，與諸從吏不能頡頏與寧，歸，遂不復出。後憲府謀辟從事，諸從吏相顧言：「宜如胡掾。」乃來羅致鼎。鼎隸府潔修，嘗從孫僉憲分司泉州，孫貪殘莫禁禦，鼎飛章劾之，孫竟得罪。諸長佐每視鼎，盱眙曰：「斯吏胸藏陽秋，其可犯乎？」滿考，內叙得爲光祿署丞。進止有常，儀觀清偉，青官嘗遙見，問左右，知其官，日送咨美之。

長樂縣〔四〕

宋

陳伯嘉

陳伯嘉 紹興中以軍功任太和縣西平山巡檢，累平凶盜。卒，民廟祀之。

皇朝

陳日光

陳日光 成化中海豐丞。邑僻習玩，前政姦豪不戢，日光始振飭之。既去，邑人立石紀績。

福清縣(五)

皇朝

蕭福 陳璣 陳用明

蕭福 永樂元年典史樂安，清慎有爲，擢人爲御史。

陳璣 縣吏員授進賢縣倉大使。正統間，侍郎趙新薦知高安。長才濶略，應酬如響。先是，邑之遠民不附，璣示以恩信，弗率者繩之法，境內翕然。

陳用明 弘治間以知印授金壇巡檢，郡檄築堤備旱澇，受事精勤，邑人德之，擢主簿黃梅。正德間，棄官歸。嘉靖改元，銓部召用，辭不赴。用明雖起刀筆，天性好義，林中丞、高憲副撫定亂軍，用明與焉。貧居委巷，達官貴人每訪其廬。

泉州府 晉江縣 惠安縣 安溪縣 同安縣 永春縣(六)

晉江縣(七)

宋

周強宗

仕承信郎。母病幾危，剗股救療，母遂平復。真文忠守泉，請赴州，賓禮之。

元

龔名安

龔名安 至正中辟宣慰司差，奏事京師，丞相奇其才，擢上田縣尉，（△）遷潯美場鹽官管勾，再遷泗洲場司令。時西域那兀納據泉，炮烙州人，殺戮慘酷。福建行省奉兵部辭討之，從間道付名安檄，使其募兵海濱。那兀納聞之，亦迫民爲兵，以拒來討。名安俾海濱民佯許之，遂命其子泉州學正炳、婿行省理問張仁等，率舟師次東山渡，翌日大豎行省旗幟於舟中，併豎那兀納所迫招民兵舟，那兀納不戰自潰，一時海上賴其保障。

皇朝

蕭景腴 陳一道

蕭景腴 以掾授定遠尉。定遠經大盜殘蹂之後，百姓流離。景腴與令弔死問孤，修城鑿池，身先畚鍤。以憂去，服除，補長洲。時織造太監張志聰恣睢橫索，長洲令郭波持法挫之。志聰忿甚，誣令撓御造龍衣，執而倒曳之車後。景腴聞之，領所部弓兵，奪迫直前，手批志聰，落其帽。市民從旁觀者，盡爲景腴張氣，梯屋飛瓦，群擲志聰。志聰阻折去，竟奪令歸。志聰還訴世廟，有旨械下詔獄。時令已先擢人爲工部主事，亦與景腴并下鎮撫司拷訊。廷臣壯其義，會疏救之，令落五級，而景腴仍調尉永從。吳廷舉巡撫吳中，爲景腴立「伏羲英風」之碑，碑於長洲之縣門。孫騰鳳，舉進士，浮沉守令間，後擢兩淮運使，洗手治

鹽策。騰鳳書學黃魯直，詩似眉山，所著有《天倪子》。

陳一道 掾也。嘉靖三十一年，爲蕪湖丞，邑有劇賊黃岳行劫湖、湘、漢、沔間，歸，以其所劫物列肆坐販，與商賈無異。一道計擒之，除其黨。三十四年，江南倭自浙流劫入歙，諸縣無有能阻者，至南陵，遂入之。時軍門檄諸縣領兵赴援，比援兵至南陵縣東門，賊至，伸手接我兵所射箭，我兵皆愕眙潰。獨一道所率，盡蕪湖驍健，遂麾衆獨進。他援既潰，一道遂亦爲賊所殺，蒼頭僕子義橫身捍刃，亦死之。事聞，贈天府通判，子義府經歷，蔭其子宗堯入太學。一道在家，習書史，蒞官勤業，禮賢好問，恂恂如儒生，無復胥吏氣。

惠安縣（九）

皇朝

張祖

張祖 建文時，以憲吏人都考，人格，留爲吏部吏。其時，建文君方與方孝孺輩講求治古經濟之事，多變太祖舊章，章奏下吏部旁午，祖爲尚書張統所信愛，密言於統曰：「高皇帝起布衣，有天下，立法創制，規模遠矣。紛然更改，未必勝前，徒滋人口，願我公重之。夫爲治，亦顧實効何如耳。」統深然之，而奪於群議。時添設京衛知事一員，佐經歷理刑名，詔吏部選可者，統曰：「無逾祖矣。」授留守知事。成祖卽位，除罷建文所置官，出祖爲湖州安吉丞，居九年，有治績。統被譴自經，昇戶歸，屬吏無敢往視，祖日經理其殯，殯畢，哭奠去。

安溪縣(一〇)

皇朝

李森

李森 慷慨樂善，以貲豪里中，出貲爲郡邑興治，修建甚多。天順中，應詔出粟二千石賑濟，得旌爲義民。沙、尤寇掠泉界，募死上掩擊，擒其酋長。兵部上功，授漳州巡檢。復調安溪源口司。

同安縣(一一)

皇朝

楊舜

楊舜 弘治中以掾任上高典史，懲治豪猾，清白自將。署縣篆二年，俸資外悉無取。屢引疾乞身，當道不舍，懇求至泣下，乃可之。每遇萬壽節，衣冠望闕拜賀。武廟崩，憂詔至，製服哭臨於祠堂，盡哀三日。作祠堂，置祭田，率族人以禮祭祀，皆可爲法。

永春縣(一二)

皇朝

黃永

黃永 少充邑庠生。洪武中，通學諸生，許奏教諭，被逮至京，悉革爲民。永時髫年，得發戶部充吏，因典簿書，習法律，部尚書奇之，以人材舉授本部主事。陞員外郎，出爲寧波知府，以最調守湖州。歲饑，設法賑貸，以餘閒修水利，歲豐倍人。復調廣信，勤民苦節，終始不渝。致仕歸。永起家掾曹耳，爲郎爲守先後計二十七年，蓋國初之重人任如此。玄孫光昇，光昇子喬棟，并見縉紳。

建寧府 建安縣 甌寧縣 建陽縣 崇安縣 浦城縣 松溪縣（一三）

建安縣（一四）

唐

許忠

許忠 唐末爲威武軍都巡檢使，屯兵福清，以備寇盜。黃巢陷福州，忠與決戰，大破之。明年，卒。民思其功，爲立祠。

皇朝

賀煬

賀煬 老人也。天順間言四事：「一，縣令之職，民生休戚所繫，卽令銓授多年老監生，有近六十歲者，其意豈不以已逮滿九載，年幾七十，非惟高顯陞擢所不敢覬，抑且吏部勒令致仕，有所不免。曷若索金銀爲子女計，縱獲罪罷職，亦不失爲富翁。此所以貪酷庸懦者衆，廉能仁惠者少。宜勅吏部，今後縣令

必於進士、舉人、監生年少壯富者，試有才能銓選，及令方面御史廉訪屈在下僚，并山林隱士才德勝任者，薦舉。一，景泰間，錄先賢顏、孟、程、朱嫡長子孫，授以翰林博士，俾奉祠祀。然徒有官而無俸祿，其於仕必有祿之義，似爲有欠，宜各給以本秩俸祿，并所應得隸卒。一，景泰間福建按察司僉事呂昌奏准以忠肅公黃榦、文簡公劉燾、文正公蔡沈、文忠公真德秀四子配享朱文公祠，然告文中未附四子配享之詞，宜勅諭翰林院增入。一，預備義倉之設，將以廣儲積，賑貧民也。奈何豪猾大戶，往往冒名代借，連年拖欠，以倖恩宥，是致義倉空虛，有名無實。乞令出粟義民，各疏里內饑民姓名，同委官開倉給放，西成之日，仍令催督還官。如此，則豪戶免冒借之弊，而義倉無空虛之患。」下禮部議行。

國寧縣〔一五〕

皇朝

童承綸

童承綸 事繼母孝。爲掾，讀書不輟，人笑之曰：「何不讀律？」承綸曰：「讀律不讀書，譬如屠子操刀耳。」尉都昌，捐俸賑民。鄱陽水，承檄開濬河，工告成，民祀之。

建陽縣〔一六〕

皇朝

江景

江景 成化中廣東長樂典史。歲壬寅，署興寧縣。流賊犯縣城，景與民固守，大戰於水關口，又戰於西門擁秀樓，賊遁去。

崇安縣（一七）

皇朝

范僑

范僑 倜儻有果斷，好讀古史，喜品藻人物。嘉靖初，從事督府，授瓜步司巡檢。以功擢信陽簿。優調博羅。剛介自持，歲取給於家。以母老，求歸養。居鄉，好義有聞。

浦城縣（一八）

皇朝

吳年

吳年 以掾丞文昌，堅持清介，搜剔弊端。暹邏國有舟漂至，衆以爲盜，年審詢之，其國所舉士也，齎糧送歸。丁外艱，補樂清。至時，縣人以資易之，久則皆信服。嘗鞭笞吏，謂：「吾故嘗爲吏，當如是如是，乃如是耶？」皆心服。亡何，徙爲王官，民相與泣留之，時有藩臬使者行部至，聞誼聞聲，問狀，驚歎，然莫可留矣。

松溪縣(一九)

皇朝

夙道暹

夙道暹 素以孝義見推鄉里。景泰初，強賊攻縣，道暹奉檄詣巢撫諭，生擒賊首二十餘，招撫民人千餘家。天順末，流賊劫縣境，復奉檄招募，自輸糧餉，竭力隄備，斬獲賊首張記等，境內以安。鎮巡上功，授本縣巡檢。

延平府 順昌縣 尤溪縣(二〇)

順昌縣(二一)

元

徐賜

徐賜 爲汀州路掾史，屬武平縣有倖殺人，坐囚繫者衆，賜承檄拘衆立庭下，詰之，一僧錯愕失次，就訊鞠之，果殺人者，衆獲釋。遷建寧西安巡檢，時寇發，民多流徙，賜勦戮渠魁，餘黨順服。陞寧德簿，白部使者，爲民減增課官鹽，民戴其德，相與碑頌之。後以延平路推官致仕。

尤溪縣(二二)

皇朝

田濡

田濡 正德間授處州衛經歷，剛毅持重。武廟南巡，逆彬檄諸衛以遼、金二書進，衛無以應，擬贖金軍士以貨使者，濡獨不肯。遭繼母喪，徒步歸，經腫血流，葬廬墓側，以哀痛終。子頊，見縉紳。

汀州府 清流縣 連城縣(二三)

清流縣(三四)

皇朝

魏得禮

魏得禮 正統時爲老人。沙寇作亂，賊將陳正景執縣令呂鏞，欲殺之。得禮激義請代，遂俱遇害。嘉靖間，學使邵銳以配祀鏞祠。

連城縣(三五)

皇朝

李元豐 李根

李元豐 讀書好義，從例於布政司承差。正德七年，武平掛坑寇作，元豐奉憲檄，隨令蔣璣攻討，轉

戰不利，遂與璣同執。元豐強挺罵賊，既與璣密謀進兵，賊知而殺之。事聞，官其子七品散官，補其弟元用爲承差。鄉人像祀之忠惠祠，而以同時死者府掾童杞，邑民江環、俞世旺、李賤生數人附焉。

李根 祖元瑫，見縉紳。根任歸順州尉，有才識。時叛目蘇大信、王盛等殺其州主，根奉檄委緝，卽領兵往田州，生擒大信、盛等數十，餘黨解，止殺戮，一時狼狽寧靖。陞東莞簿。

興化府 莆田縣 仙游縣(二六)

莆田縣(二七)

宋

方喜 龔珀

方喜 字良翰，提舉臨之孫。辟燕山工曹掾。燕雲陷，虜令一時陷沒者悉易告身。喜南望霄涕，取出身文字焚之，惟留承奉郎告置衲衣中。久之，稍稍給與講好，虜爲弛防，因變姓名，携蒼頭問道歸。蓋在燕十九年矣。守以聞，得旨特轉一官，改差泉州監稅。後通判廣州，終於官。

龔珀 初爲泉州銅場從事，調福建提舉司屬官。父疾，不解衣帶，不人房闥。連丁家艱，廬墓六年，日食鹽菜而已。婦病，還舍，命醫自闔外視之，戴星還山。莆之善居喪，自鄭閩清燴後，鮮有及之者。

薛鸞 陳公福 朱鍵 應元

薛鸞 父元鼎，官左史。鸞辟而孤，母鄭携依外家。至元中，值亂，失母所在，號泣禱神，裹糧出訪，得母無恙。已，以貧故，勉受鈔庫使，尋以母老辭。母喪，服闋，遂不復仕，號鐵耕道人。

陳公福 繇路吏累官德縣尹，有息盜安民功。

朱鍵 憲吏也。以學行歷薦，官至龍巖縣尹，有捕盜安民功。

方應元 隋泉州長史叔達後。家貧爲吏，烏古孫良楨爲泉州推官，器應元，使典刑曹。盡心獄事，有乖法典，輒蹙額不寧。尋爲南安縣蘆溪司掾，民毒溪以漁，人飲溪流多誤死，巡檢劉萬松使應元撰文諭之，應元操觚立就。一旦棄去歸家，晨起，見有一夫號凍遠道中，解衣衣之。立春，鞭土牛，聞郡聚觀，隸人執鞭疾驅，衆皆辟易，一兒仆地，人爭踐之，應元力捍蔽，抱兒歸父。是夕，其幼子槐生出，遇奔馬，急趨蹶道中，馬躍過，無毫毛損，人謂救兒之報。槐生，見皇朝縉紳。

皇朝

張聰 楊殖宗 朱慶 周末鏞侄典章（二八）黃慶 陳頡 張志哲 魏時敏 朱諫 吳孟謙
鄭燉 方譽 鄭珏 吳煒 雍汝和 鄭際 曾奇瑞 陳景弼 陳祚 林文煥 林渠 卓鍾綸 鄭大機 陳鎰 周爲邦

張聰 永樂間任徽州府經歷，贊畫有方，嚴簿書，慎法律，上官賢之。

楊殖宗 吏也，初任青田典史。景泰初，盜作，率民兵守黃壇，邀賊歸路，殺獲無算，陞主簿。後析置景陵，擢爲知縣。制服豪強，撫綏良善，勤儉明敏，綽有賢聲。官至金華同知。青田人首祠名宦。

朱慶 吏也。景泰元年，任武義縣主簿，勤政恤民，民咸愛之。

周末鏞 宣德間以稅家子應辟，從事薇垣。讀書能文，喜彈琴，游諸公間。仕南京錦衣衛知事。堂侄典章。

典章 吳橋主簿，自號小溪主人。比人仕，嘗著《夢梅解》自見。有《夢草詩集》，趣韵清婉。

黃慶 初爲郡庠生，以誼誤謫都察院都吏。讀書能賦，有治才。時營造，充委官採辦木植有功，授本部營繕主事。歷禮部主客郎中。

陳頡 以藩司吏辦部事，三使西域，賜賚優渥，擢戶部照磨，大有聲稱。學士林文銘其墓。

張志哲 丞繕雲、卽墨二縣，有惠政。歸家貧甚，無怨。能詩。以壽終。

魏時敏 謁銓時，太宰尹旻聞其能詩，試之，大加稱賞，遂得無錫丞。復改桃源，致仕。與莆中諸縉紳相唱和，有《竹溪詩集》二卷，黃仲昭、方岳爲序。

朱諫 歷烏程、宿遷二丞，有最聲。

吳孟謙 家貧，爲府小吏，峻潔端嚴，同列莊之。弘治三年，丞順德，民供折薪錢，嘆曰：「丞何功受此？」番禺後山之役，奉檄轉餉，盤運久，多沮損，孟謙自以俸償，人無知者。尋卒於官。庶吉士鄒智諫之曰：「君裳蕭疏，君貌嶮嶮。公庭如寺，詩思如水。」李承箕志順德，傳之廉吏。

鄭燉 主簿樂平，有善政。鄭紀銘其墓。

方譽 以邑庠生充吏，任欽州長墩巡檢，致仕。林俊爲贊曰：「殷敦夏彝，古物存焉。周行曠徑，時命屯焉。孰速歸來？鳥飛倦焉。委分全真，卿邦勸焉。」

鄭珏 龍泉典史，居官廉能。

吳煒 以掾任易州同知，蒞官廉潔，居家孝友著聞。

雍汝和 掾也。正德間，提舉雲南，力御安鳳之變，死於黑鹽井，民祀之。

鄭際 臨清州同，剛直能詩。

曾奇瑞 鄧州同知，寬簡慈靜，官久不懈，政有不便，悉論更之。

陳景弼 弘治間省祭，先後上疏十餘，皆切時政。後授潮州衛知事，署海陽、饒平二縣，愛惜民財，不畏強禦。有給事中以使事過里，譴貨亡厭，率衛卒發其橐，送其贓物於府庫，時論壯之。子宣，官教諭。孫一魴，進士。

陳祚 正德間爲廣西古田典史，與賊戰沒，贈主簿，蔭一子。

林文煥 正德間仕朝城丞，妻孥常苦不飽。撫按察其廉，先後委掌東嶽香幣，不持一緡。歲饑，集餓者粥之，分日膳。築學宮，而撤非祀之宇，以佐材具。越月，殿廡齋廊煥然一新。居數年，棄官，賣卜還。

林渠 宿州同知，工醫及書。

卓鍾綸 以掾爲巡檢。與賊戰，殺三賊，身被傷。超遷鎮遠府經歷。

鄭大機 嘉靖中以掾丞安仁，廉恕有爲，善撫百姓。鄰界大洲盜發，副使張九功督兵捕之，大機謀畫居多，所過秋毫無犯。歷任九載，楚人稱良幕。

陳鏞 嘉靖間仕雲和典史，廉靜好學，居官公恕勸民，爲善節愛，出於至誠。遇士夫，與析義理。公餘，訓誨童豎，多所開發。後以直言忤當道去任，恬然就道。

周爲邦 以掾爲恩縣典史，醇孝清勤。去日懸橐，上庶鳩金爲助，哀號奔送，車不得行。

仙游縣〔二九〕

皇朝

李馭 丘聲甫

李馭 通州判官，有政績。

丘聲甫 石城主簿，有才能，善禦盜。

漳州府 龍溪縣 漳浦縣 南靖縣 平和縣〔三〇〕

龍溪縣〔三一〕

宋

鄭枬

鄭枬 政和初應選，補武學生。時募良家子從軍，枬往鄜延路總管劉延慶軍投用。赴大理河，與西夏接戰，多斬首虜，功補承信郎。賊平，授汀州黃土寨巡檢，捕獲王猪奴賊，辟興化軍吉了寨巡檢。黃土兵黃勝等叛，復以枬權巡檢，勝素懾枬威名，閉寨自焚。宣和七年，金虜寇邊，枬赴樞密院自陳，乞發赴河北軍前任使。累立戰功，轉至修武郎。時召河北兵馬入京守禦，靖康元年，虜逼都城，枬爲四門都巡檢，

領兵救亂，力戰死之。紹興初，劉光世請於朝，授其子綸承信郎。

元

黃榮

黃榮 善鈎貫兵書。至正間，畚寇李志甫攻城，輯義勇平之，授神山懷安大使。秩滿致政。賊復出，榮率鄉人立柵保界。分省策功，終不就命。

漳浦縣〔三二〕

宋

林昌業

林昌業 博覽典籍，精究術數。嘗爲泉州軍事衙推，老而退居本縣羊額山之陽，鄉里宗敬之。

南靖縣〔三三〕

皇朝

辜添敬

辜添敬 正統中老人。以戢盜功，命爲古雷巡檢，賞鈔二百貫。

平和縣〔三四〕

皇朝

曾椿

曾椿 好義，有幹局，樂施予，事繼母孝。縣治初設，城池諸役并椿董建。署漳汀巡司，賊不入境。爲倉藏，私粟時發以賑。蘆溪頑民，戒之勿盜。次年歲凶，饑民聚黨，擅開社倉，相顧指椿倉曰：「此義倉也，無犯之。」

福寧州 寧德縣(三九)

皇朝

阮宗澤 周聘 游安 雷德宏 李焯

阮宗澤 任濱溪白牛寨巡檢，以州尹令率兵禦寇南屏，至古縣遇賊，力戰死之。

周聘 以掾爲瀾山丞，攝望江縣事。俸金外，他無取。布政使胡鐸、按察使張峩，夜被盜劫入賊舟，漏三鼓矣，聘聞，率民快十餘人馳拯之。民間聘往，盡蜂至。賊窮走，因取胡、張還。

游安 貧爲人傭，謂其侶曰：「作勞如此，豈活計耶？」其侶戲之曰：「何不去爲官？」安曰：「亦人做耳。」遂折耘具，去爲州從事。人京選閩官，改倉官，陞巡檢，以能聞。

雷德宏 以掾授河源主簿。福安有一吏死京師，其婦欲歸，無可仗者，時德宏謁選將行，衆請附之，德宏曰：「少婦也，不可。」婦大慟哭，宏買一婢，伴之歸。

李焯 以掾丞臨高，有才操。攝崖州事，去後見思。

寧德縣〔三八〕

皇朝

黃文莊

黃文莊 陽春典史，與征勦羅旁有功，與朝命之賞。

何子曰：古人云：「燕雀安知鴻鵠之志哉？」夫鴻鵠亦安知燕雀之志哉？鯢鵬、斥鴳，各有適耳。卑秩小吏，而蘊蓄不朽之心，自喻適志也。夫如是，則與公卿大夫奚讓焉？

贊曰：古有賢人，隱在下位。田或有龍，姜不棄悴。自喻適志，攸攸遂遂。不畏於天，崇腆斯媿。

〔校記〕

〔一〕「侯官縣 長樂縣 福清縣」九字，各本原脫，據本書體例補。

〔二〕「閩縣」二字，各本原脫，據本書體例補。

〔三〕「侯官縣」上，各本原衍「福州府」三字，據本書體例刪。

〔四〕「長樂縣」上，各本原衍「福州府」三字，據本書體例刪。

〔五〕「福清縣」上，各本原衍「福州府」三字，據本書體例刪。

〔六〕「惠安縣 安溪縣 同安縣 永春縣」十二字，各本原脫，據本書體例補。

〔七〕「晉江縣」三字，各本原脫，據本書體例補。

〔八〕「上川縣」，當誤。

〔九〕「惠安縣」上，各本原衍「泉州府」三字，據本書體例刪。

〔一〇〕「安溪縣」上，各本原衍「泉州府」三字，據本書體例刪。

〔一一〕「同安縣」上，各本原衍「泉州府」三字，據本書體例刪。

〔一二〕「永春縣」上，各本原衍「泉州府」三字，據本書體例刪。

〔一三〕「甌寧縣 建陽縣 崇安縣 浦城縣 松溪縣」十五字，各本原脫，據本書體例補。

〔一四〕「建安縣」三字，各本原脫，據本書體例補。

〔一五〕「甌寧縣」上，各本原衍「建寧府」三字，據本書體例刪。

〔一六〕「建陽縣」上，各本原衍「建寧府」三字，據本書體例刪。

〔一七〕「崇安縣」上，各本原衍「建寧府」三字，據本書體例刪。

〔一八〕「浦城縣」上，各本原衍「建寧府」三字，據本書體例刪。

〔一九〕「松溪縣」上，各本原衍「建寧府」三字，據本書體例刪。

〔二〇〕「尤溪縣」三字，各本原脫，據本書體例補。

〔二一〕「順昌縣」三字，各本原脫，據本書體例補。

〔二二〕「尤溪縣」上，各本原衍「延平府」三字，據本書體例刪。

〔二三〕「連城縣」三字，各本原脫，據本書體例補。

〔二四〕「清流縣」三字，各本原脫，據本書體例補。

〔二五〕「連城縣」上，各本原衍「汀州府」三字，據本書體例刪。

〔二六〕「仙遊縣」三字，各本原脫，據本書體例補。

〔二七〕「莆田縣」三字，各本原脫，據本書體例補。

〔二八〕「侄典章」，《周末錄傳》作「堂侄典章」。

〔二九〕「仙游縣」上，各本原衍「興化府」二字，據本書體例刪。

〔三〇〕「漳浦縣」南靖縣「平和縣」九字，各本原脫，據本書體例補。

〔三一〕「龍溪縣」三字，各本原脫，據本書體例補。

〔三二〕「漳浦縣」上，各本原衍「漳州府」二字，據本書體例刪。

〔三三〕「南靖縣」上，各本原衍「漳州府」三字，據本書體例刪。

〔三四〕「平和縣」上，各本原衍「漳州府」三字，據本書體例刪。

〔三五〕「寧德縣」三字，各本原脫，據本書體例補。

〔三六〕「寧德縣」上，各本原衍「福寧州」三字，據本書體例刪。

閩書卷之一百二十六

英舊志 韋布

福州府 閩縣 侯官縣 懷安故縣 古田縣 閩清縣 長樂縣 連江縣 羅源縣 永福縣 福

清縣(二)

閩縣(三)

唐

林謂

林謂 善屬文，養高不仕，搜掇異聞，作《閩中記》十卷。廉帥李貽孫重之。

五代

陳貺

陳貺 隱居石門巖，種芋、菜、筍爲糧，有餽之米者，必答以所種，使相當。隱廬山三十年，南唐主東帛聘之，貺人見，布裘鹿輦，進止雍容，因獻《景陽臺懷古詩》，南唐主稱善，欲授之官，固辭，遣還舊隱。

宋

黃晞 劉渙 劉藻 李樗 曾逢震 鄭文通 林洪範 陳若冲 余咸熙 黃六有

黃晞 以書自喜，不苟於人。蔡襄稱其「高世懷道之士」。趙叔平內翰薦之於朝。

劉渙 字孟潛，太子洗馬仲甫之孫。隱釣北溪之上，歌詩自娛。元祐中，鄉人千餘薦之郡守許懋，乞應逸民之詔，懋聞於朝，渙力辭不就。子達夫，見縉紳。

劉藻 字昭信。與王晉、任文薦同以《禮》學稱。亦嘗解《易》，有曰：「見險而止爲《需》，見險不止爲《訟》。能通其變爲《隨》，不能通變爲《蠱》。」

李樗 字若林。與林之奇俱受業於呂本中，後領鄉貢。其學以孝弟忠信、窮經博古爲主。及門之士，往往渾厚質實，志尚修潔。黃幹稱之曰：「吾鄉之士，以文辭行義爲後進宗師，若林其傑然者也。」有《毛詩註解》。學者稱迂齋先生。

曾逢震 字誠叟。從朱文公學，胸中煥然，洞見道體，經史百家，無不窺究。隱居道山，家事有無，不問也。嘗自編錄其詩文，名《林醜鏡》。

鄭文通 字成叔。嘉泰甲子貢士。朱文公嘗命編次喪禮。著有《易學啓蒙或問》、《春秋集解》、《喪禮長編》、《庸齋集》等書。

林洪範 博通經傳，屬文宏麗，構思敏捷。著《諸經義方》數十卷。

陳若冲 字德用。以經學詞章爲汪彥藻、柳彥質、李邴、趙鼎所知。自號樂全。所著有《藍溪集》。余一作俞。咸熙 性尚凝簡，應舉不利，閉戶窮經，潔道自植。有文集十卷。

黃六有 宋末游太學，爲諸公貴人重客。逢世大亂，貧不自活，携二子行五百里，教學代耕。暇則歷

訪先賢講習之所，借書吟誦，著述不休。聞有好善遺世者，雖窮途懸崖邃谷，必杖屨求見。謝枋得與善。

元

方伯載 林霆 吳鑒

方伯載 幼登陳忠肅公門。強記善問，落筆皆英氣。薄科舉程文，而喜爲詩。元制，典人十等：一官、二吏、七匠、八娼、九儒、十丐。人間伯載：「何不爲程文應選？」哆頤而笑曰：「吾人品豈在娼之下、丐之上乎？」（三）吾將逸民，超然十等人外。」

林霆 嘗作《致日經》，推陰陽曆數，以資占決。金華吳萊有詩贈之。

吳鑒 工文詞，簡潔清新，一時推重。

皇朝

邵京實 鍾耆德弟明德。 吳海 陳週孫焯。 林枝 林清 鄧定 鄭闕 鄭愷 林觀六世孫世璧。

高昇 林焯 林燁 林宅賢 鄭靜夫 鄭天挺 黃用中 徐燾 陳薦夫

邵京實 字仲堅。務學尚隱，與葉鉞、林玉、鍾耆德、明德、任宗仁、林延孫、吳忠皆道誼交，有過從，卽相與唱和，詞音清雅，一時推重。

鍾耆德 字元長。博極群書，詩文渾雄嚴整。家貧不娶，授徒養親。晚經至正之亂，舊業蕩盡，每恨甘旨。親沒，哀毀幾滅。處二弟順德、明德，怡怡如也。有《自省錄》、《養正集》等書。

明德 字叔達。清詞懿行，與兄齊名。爲邵京實題《山居十六詠》，其《巫頂飛雲詩》云：「白雲飛去山色深，白雲飛歸山色陰。時來時去自今古，山亦無語雲無心。有人結廬占巫頂，白石支頭臥雲影。清

宵雲起隨飛龍，行雨歸來人未醒。」

吳海 字朝宗。在元季以學行著稱。時方繹騷，無仕進意，一時名人如貢師泰、林泉生、藍晦、王翰，皆重之。國初，部使者欲薦於朝，力辭。家居，採摭古今孝子、順孫、節婦、烈女、兄弟之相友、姊妹之相宜者，附以感應禍福，各爲一卷，以貽閭巷，名曰《命本錄》。又著書論楊、墨、佛、老爲《六經》之賊，管、商、申、韓爲治道之賊。欲上之，人悉取其書焚絕之，使天下曉然知正道，慕鄒魯之風。徙居不克，以魯自號。爲文嚴整雅奧，而歸諸理。

陳週 字仲昌。嗜學問，通《春秋》，好爲詩。所居石潭之上，種竹萬箇，結亭栖隱。嘗倚竹而歌曰：「修竹兮青青，中虛兮外直，素節兮貞姿，寒暑兮一色。冷冷風兮朝夕，余舍之兮焉適？」子叔剛、叔紹，俱見縉紳。孫焯。

焯 字文厚，叔紹子也。成化辛卯鄉貢士。性豪宕疏曠，上計不偶，遂勅斷家累，去義谿十里，營桐山居之。鑿池築塢，植梅樹，嘯咏其下。興至，引田父共酌，有携筐筥芹藪來詣者，輒爲大醉。工詩，善草書，達宦貴人求不能得，至具酒脯屬田父、野叟，反得之。晚復棄去，築棲雲，自號棲雲叟。與從弟僉憲桂、林方伯璧等，結秋江夜泛者三十餘年。

林枝 字昌達。工詩文，耽隱不仕。

林清 避元不仕，變姓名匿居山寺。會府公訂冊寺中，見清，詰問，且曰：「能詩乎？」曰：「頗能。」卽以冊號八音命次之，清應聲曰：「金紫何曾一掛懷？石田茆屋自天開。絲竿釣月江頭住，竹杖挑雲嶺上來。匏實曉收栽藥圃，土花春長讀書臺。革除一點浮雲慮，木筆題詩酒數杯。」府公驚羨，遂與爲友，政

暇輒携酒過飲，倡和移日。一日，忽論海濱人物，因曰：「如林清者，雄才實德，惜未見其人。」清不覺有感，府公曰：「公殆是耶？」清曰：「若林君，安得見之？此民所以有感也。」相與盡醉罷。明日，府公物色，無清跡矣。清孫誌，見縉紳。

鄧定 字子靜。洪武初，與兄誠並徵遺佚，誠應聘，定獨不出，削跡東郊，結廬竹嶼。同時名士如王恭、陳亮、鄧誠、陳申，相與詠賡。有《耕隱》二卷。

鄭闕 字公啓。從林鴻爲詩，有聲。

鄭愷 博學，善詞章。詩歌馳騁古淡，頗似金華吳立夫步驟。

林觀 字用賓。洪武中，隱居不仕。善隸書。性厚而直，鄉人化之，皆往質平。卜地葬父母，術者曰：「吉壤也，後當有至公卿者。」觀曰：「野人也，敢望此？若有福，與吾宗共之。」乃取族人火化者瘞其中，凡二十四即周。觀子元美，孫瀚，其後累世至大官矣。

世璧 字天瑞，觀六世孫，而通政參議炫子也。少有俊才，爲歌詩古文詞，任誕自放，一時同縣邵傅、懷安林鳳儀、古田郭文涓、福清王廷欽，皆與游。所著有《彤雲集》。

高昇 字景初。正統間鄉薦，試禮部不偶，即歸隱教授，門下多所造就。性樂易，喜施舍。鄉黨有鬪，不之官訟，輒就昇直。

林焯 正德間人，署書逕丈最佳。

林燁 著《微詞什伍》二十四卷，宇宙名物，罔不羅列。

林宅賢 邑庠生。居合北之滄灣。事父母極孝。家貧，教授里中。兄犯狂易疾，家人厭而閉之，宅

賢自外歸，輒出與飲食，有美味必授七進。〔四〕生平無愠怒之容，人有非理至者，宅賢見之，微露莊容，鄉人交皆曰：「汝莊於林君，是林君有怒也。」

鄭靜夫 郡諸生也。少孤，家貧，所得束修，悉充母甘旨。嘉靖季，邑有倭寇，靜夫負布囊，納神主，奉母出逃。至鳳岡山中遇寇，棄其二子，獨負母。一賊創靜夫右臂，去之。忍痛至水磔橋，既寇大至，索金，見囊空，併欲殺母，靜夫空手衛母，泣告寇：「家貧母老，殺我足矣。」寇刃靜夫右臂，臂落，猶以左肱扶母，尋仆於地。母坐守一夜，靜夫乃死。後賊退，族人收骨葬之。而二子不知死所矣。

鄭天挺 邑諸生也。嘉靖間，倭寇閩，天挺居邑鳳山，母喪在殯，衆出避賊，天挺獨守柩，賊至索金，天挺拜且哭：「貧無金也。所不去者，爲母柩耳。」寇欲舍之，向導者誘令殺之，并焚其柩。

黃用中 字道行。能詩善書，時寫意作山水石。注釋《唐駱丞集》十卷行世。

徐燭 字惟和。父梲，以《易》學名家，仕永寧令。燭數上公車不第，與其弟燭肆力詩歌，諸體並擅，所著《幔亭集》二十卷。又歷選閩中諸先詩十二卷，名《晉安風雅》。

陳薦夫 字幼孺。能爲六朝文，詩工麗情至。舉萬曆鄉薦，未第卒。

侯官縣〔五〕

宋

葉子儀 潘植弟柄。 陳則之 陳衡

葉子儀 文章博洽，有《絳毫》及《易玄神契》行世。

潘植 字立之。父滋，林之奇高弟也，黃榦嘗受學焉。植與弟柄從朱文公游。工文，不試，務實爲己，師友稱之。

柄 字謙之。年十六，有志於道。受學朱文公，取聖賢格言爲訓，而隱括《呂氏鄉約》繼其後，凡存心養性之道，律己治人之方，條目具例，終身所行不出於此。有《易解》、《尚書解》。學者號瓜山先生。

陳則之 有文行，養高不仕，著書爲業。弟像，天禧中進士。

陳衡 字公權。父僖，爲軍掌籍。靖康初，福州軍亂，殺守臣柳廷俊，朝廷將致討，僖抱籍焚之，家人恐禍泣諫，僖曰：「以身易百千人命，所甘也。」衡質直嚴重，危坐終日，對妻子未嘗見齒。與鄉人處，則斂退樂易，惟恐失色。不疑人欺，詐直弗白。責通於人，則媿若己負。子孔碩，舉進士，歷官有名矣，而訓飭彌厲，平居所以告語之者，要歸於守道循理，愛人及物之意。其卒也，市里失聲歎叱，如悲親戚。

皇朝

王肇 陳翰 陳士貢 高澂 傅汝舟 王應期 王應山 趙璧

王肇 字開若。父康，兄縉紳。少業於陳郊，學詩林鴻，學書王偁，學畫高棅。永樂、宣德間，以文學屢徵，不起。所著有《蒙齋集》。

陳翰 字文起。父元修，善青烏術。八歲隨父建安，時楊文敏方以文學詣博士受業，見翰謂曰：「儒子何能？」曰：「治《論語》。」文敏因試問天下歸仁，翰曰：「須彌納芥子。」客有未喻者，時適薦含桃，翰舉其核曰：「仁在其中矣。」於是一坐愕然，呼爲「陳君」。後五年，文敏以進士起家，翰歸鄉里，屢使招之，自匿不見。出，徧游名岳，十年乃歸，與妻子訣，隱居太姥山中。正統五年，預知文敏將卒，走吊之武林，不

見喪主而去。後竟不知所往。

陳士貢 古靈先生苗裔也。父子敬，永樂末以百戶長爲福州府司庫，庫失火，燒及庫中進御棕毛屑，罪死，當傳之燕京。士貢甫弱冠，自髡，詣郡請代父刑，許之，遂就逮。故人賓客，皆白衣送之芋江之上，既發，涕泣相吊，士貢笑曰：「士患不得其死，士貢今者得死矣，受質不受吊也。」至京備極楚毒，臨決，延頸受刑，顏色不變，其蒼頭焚尸裹骨以歸。

高澂 字宗呂。父鑑，見緒紳。澂早善屬詞，不樂進士業，每謂文至牽飾比偶，猶之留鬚眉以傅脂粉，無足學也。遂洗意爵祿，結霞上之居，自號石門子，又霞居子。善畫，善隸、草，善八分書。家貧，嗜酒，日酣飲，醉則狂叫放歌，陶陶任適。醉甚，卽散髮赤脚，飄然舉舞。又自號鬚仙子。詠是孤潔一世，知名海內，時時軒蓋造之，迫則見之，求其所能，則不得。及其醉也，雖尋常人投之楮素，懽然揮墨，任意縱橫，而結構峻古，意態突兀，醒則雖工意爲之，皆所不逮。鄉有宋子者，與澂善，瘡歲弗愈。一日澂造問之，宋強疾移榻，就堂相見，因飲之酒，酒酣，宋出素請畫。澂染筆寫菊數本，倒垂縣厓，江波間，香姿隱隱有飄拂流動之狀。宋冷然疏爽，因再請，復寫奇石亭立，雙竹凌空，蕭蕭數葉，風韻若有聞焉。宋躍起視之，毛髮俱竦，是日瘡遂就差。時爲之語曰：「少陵有佳句，不若霞仙筆。醉後掃丹青，往往神鬼泣。」

傅汝舟 一名舟，字木虛，自號丁戊山人，一號磊老。方額，碧目，小指有四印文。年十四，則誦黃帝、姚姒。二十，卻秀才。學通天官，堪輿、涅槃、老聃，屬《盤》、《雅》、秦漢等語而肆命之，其古色蒼黯瓌奇處，至不可辭。與高澂齊名。閩人諺曰：「高垂腹，傅脫粟。言斷斷，中歌曲。」中歲好神仙方外學，增損姓名曰傅汝舟，輕別妻孥，不問生產，若飛鳥遺跡，蟬蛻亡聲也。所著有《吟嘯棄存》、《越吟》諸稿。

王應期 字懋啓。爲諸生，舌耕養父母。父母死，貧不克葬，權厝先隴旁，歲時節序，焚香伏慙，作孺子泣，達曙乃還。柩再遷，廬其側，復晝夜哭也。及葬，方謝蔬食，蓋二十年矣。居志性學，自號未醒子。

王應山 字懋宣。喜讀書，以《春秋》教授烏石、武夷間，從者如雲。詩宗大曆，婉而多致，監司、守、令常式其廬。老益苦心編摩，著作甚富，有《閩大記》以識閩中文獻之盛。

趙璧 字希和。舉嘉靖鄉薦。天性孝友，與人交不忘。有弟奮，教之。迨奮登第服官，以病乞歸，璧手調湯藥，未嘗離次。將卒，以二孤付璧，復爲撫視，過於所生。蓋不上春官者近十年，後於道中聞其弟之長孤殤，悲痛而卒，士人哀之。奮，見縉紳。

懷安故縣(六)

宋

林憲卿

林憲卿 字公度。從朱文公學，色溫氣和，擇言謹行，鄉人皆化其誨。死，無子，鄉人卽其所創存齋祠之。其徒吳宗萬、林士蒙，皆知名。

皇朝

姚忠 林奐 鄭洪 鄭炎 黃恭 馬聰 陳良策

姚忠 字用恕。師事國子博士林志仁，朝夕講誦，久之，明理篤學，深得聖賢之旨。節儉恬淡，雅好山水，不樂仕進。自號耕雲山人。

林奐 字元美。值元季不振，無心致用，惟閉門讀書，時邀賢朋唱和，以琴書爲樂。其書法道美，詩有理趣。見人善，獎諭若己出；聞人惡，卽麾斥之。親鄰事有不直者，夜不安寢，聞輒馳赴，必別白是非而後已。國初，被薦於有司，以目瞶耗辭。子英，見縉紳。

鄭洪 字公量。幼失怙恃，卓然自立，刻意古學，啓迪後進。家貧窘，處之裕如。詩有唐人風致，文以理勝，不求富麗。

鄭炎 字以明。隱居教授，課僮耕稼，不慕榮利。其大父御史潛，嘗創義學瓜山之陽，炎每值朔望，必幅巾深衣，率諸生致敬於先聖先師。平生一語不妄，人目爲迂，而自信益篤，老不少變。

黃恭 府庠生。性至孝，父得風疾，每夕籲天，及卒，哀毀幾滅，不御酒肉，至於終喪。後喪母，亦如之。

馬聰 字長夫。學慕古人。年少讀書別館，有鄰婦奔之，閉門不納。舊與羅源令游，令得罪庾死，寄橐千金，期歲還其家，故封識也。年四十，方有一子，僕抱持，偶墜幾殞，聰徐謂之曰：「命也。亟逃，不者家人甘心矣。」學使邵文僖銳重其賢，禮之。後生子森，官至大司徒。次子楷，亦有士行。楷面有斑，若其兄墜傷之狀云。

陳良策 字伯獻。祖顓，見閭巷。良策蚤業儒，家貧，教授自給。少有得，卽樂施不吝。養寡姊三人，終身敬事之。子元珂、元琰，嘉靖間俱登第。

古田縣(七)

宋

邵清字整

程伯榮 林用中弟允中

余偶(八)

林師魯

程若中

林大春

蔣康國

李友直

李元譽

邵清 字彥明。元祐間太學諸生，從張橫渠學《易》。崇觀間還家，遂不復出，築室先塋側，聚書千

卷，角巾鶴氅，鄉黨敬之，不敢以名字稱，因其嘗應八行舉，呼爲八行先生。年八十四。子整。

整 字宋舉，自號蒙谷遺老。與族人景之以家學自相友。教授生徒百餘人。少從合沙鄭少棣學《易

傳》、《六十四卦圖說》及《春秋元經》。其纂集《圖序》，甫訖而卒。景之，見縉紳。

程伯榮 字良弼。與王龜齡、沈有開、傅子淵，皆友於朱文公。

林用中 字擇之。始從林光朝學，後登文公之門。文公稱其通悟修謹，嗜學不倦，而與何叔京書稱

之曰：「區區稍知，復加激厲，此公之力爲多。」弟允中。

允中 字擴之。亦受業朱文公，文公稱其「外晦內明，外樸內敏」。有《草堂集》。

余隅 字占之。朱文公高弟。學問警敏，與林用中齊名。有《克齋文集》。

林師魯 號芸谷。文公門人。父芸齋，與朱韋齋善，臨終手筆數十字，戒其家治喪無用浮屠法。

芸谷與程深父、林熙之相從講學，而林用中師事之。

程若中 字寶石。從文公學，躬行無偽，禮度不違。子孫侍側，冠服肅然。有《盤澗集》。

林大春 字熙之。文公門人。嘗題仲尼「再思」、曾子「三省」以自勵。號槌齋。

蔣康國 嘗從文公講論。文公《楚辭集解》多宗之。學者稱鼎山先生。

李友直 字直之。以詩書禮樂教授鄉里，無貧富貴賤，隨賢愚啓迪之。家貧不堪，處之恬然。父亡，事繼母以孝稱。

李元譽 字子貞。以布衣召，除國子學錄，不起。

皇朝

王夢祺 黃童

王夢祺 字穆仲。鄉舉不第，試太學，補第一。聚徒鄉校，學者師之。

黃童 字仲器。三歲失怙，稍長，事母盡孝，知奮勵。永樂中，以楷書徵人文淵閣，繕寫《大典》。書成，當拜官，乞終養母，累徵不起，以壽終。

閩清縣〔九〕

宋

許儉

許儉 字幼度。朱文公門人。三世同居，庭無間言，丞相鄭性之名其堂曰孝友，林羽爲記。

皇朝

鄭昭

鄭昭 字仕賢。洪武中，有司以孝廉薦，懇辭不得，則委棄田廬，入山益深。有司舍之，昭始歸鄉，葺屋墾田。不數年，家居，乃葬其親戚之不能葬，賑其鄉族之饑困者，立家塾以訓子弟。每風日清美，杖履

徜徉，觸詠自娛，人人忻仰之。

長樂縣（二〇）

宋

林通 維仲 劉砥弟礪，字子珩。 陳枅

林通 登鄉薦。元祐間，邑令袁正規聘修縣圖經，以錢二十萬爲謝，却不受，請以修廟學，於是鄉人皆來助工。有詩集。

維仲 失其姓。紹興間，耽詩樂道，晦跡林泉，三辟不赴。

劉砥 字履之。六歲時，日誦千言，至覽忠孝大節，輒激憤感慨。十歲通九經、傳記，綴詞賦，與其弟礪並登童子科。受學朱文公，文公授之《先天太極圖傳》，充然有得。文公晚修禮書，砥預編次。以時方攻道學，益無復仕進意，年四十五卒。爲文醇雅宏博，詩不加琢，而能達其意。弟礪。

礪 字用之。幼穎悟，孝弟，與黃榦最善。偽學說行，志尚愈堅，立身行己，不改畛於繩墨。

子玠 字君錫，砥子也。從黃榦學，非名士不交，非義理之書不存。平居退若無有，及其見義必爲，不類流俗，則有人所難者。

陳枅 字自修。朱文公門人，有所錄《問答》。

元

林清 歐陽侁 陳有霖 陳東 陳仲文

林清 字以寧。經明行修。泰定間，年七十餘，屢辟不就，賜號梅隱處士。

歐陽旸 字以大。舉進士不第，隱居著述，動循禮法，學者師焉。所著《四書釋疑》、《五經旨要》、《性理字辯》、《格物啓蒙》、《忠孝大訓》、《女範》、《幼學》等書。子潮，舉莆田教諭，通五經，人稱五經先生。《郡志》作歐道江，旸號也。

陳有霖 字希說。與歐陽旸往來論學。至正中，築鄉約堂，行藍田鄉約。爲義學，集鄰里子弟講學其中。

陳東 字景暘。雋敏多聞，浮游沅、湘、吳、越間，達於京師，諸所歷覽，輒形歌詠。僉郡同知郭履辟爲校官，辭不就。僉憲趙承禧以邀跡丘園，不求聞達薦，東曰：「吾既不求聞達，乃復名塵薦？」剡去之。隱居不跡郡城。

陳仲文 字奎甫。與族子潔建書堂於藍橋林壑中，以程朱之學倡鄉人。國初，以子輔恩，封知縣。

皇朝

陳亮 林紹 高淮 陳漢臣 林敏 陳本 鄭文霖 林良箴 劉布 陳晉昌 劉一企 李仕黼

陳亮 字景明。好文工詩。洪、永中，郡縣累徵不應，作《陳搏詩》見志。日與高廷禮、王恭、周玄輩往來倡和，又締三山耆彥爲九老會，命酒泛舟，登山尋寺。有《滄洲集》。

林紹 字淳裕。能詩。永樂中，邑人王恭、王堅交薦於朝，被徵不起。有《林泉清響集》。

高淮 字魯仲。工山水，遠追房山，近方漫士。永樂中登鄉薦，未仕卒。

陳漢臣 名留係，以字行。辟南安教諭，辭歸。有《榕溪集》，張以寧爲序，稱其「不自畫於今之能言，而志附於古遼痼土，安鑿齒之疾而且屢空，天將玉成漢臣而不朽之也」。

林敏 字汝學，一字漢孟，宋林簡肅之裔。與周玄輩結社，不就薦舉。

陳本 字叔固。善詩文，耽隱不仕。

鄭文霖 字汝衆。躬耕不仕，與王恭諸人吟詠，自號耽犁，言：「吾耽吾犁，忙乎無思，熙乎自怡。方其在手，不啻榮執圭而適運斤也。」練子寧爲作《耽犁賦》。

林良箴 工詩文，草書、畫、琴尤精。嘗與王恭、高棅、陳亮往來，自號琴樂子。棅有《琴歌》贈之。

劉布 字孟升。少聰敏，嗜古書法，習書山中二十餘年，篆籀爲時所重。

陳晉昌 字鴻翰，以字行。事父母至孝。父伯通，年九十餘，晉昌已老，身爲滌廁。父病殆，祈天減算，疾爲旋愈，延二期乃歿。既葬，朔望携茗果詣塚拜泣，雖風雨不廢，以父性愛菊，植菊於塚次。

劉企 號抱一山人。本學官弟子也。默而好深湛之思，棄士業，著《陰符難經》，衍孺古文辭。偶身步若翽，遇常意，輒戲曼跳梁。從閩傅汝舟治竹筐、食擔、葫蘆，經武夷山下，遇仙，語在武夷。歸。

李仕黼 字士殷。表望學校，四方名士，多出其門。家清，反却貧生贊禮，教人以孝弟修身爲本。兄弟四人，養葬父母，皆出其手。著《五經纂要》。及貢而卒。

陳耀 字孟輝。博學不仕，與弟分產，盡讓己資。

連江縣（二）

宋

林幾復 林蕃 鄭所南

林幾復 學問該博，時號書廚。隱居不仕，學徒甚衆。

林蕃 字丕顯。從林之奇游，於呂祖謙爲同舍生，而年又長之。及祖謙講學授徒，蕃誦首受業，祖謙曰：「此閩中瑞物。」後參謁朱文公，以乏資且老，不得時見。聞鄉人有從文公學者，輒造門扣問，無論晚輩。郡文學以禮延致之，數日而歸，曰：「向者違親而赴金華，爲道故也，今又安能舍親爲人耶？」

鄭所南 字憶翁，一名思肖。太學上舍，應博學宏詞科。喜畫蘭，疏枝簡葉，不求工也，顧不妄與人，邑宰魯而求之，所南曰：「頭可斫，蘭不可得。」嘗寫一幅，自題其端云：「純是君子，絕無小人。深山之中，以天爲春。」其志可見也。元兵南下，叩闕上書。宋亡，遂變名思肖，示不忘趙。其曰所南，亦示不復北面他姓也。僑居吳下，坐必南向，歲時伏臘，輒望南野哭再拜。返，置田數十畝，寓之城南報國寺，僧收其歲人以祀。祖禰諱，必大慟祠下，矢不與北人交接。或於坐入聞北人語，輒卽引去。嘗有詩云：「不知今日月，但夢宋山川。」又《題寒菊詩》：「寧可枝頭抱香死，不曾吹落北風中。」吳人好事者，爲鏤其所謂《錦錢集》者行於世。

皇朝

趙迪

趙迪 字景哲。從林鴻爲詩，有聲。

羅源縣(一一)

宋

鄭伯淵 陳粲

鄭伯淵 號秋浦。急公好義，邑青衿半出其門，號鄉先生。咸淳六年，邑大旱，伯淵年七十餘，徒步至福源潭，爲民祈禱。翌日，大雨如注。明年，又旱，亦如之。邑有二溪，歲久，中溪壅塞，伯淵捐金發粟，協衆力復之。居民感其德，嘗有詩曰：「十里清溪流活水，連村綠稼有甘霖。羅川野叟千年史，秋浦先生一片心。」

陳粲 字文奎。事母以孝聞。邑先輩余元泰嘗采邑中嘉言善行，有補風化者名《鍾幢嘉語》，粲復採補之。

永福縣(一二)

宋

黃非熊 黃雍

黃非熊 慶曆間讀書三島村，因得方廣巖之勝，捫蘿闢洞，作《十咏》傳於世。後養高不出，自號南溪處士。

黃雍 字子邵。知宋將亡，隱居山中。語及時事，恒流涕被面。文信公勵志恢復，聞其慷慨多奇，以

詩招之，雍度時事不可爲，辭不就。然每誦其詩，以語門生吳鑒，輒慟哭移時。後信公開府南劍，復物色之，終不出。

福清縣（一四）

唐

王仁續

王仁續 閩王審知聞其賢，召試大理評事，恥受偽命，終隱南山。

五代

林安

林安 事母至孝。母死，廬墓墓傍，石裂泉湧，閩王異之，以其廬爲湧泉寺。

宋

林正華 鄭叔熊弟叔豹。

林仲嘉 林子充合傳。

鄭首 林文昭弟文賴。

陳杰 陳克勤合傳。 高若虎

許天瑞 弟人瑞合傳。

許拱辰

翁亢

魏几

林阿盟

陳叔盟

林亦之

林公選

侄同。

同弟合。文之。

陳藻 林萬頃

黃謬

陳革

卓立

陳寬

黃銳

夏良規

劉琛

鄭東起

林宗道

林正華 字君輔，安六世孫。至和中，人太學，棄歸養母。母卒，不水漿累日。已日蔬食誦經，卜葬

湧泉山，皆身營之。既葬，廬墓寢苦枕塊，晨夕號慕。俄而祥雲滂，甘露降，烏鳥翔。鄉人白官旌之，世稱湧泉大小孝子。

鄭叔熊 好談兵，王安石贈之詩云：「鄭子喜論兵，魁然萬人敵。嘗持一尺箠，跨馬河南北。方今邊利害，口腹能講畫。疑師穀城翁，方略已自得。天兵卷甲老，壯士不肉食。低徊向詩書，文字銳鑄刻。利名又齟齬，棄置非人力。黃塵彫蜀裘，逆旅同偈仄。秋風吹殘汗，霰雪已驚客。浩歌隨東舟，別我無慘惻。聞生今好游，往往老妻息。南陵子所慕，天命豈終塞。」弟叔豹。

叔豹 元祐間，上《兵器圖》、《宗祀書》、《明堂制度》及《朝享冕服儀》數卷。

林仲嘉 以詩名，與鄭俠、王聖時、林圖南、李天與相唱和。嘗游京洛，有詩三卷。同縣人林子充，長於性學，所著有《論語詩》五十首，林之奇解《論語》多引用之。又有《指南集》二卷，詩文二卷。時鄉人有「古屯三賢」之號，蓋謂仲嘉、子充也，其一志不著其名。

鄭首 字晉信。強記能文，新頒《通鑑》，有鬻於門。一夜輒默識之，鬻者驚，納為贄。宣和二年，年十九，魁鄉薦。南渡大赦，首以赦書不文，別撰之，遣弟子二百人馳宣水南山下，躬効縣官跪拜。鄉人借地架屋，首戲答之，曰：「疆土日隘矣，無可借者。」被許賜死，陷刑天黑，太史奏東南文星墜，赦之，無及矣。所著有《六經解》、《榕溪集》，亡傳焉。

林文昭 字宗範。有《論語解》一卷。弟文輅。

文輅 字宗孟。文昭能解經，而文輅善星數。論《史記》與《漢書》皆稱太初元年丁丑歲，而二說不同者：《史記》，顓帝曆；《漢書》，黃帝曆也。所著有《曆集》。

陳杰 字希古。從林搏學琴有名，隱於漁溪市。市當置郵中，多停驂問希古者。又有陳克勤，善鼓瑟，通輜鈴、遁甲諸書，而尤長於詩詞。

高若虎 字仲容。所著有《渤海詩話》。

許天瑞 家貧不娶，與弟人瑞以道自樂，解《論語》、《六經》，莆、泉之士稱「二許先生」。

許拱辰 字元弼。以經學詞章聞。所著有《玉融新對》，莆田黃公度爲序。

翁亢 字柔中，號荔枝臺。能詩，有豪俠風，喜談前輩行事。隱居教授，莆林光朝嘗往來亢家，每歎此翁五十年丘園，而城市鮮知名者。從子昭文，圃非時得荔枝，其母曰：「豈有嘉客踵門耶？」頃之，光朝至，因名爲嘉客紅。

魏几 字天隨。從林光朝，以克己復禮問，光朝曰：「五湖明月。」因以穎悟，賦《丹霞夾明月》，有「半白在梨花」之句，人以「半白梨花郎」目之。其昆仲有《雪堂天游》，亦名士也。

林阿盟 字載德。林高諸孫也。從林光朝學，苦《六經》無所入，至欲投江死。光朝稱之，謂魚鹽中膠鬲。

陳叔盟 少從林光朝講學，出揖客而容顏，光朝曰：「心不負人，面無顏容。」叔盟悟而自克，遂以行誼名。

林亦之 字學可。盛年挾策游四方，卒不契去，之紅泉，謁林光朝而師之，左右三十餘年，遂爲高弟。光朝卒，莆人推亦之嗣講席。光朝之學，一本躬行，亦之戶外，履幾半於師矣。或勸其著書，答之詩曰：「講學紅泉不著書，只將心學授生徒。」趙汝愚帥閩，辟入東井書堂，待以賓友之禮，上其學業於朝，命未下，卒。學者稱網山先生，一曰月魚先生。景定間，林希逸追舉其賢，贈迪功郎，賜諡曰文介。子簡，字綺伯，莆中劉克莊少師之。

林公選 字養直。曾祖遜，祖挺，父瑒，兄公遇，俱見縉紳。公選隱約俶儻，與兄同德，學不緣師授，不以文見於世。兄子同。

同 字子真，公遇子。棄世澤官，終養不出。孝謙廉讓，而深於詩。嘗著《孝弟篇》及《三教一心》諸語。宋幼帝南入海，樞密張世傑轉圍泉州，傳檄諸州起兵應之。同所居其祖瑒舊宅，軒敞可治事。而邑人劉全子者，太常少卿誅之後，故爲監丞，同妹夫也，與鄉人黃必大謀起兵應世傑，即同宅置忠義局募士，復永福縣。宋以全子爲福建招撫使。景炎二年九月，元也的迷失兵入福州，其冬入福清，全子與戰，敗，出亡走。衆勸同避之，同曰：「吾宅業建局，名忠義。」盛服坐堂上，嚙指題壁曰：「生爲忠義臣，死作忠義鬼。草間足可活，吾不苟爲爾。」諸公何爲者？自古皆有死。」兵至，詰之，大罵而死。全子出亡，既亦自經死。而林、劉二族，株連者衆矣。全子之妻，其爲同妹者，著於烈。弟合。按宋史有《林氏傳》者，以全子起義兵事見《林同傳》，而列傳無同者，獨有《空齋傳》。蓋同號空齋，取《同空》之義，故《忠義集》稱曰空齋處士。史訛同爲空齋父，而監丞爲同官，以空齋舉進士，歷知縣，家居。全子爲全祖，「福清」爲「永福」，與《林氏傳》矛盾。幸全子之名附林氏以傳，而同事暨見，其言乃可尋繹不泯。舊志訛同於隱逸，言至元中，臺郡上其行義，詔徵所著《小孤山人集》，命之以官，並辭不就。無乃其弟合，獨全其節，後人因爲同諱之哉。

合 字子常。與兄同志，植梅百株，結廬於小孤山，愛敬無間言。

文之 字子彬，環世孫。環，見縉紳。文之從劉克莊爲古文，平易高古，用意獨至。克莊謂曰：「後來文印，屬之子矣。」有《若存集》及《朱墨通鑑綱目》。

陳藻 字元潔。初從林亦之於網山，又從於紅泉。時陳叔盤授《詩》於林光朝，與之讀《國風》於古

寺，吟諷累夕，俄至《采蘋》，掩卷而泣，頓得《中庸》之旨。叔璽喜告亦之，而遂以見光朝，曰：「吾嘗語，若《詩》不歌，《易》不畫，無悟人處。而今於是尤信吾《詩》不亡矣。」乃受其拜，而接之若孫。藻因爲通儒，遂嗣亦之講席。明理究學，浩然自得。入則課妻子耕織，出則誘生徒弦誦，或拾穗而歌，或舞雩而詠，學者稱樂軒先生。所著有《語孟莊子杜詩解》并詩集。景定間，門人林希逸薦其賢，贈迪功郎，賜諡曰文遠。

林萬頃 字叔度。始解《春秋》、《易》，陳藻不善也，及見其解《同聲相應章》，曰：「當北而矣。」萬頃解曰：「蠶絲吐，而商弦絕；銅山崩，而洛鐘應，其聲同也。磁石引鍼，琥珀拾芥，其氣同也。氣同聲異，天壤咫尺。聲同氣異，咫尺天壤。平地而水，濕者先濡，水上而下也。抱薪而火，燥者先燃，火下而上也。龍興而雲從，雲自下而上，應者也。虎嘯而風號，風自上而下，應者也。水火燥濕，無情而應有情。雲龍風虎，有情而應無情者也。」

黃譔 字忠甫。讀書精博，不交世事。所著有《玉融志》、《容安拾稿》。

陳革 字壯行。博學工文，一時名上多器重之。所著有《中隱集》。

卓立 字志道。中特科，著《西溪文集》八十卷。按科日志特奏名並無立名。

陳寬 嘗寓龍門，著《龍門集》。後入蜀，著《紀夢集》。

黃銳 著有《龍山集》。

夏良規 字道矩。有《論孟六經解》。

劉琛 字文璧。文行雅正，詩賦尤工。以舉子業授生徒，多擢科第。嘗與樗菴先生論學於江山平遠樓，鄉人重之。新志作鄭潛、潛想，號樗菴。

鄭東起 舊名震龍。家居教授，常百餘人。爲文章有氣魄，元憲使程鉅夫名其集曰《自然機籟》。亦善字書，（一五）學者多寶愛之。

林宗道 字仲學。景定間領鄉薦。性聰敏，爲文一不經意，詞氣豪逸。尤善隸書，晚年用筆益蒼勁。

元

劉應竹

劉應竹 字友直，宋劉詵之後也。母終，廬墓深山中，距家十里，猿狖爲鄰，風夕雨夜，草樹悲鳴，應竹居之三年不懈。後芝生門楣及墓石之上。

皇朝

蔡以俊 陳廉 羅泰 葉廣彬 郭造卿 陳兄

蔡以俊 穎悟該洽，至老未嘗釋卷。隱居教授，不求仕進，卒年八十。

陳廉 字叔平。聰敏嗜書，構醉墨堂并雲山不礙樓，學書其中。精究篆、籀、草、隸凡二十年，而草、隸尤爲時重。性簡抗寡諧，貴游豪俠踵門求書，輒弗屑與。過故人家，有楮墨當意，卽解衣揮灑，累數十紙。號黃山翁，又號雪蓬散人。林鴻、高廷禮、王恭、周玄諸名士，皆有詩美之。

羅泰 字宗讓。少從鄉先生宋瑜受《春秋經》，既卒業於訓導林友從。潛心《易》旨，一時同游如進士鄭澄初、主事鄭介叔、知縣鄭彥韜、文學鄭廷玉、鄭希晦、林範伯輩，咸與切磋講明，鄉後學皆師尊之。隱居教授凡四十餘年，賢士君子至者，恒就見焉。宣德壬子，應天尹聘司文衡，泰辭曰：「布衣也，以一鄉之

善，淑一鄉之人則可，敢去取畿甸士哉？」平生好古，遵禮輕財。達生母喪，家貧，數年不能葬，語及，未嘗不泣下也。年四十，妻死，不娶，曰：「吾有子矣。」

葉廣彬 字大宜。治科舉不遂，躬耕爲養，誦讀靡廢。父母沒，終慕不懈。自號月窗，嘗自題曰：「小構幽窗與月通，清輝瑩徹此心同。仰天不語無人會，靜對明蟾獨省躬。」子朝榮，見縉紳。

郭造卿 字建初。父萬程，見縉紳。母氏，見閨閤。造卿爲諸生，器於父友馬恭敏森，令受業羅文恭洪先之門。閩中倭起，客游吳越，胡少保宗憲、李襄敏遂禮致之。新安汪司馬道昆撫閩，見，奇其文，而高其行，禮爲上客。而戚都護繼光在閩有平寇功，枉車騎於造卿，甚委心焉。大司馬葉夢熊，起家爲其邑令，欲延造卿署中，度不能屈，乃館之蕭寺，訂盟莫逆。夢熊去，而夢熊之侄名春及者爲惠安令，邀定其《政書》。葉氏二公交造卿，惟恐不及也。造卿廩諸生，例尚不及計偕，會徐中行子與攝閩學，強遣計偕，爲儀郎所格。造卿謂郎執例固當，郎亦聞造卿名，更過從，相稱慕久之。卒業北雍，王文肅錫爵時爲祭酒，臨其舍，遇以國士。或邀造卿試中書，不從，文肅大稱善。居頃之，中行以閩觀察使人覲，而戚繼光鎮薊門，交辟造卿爲客，造卿曰：「徐公於我厚，厚在吾親，蓋俎豆我父，旌表我母，我不可不往。」則之徐。既至，徐不久卒，造卿爲治喪，立後，傳其遺文，去之其故所守郡汀，哭徐公祠下，繪像樹碑，復爲請祠於其鄉，乃曰：「吾於徐公盡矣。」束裝見戚於薊門，戚爲造卿督築館漢莊，請草燕史。未竟，戚去，造卿曰：「吾不可廢成勞，今後世無復知有戚將軍。」遂留竣事，官廩之，造卿不受也。其時，夢熊正分部盧龍塞，從旌荆道中，而維揚顧養謙者，以中丞鎮薊，爲造卿治具館所，樂飲。造卿爲養謙畫海漕，活遼人以十餘萬。造卿名僅籍太學，所知交盡當世名卿，賢士大夫，擘畫成敗，論古今得失源委，九邊、三輔、列藩、阨塞

夷險，攻守所宜，如列眉觀火。行不齋書，問以典故、疑義及奇事、僻語，莫有能難者。久於塞上，塞人親附之，欲留之，不得。晚歸故山，婆婆麟巖、石竺、靈源間，輒命酒叫呼，人莫窺其意。

陳見 父一科，見縉紳。見，嘉靖二十五年鄉薦。倭攻福清，率家僮禦之，不克，與訓導鄢忠涵被執，死。

〔校記〕

〔一〕「侯官縣」懷安故縣 古田縣 陶清縣 長樂縣 連江縣 羅源縣 永福縣 福清縣「二十八字，各本原脫，據本書體例補。」

〔二〕「閩縣」三字，各本原脫，據本書體例補。

〔三〕「娼之下，丐之上」，各本原作「娼之上，丐之下」，據文義改。

〔四〕「七進」，疑誤。

〔五〕「侯官縣」上，各本原衍「福州府」三字，據本書體例刪。

〔六〕「懷安故縣」上，各本原衍「福州府」三字，據本書體例刪。

〔七〕「古田縣」上，各本原衍「福州府」三字，據本書體例刪。

〔八〕「余偶」，本傳作「余隅」。

〔九〕「陶清縣」上，各本原衍「福州府」三字，據本書體例刪。

〔一〇〕「長樂縣」上，各本原衍「福州府」三字，據本書體例刪。

- 〔一一〕「連江縣」上，各本原衍「福州府」三字，據本書體例刪。
〔一二〕「羅源縣」上，各本原衍「福州府」三字，據本書體例刪。
〔一三〕「永福縣」上，各本原衍「福州府」三字，據本書體例刪。
〔一四〕「福清縣」上，各本原衍「福州府」三字，據本書體例刪。
〔一五〕「字書」疑爲「字畫」之誤。

閩書卷之一百二十七

英舊志^(一) 韋布

泉州府 晉江縣 南安縣 惠安縣 德化縣 安溪縣 同安縣 永春縣^(二)

晉江縣^(三)

唐

鄭晚 王肱 王穀

鄭晚 歐陽詹之妹嫁焉。孝弟惠和，侔於前哲。人望無間，時譽皆歸。歐陽詹銘其墓曰君子。

王肱 字用輔。爲文好譏刺當世，以是累舉不第。嘗著《濟狀》一篇，言濁河貫清濟，濟詰其浼濶。

時甚奇之。又有無題古詩一百三十首，辭多悽惋。

王穀 工詩。

宋

陳在中 崔唐臣 陳彥達 林頤壽 丘崇 陳好 王凱 王文獻 楊少陽 黃子中 陳權 黃址 蔡和 楊至 楊履正 林巒 王次傳 王雋 石晉老 陳景溫 李中正 陳伯春 劉志學^(四)

呂肖翁 陳與桂 呂椿

陳在中 字繇文。博聞深《易》，景德中，進所著《六十四卦》，賜釋褐，不仕。子詰，工詩，祥符初進士高第。

崔唐臣 與蘇頌、呂濬同學相好。蘇、呂登第，崔慨然罷舉。其後，蘇、呂入三館，乘馬偕出，循汴岸，見一士艤舟坐窗下，蓋崔也，亟就謁之，問其別後況味，曰：「初倒篋中有錢百千，以其半買此舟，來往江湖間，其半市雜貨，時取贏自給。雖云汎梗飄蓬，差逾應舉時也。」蘇、呂邀與歸，不可，但叩官居坊曲所在。明日，自局中還，各覩崔留刺，再訪舟次，則已行矣。

陳彥達 家富篤義，時出私財助公，見人貧乏，患濟之。讀書手不輟卷，舍南數武爲別館，中堂設圓牀環榻，與朋友共食。士無資者，就彥達听昏食飲，寒暑裘葛，油膏紙筆之費，皆無所吝。鄭俠名其齋曰尚友，而爲之記。

林頤壽 字褒世。父附貢辟雍。祖母楊，苦背瘍潰爛，徑數寸。頤壽以敗臙在中，寢餽旁肉，楚不堪拭，俟母熟寐，舐之，傅藥而愈。廬父墓，芝產焉。廬繼母墓，有白鵲之應。爲人該究經史，王大書，精方脉。郡守陸藻稱其博物君子，里人爲著《孝友傳》。

丘崇 字執禮。工詩文，尤精天文、象數。李文肅時與唱和。

陳好 初名豪。受學楊龜山，後在太學與陳東上書留李綱，東被誅，變名游瓊州，卽家焉。

王凱 字和中。當應八行舉，徐師仁稱其履行無玷。事父母篤孝，廬墓三年，猶不忍舍。處弟至友。雖至貧苦，不肯向人求借衣食。嘗題桐廬釣臺，人傳誦之，號曰王釣臺。

王文獻 嘗撰《孝經詳解》一卷，紹興間以進闕下。

楊少陽 字七公。有詩文數百篇，爲時名公稱賞。如《崇福寺碑銘》、《二公亭記》，皆號奇絕。

黃子中 少游場屋，不遂，歸休林泉，自號南陂處士。上詩，有《南陂集》。

陳權 字巽行。自號朝陽居士，註老子《道德經》，編類《漢唐君臣圖》，有《朝陽詩集》。

黃址 長於詩，有集。文有《南華真經解》、《琴書人覺》一十卷。

蔡和 字廷傑。願從朱文公游，以親老不能去，勉友人陳易往受業，數以書從易請質。居白石村，喪祭酌古禮，鄉閭化之。北溪陳淳，往來道泉，學者勉留講授，一時如同邑蘇思恭、王次傳、王雋、黃必昌、安溪鄭思忱、恩永、惠安江與權、永春卓琮、黃以翼，皆從和與淳學。條理明備，講論平實，號爲紫陽別宗。

楊至 字至之。游文公之門，作「天道至德」、「天道至教」二圖，未言：「君子法天從政，如風動以教民善，如雷擊以懲奸慝，便是始爲士，而終爲聖，盡乎人，而合乎天。」有《文公語錄》一卷。

楊履正 字子順。文公門人。生徒數百，文公稱其細密。

林巒 文公門人。能推所聞以講學閭里。

王次傳 字崑父。善講折指，授生徒多貴顯。再預薦，不第。

王雋 字迪父。精敏絕人，館陳北溪於家，筆授字義，行於世。

石晉老 曾祖銳之，祖倪，世清白吏。晉老盡以貳產遜兄。居鄉急誼，一語不欺。傳康銘其墓，稱爲篤行君子。

陳景溫 字子實。淳熙間上庠，詞賦擅名。弱冠入京補試，以「大衍天地之樞」爲題，多士愕眙，景溫

講析四象要義甚詳，應試士皆來授指。以內舍生卒。同郡林冠英、高仲、魏奕士明、陳世仁、仁卿、陳時中子周、許國光、潛仲、王昭復成之等，皆與景溫同時知名。

李中正 字少謙。博涉狷介，與傅忠簡諸公友善。

陳伯春 字耀卿。邃《三禮》，有《戴記解》。又阮艮隱卿以《易》，黃清老傳之以《春秋》，陳玠子肅以《書》，皆馳聲場屋。

呂肖翁 字希聖。有雋才，方弱冠，人爭購其文。家居，授徒自給，貧病羸窮，不少介意。

陳與桂 字彌芳。年少博學，咸淳中領鄉薦，入元不仕，隱於安溪水竹村。文行高古，後學矜式之。

呂椿 字之壽。幼從丘鈞礪學，貧隱授徒，詞賦敏捷。所著有《春秋精義》、《詩書直解》、《禮記解》。

元

孫彥方 趙希直 蒲仲昭

孫彥方 生長貴冑，妙年恬養，川游巖觀，風哦月謠，清新而壯亮，雅麗而韻度。古田張以寧游溫陵，歎服其詩，刻之《桐華新稿》。

趙希直 宋宗室。里第藏書，贏於巷市，悉遍讀之，尤以善詩聞。張以寧稱其「短章清妍妥適，長篇滔滔汨汨，簡斷而思溢。人不足，己獨多也」。

蒲仲昭 祖心泉，故梅州守，察宋國危，遂隱身讀書，遺詩若干卷，劉克莊序之。仲昭既世其業，而游居於泉，以詩鳴者陳衆仲、阮信道、王玄翰，仲昭或師或友，皆薰所長。

皇朝

莊逢辰 陳亦言 諸葛珪 龔炯 張廷芳 陳璫 溫成翁孫恭附。蔡觀慧 林曉孫尚新，曾孫可

宗。(五) 王宣 李璧 陳洪璧 趙建郁 李仕弼 朱汶 陳鷗 江一鯉 王朝佐 李杜 顧應蘭

秦廷帷 張守化 沈大易 王國輔 朱一泮 陳欲潤 林甫任 林益萌 蘇士潛 王鏞弟鑄 黃

明 楊道恒 史繼倬 黃汝惠

莊逢辰 字士明。元季種藝養母，雖在亂離，不釋書卷。母卒，居喪據《家禮》。洪武初，恬隱不仕，

後進多師之，稱靜齋先生。子琛，見縉紳。

陳亦言 字汝納。至正間，自古田侍父瓊來官晉江涇州鹽場，因家焉。平生不樂仕進，刻苦力學，貫

穿經傳子史，尤工詩賦。同時蕭子玉、趙應嘉、張仕寬、邵石田輩，往還講論。年幾八十，卒。有《潛齋

集》。

諸葛珪 字楚賢，宋諸葛廷瑞之後。少好學，緼藉經籍，儻尚氣節。洪武十年，憲檄辟爲從事，憤

然曰：「安能居刀筆之下！」托疾不就。越四年，以明經徵赴，將授以職，復以疾辭，杜門養志，娛心經

史。子文，見縉紳。

龔炯 字延璋。敦厚周慎，刻志爲學，詩文當時稱。尚書翰，道勁端嚴，得歐陽率更筆意。洪武中應

薦，以親老乞終養。

張廷芳 世居縣南方山。父謙齋，以文學召爲石井書院司糾。廷芳講明理學，修其父業，冠婚喪祭，

一遵《家禮》，自號退密翁。嘗著《易經十翼章圖蘊義》十卷。

陳璫 字微仲，號栢崖。性孝友，不求聞達。工詩詞。宣德間，累召不起，號爲徵君。

溫成翁 少孤，事母極孝，十一歲，焚香籲天，刲股愈母疾。善爲詩，號梅窗，有《梅窗雋永集》。孫良，見縉紳，恭，字允恭。受學陳微仲，篤志經史，善楷書，鼓琴能知其音律。有詔徵賢良方正之士，郡守胡志和以恭充薦，方伯石瑄試之，遂以名聞。上道，忽遘疾，卒。

蔡觀慧 字允元，文莊清父也。既受文莊封，與鄉里耆舊爲逸樂會，會之言曰：「朋友五倫之一，百行道義之根，凡我在會之人，善相勸，過相規，有疑相質，有憂患相與爲力也。」

林峴 與李木齋聰論《易》有得，去之三山，從鄧煥講《禮記》，盡得蘊奧，以授泉士，發爲箴砭，言旨藥石。布衣檐簪，澣浣垂漱，辟積如新。同堂子姓，人人垂白，皆授德不情。所與游，盡正直可欲之上，遇田夫野叟，亦端拱酬對。子性之，係一新，並見縉紳。孫尚新。曾孫可宗。

尚新 字特起。篤志學問，孝友恭讓，講於忠恕之道，自號猛省子、懷畏子。子豫宗，亦好修行善。豫宗子茂先，有孝行。

可宗 一新子。爲諸生，淹洽史書，事一新最孝。

王宣 受業蔡文莊之門，掇鄉科，初試不第，遂以養親爲志，終身不復應舉。爲人廓落豪邁，俯視一世，仰觀千古。精研前聖之遺，洞貫百家之旨，意欲伐前人之蕪穢，揭六籍於日星。林希元稱其「自得之學，不滯於章句，絕俗之行，不混於塵俗」，而薦之朝。

李璧 自號介石。家徒四壁，力學不倦。教授鄉里小兒，自給衣帶巾服，飭步矩、行，至老猶以筋力爲禮。工詩詞對偶，尤善草、行、筆書遒勁，若老幹枯藤，深得宋翼家法。

陳洪璧 隱居涵江之濱，刻苦學《易》，而於《太極圖》、《參同契》鑽研人奧。所爲詩文，多以理勝。

趙建郁 字本學，別號虛舟，宋宗室裔，而蔡文莊門弟子也。結廬瑾戶，併心著述，所著有《周易學庸說》、《杜詩註》、《參同契釋》。且謂昇平日久，世罕知兵，因即《易》演為陣法，彙集韜鈴內外篇凡七冊，解引孫子書凡三冊。稿就封識，以俟其人。俞大猷從受學焉。

李仕弼 字君佐。善治經，為諸生祭酒，遠從伊洛，近守文莊，體裁自家，淵源往哲，學者師之。

朱汶 號碧潭。以名家子少從父薄游，歷覽名勝，退而學詩。耽酒自放，屋壁戶牖，題墨皆滿，貧不自謀，家人謂之曰：「何物可憎，徒浣墻戶，曾不可食。」取筆硯投擲之，汶不變也。一日，郡守出教，訪所謂朱詩人碧潭者，吏人持教喧問市中，久乃知為汶。至門，強汶入謁。汶衣褐衣，窄袂而長裾，闊步趨府，守下與為禮，汶無所不敢當。其所居西郊僻處，守獨出訪之，數椽欹傾，植竹撐拄，坐守其下，突煙晝濕，旋拾櫛葉煨火，燒笥煮茗以飲守。皂隸忍饑，詬罵門外，汶若不聞。於是，泉人乃知有朱詩人。

陳鷗 號忘機。與邑中朱汶、江一鯉、朱梧、于宗亮結詩社，為五子。王慎中序其詩，謂：「五子者，各有奇節怪行，既無所用於時，而一力於此，叫呼倡和以為極歡。旁觀皆笑為狂謬，甚或加指斥，五子獨喜自得，不顧也。」鷗少而無妻，黃克晦為作《海翁圖》，繫之詩曰：「我悲我兄世不知，年當十八已無妃，而今七十待阿誰？」

江一鯉 號草塘。家本武胄，個儼跌宕，喜談孫吳，豪氣逼人，盡傾一座。既與朱汶、于宗亮等為詩，格調清越，音節鏘然，而無矯舉匡拂之意。有室數椽，有園一區，方塘半畝，雜植花菓蔬薤，臺筍短褐，携鋤抱甕。園無樊牆，佳實離離，盜不忍竊，知為高人所樹也。好天良日，挾策引觴，咏歌倘佯其下，每得句，躍然自喜。客至，摘柑剥棗，烹葵剖柿，延款之。性嗜酒，或置酒招之，造飲輒盡，未嘗向人語貧，有所

求假。

王朝佐 字邦翰。能詩，善書畫。吳郡文徵明見其詩畫，嘗嘆之曰：「此人生在泉州，可謂黃金與土同價。」

李杜 字思質。與王參政慎中游，其爲文槩矧慎中。棄諸生業，俞都護大猷、大司馬譚綸禮爲記室，號雲臺山人。因避地粵西陽朔終焉。

顧應蘭 字維心。邑諸生，少司徒珀仲孫也。珀居鄉，每值凶災，捐穀出賑，而應蘭能承其志。嘉靖庚申、辛酉間，民中倭大死疫，應蘭召役夫舉槨埋竹簞，哀屍一萬六千餘，而髀胣體日以萬具，別男女而丘之。郡城村落有在而無，而爲之志曰：「嗚呼！在昔盛時，民無菜色，飽暖以嬉，死無所歸，則鄰里助其葬，有司埋其骸，爾輩何不幸值此時也！禮葬者載柩於庭，乘輶辭祖，親戚姻朋，執葛紼，歌蒿里，爾輩何不幸值此時也！蓋在《蔓楚》之詩曰：『天之沃沃，樂子之無知。』《兔爰》之詩曰：『逢此百罹，尚寐無吽。』」

秦廷帷 諸生也。家貧薄甚，父病瞽羸然，與母傅居，廷帷事父孝謹。父沒，致毀。母喜酒，廷帷措置糯杭，歲釀酒十二石，月置一石於母寢。知母好施，常從學舍袖蔬直兌錢數百，置奩中，恣所與。漳郡有慕其學行，致百金聘爲子師者，念母老，謝卻之。子舜翰，仕參議。

張守化 字可化。治經苦勵，爲弟子師。泉中中倭，守化兄陷賊，賊持之索贖金甚急，守化挈其篋中束修往，僅僅而已。至中途，遇他盜脅索之，忽有異香從空至，盜怪而舍之。既見賊，賊少其金，守化悽愴哀慟，賊輩相顧曰：「此孝禮也。」遂縱兄歸。

沈大易 字希周。少舍科舉，篤志聖學。稍長，卽洞識心體大原。已，歷鵝湖，登朱陸講堂，浮彭澤，匡廬，與王龍溪、鄒東廓、守益、羅念庵、洪先、會蘭、王文成之旨，錢緒山、德洪、薛中離、侃，稱爲吾黨上乘。晚造天闕，質洪甘泉若水，留學五載而歸。所著有《勸學質疑》、《正學傳習》諸書。

王國輔 字忠甫。受《易》於蔡元偉及予先子，研究精深，動履繩尺。先達後進，交口稱之曰：「古心古行。」元偉復以女妻之。

朱一泮 亂歲稱孤，既數年，得其父手書，悲涕不止。事母盡孝，母歿，哀毀過當。設帳受徒，衣冠危坐，無寒暑。行曲巷旁途，必紆轉正方，學者稱敬所先生。

陳欲潤 字爾身，御史讓子也。刻志聖賢之學，正立危坐，矩言法論不輟於口。

林甫任 諸生也。少志聖學，取六經及宋儒書讀之，寒暑不輟。作四面圖纂以自記，口居敬，口立志，曰進學，曰遠識。自謂敬一字，持之鈍堅，雖白刃莫奪也。所著有《詩經翼傳》、《四書管見》、《感省集》。

林益萌 諸生也。鞠躬淳行，處鄉閭，恂恂誨誘，鄉人愛之。後以子工部侍郎欲履貴。

蘇士潛 諸生也。常爲學士前茅，爲人嚴毅莊重，毫髮不苟。及子茂相貴，教廉教忠，前後不二，曰：「服我一言，養勝八簋。」後茂相仕至大官矣。

王鏞 字庚鏞。萬曆中鄉薦，少篤學問。早歲持父喪，蔬食麻襲，不入內舍，見爲遲頓迂緩，其心行愿樸，學問中人也。弟鏞。

鏞 諸生也。所解有《論語》、《易》、《詩》二書，皆六七易稿乃定。將卒時，尚改《吾未見剛》一章，命

侄潔書之。潔曰：「夫子病甚，可少間。」鑄曰：「此章千古疑關，不可不講。」

黃明 字允靜。諸生也。潛心《易》學，弱冠游蔡文莊之門。聶貞襄豹倡學閩中，明從游，爲高弟。

楊道恒 字惟衷。少有志用世，不遂。晚沉酣道味，作譚真子自許，雖未窺聖學之奧，或可比於諸子百家焉。

史繼倬 方伯朝宣子也。強學，他無嘗省。史氏之門貴盛，繼倬獨耐貧苦，躬孤行壹意。母卒，治墳負畚鍤，爲諸傭先。

黃汝惠 字明學。父憲清，見英舊。汝惠生長名族，席父兄蔭，不倚之。潛心風雅，多所撰述。

南安縣(六)

宋

劉濤 黃登 李亢宗 黃謙 趙彥慧 韓雲瑞 翁定

劉濤 字普公，昌言孫也。工詩及草書，蘇軾跋其書奇逸多才。徽宗召人禁中，值大雪，令草書雪詩，濤書鄭谷「亂飄僧舍茶煙濕」四句，上見其首書「亂」字，不懌，因問：「卿字孰師？」對曰：「臣無師。」不稱旨，退。晚年困躓，讀書靈泉院，自號靈泉山人。

黃登 字君涉。少游上庠，與陳覺民有研席之好，及覺民守泉，未嘗私干。卒，覺民誄以文，謂其窮經耻受，一命學道，深造大方。蔬茹如享太牢，燕處若奉五戒。張讀亦以隱君子目之。

李亢宗 字子能。朱文公門人。

黃謙 父命之人郡學習舉業，而謙徑來受學於文公。

趙彥慧 字凝遠。馳恩合得官，不取。真西山欲以逸士薦，辭。有《靖節年譜》二卷、《古錦囊詩》、《春臺詩話》行世。

韓雲瑞 字文叔。以父蔭得官，不調，取印曆大書《歸去來詞》。號宜休，有《耕煙小集》。

翁定 字應叟。年四十，不應進士舉，名公多與交。有《瓜圃詩》五卷。

元

諸葛泰

諸葛泰 有學問，皇朝修《性理大全》，多取其說。

皇朝

黃鉞 黃淑清

黃鉞 孝廉也。講學蔡文莊之門，爲東南弟子師。

黃淑清 河清弟也。自號曉江漁者。爲諸生，棄之去，入山耕讀，邦君賢大夫禮之，不應也。令顏容端與善，以艱歸，貽之書曰：「俗以仕宦丁艱曰放假，蓋謂歷官日多不能肆縱，只一居喪，當爲暇日，利田便舍，肥肉大酒，言出莫違，意着群應。人耳驗目，大都如此。昔呂東萊在艱講授，陸象山已議其非，何今古相遠，不啻雲泥？執事學有主腦，定是踏定一步也。」

惠安縣（七）

宋

謝文龍侄起宗。 劉鏡 張巽 江與權

謝文龍 字德翔。與弟維新以文章馳名。郡守陳覺民深器重之，曰：「二謝真江左人物。」維新少魁浙漕，早世。文龍三舉禮部，一貢太學，范祖禹、莊公岳並以國士稱之，亦未第卒。與文龍同時著名者，又有邑士郭浮休。

起宗 善評經史，自成一家。嘗著《野議》十篇，丞相趙鼎稱其材識高遠。累試南宮。卒，陳知柔銘其墓曰菱溪先生。

劉鏡 字叔光。與楊至、陳易、楊履正俱從游朱門，稱高弟。

張巽 字子文，一字深道，五代漳州刺史清溪之裔。父寓，知臨江軍，與張南軒共學。淳熙中，寓遣巽從南軒於長沙。及歸，南軒贈以二詩，指示爲學根本。巽歸，杜門玩養，人鮮知者。是時，朱學盛行於泉，如楊至、陳易輩，稱清源別派，而劉鏡叔光，尤稱高弟。巽間從游，因得所聞於晦菴者，心疑曰：「恐不止是。」走證武夷，晦菴以所嘗與南軒講論中和之旨告之，曰：「此某與南軒晚年畫一工夫也。」臨別，有請，晦菴曰：「南軒記嶽麓，某記石鼓，合而觀之，知所用力矣。」巽退，喜曰：「吾疑果是。」既歸，日從事涵養體察，久益明淨。或勸其著述，對曰：「尊所聞，則高明矣；行所知，則光大矣。」有草堂錦溪之上，學者稱錦溪先生。

江與權 字亞良。從學蔡白石及北溪，爲文古雅，以右選人官，兩選鄉貢。

元

陳士麟

陳士麟 字子信。性嗜學，多所周通，老宿弗逮。每取諸葛武侯「吾心如秤，不能爲人輕重」之言以自儆。所居在縣之烏石山，種稻盈郊，樹葉環宅。市書課兒，釀酒延客，或適意漁獵，放浪戴澤間。將死，囑其子同曰：「平生慕古，今且不起，喪事依禮，慎毋用二氏，非親知不受吊。」踰月而葬，題云：有元貞士烏石陳公之墓。

皇朝

柯著吳河合傳 黃克晦 陳增 朱昭 劉錄 吳天成

柯著 字景明，教諭熙之子。風骨巖峭，善墨梅，爲槎牙老幹，橫斜疏瘦之勢，精神絕出。同時有吳河萬水者，善墨菊，作傲霜、團露二體，尤盡其妙。二人家徒四壁，終不肯向人作寒乞聲。

黃克晦 字孔昭。家貧學畫，蚤依永春李氏，李故多藏書，克晦就其困敖中讀十年，遂肆力爲詩。其詩髣髴顏、謝，姿韻橫出。近體多引先秦、兩漢事，非昔人所經用者。句章沈明臣序其詩曰：「孔昭詩本之以雄渾，發之以春容，厲之以頓挫，紆之以沖和。情自景生，語必自鑄，日新造構，古質闡然。銖兩鈞停，肉好合度，大雅之道，稱無憾焉。」吾先子亦謂：「孔昭之詩，如人幽林，長薄其樹木，皆世所有，而鬱然翳翳，遂覺老蒼。歷下、瑯琊所稱，盧、謝未能或先。」克晦畫筆蒼勁，閉戶經月成者，尤可傳世。

陳增 字士陞。父煒，翁源知縣，爲人孝友醇謹。增二十二領鄉舉，避不就鹿鳴之宴，徒步而歸，閉戶劬書，脫粟布衣，不第。久之，其篤行好修，人稱前輩風度。

朱昭 字養晦，副使一龍父也。屢試不遇，肆力書史，見解出人意表。一龍舉進士，昭益廣求書籍，築樓誦讀其中，曰：「政暢吾慕古之懷。」嘗作《蠹木賦》，辭旨斐然，其辭曰：「小圃雜植菓木，間有蠹，不

暇治。暮春之月，衆芳競發，香氣襲人，予往玩之。或愛其枝葉之茂，而忘其心腹之疾，攀而隨折，因見蠹虫在中，動以待斃，感之賦焉。曰：方春發生，萬物爭榮，既靜觀夫自得，亦俯仰而含情。涉後園以適趣，愛佳樹之繁英，匪斧斤之斯伐，忽根株而自撥。相枝葉之無傷，而顛沛之何說？細觀厥木，外完中缺，豈綠竹之虛心，奚脉理之內絕？爰有一物，哲質素章，蝸蝓蠹蟲，穴於其中，殊屈伸而無據，若進退之難容，居然就食，名爲蠹虫。予於是歎歎悽愴，呼兒曹而語之曰：是余之過也。余知培其表，而不養其裏，維實之食，一至於此。廣而言之，亦風人之取譬也。兒曹曰：願卒聞之。余曰：噫嘻！凡茲植物，品彙不齊，叩其性質，則有陰陽、堅脆、貴賤、修短之殊蹊。是以神芝仙桂，生於絕域，長於天闕，根盤九陰，香薰日月，夏無炎蒸，冬無霜雪，鬼魅畏之，避不敢越。乃若三河之隄，五岳之麓，椅梧生於朝陽，栢栗聳乎故國，文梓則出走青牛，貞松則淒息白鹿。復有香生楓柟，才美楠楸，松子古度，平仲君遷，周則召伯所憇，漢則將軍坐焉。莫不紛披霄露，傲睨晨煙，風雲颺颺，節勁心堅，含聲抱律，黛色參天，巢鵲集鳳，無慮千年。故東海之廟，以白木名，西河之社，以枯桑稱，楊葉關於北陸，梅根冶於南陵，豫章以之名郡，刺桐因之爲城。是皆不蠹之木，永其壽命，而爲神人之所憑也。次則徙植河陽，移根楚畹，蒐園縹玉之娛，金谷綠珠之選，勤輿臺之栽培，窮昕夜之錘舂，燥濕是調，腹心無沴，花實任其開落，春秋忘其近遠。若大孤山淺壤，木雖有材，風霜摧折，牧豎撼排，鳴鴉啁鴉，茵壓蒼埋，徒使存心負節，淪沒蒿萊。外戴癭瘤，下拂塵埃，桂銷亡而莫惜，桐半死而誰哀？至如柑、橙、橘、柚之屬，層枝剌刺，含液抱膏，根抵何有於蟠蚪，疾病端起於秋毫。幾微不剔，至尋斧柯，嗟斯木之受病，遂付之無可奈何。載觀是蟲，初無種類，胡爲乎生？但有屑木之能，曾無聲音之異，命與木俱，木傾則死。惟人物之理一，吾於是乎有取。是故妹喜蠹夏，妲

己蠹商，褒姒蠹周，宦豎蠹於漢唐。使三季不蠹女寵，則國祚固未可論。漢唐不蠹宦豎，則天下可至今存。於戲！天地之性，惟人爲貴，端厥身心，統理萬類，逸居飽煖，無所猷爲，敗家凶國，與蠹同歸。物有小而戒大，事由微而至著，是用擬詞，比之風刺。」

劉錄 字廷紀。爲文學諸生，纂述疏義，教授生徒。所著有《學庸口義》、《詩經直解》、《讀詩記》，至《易》、《書》、《春秋》、大、小《戴》諸篇，各爲輯略。孝事父母，宗戚鄉里，處之得宜，人稱型範。

吳天成 字德渾。能詩。

德化縣(八)

宋

蔣明紀 張元德 黃公懋 陳文叔 張應辰

蔣明紀 字綱甫。七歲能誦詩說經，操大衍數，工五七言詩，詔免解二次。

張元德 長於講《易》，以六十四卦再重爲《易》書，繇象、大小象、爻辭、繫辭、說卦、雜卦皆具。自作筮法，以土作地盤，匏爲天體，中刻木八面，畫八卦，初撼得之爲下卦，再撼爲上卦，視其爻辭，以斷吉凶。

黃公懋 三舍法行，公懋得升於州。以不喜王氏《三經字說》，退而隱居不娶，讀書著文，有《和秦隱君詩》百篇。故寄食於從弟，自知命過，鹽櫛訣謝。

陳文叔 字元彬。博覽洽聞，文詞蔚瞻，名冠太學，中上舍優等，後學宗師之。未祿而卒。有《西笑遺筆》，人多傳誦。

集。

張應辰 字紹卿。該通經史，一時名流黃霆發、徐雷開、林汝作、鄭起東，皆出其門。有《禮記解

皇朝

余英、鄭起東、鄭師孟、鄒維、王廷鉞

余英 以奇童稱。宣德己酉，領薦第五，人惜其不永。

鄭起東 字子震。入太學爲文人，明經鄉校，師範蔚然。

鄭師孟 字醇冲。操履純端，窗几間，書聖賢格言以自警。三世同居，睦族賑鄰，事親教子，咸可師

法。

鄒維 諸生也。有古行。

王廷鉞 諸生也。有陰德，活人於死者。侄三聘，以孝稱。

安溪縣〔九〕

宋

尤台 鄭思永 林德秀

尤台 字公輔。八歲能屬文，腹稿立就。慶元二年，應童子科舉，中書試以「公則悅」賦，詞藻絕出。擬奏賜官，格於吏議，僅免三舉，不第而終。

鄭思永 字景修。好學篤行，蔡和愛其朴粹，妻以女。從和終身。著《易說》。

林德秀 字實之。家貧苦學，善屬文，有歌詩雜著傳世。

皇朝

鄭陞 吳昱 李亮 林鴻儒

鄭陞 成化間人。少業儒。失父，善事母，友諸弟，雖一錢尺帛，必歸母，不敢私。母病，躬湯藥，旦夕不倦。居喪盡禮，廬於墓側，鄉人重之。

吳昱 字時昭。賦性嚴毅，好吟咏，微醺後，輒誦古詩自娛。晚號介菴。

李亮 字文誠。家貧嗜學，事親盡孝，士論與之。

林鴻儒 字允德。諸生也。溫恭孝友，博學能文，精治《尚書》，郡士治《尚書》者皆從之。有《書經日錄》行世。子應漢，萬曆鄉薦。

同安縣(一〇)

宋

許衍 柯翰 許升 王力行 陳齋仲 許景陽 丘葵 魏秀才

許衍 衍之弟。隱居苦學，博通經傳子史。編《田舍墨記》四十卷。

柯翰 字國材。孝謹誠懇，自守介然，及門授經，人以百數。朱文公薄同安，屬治學事，引翰自助。

翰內行峻潔，衆嚴憚之，久皆化服。葺廬以居，取楊子所記「三年通一經」者以名其堂，文公爲作《一經堂記》。

許升 字順之。生長華宗，弱冠志道。朱文公簿同，升從游最早。居家，偕同志陳齋仲聚首淨障寺，又與石子舍、徐元聘、柯國材、陳汝美、王近思等友善。後遍交四方之士，若范伯崇、廖德明、林擇之、許敬之等，或相過從，或往來書問，論道肄業。文公稱其恬淡靖退，無物欲之累。所著有《孟子說》、《禮記文解》、《易解》等書。

王力行 字近思。游朱文公之門，苦學善問，深得旨趣。所著有《朱氏傳授支派圖》、《文公語錄》一卷。

陳齋仲 從文公游，文公勉其務實。

許景陽 字子春。從文公游，文公稱其意趣。

丘葵 字吉甫。居海嶼中，因自號釣磯。蚤有志考亭之學，初從辛介甫，繼從信州吳平甫授《春秋》，親炙呂大圭、洪天錫之門最久。風度端凝，如立鶴振鷺。宋末科舉廢，杜門厲學。所著有《易解義》、《書解》、《詩口義》、《春秋通義》四書。日講經世書，聲音既濟，圖《周禮》補亡。元時，倭寇至其宅，他無所犯，惟取遺書以去，故其著述多無傳者。

魏秀才 逸其名，居浯江之上。丘葵贈詩二章，其一：「屋茅蕭索泣寒蟲，獨自吟詩學已工。敗葉能令溝水黑，亂雲不放夕陽紅。半生辛苦空儒服，一歲蹉跎又朔風。不意窮鄉有奇事，暮春得拜席門翁。」其二：「月淡蓬門掩候蟲，窮通底解問天工。茶烹栗面紛紛白，燈吐花心灼灼紅。屢改新吟添硯水，密糊舊稿護窗風。相逢莫道龐公老，覽鏡先慙似老翁。」其人有太上隱者之風，不可使泯泯也。

元

沈祥

沈祥 事父母盡孝。至正甲午，盜起，民風雨散。祥負母逃海中之嘉禾島，盜躡其後，祥爲所掠，幸計脫，而不知母所在，衝賊鋒行求，晝夜號呼，不飲食者三日，始獲之巖穴中。母子抱持，悲喜交集，欲渡海回居，而囊裝既於盜手，乃質子彰，獲錢千緡，爲歸資。其事兄最友，數日不聚，卽中心欲然。知世將亂，深蟄不出，自號隱。高人韵士，或來賦詩爲樂，間里交口稱「良士，良士」。彰中國初鄉闈，上京師，會朝命需才急，不俟會試，選人爲吏部考功主事。祥沒，彰請宋學士濂銘其墓。

皇朝

周祐 顏弘 顏敦祥 李如玉 楊真 胡有耀 許開 傅鑰

周祐 字命申。學問該博，隱居教授，傳《易》說於漳郡，漳之《易》學，至今宗之。

顏弘 字篤任，唐魯公後也。豁達，篤孝友。嘗赴試秋闈，臨場適母病，奔歸，朝夕奉湯藥，衣不解帶者旬日。以兄歿子幼，二親老，遂舍舉業，傭書代耕，上事下育，所得學資，分散從弟侄之貧者。歲時朔望，事先盡禮，二親忌辰，雖年遠，哀哭如初喪。教人弟及鄉鄰里黨，必先孝弟忠信。見人死喪窮乏，輒罄助之。食無重味，一盂而已，人稱一孟先生。嘉靖初，有薦辟之詔，林希元丞南大理，以與王宣同薦，督學潘潢行縣，聘主邑社學，辭不就。

顏敦祥 字篤禎，與弘同族。天性孝友，飭躬勵行，博通經史，尤長詩草。甘貧守道，教授鄉里，生徒出其門者，咸知禮讓。居父母喪，枕苫寢塊者三年，家貧不克葬，衰絰不解。家居邑之金門所，郡倅至金門，聞敦祥，求見之，辭以衰絰在身。倅固請，遂以衰絰見。縣官屢聘賓筵，輒辭不就。

李如玉 纂集《周禮會註》十五卷，嘉靖八年，令其子詣闕進，詔嘉之。如玉究心《禮》書，有司以禮獎勤，給冠帶榮之。

楊真 林希元蒙師也。嘉靖丙午、丁酉歲，漳、泉大飢，當路主賑粥，真獨不赴，闔門餓死者七人。

胡有耀 字子謙。邑庠生也。輕財好義。嘉靖戊午，倭至其鄉，有燬散財連結禦之，度力屈，令其妻子宵遁，謂曰：「吾與衆盟，義無獨去。」明日，率其徒與鄉人併力拒賊，賊所得，罵不絕口，被戮獨慘。事聞，贈州同知。

許開 諸生也。懷奇博覽，善古文詞，所著有《滄南集》。

傅鏞 字國毗，都御史鎮之弟。其少時，則有馳馬鳴鏑之志，晚年折節爲詩，遍友四方豪俊，與同郡貳守陳紹功及鄉戶曹郎莊履朋中益，予兄大理評事喬遷齊孝及予相善。病且死，哀所爲詩，特從海上來謁予序之，曰：「吾不藉子無傳矣。」乃予叙國毗詩，謂其「一字未妥，千金不易。晝則忘疲，夜以申旦，不嫌其乏於具體，而以偏師求是於古人，其大致如此也」。

永春縣(二)

宋

黃以翼 王識 卓琮 顏褒 陳璣

黃以翼 字宗台。嘗受業陳北溪、蔡白石，莊毅有立，析理精詣。暮年記問益富，所著有《周易禮說》。

王識 字致遠。弱冠領鄉薦，博覽書傳，尤精星曆，嘗作《渾天圖》，每仲月爲圖，以驗天文盈縮。又作渾天儀，以布漆爲之，可旋轉，外作八卦桶承之。陳知柔爲刻碑題跋，每與識夜驗星象，畫乃畫圖，因作《觀星詞》贈之。

卓琮 字廷瑞。從陳北溪游，嗜學堅苦，以積累成功。凡所講論，能暢北溪之旨。

顏褒 自號唯菴，孝初孫也。妙齡游江浙，邃於經學，詞藻豐贍，書法尤精。講席一開，從者雲集，片言隻字，人爭寶之。嘗歲晚，吏來索逋，褒方講詩，笑謂曰：「且候講畢。」因請玉川先生洛城裏破屋數間而已矣，殊不經意。陳知柔《涵清閣詩》云：「追憶唯庵真可人，詩成咳唾筆如神。便登是閣一快掃，當有銀鈎鐵畫新。」族人伯錄，亦有隱者稱。

陳璣 字介行。學問該貫，尤長於詩，信筆立成，出人意表。嘗有《讀易詩》云：「從此不除窗外草，要觀天地發生心。」又曰：「須信生生是真易，疎籬依舊竹生孫。」

皇朝

李陽初 子應元。

李陽初 邑諸生也。謙謹縛紬，若不勝衣。幼孤，事繼母至孝，繼母沒，哭之傷肺，病瘁。終其身，好施予，尤急其族人，爲贖一粥子而婚之。比陽初沒，所贖子服陽初如所生。子應元。

應元 字思貞。萬曆中貢士，以父母在堂，無復仕宦意，一詣太學，不數月遽歸。鄉人有爲銓郎者，強留之不可，人咸稱孝。

〔校記〕

〔一〕「志」字，各本原脫，據本書體例補。

〔二〕「南安縣 惠安縣 德化縣 安溪縣 同安縣 永春縣」十八字，各本原脫，據本書體例補。

〔三〕「晉江縣」三字，各本原脫，據本書體例補。

〔四〕「劉志學」，各本原闕本傳。

〔五〕「曾孫」二字，各本原脫，據《林曉傳》補。

〔六〕「南安縣」上，各本原衍「泉州府」三字，據本書體例刪。

〔七〕「惠安縣」上，各本原衍「泉州府」三字，據本書體例刪。

〔八〕「德化縣」上，各本原衍「泉州府」三字，據本書體例刪。

〔九〕「安溪縣」上，各本原衍「泉州府」三字，據本書體例刪。

〔一〇〕「同安縣」上，各本原衍「泉州府」三字，據本書體例刪。

〔一一〕「永春縣」上，各本原衍「泉州府」三字，據本書體例刪。

閩書卷之一百二十八

英舊志 韋布二

建寧府 建安縣 甌寧縣 建陽縣 崇安縣 浦城縣 政和縣 松溪縣二

建安縣三

宋

丘濬 林志寧 余允文 游倪 曹晉叔 鄭儀孫 詹本 練來 葉夢麟 雷龍濟

丘濬 字思道。精曆數，絕意榮途，京洛名公頗禮遇之。嘗爲感事詩百首，辭多譏諷，執政欲誅之，仁宗曰：「狂夫之言，聖人擇焉。」遂薄其罪。又嘗著《長世論》五十篇，言用兵利害，龍圖學士田瑜繳進之，詔除萬年簿，不赴。

林志寧 游文彥博門下求教，彥博令往見二程，因使人送至明道處，歸語游酢、楊時二人，遂繇此詣見程氏。

余允文 字隱之。以孟軻亞聖，自司馬光作《疑孟》數篇，而其後李觀、鄭原著《常語》及《藝圃折衷》，皆肆詆毀，乃作《尊孟辯》三十餘條闢之。

游倪 從朱文公游，所著有《癸丑答問》。

曹晉叔 從文公游。

鄭儀孫 號翠屏。從丘富國學《易》。咸淳癸酉，應賢良舉。又明年，少帝北行，儀孫退而著《書易圖說解》、《大學中庸章句》、《史學蒙求箋註》、《性理字訓》，郡守吳某率幕屬迎於學，師事之。

詹本 字道生。溫言正行，高抗不仕。丞相江萬里欲薦爲郎，先致書於本，本方坐門前石磯垂釣，使者至，問本居，本給曰：「前。」卽持竿去，不知所終。

練來 一作來，字彥本。父幹譽，見縉紳。來累試禮部不利，閉門著書，有《大易發微》、《二禮疑釋》、《宋野遺民集》十卷。

葉夢麟 應聘赴臨安，少帝北行，遂隱西甌，以講學爲事。

雷龍濟 字耕祿。鄉貢進士，常舉義兵崖山，圖復王室，沒於萬石灘。

元

江應隆 周震一 蘇照 虞廷碩一作蘇〔四〕 劉邊

江應隆 自號菊隱。求學於謝疊山，疊山薦字之，曰：「仲龍，蓋取孔明長笑隆中，而時人以伏龍待之。」

周震一 家在城府，不妄交一人。謝疊山枋得客建寧，震一獨與相厚，疊山稱其「忠厚篤敬，言不妄發，行不妄動，翛然出塵埃之外，而可與神游八極之表」。子持敬，亦修真慕道，爲疊山所稱。

蘇照 字明遠。工詩文，尚儒術，後進多師之。至正間，以明經薦，至京預纂修事，欲授以官，以親老

辭。臨川劉灼贈詩，有「才子曾聞起建安，若爲金馬得辭官」之句。尤精墨菊山水諸畫，稱爲名筆。卒年八十。子伯厚，見緒紳。

蘇廷碩 字君輔。工詩文，尤邃舉子業。嘗編集《歷代詔令》四卷、《制誥》五卷、《古賦準繩》十卷。

劉邊 字近道。工詩。有《自家意思集》、《讀史摭言》若干卷。

皇朝

鄒伯陽 楊伯安 楊伯成 孫讓、錫。田汝楫 雷境 蘇鉦 連鏞 蘇塘 雷溫 吳真 蘇汧

張羸 倪應元 楊應詔 李培 滕元烈 楊量 劉欽 鄒漢 楊公載 蕭詔 朱爇

鄒伯陽 名文復。倜儻有大志，博學善吟咏。元末，隱居不仕。國初，大將胡廷瑞下建寧，圍城日久，廷瑞怒欲屠之，闔郡驚惶，太守翟公募耆德詣師，伯陽應命往見，言詞慷慨。廷瑞爲動曰：「姑聽於天。」封三牌，令探之。牌一鐵、一銅、一牙，決曰：「得鐵屠，得銅搜金珠，得牙活以蘇。」伯陽默禱，遂探得牙，建城以無他。

楊伯安 字文思。性敏能文。少孤，事母篤孝。洪武初，以人材薦，伯安辭母老不就。兄伯祥，應斗役虧糧，罪當死，伯安請母曰：「兄無嗣，兒有子，請代。」母泣，然其請。卽詣獄被械，歲餘臨決，忽遇恩宥。伯祥尋以薦授留守右衛知事。

楊伯成 字士美。事親孝謹，尤篤友子。一舉茂才，再舉孝廉，皆不就。後以子大學士榮贈官。

讓 字允謙，伯成孫，榮仲子也。居家孝友敦睦，散粟周貧。購田，合族里有嫁娶喪葬不能爲禮者，分貲助之。沙、尤寇劫掠鄉村，民居悉燬，過讓廬，相戒勿犯。景泰、成化間，兩輸粟備軍興，賜勅旌門。

錫 字允嘉，榮第三子。魁梧嚴重，通諸經大義。燕居未嘗去冠服。自奉儉約，訓諸子以盈滿爲戒。以孫旦貴贈官。

田汝楫 字仕濟。喜讀書，尤攻性理之學。每見地上行蟻，輒迂跡避之。家畜鷄豚，非祀先、奉親、待賓，不忍耗殺。時時出游山水，吟咏嘯傲，盡醉而歸。子忠，見縉紳。

雷境 字彥達。幼孤，事母至孝，究心典籍。家赤貧，豁如也。永樂初，以薦至京，固辭歸。鄉人稱慎齋先生。

蘇鉦 字良聲。孝友，喜讀書，好吟咏。善書翰，寫竹石花木山水，態韵超逸，片楮半縑，人所珍惜。

連鏞 字文韶。父智，見縉紳。鏞強記能文，嘗以《春秋》應舉，弗第。正統間，邑有強賊，陰倚沙、尤賊鄧茂七聲勢爲亂，鏞奉檄招撫之。賊從復叛者再，鏞間關山谷，反覆勸諭。賊將懷貳，乃行間誘之，使自相攻，遂設伏殲其首惡，群盜一時就擒。事聞，詔授冠帶。

蘇塘 字良璇。好學善書，剛毅耿介，鄉推孝友。正統間，沙、尤寇起，及鄰鄙邑，有司以鄉里素服其信行，委以招撫。塘躬抵逆巢開諭，衆皆退聽。

雷溫 字存直。景泰七年鄉舉。篤學修行，年三十餘卒。

吳真 字楷臣。天順六年鄉薦。穎敏苦學，非禮不動，人稱懿行。

蘇洵 字景濟。成化改元，詔藩郡召經明行修之士，郡守以洵應薦，以疾辭歸。洵善書，能染竹石梅菊。所著有《貽拙集》、《燕游倡和錄》。

張羸 字惟貞。隱居山中，日讀《周易》、《老子》。家貧，以耕自給，號半犁子。嘗著《飲書》，以擬《酒

經》。一日，送吳中立北上，出《夢游詩》示之曰：「將歸矣。」既抵山，自爲挽詩、墓銘，手稿類封一篋，端坐而逝。

倪應元 字泰初。郡諸生。事父母以孝聞。遭喪值火，盡棄資，扶柩出走，露宿守之，縣是廢箸貧，嗜書史，著述自娛。

楊應詔 字邦彥。嘗讀書武夷天游峰，因號天游山人。少時，從其祖松宦學，祖試叩所欲爲，應詔言：「欲讀盡天下好書，^五幹盡天下好事，做盡天下好人。」年二十，游庠序，謁朱文公祠，仰而嘆曰：「他日不俎豆，是非夫也。」年三十，舉於鄉。十上春官，不第。其始上春官時，崑崙山人張詩者，見其文，稱爲司馬子長、李太白復生，應詔不屑也。久之，遍游趙、齊、魯間，卒業南雍，得奉常呂涇野柵之學，喜其淵源有本，遂師事之。歸而創道宗堂華陽山，奉祀孔聖，并顏、曾、思、孟、周、程、張、朱諸賢及涇野。其中揭涇野所嘗著教壁間，日與參對。年友溫陵蔡元偉，亦潛心斯道者，遂自泉往建相聚砥磨。而他諸名公，若鄒東廓、守菴、王龍溪、唐荆川、順之、魏莊渠、校、章介菴、袞，或見而心合，或聞而神往也。應詔之學，以寡慾正心爲立本，以不愧天爲歸的，於古今壯猷、奇烈、忠義、慷慨之事，峻嶒激發，夢寐見之，雖沉潛深靜之意少，而心懷軒豁，殆亦聖門之謂狂者。所著有《閩學源流》及《困學二錄》，又有《五經辯疑》、《四書要義》，以發聖賢之旨。有《衛道錄》以闢禪，有《日史》以自記。子德興，睦州司訓，有士行。

李培 字汝耘。李肅愍默子。隆慶間恩貢，事繼母盡歡，撫孤侄若己出。博學多文，虛襟雅度，郡里推重。

滕元烈 邑廩生。嗜學篤行，見義必爲。

楊量 字子充。朴茂端方。少爲諸生，有聲。老而精醫，多所存活。

劉欽 字敬止，宋屏山先生後。建安學生。真率守貧，捐田讓族。妻死不再娶。執喪廬墓。雅志聖賢之學。

鄒漢 字雲卿。郡庠生。事父母孝愛，讓產與弟，自授生徒。每夏秋之交，依古方合愈痢丸藥施療。有死無棺、債難償者，悉拯助之。

楊公載 歲貢士。積學能文，孝友有聲。

蕭詔 歲貢士。爲人孝友。

朱爇 有士行。

甌寧縣〔六〕

宋

張禧 程元 童伯羽 黃森 童成大

張禧 事母至孝，里人爲立純孝坊。造橋，名橋曰順母。

程元 字善長，一名駘仲。溫恭曠達。自預舍選，一時後生學士皆慕其行。郡守張銖，以經明行修薦於朝，不報。時龔何亦以廉節著，胡憲興教鄉郡，延元與何參學政。

童伯羽 字蜚卿。入雲谷師事朱文公，充然有得。時學禁方厲，遂不求仕進，創樓讀書其中，文公嘗造訪之，名其樓曰醉經，堂曰敬義。繇是伯羽以道自任，日以敬義之道化行鄉里，趨向彌衆，時人以敬義

先生稱之。所著有《四書集成》、《學經衍義群訓》、《解晦庵語錄》。

黃森 字水心。父駟，宋季爲吏部郎中。森淹通書史，諸子百家莫不精詣。景定間，預鄉薦。國亡，不仕，隱天湖山，築室數椽，四圍植栢，以不及首陽爲媿。

童成大 字元偉。博極群書，窮研性理，優游不仕。謝枋得作《功名富貴圖》贈之。有《松壑集》。

皇朝

童叙 童文貞 范澄 王仕策 陳錢 張鳳鳴 童勁 楊汝材 謝桂芳 任本信 李懋治 滕

仲篋

童叙 字景和。篤好問學。永樂間以孝廉薦，疏乞養母，終身不仕。所著有《臨清集》。

童文貞 字景祥。永樂戊戌，鄉人陳銅謀爲不軌，詔發兵勦之，時總戎欲盡屠其境，文貞挺身軍門，陳善惡，乞特捕元兇，且請以一家爲質，總戎感動，良民賴全活。所著有《玉溪集》。

范澄 字本清。弘治間，繇貢入太學。有志古人之學，讀書以真知實踐爲主。少喪父，事母楊甚孝，母歿踰禪，猶不肉食。里人有負富室租，將鬻妻，澄聞，出粟貸償，鄉間高之。子嵩，見縉紳。

王仕策 字子長。正德間鄉舉。刻苦力學，士輩稱重。

陳錢 字大用。平生慎言笑，重然諾。每稱引，必舉祖忠肅公也。尤慷慨好施予，然嚴峻不可干以私。三山林文安、陳都憲，皆與爲詩友。

張鳳鳴 嘉靖間邑諸生。蚤孤，泣血骨立。事母孝，母死，絕酒斷葷，目爲眩瞽，數歲復明。

童勁 貢士。端方朴實，輿論推重。

楊汝材 字以達。輕財慕義，遇歲當貢，輒以讓人。北上春官，不以功名爲意。不仕而卒。

謝桂芳 字桂卿。萬曆元年鄉薦。工詩文，有《泰巖編》、《心經蠡測》等集。

任本信 字以實。醇謹篤學，事繼母、撫孤侄盡道。萬曆十六年鄉薦，杜門勵節，卒。家無半畝，環堵蕭然。

李懋治 字克修。萬曆二十五年鄉薦。醇謹重名節，事兩繼母盡孝。

滕仲篋 貢士也。事祖母葉氏，色養備至，後葉年登百歲。

建陽縣(七)

宋

熊知至 游復 歐陽凱士 蔡發子元定。元定子淵(八)沆。沆。劉文伯 江明弟廣 吳翌 李從禮

陳萬年 吳明志 劉清夫 劉淮 魏椿 周明作 吳雉 游開 熊慶霄 翁泳 朱沂

熊知至 字意誠，哀四世孫。博學工詩，天聖中，五舉不第，歸隱鰲峰，有《鰲峰隱人集》。劉文簡贊之曰：「鄉言善士，世號儒宗。止而不第，歸隱鰲峰。研精蠹簡，彈拊絲桐。愧無冰鑑，誰識卧龍？」

游復 字執中。性資孝愛。總角，強學砥礪，竭力養親，家乏經月之儲，而親意未嘗不怡。既壯，學富行修，鄉里旁郡，見服聞悅，遣子弟從游者，遠近相屬。其學以中庸爲宗，誠意爲主，閑邪寡慾爲人德之途，晝驗之妻子，夜考之夢寐。其與人謀，不啻自己，其教人，禁切其不善，而開其善，不啻如其父兄。亦或以忠誨成懟憾，復終不改，曰：「寧人負我，我毋負人。」一舉有司，不第而止。楊龜山志其墓。

歐陽凱士 字彥成。爲文敏健。建炎間，一舉不第，屬兵興，上書論當世得失，時相以爲狂躁，編管洪州，久之得還，徜徉玩世，預知死期。有《無旁集》一編。

蔡發 字神與。父諒，見縉紳。發高簡廓落，不與世俗俯仰。去游四方，見聞益廣，遂於《易》象、天文、地理三氏之說，無所不通，而皆能訂其得失。晚號牧童老人。子元定。

元定 字季通。十歲時，父教以讀《西銘》。稍長，則又示以《程氏語錄》、《邵氏經世》、《張氏正蒙》諸書，曰：「此皆孔孟正脉也。」元定深涵其義。既長，辯析益真。讀書西山絕頂，聞朱文公名，往師之。文公扣其學，大驚曰：「吾老友也，不當在弟子列！」遂與講論諸經奧義，每至夜分，四方來學者，俾先從質正，而後折衷之。翁季錄、太常少卿尤袤、秘書少監楊萬里，聯疏薦於朝，召之，堅以疾辭，世人謂之聘君。韓侂胄擅政，設學禁，以空善類，一時臺諫承風排擊，尚隱姓名。至沈繼祖、劉三傑爲言官，公然連疏譏詆文公，併及元定，坐謫道州。州縣捕元定甚急，元定聞命，不辭家就道。文公與從游者數百人，餞別蕭寺中，坐客有興歎泣下者，文公微視元定，不異平時。杖屨同其子沈行三千里，踵血爲流，無幾微見言面。既至，遠近來學者甚衆，州士子群趨席下。卽有名士挾才簡傲，非笑前修者，亦心服謁拜，執弟子禮，人爲語曰：「初不敬，今納命。」愛元定者，謂宜謝遣生徒，元定曰：「彼以學來，何忍拒之？若有禍患，亦非閉門塞竇所能免也。」貽書訓諸子，勿以吾得罪故，遂懈一一。謂沈曰：「吾欲安靜還造化，可謝客。」閱三日，卒。侂胄既誅，贈迪功郎，賜諡文節。元定於書無所不讀，於事無所不究義理，洞見大原，下至圖書、禮樂制度，無不精妙。古書奇辭奧義，過目輒解。文公疏釋《四書》，及爲《易詩傳》、《通鑑綱目》，皆與元定往復參訂。《啓蒙》一書，則屬之起稿，嘗曰：「造化微妙，惟深於理者能識之，吾與季通言而不厭

也。」及葬，誄以文曰：「精詣之識，卓絕之才，不可屈之志，不可窮之辯，不復得見矣。」學者尊之曰西山先生。所著書有《大衍詳說》、《律呂新書》、《燕樂原辯》、《皇極經世》、《太玄潛虛指要》、《洪範解》、《八陣圖說》，文公爲序。子淵、沆、沆。

淵 字伯靜，號節齋。與弟沆、沆並躬耕不仕。元定春陵之謫，淵事母家居，備極孝誠。所著有《周易訓解》、《易象意言》、《卦爻辭旨》、《古易協解》、《大傳易說》、《象數餘論》、《太極通旨》等書行世。

沆 字復之，元定三子。使淵紹其《易》學，沆紹其《書》學，而以所發明《春秋》屬沆。沆一日讀《易》，豁然悟曰：「《易》一卦一爻，爲義各異，謂《春秋》以一例該衆事可乎？」讀《書》至「道心」「人心」，則歎云：「《春秋》二百四十餘年間，諸侯大夫行事，發於道心者無幾。聖人於贈仲子納郛鼎，皆據大義以止私欲之流，一書綱領，率在此矣。」沆所聞父師之傳以開示後進者，以「敬」爲入德門戶，「義」爲一身主宰，復爲學者遷善改過之幾。時時以「敬」「義」示人，與人講明《復》卦，言當以「不遠復」爲法，以「頻復」爲戒。所著《春秋五論》行世。人稱復齋先生。

沆 字仲默。文公晚欲著《書》傳，未及遂，以屬沆。《洪範》之數，學者久失其傳，獨元定心得之，然未及論著，曰：「成吾書者，沆也。」沆受父師之記，沉潛反復數十年，然後成書，多發明先儒所未及。其於《洪範》數，謂體天地之撰者，《易》之象，紀天地之撰者。《洪範》之數，數始於一奇，象成於二偶。奇者，數之所以立；偶者，數之所以行。故二四而八，八卦之象也。三三而九，九疇之數也。繇是八八而又八八之爲四千九十六，而象備矣。九九而又九九之爲六千五百六十一，而數周矣。《易》更四聖而象已著，範錫神禹而數不傳，後之作，昧象數之原，窒變通之妙，或卽象而爲數，或反數而擬象，洞極有書，潛虛

有圖，非無作也，牽合傳會，益晦自然。嗟夫！天地所以肇，人物所以生，萬事所以得失，莫非數也。數之體，著於形，數之用，妙於理。非窮神知化，曷足語此？待行道州，父子間常以義理相怡悅。父歿，徒步護喪返，年僅三十，屏去舉子業，一以聖賢爲師。元定著律呂書，演八陣圖，皆爲文公所歎重，然學者鮮關其微，間以叩沈，毫析縷解，至象緯運行，陰陽向背，歷如指掌。卜居九峰山，邃奧重掩，雖當世名卿，物色求訪，不屑就也。卒，謚文正。皇朝正統間，詔從祀孔子廟庭。成化三年，進封崇安伯。嘉靖中，仍稱。子模、杭，見縉紳。

劉文伯 從韋齋游，構一室，榜曰清軒，讀書徜徉，與客論文其間，悠然不知日之夕也。劉子鞏寄詩，有「中郎言語妙天下，得非游世厭營營」。其稱許如此。

江明 字清卿。父琦，見縉紳。明以童子見張魏公，即開口論天下事，魏公奇之。既冠，益從諸老游，讀書問學，探討不厭，持守踐行，造次規矩，其恬曠虛遠之懷，安靜篤實之操，鄉人無不悅而親之，望而敬之。其始亦嘗爲浮圖學，後乃孳孳於修身進德，不以歲年之晚，病疾之侵，少有自安之意也。卒時，年六十二，篋無完衣以斂。一子宗老，方七歲。鄉人無親疏賢否，哭之皆出涕，退而相與咨嗟悼歎，無異詞也。弟膺。

膺 字子服。從朱文公游，稱爲老友，吟句多佳，輒酬和之，時與往返論辯。蔡元定謫春陵，膺載俎遠郊，涕泣而別，群儕皆爲感動。

吳翌 字晦叔。蚤孤。踰冠，游學衡山，師事胡五峰，聞其所論學問之方，遂捐棄科舉學。五峰歿，與其從弟廣仲、從子伯逢、門人張敬峰游，既誦其所聞於五峰者，而又上稽前古聖賢之言，中攬前世先儒

之論，下引四方朋友之說，參伍辯訂，去短集長，其左右出入，雖不專主於一家，其大要以胡氏所傳爲宗。其爲人忠信明決，通微曉事。與人交，表裏殫竭，心所不安，告語切至。張氏門人，在衡湘者甚衆，無不往來參決。卒買田築室衡山下，與賓客從容其間，讀書咏歌，愴然有以自樂。年四十九卒，竟葬衡山。

李從禮 字勉仲。兒時與文公同學，後試禮部不偶，遂絕意仕進。其詩清新穩密，時出巧思，偉麗可喜。

陳萬年 字宗之。殿中侍御史洙曾孫也。洙，仁宗朝抗疏立儲，未報而卒。司馬文正兩爲請於朝，後朝廷屢修嘉祐定策功，洙獨不與，萬年憤惋，具事以聞，章下任事者，不報。復捐書廢業，觸犯寒暑，僕僕奔走塵埃中，必求暴其祖之德善，以求聞於後世。其行也，朱文公爲文送之。

吳明志 剛介有志操，雅饒意趣，有文集數十卷。

劉清夫 字靜甫。精詩學，尤長於樂府。

劉淮 字叔通。博學能文，爲詩不事雕刻纂組而平易從容，最有餘味。朱文公嘗當風雪寒夜擁爐讀淮詩而跋之曰：「予見叔通詩，佳句多矣，獨不見此卷，豈予所好者，乃叔通所大不得意者耶？」吳雉作《感秋賦》，初發深省，其末寄意欲逃之麴蘖之間。淮以碩果不食者屬之。文公曰：「如叔通，可謂得朋友之職矣。」

魏椿 字元壽。從朱文公，有《戊申語錄》。

周明作 字元興。從朱文公游，有《壬子問答語錄》。

吳雉 字和中。從文公游，所錄有《文公問答》。文公卜居考亭，鄉人作聚星亭，欲畫荀、陳遺事於

屏，無從得本，雋考究車服制度，時推博雅。

游開 字子瑩，酢從孫。從文公游，文公稱其文學議論有餘。

熊慶胄 字竹谷。少受業於蔡淵，後游真德秀、劉垕之門，潛心問學，不求聞達。所著有《三禮通議》、《春秋約說》、《中興三朝通略》，又有《學庸緒言》、《心經集傳》、《采詩小紀》、《史學提綱》、《敬思齋》、《直方齋》等編。

翁泳 字永叔。始祖郛，見僑寓。泳篤志好學，從蔡節齋游，與熊竹谷、蔡覺軒爲同門友。註釋《河洛運行講義》。學者稱思齋先生。

朱沂 字泳道，文公曾孫。累薦遺逸，不起。與謝枋得游，枋得稱其「論古今人物高下、國家興慶、善類仕止久速之故，脫盡華葉，獨存根株。使其老爲太平民，正所謂胡瑗嘉祐真講官也，生不逢時，可爲浩歎」。

元

王佛生 魏慶之 胡本

王佛生 字子善。兩舉不第，尋棄去，隱溪源。布衣蔬食，巖游川觀，吟咏自適。

魏慶之 字醇甫。師於王晟，得考亭學。中歲留情詩賦，種菊盈籬，詠觴自適，號菊莊翁。手編《詩人玉屑》若干卷，而尤以施舍稱。

胡本 字貫通。父喪，廬墓，啜粥三年，朝夕悲慟。年四十五，卒。守芮麟篆其墓碑曰孝子菊莊先生之墓。

皇朝

蔣易 王慶 朱洵侄榮，曾任孫秉鈇。 袁紱 李繼元 李世科 趙觀本

蔣易 字斯文。篤信好學，工詩善屬文，有《鶴田集》及編《國朝風雅》行世。

王慶 字仕俊，佛生長孫。曠達好吟詠，建安楊文敏欲疏薦之，咏牛寄意。年七十餘。

朱洵 字宗信，文公八世孫。性質醇介，而多慷慨之行。正統庚申，歲大饑，賑粟數百石，重建武夷精舍，置唐石墓田，刊文公年譜，修葺考亭書院。一日，舟行泊漳灘下，有後舟遭溺，亟令救出，延之舟中，給以衣食資斧，其人于忠愍公謙也。後朝議爲聖賢之後立博士，忠愍以洵聞，割下建陽，洵言：「當長某，不敢踰次。」人多其讓。

榮 文公九世孫。好善樂施，歲凶，蠲粟助賑，縣官義之。

秉鈇 文公十二世孫。履繩蹈矩，事繼母至孝。潛心家學，多所發明，生徒從游甚衆。

袁紱 字行甫。事親孝謹，失偶不娶。喜賑人急，傾橐燔券，一無所吝。晚游太學，行善益力，年八十餘卒。孫天爵，亦有善行。

李繼元 諸生也。慈孝好義，初補弟子員，痛父早喪，乞養母，棄科舉不就。嘉靖間，賊警至，倡衆防禦。歲饑輸粟助賑。

李世科 字汝登。有孝行。父朝佐，瀏陽令。朝佐時遭疾，世科夜籲天滅己齡以益父算，疾尋愈。舉萬曆鄉試。居恒布衣徒步，恂恂鄉曲。卒年四十八，人惜未究。

趙觀本 字子立。邑諸生。少躬學問，晚而歸禪，曰：「吾儒闢佛，未諦內典耳，苟有益於心身性命，

何必陰收陽斥？」時對客語，非啓以明性體、收放心，則勉以敦善行、積陰德，曰：「吾蓋學佛，而益知爲儒也。」

崇安縣〔九〕

宋

詹先野 翁邁 劉元振子勉之。學箕〔一〇〕 哀謙 游中孚 彭止 江鉢 詹繼〔一一〕 黃鉢

翁易 楊驤族弟道夫。道夫子若海。 彭巖肖 丁堯 詹樞 趙必連〔一二〕 劉濟 范師孔 安實 鄭德

普 詹琦

詹先野 字景舒。經史諸子，歷覽無遺。天聖四年鄉薦，繼應賢良科，隱居不仕，築室廩江，嘯咏山水。

翁邁 字和冲。年十二，爲郡舉首，邑侯歐陽竦試而奇之。郡守元暕，以其穉齡，不甚加禮，且扣所讀何書？邁曰：「近講相鼠之詩。」暕異其言，尚意其詞采未逮，及宴鹿鳴，乃遣小妓索詩。邁賦云：「年方十三四，嬌羞懶舉頭，舞餘駒皎皎，歌罷鹿呦呦。近座香先噴，持盃玉更柔。高唐人去遠，誰與話風流？」守大稱賞。

劉元振 字君式，劉幽之後。幽，別見。元振少沉靜，有器識。季父照，當任子，將屬元振，辭與其弟貺。弱冠游太學，持身有禮，衆敬憚之。國子先生呂大臨、游酢，皆與友善。元豐中，士子方尚文華，元振獨沉涵載籍，深造義理，以是不合有司，遂篤意養親，放情泉石。子勉之。

勉之 字致中。自幼強學，肆筆爲文，滂沛闕闕，凌厲頓挫。踰冠，以鄉舉詣太學，時蔡京用事，禁士挾元祐書，師生收書連坐，罪至流徙，名爲一道同風，而實以鉗天下之口。勉之心知非是，陰訪伊洛程氏之傳，得其書，藏去，俟深夜，同舍生熟寐，乃始探燂燃膏，潛抄默誦。涪陵譙天授嘗從程氏游，兼邃《易》學，適以事至京師，勉之聞，卽往扣，盡得其本末。一日，棄錄牒，揖諸生，器歸，道南都，見元城劉忠定，過毗陵，見龜山楊文靖，皆講業焉。而忠定尤奇之，留語數十日，告以平生行己立朝大節，以至方外之學，無不傾盡。勉之拜受其言，精思力行久之，若有得。與籍溪胡憲族人子輩，日講論切磋，結屋建陽之蕭屯，讀書力耕，一時賢士大夫高仰之。中書舍人呂居仁與同列曾天游、李似之、張子猷共薦於朝，特詔詣闕。既至，秦丞相檜爲其事非己出，心不能平，時又方決屈己和戎之策，意山林之士敢觸忌諱，尤不欲使見天子，第令策試後省，給札上對。勉之卽日謝歸，杜門高卧，十餘年。故相趙鼎出鎮南州，道出里門，紆轡入謁，坐語移日，彌加歎重。故與朱靖獻善，女配文公。所居有白水，人號白水先生。

學箕 字習之。父珩，見縉紳。學箕恬於仕進，年未五十，隱居南山下，週遭竹樹，左右圖書，時時扁舟游泳九曲溪中，煙霞魚鳥，悠然有會，曰：「如此方是閑居士。」所著有《方是閑居集》。劉淮稱其詩摩香山之壘，詞拍稼軒之肩，至若松江嘯遍，直欲與坡仙爭衡。

哀謙 字彥先。溫言正行，高亢不仕。建中靖國間，耕隱縣之黃洋原，結庵其上，名曰玉泉。繙閱千古，綜緝百序，絕不以聲勢爲念。

游中孚 字大信。博文強識，《春秋》、《左傳》、漢唐史記，成誦如流，能言其得失同異。李光知宣州，會李成擁衆攻城，議遣官求援於岳飛，道路阻絕，僚屬憚往。中孚時爲光門客，慨然請行，挾十騎，從間道

走太平，見飛與飲，屢起請，飛曰：「君姑飲，援兵已至竟陵矣！」圍遂解。事平，光欲請於朝官之，中孚力辭，竟不仕。

彭止 字應期，自號漫者。嘗謁辛棄疾，值其晝夜，（一三）題詩而去，辭云：「棋子聲乾案接塵，午窗詩夢煖於春。清風不動階前竹，誰道今朝有故人？」棄疾覺，遣人追之，延留累月。所爲詩，皆清麗典雅。有《刻鵲集》。

江鉢 字貴叔。父墳，見縉紳。鉢聰敏絕人，十歲應童子科，賦《並蒂梅》詩，聞者歎賞。紹定中，與兄鎔再舉於鄉，後侍墳之永平，受業魏了翁，遂高卧廬山，講明正學。嘗賦《隋堤柳》，詩云：「錦纜龍舟萬里來，醉鄉繁盛忽塵埃。空遺兩岸千株柳，雨葉風花作恨媒。」

詹錫 字勝甫。恬於榮利，與朱文公、蔡元定、江必大諸賢，講伊洛之學。築涌翠亭，聚書千餘卷，吟咏其間。

黃鉢 字子厚。朱文公年十五六時，與相遇於劉屏山齋中，鉢少文公一歲，讀書爲文，不相上下。一日，忽踴躍猛進，出語驚人，文公歎其超然不可追逐。其後詩文益工，琴書益妙，而文公有志於學，不暇與鉢較量文字間矣，然每得其詩文筆札，未嘗不賞歎移日。鉢文學太史公，詩學屈宋，書隸學魏晉以前，其於騷詞，能以楚聲古韻爲之節旋，抑揚高下，俛仰疾徐之間，凌厲頓挫，幽眇回鬱。晚節，詩彌高古，遂與世亢，至不復可以示人，或者得之，亦不省爲何等語也。

翁易 字粹翁。通六經，尤長《春秋》。嘗與計偕，從劉燾游，因得登朱文公、蔡元定之門，遂不介心青紫。講明奧義，往返辯難，悉得旨歸。晚歲，授徒竹林精舍，人稱竹林先生。子甫，見縉紳。

楊驥 字子昂。從學文公，有己酉、甲寅《問答》。族弟道夫。

道夫 字仲思。游文公之門，屢有問答。嘗舉孔、顏所樂何事以質文公，謂是：「私意淨盡，天理昭融，自然無一毫係累。文公深然之。子若海。」

若海 從文公游，有《語錄》。

彭巖肖 嗜學不倦，詩文窺韓、杜戶庭，指肝剡腎，無一字輕綴。縣尹楊補植清獻梅，命賦，云：「清獻堂前樹，無枝可著春。豈知三百載，復有種花人。」慶元中領鄉薦，前輩咸以老成禮之。

丁堯 從文公游，篤厚慈良，有志爲己之學。早卒。

詹樞 好學粹文，不苟仕進。邑令陳樵子重建武夷精舍，延樞與熊蒙正爲士人講說，後輩欣然從游。

劉濟 字應徐。有詩名，嘗題趙必漣梅花莊云：「莊後莊前千萬枝，元方題扁季方詩。何當把酒對花樹，坐對參橫月落時。」有《日行辯》、《明德辯》行世。

范師孔 字學可。咸淳中預薦，肄業武夷書院。三司辟充講書，橫經析理。與子棄俱能詩，所爲詩文號《畫餅編》。日與鄭德普、趙若櫟唱酬，名相伯仲。

安實 字子仁，哀長吉曾孫也。以哀爲嫌，遂易今姓。師事熊禾，聚徒講學，其憂憤鬱懣之氣，往往發之文章。及卒，建安翁植誄之曰：「子仁氣激乎鯨海，學傳於鰲峰，絕塵險。詞拔神牙而破鬼膽，鉤玄幽思，出月脇而穿天心。」

鄭德普 字汝施。幼穎敏淹洽，刻意爲詩，與趙若櫟、范師孔游從唱和。其題靈巖云：「山蒸雲氣晴

能雨，泉挾風聲夏亦寒。」題齊雲峰云：「石潤黏蒼蘚，澗高流白雲。」咏南樓云：「雁斷風仍急，烏啼天正陰。」皆佳句也。

詹琦 字景韓。慕韓魏公爲人，故名琦。宋末，隱武夷山南，築靜可書堂，與徐幾日以聖學相勵。幾稱其孝弟忠信，金石君子也。有《滄浪集》。

元

趙若 彭炳 江志

趙若 字順之。工詩，通音律。丞相蒙古夕人閩，見器重，薦於朝，授同安尹，不就。高丞相開閩省，三使人聘之，強爲一見。勸之仕，不從。有《澗邊集》二十卷。

彭炳 字元亮。詩倣陶、柳。游齊秦都下，聞昌平隱者何得之，遂往謁之。駙馬烏谷孫事以師禮，朝野自是知名。至正中，徵爲端本堂說書，不就。有集一卷。

江志 字繼祖。事熊禾，私淑文公。刻意精詣，士從游者隨材質高下，皆有所得。延祐中，歲大侵，至殺人相食，志毀家賑恤，邑令夾谷山壽列薦，省劄授教迪郎。

皇朝

黃賓 程久中

黃賓 字朝用。以邑庠生入南雍，文行最六館。援例歸省，（一四）中途聞父喪，匍跣還葬，蔬食廬墓。親族有不克葬者，推地與之。卒之日，奔走哭弔者相屬。

程久中 字貞甫。嘉靖初，以恩貢選，讀書胄監，逸才續學，揮毫拂楮，頃刻百餘言。海內知名士，往

往託交八館諸生，皆自謂不及也。

浦城縣（一五）

宋

黃元 黃孝綽 張彝憲 張師寓

黃元字清臣。對人野率，似不能言，而文字奇偉。年十五，以文謁章得象，得象奇之。游錢塘，贈林逋詩，逋尤激賞。時王隨知杭州，奏禁西湖爲放生池，元作詩數百言以頌，士人爭傳之。有《東溪集》二十卷。

黃孝綽父覺，見縉紳。孝綽再舉進士，不第。嘗游舒州潛山，樂焉，自號潛叟。子萃，仕至職方郎中，每歸省，孝綽必使條狀所治事，事當理，則開顏爲欣飲。

張彝憲字季常。博學多聞，放懷林壑。咸平初，楊億自括蒼解郡趨朝，凡兩造其居，因贈以詩，京師貴游諸公，皆爲屬和，朱文公復爲序之。子泌，見縉紳。

張師寓字虞佐。耿介不苟合，從游敬畏，號鄉先生。及屬壙，友張具瞻來視疾，指心示之曰：「血氣枯竭矣，而一點不動。」

元

徐添祿 林童

徐添祿字仲貴。恬尚高隱，勸之仕，不應。其家開渠得金，曰：「此鄭氏宅也，蓋其先世瘞是，而子

孫莫之知。」召鄭歸之。子奇，見縉紳。

林童 字本初。嗜儒淳行。三歲失怙，事母稱孝。鄉有死喪無告者，濟以棺斂，人高而德之。

皇朝

周思 葉儒 蘇世

周思 字子睿。先世原慶爲浦令，德居民，遂卜居焉。思耽山水，嗜吟咏。養親溫清備至，事後母尤篤。嘗遠游，聞親病，卽奔歸視藥，久之，焚香籲天，願以身代。割股糜藥以進，病良已。及卒，奉葬龜峰，晨夕呼號，自名爲見峰子，曰：「見峰如見親也。」著《見峰集》。

葉儒 字敬善。涉獵書史，兼善繪菊，縉紳士大夫皆樂與游。永樂甲午，歲歉，作粥濟饑，全活甚衆。民有公賦不能辦者，輒代之輸，人稱長者。

蘇世 字公載。讀書好禮，不干仕進。精醫施藥，歲歉周急，鄉人稱焉。

政和縣（一七）

唐

范處士

范處士 唐末人。淳厚，篤孝友。生九子，教以義方。鄉人有爭訟者，處士援聖賢之言開諭之，皆化服去。

宋

陳朝老 謝安時

陳朝老 字廷臣。祖伯弓，五經主簿。父頤，吉水丞。元符末，詔求直言，朝老以太學生論事剴切，臺諫受蔡京風旨，目爲狂妄。大觀三年，徽宗用何執中爲左僕射，朝老言：「陛下卽位以來，凡五命相。韓忠彥則庸懦，曾布則賊污，趙挺之則蠢愚，蔡京則跋扈。今復相執中，是猶使蚊負山也，欲天下之甑不墮，難矣。」宣和七年，欽宗受禪，復與太學諸生陳東等上書：「臣聞自古帝王之盛，莫盛堯舜。堯舜之大，莫大賞善而罰惡。堯之時有八元、八凱，未暇用也；有四凶，未暇去也。堯非不知其可用可去，意者謂將倦於勤，必舉天下授舜，特留待舜，使大明賞罰，以示天下耳。臣竊謂：在道君皇帝之時，非無賢才如八元、八凱者也，亦非無奸臣賊子如四凶者也，然而未用未去，留以待陛下耳。夫蔡京、童貫、王黼、李彥、梁師成、朱勔者，世所名六賊者也。臣等謹按：蔡京罪惡最大，天資凶悖，首爲亂階，陷害忠良，進用獍狍，引致子孫盡居要塗，變亂法度，竊弄爵祿，殘暴生民，交結閹宦，包藏禍心，無異王莽。緣京用事，姦人並進，王黼相繼爲相，勢柔慢之容，肆俳優之行，欺君罔上，蠹國害民，無所不至。童貫實因京、勔，遂握兵權，至爲太師，封王爵，貪功冒賞，不悟事機，朔方之兵，遂致輕舉，敗我國盟，失我鄰好。貫之所恃梁師成，實聯婚姻以相救護。師成外示恭謹，中存貪詐，假忠行佞，藉賢濟姦，盜我儒名，高自標榜。李彥根括民田，威震三路，奪民資產，重斂租賦，剋剝太甚，盜賊蜂起。曩時青溪之寇，實繇朱勔父子侵奪東南之民，怨結數路，方賊一呼，四境響應，屠割州縣，殺戮吏民，天下騷然，彌年不已。按朱勔父子，皆曾犯徒杖脊，始因賄以事蔡京，交結閹寺，收買花石，名爲進奉，其實盡以人已，騷動數路，蔑視官司，僅同奴僕。所貢之物，盡取於民，撤民屋廬，掘民墳塚，幽明受害，所在皆然。甚者深山大澤，人跡不到之地，苟有一花

一石，擗作威福，迫脅州縣，期於必取，倉往顛踣陷溺，以損其身，東南之民，怨入骨髓，欲食其肉而寢其皮，天下扼腕此六賊久矣。設我國家，離我民心，危我社稷。夷狄交侵，盜賊競起，雖我道君皇帝，哀痛罪己之詔播告四方，而京等六賊罪狀未白，典刑未正，天下無不歸怨。若不行誅殛，將何以雪道君皇帝之謗？何以解天下之疑？伏望取六賊肆諸市朝，悉舉賢才而登用之，庶幾道君皇帝未滿之志，繼成於陛下。」書奏，編置道州。建炎改元，遇赦，歸耕石門。紹興間，三降詔徵之，其最後詔曰：「朕久不聞問，良切傾思，竊惟邇來調護多貺，始命卿辭以疾，再命卿辭以隱，今茲三命，合體古人所謂僕僕而走，庶以慰朕願望也。特賜白馬一匹，金鞍紡勒一副，紫磨金八十兩，卿其受之。能為朕用，異日子孫永膺多福。」時秦檜用事，朝老無出仕意，堅辭不起。自號常歡喜居士，名堂曰寄懷，又賦《吾亦愛吾廬詩》。士大夫高其行義，學者以陳三詔稱之。有文集百卷行世，壽七十卒。弟蟠老，累官武功人夫。五世孫松使，度宗末登進士。

謝安時 字尚可。博通經傳，涉筆成文。宋寧、大觀間，以兩僞召入辟雍，謁告歸，領鄉薦。靖康之變，乃携家隱西坑別墅，號桂堂居士。後累舉得官，卒不拜，終於家。鄉人挽以詩，有「不肯上書游北闕，只緣留意在東山」之句。

皇朝

丁同 林順 余畝 吳應 陳延梓

丁同 字彥仁。與友人劉穀安、孫伯琦、張文仲、李弼大彈琴賦詩，為方外之游。

林順 字孝從。弱冠為鄉校師。水樂間，邑令黃裳舉孝廉，不起。嗣令吳朝宗舉楷書，復力辭。年

八十餘卒。

余畝 字希升。凝重寡言，蚤失怙，獨奉母。讀書刻苦精詣，下筆爲詩文，動契古意。永樂間，邑以楷書薦，守芮麟令書，書《游圭吟》復之，拂袖歸。

吳應 字允吉。太學生。能詩，工篆隸。

陳廷梓 諸生也。以例授儒官。父蚤喪，事母至孝，母病，湯藥自嘗。母卒，刻木事之。

松溪縣（一八）

元

葉陶

葉雋 字良弼。父景仁，見縉紳。雋讀書知大義，有孝行。祖母年高病足，與姊妙儒昇而卧起者數年。痛父死賊，傾家募士，從閩道人賊境，殺其渠魁，載父屍還。事聞，授南豐州同知，力辭不就。廬於墓側，旦夕悲泣，芝生隧道，自號湛虛樵者。

皇朝

葉固 陳銓 陳聖銘 魏文楷 葉允升

葉固 字廷堅，唐建州刺史顯之後。性朴嗜學。永樂中舉楷書，赴京，預修《永樂大典》，與祭酒胡儼爲文字交。

陳銓 字士衡。清慎有才譽，事親孝，居喪毀瘠，坐居以文酒自娛，鄉縉紳重之。

陳聖銘 字子中。嘉靖間處士。博古好施，事父母至孝，居喪尺寸合禮。嘗聚經書子史六千卷，建樓藏之，沉酣其中，顏曰友書。其於世家族屬之源委，地理人物之出處，造化陰陽之象數，考覈研磨，鑿鑿有據。因念湛盧山紫陽書院祀事單儉，捐田八畝，以益燦盛。自開義塾，教授學徒，束脯弗受，且供其墨楮。族有婚葬不給，里中有貧而死者，時資助之。

魏文楷 諸生也。至性孝謹，母病渴，思蓮實，文楷肄業妙峰山，猶及記山中蓮池，其泉獨煖，連嘗後稿，因往覓之，果得老蓮一莖於芋叢中，持歸啖母，母悅而病隨蘇。有伯父死，繼立繼，（一九）族論未定，訟於官，郡守以倫序屬文楷，所得繼田六十畝，頓首不受，願推其半給季父之獨貧者，而以其半以祀伯父，守甚高之。

葉允升 諸生也。母病篤，朝夕侍藥，焚香告天，愿以身代，宗黨稱孝。

〔校記〕

〔一〕「英舊志草布」，各本原作「草布志」，據本書體例改。

〔二〕「福寧縣 建陽縣 崇安縣 浦城縣 政和縣 松溪縣」十八字，各本原脫，據本書體例補。

〔三〕「建安縣」三字，各本原脫，據本書體例補。

〔四〕「虞」字，各本原脫，據本傳補。

〔五〕「讀盡」，各本原作「盡讀」，據下句文義改。

〔六〕「福寧縣」上，各本原衍「建寧府」三字，據本書體例刪。

〔七〕「建陽縣」上，各本原衍「建寧府」三字，據本書體例刪。

〔八〕「元定」上，各本原衍「元」字，據《蔡元定傳》刪。

〔九〕「崇安縣」上，各本原衍「建寧府」三字，據本書體例刪。

〔一〇〕「學貧」，各本原作夾注，據本傳改爲正。

〔一一〕「詹繡」，本傳作「詹錦」。

〔一二〕「趙必漣」，各本原闕本傳。

〔一三〕「值其晝夜」，原文如此。

〔一四〕「授」，各本原作「授」，據文義改。

〔一五〕「浦城縣」上，各本原衍「建寧府」三字，據本書體例刪。

〔一六〕「及屬城」，各本原作「及屬城」，據文義改。

〔一七〕「政和縣」上，各本原衍「建寧府」三字，據本書體例刪。

〔一八〕「松溪縣」上，各本原衍「建寧府」三字，據本書體例刪。

〔一九〕「繼立繼」，原文如此。

閩書卷之一百二十九

英舊志 章布〔一〕

延平府 南平縣 將樂縣 尤溪縣 順昌縣〔一〕

南平縣〔一〕

五代

陳陶

陳陶 字高伯。性沉敏，博學善屬文，聲詩曆象，無不精究。隱南昌西山。武宣時，以歌詩名。嚴字牧豫章，以其操行高潔，牢欲貶之，遣小妓蓮花往侍陶，殊不顧。嘗游廣州，得柑橙歸種，既果，令山童鬻之。沒，復二種，皆不實。宋開寶中有見之者，世傳其得仙。

宋

吳儀從弟熙。 李侗 黃卓

吳儀 字國華。修清力學。漁釣橋溪之上。時或行歌松蹊竹曠，莫窺其際。楊時嘗題其釣臺及咏歸堂。羅從彥師事之。自號審律，時稱審律先生。從弟熙。

興，字孝明。博學勵操，與儀稱雙璧。或從之談道論文，傾心瀉意，語以勢利，俛焉不答。元祐間，陳瓘以其兄弟學行，召於郡守，延二人詣學爲諸生講經，薦於朝，得召赴闕。

李侗 字應中。少年豪勇，常夜醉馳馬數里。年十四，聞羅從彥得河洛之學於龜山，遂往師焉。授《春秋》、《中庸》、《語》、《孟》之說，從容潛玩，盡得所傳之奧。退而屏居山田，結茅水竹間，謝絕世故餘四十年。危坐終日，以驗夫喜怒哀樂未發前氣象，而求所謂中者。其於天下之理，該攝洞貫，以次融釋，各有條緒。其言曰：「學問不在多言，但默坐澄心，體認天理，則雖一毫私意之發，亦自退聽。」又曰：「學者之病，在於未有浩然冰解凍釋處，縱有力持守，不過免顛然悔尤而已。」嘗諷誦黃庭堅所稱周濂溪「胸中洒落，如光風霽月爲善」，形容有道氣象，學者存此於胸中，庶幾遇事廓然，義理少進矣。又曰：「讀書者，知其所言，莫非吾事，而卽求之吾身，則聖賢之地皆可勉至。」又曰：「講學切在深潛縝密，氣味深長，蹊徑不差。若概以理下，而不察其分殊，所以流於疑似亂真之說，而不自知也。」其示人大要如此。吏部員外郎朱松，故亦與侗受學羅從彥，雅相敬重，遣子熹從之。少縣鄧迪嘗謂松曰：「願中如冰壺秋月，瑩徹無瑕。」而熹亦稱其「資稟勁特，氣節豪邁，充養完粹，精純之氣，達於面目。語默動靜，自然之中，若有成法。其道德純備，學術通明，既不求知於世，亦未嘗輕以語人，蓋庶幾乎中庸，邈世不見知而不悔者。」卒年七十有一，謚文靖。遺書有《延平問答》及《語錄》。皇朝諸臣先後言：「文靖，朱文公之師，宜從祀孔廟。」久未行。萬曆四十三年，進從祀。

黃卓 字德美。博學工文，尤長於詩。嘗與朱文公游，時稱騷壇元白。

將樂縣(四)

五代晉

廖安好

廖安好 年甫十歲，讀《易》、《禮》、《春秋》三經。作文如注，尤以能詩名。

宋

楊希旦 楊迪 廖衡 鄧綱 梁伯臣 李冲

楊希旦 自少文行知名，屢舉不第，退老於家，詩書自娛，敦朴夷易，粹然長者之風。龜山先生言：「某嘗侍先生燕閒，善言懿行，猷聞習見。」又爲序其集言：「其詩文清切平易，不尚雕琢。」

楊迪 字遵道，龜山先生子也。垂髫力學，既冠，益通貫古今。與人辯，綱振條析，發微指極，冰解的破，聞者斂聳。游太學，聲出等夷。一旦棄不顧，抱經游伊川之門，伊川雅器許之。

廖衡 字仲辰，龜山侄婿。善爲詩、論議，得龜山壺奧，而年不永。

鄧綱 字衡老。朱文公門人，有《近思錄問答》。

梁伯臣 字明道。母得目疾，晨興奉盥饋，侍湯劑，必躬勞。親亡，哀毀幾不勝喪。子澤民，令崑山，有惠愛。

李冲 字元翁。文詞瞻麗，爲時所重。

皇朝

李富

李富 字尚禮。三歲失父，六歲問母，卽有嚙齧容。稍長，事母至孝。母多病，不願仕進。構屋，篆曰學古山房。所著有《日新圖》、《五倫箴》、《辨惑錄》諸書。母死，廬墓號哭，年六十矣。釋服，謂其子曰：「吾早喪父，未能爲服，以母在也。今追服吾父焉。」

尤溪縣_(五)

宋

莊德燦

莊德燦 朱韋齋父子俱與往還。

元

郭居敬

郭居敬 博學能文，事親歡順，旣沒，哀毀盡禮。虞集、歐陽玄諸公欲薦於朝，牢讓不起。

順昌縣_(六)

宋

廖衡 廖嶢 馮安國 余大雅 弟大猷。

廖衡 六歲能屬文，縣尉催租見之，命吟雨中山茶，有「淚多陳后愁離殿，浴出楊妃困倚闌」之句，尉

喜甚。尉湖外人，時方得家書，復出驛語：「洞庭消息寄來遲」，衡應聲曰：「巫峽夢魂歸去早」。尉大奇之，名聞郡守，檄縣禮遣，至，試以詩，迎題立就，婉麗可喜。即赴鄉舉，主司得其文，置在第三，守私易之，自是絕意功名，終生林壑。

廖曉，字次山。元符間，入太學。蘇軾卒，諸生相與飯僧，以曉工文，推爲薦疏。又作詩悼軾，語皆妙絕。崇寧中，上書言時政，黜還鄉。有《雲溪集》十卷。

馮安國，字彥修，力學能文，行誼尤高。時行王氏學，安國晦迹於家，聚徒講經。建炎中，范汝爲據尤沙，籍民降附，安國不屈，死。

余天雅，父良弼，見縉紳。大雅與劍浦游敬仲，同時從朱文公，每見必告以簡約切實工夫，而要歸求放心。言兩捧鄉書，有《朱子語錄》一卷。弟大猷。

大猷，字方叔，亦從文公游，文公稱其見理穩實。

皇朝

林森 蕭文秀

林森，字廷茂。正統戊辰，卓寇蜂起，諸兄弟各逃去，森獨負母逃，路拾顆珠，賊欲殺之，出珠以獻，母子得免。後歸鄉學，奉懼終母。

蕭文秀，字廷實。父大貞，歷貢，將北上，文秀跪白曰：「太人年踰七九，兒輩卽付讀授童謔，猶足充菽水，奈何頽齡履此修途？」不可。請隨行，又不可。甫抵抗，果以嬰疾報。文秀冒死窮走，遇父轍於江郎山，痛哭瀕絕，葬祭力行古禮。奉母娛順，逮卒，寢息常在柩旁。

汀州府 長汀縣 寧化縣 上杭縣 武平縣 清流縣 連城縣 永定縣

長汀縣

梁藻

梁藻 梁龜年 鄧春卿 王格

梁藻 字仲華。強學多識，不就父任。三舉禮部，未成名，杜門自適。有《梁處士集》。

梁龜年 字永之。王十朋寄之詩：「詠歌沂水舞雩風，氣壓當時冠與童。人似賈生年更少，家傳孫

綽賦尤工。孤熊傲兀深叢裏，一鶚軒昂衆鳥中。」早取功名寄衣鉢，古來相種出山東。」

鄧春卿 字榮伯。崇寧間，詔舉隱逸，郡守陳粹以春卿應詔，後舉八行，郡守章清文以名聞，俱辭不

受。安貧樂道，老於南山之阿。二公累造其室，一日，章訪之，春卿謝不能肅，獻詩一篇，章次韻，屬和者

數十。年九十六卒。

王格 字伯庸。恬於進取，授徒爲樂。少與陳軒厚善，軒來守郡，餽之俸錢五十萬，格悉歸郡庠，且

哀勸縣人共買田入學宮。子宗哲、明哲、宣哲，皆第進士，溶哲，貢辟雍。宗哲，見縉紳。

董璘

董璘

董璘 永樂中人，冒監，不仕，退充所學。僻書小說，莫不淹貫。興禮敦讓，爲鄉閭軌。

寧化縣〔九〕

唐

伍德普

伍德普 父昌時，事王審知爲偏將軍，英武多謀，征伐有功。德普自少績學，隱居教授，漁釣爲樂。

宋

徐唐 雷觀

徐唐 字守忠。未冠，受《春秋》於鄉先生吳果，不兩月誦析如流。宰宴君奇之，俾受業於李觀，觀曰：「胡先生講《春秋》於上庠，子盍造焉？」於是負笈京師，質疑問難，旁通群經，諸子屈服。遂見知於歐陽修，未幾，薦之仁宗，召見講《易》。嘉祐三年，奔母喪，廬墓不出。

雷觀 靖康間在太學。時朝廷用張邦昌爲相，歎曰：「此何等時，遽還貴臣耶？」引漢陳龜言「三辰不軌，擢士爲相，四夷不恭，拔卒爲將」之言，上書極論。

皇朝

張子才 張彥正弟彥隆。

張子才 永樂間舉茂才，不起，以力耕課子孫。景泰中，納粟賑民，辭官不受。

張彥正 性孝友。少時，母疾甚，刲股籲天求代。既長，讀書吟咏，進修不懈。年九十，號華山隱叟。兄彥銘，見縉紳。弟彥隆。

彥隆 號遜齋。慈祥敦厚，樂善好施，縣行鄉飲禮，與其二兄更迭賓位，令鄭瑄命工繪圖，屬詩人咏

歌之，號寧陽三老。

上杭縣（一〇）

皇朝

江瀚 李嘉言 丘金質

江瀚 著錄邑庠。正統中，沙、尤寇發，瀚逃難被執，詢知其士人，欲用之。罵曰：「朝廷養我何爲，我何隸籍，從爾狗鼠輩耶？」賊怒，捽近城下，脅使跪，不屈，罵不絕口，遂見殺。賊雖殺瀚，顧高誥城頭人曰：「上杭江秀才也。」

李嘉言 諸生也。嘉靖季，有山背人李占春者，因饑率徒黨羅廷秀、李迺瑄、卜廷詔、張節、張憲等以半穀爲名，日間至萬人，劫永定、連城二縣。二縣兵與戰，敗。武平知縣徐甫宰、生員李琛乃招占春降。占春等雖降，淫暴日甚，雙坑人丘廷盛與迺瑄謀殺廷秀，迺瑄懼，復構廷詔、節、憲反，嘉言應命往撫，爲賊所脅，罵賊死。

丘金質 嘉靖時隱士，博覽，長數學。

武平縣（一）

皇朝

廖榮 王璘 舒冕 石厚 舒儀 鍾廷鳳 鍾嶽 李寶員 林乾利 陳仁政

廖榮，性嚴毅，有才學，舉動準禮。甫壯，膺貢，父將易簀，命之曰：「汝務遠大，苟安小就，吾目不暇。」榮八歲餘，尚赴部試，人謂癡孝。

王璘，涉獵書史，通達時務，堅志藏修，詩酒自娛。

舒冕，字廷瞻，太學生。游胡文恭居仁之門，得用功之要，服膺靡懈。冠婚喪祭，悉遵家禮。父母有疾，衣冠侍養終制，廬墓三年。

石厚，字伯載，穎悟篤孝，以親老無他兄弟，舍業終養。親沒未葬，適大帽山寇發，空鄉奔竄，厚獨撫柩號慟，寇至，感動去。

舒儀，字宜嗣，國子生。力於爲義，遇橫逆弗較。築新城，至破產資工費。貧窮無告者，悉爲經理處。

鍾廷鳳，字應韶，邑庠士也，比貢而沒。淹貫經史，事繼母前兄，以孝弟聞。

鍾嶽，少志科舉，因父病，感泣棄去，養志爲樂。正德七年，邑中兵亂，輸粟數百石以給軍。歲饑，作粥飼流離。

李寶員，幼游邑庠，因親老弗竟志，日游倩琴詩。喜施樂濟，宗族婚喪不能舉者，助之。

林乾利，爲諸生，有聲，棄之去。剛方孝友，嘗創義倉以賑饑里。

陳仁政，博通經史，詩酒自娛。父璋，好施仁政，克成其美。

清流縣〔二〕

皇朝

伍禮 伍鈍 葉有忠 伍鼎 伍鳳 李端 雷瑄

伍禮 字宗期。永樂辛卯舉人，北上春闈，父政送之曰：「汝行勉力，吾老矣，必無復相見。」禮感泣，試畢南歸，力請終養。釣水採山，奉親為娛。

伍鈍 字文璉。好文史，富詞翰。因母陳不欲其去左右，遂絕念進取，專志奉養。凡百所需，稟命乃行。母病危篤，夜禱北辰，減半增壽，復割股調藥，母病尋愈。晚年婢僕雖具，省視必親。母歿，哀毀治葬，廬墓鄉里，歎羨以為莫及。

葉有忠 字蘿臣。母卒，獨身葬事，不較諸弟，乃預造穴壙旁，曰：「死可付親。」弟福，為諸生，家事悉為處治，先弟而後已。後福領鄉薦，無何卒，其孀妻陳年少無出，有忠撫育福孤，時時勉陳以古節，婦感其言，竟以完節。

福 字福民。童時，父命治家事，無難易未嘗敢違。兄弟有勞役，必分代之。以後秀入學，發憤讀書，中永樂鄉闈，無何卒。福處兄弟，財帛相通，有無同之，姊姒子侄，化其禮讓，一門孝友，近世莫及。

伍鼎 國子生也。文思典雅，多有題詠。

伍鳳 國子生也。清才粹學，專心苦思，惜其早卒。

李端 庠生也。拾金還人，金且百。令凌宗義而欲併之，曰：「此奚足述。」奔避之。

雷瑄 正德時庠生。父病，割股和藥。強寇橫行，縣民驚竄，招集流散，訓練固守，城賴保全。

連城縣(二三)

宋

鄧旦 李子圓

鄧旦 字日升，都統使晉之族也。晉，見弁輪。旦博極群書，爲文典雅。四舉於禮部，年甫強卽無復仕進意。卜築縣東十里石門巖側，榜齋「尚友」，客至，與高談痛飲。該免舉恩，同儕移書趣行，答曰：「勿復敗吾佳思。」隱居四十餘年，以壽終。

李子圓 字含方。天性英邁，讀書敦行。端平間，草寇標掠，邑集兵勦之，以子圓爲倡。子圓率弟子應、子榮、子文、壽文、輝文、孫、榮茂，奮勇當先，遇賊力戰。弟子俱遇害，賊亦死傷過半，尋遁。子圓獨與子榮、茂脫歸，入石門巖學黃白以老。

皇朝

童昱 童世堅 孫大樑。 李瑗 子元璣。 李植 子周臣。 童邦傑 林瑞 李元憲 童志召

童昱 字道彰。少從李慶游，甚爲器重。及長，慕吳聘君學，私淑其門。不樂仕進，卜築文溪之東，名曰東臯清隱，李慶爲作《東臯清隱賦》。

童世堅 字克剛。游邑庠，以文知名。正德癸酉應貢，不肯北上。謀於仲兄，營葬祖宗父母事畢，嘆曰：「此時闕寺熏灼，道與世違，可以隱矣。」卜居畫錦橋東扁廬，尋樂藏修。其次走謁王文成，廩教而歸，沉潛體認，充然有得，邑人稱曰尋樂先生。孫大樑。

大樑 字愛崗。克遵祖訓，事親孝愛，幹蠱濟艱，私錢產業，與弟公之。

李瑗 字仲璧。孝友敦行，不樂仕進。仲弟璉，蚤世，母憂泣幾毀，夙夜曲解。雖承親分異，知其心念季弟，召與居起，不殊同爨。季弟名璉，與瑗並壽踰八袞。晚歲相友篤摯，令蔣公優禮之。子元璉。

元璉 字世用。瑗長子，而袁州訓導元瑄，其弟也。元瑄，見縉紳。元璉事繼母錢甚孝，錢所生子名元積，元璉愛之過己子。父授諸子產，元璉曰：「元瑄以忠孝名而早歿矣，元積孱然幼也，請厚之。」父大悅，從焉。享年九十餘。課子晏，暑，俱明經應貢。晏任安吉學正，署任六合訓導，師範並薦。晏子學儒，邑庠生，善事父母，父母沒，廬居哀慕，年亦九十餘。

李植 字梅莊。九歲失怙，日擁棺泣也。長事寡母，承顏順志。恬養杜門，寄情山水，年九十餘易簪，賦詩有「虛度浮生九九秋，歸根不許惹閑愁」之句。子周臣。

周臣 字明佐。事父母最孝，愛篤二弟。樹德好施，公家之務，破產身先。居家嚴肅，所生四子，俱隸弟子員。友愛敦迫，人稱萃善。

童邦傑 字子龍。諸生也。素閑韜略，適廣寇羅袍、楊舜、賴賜等萬餘蜂屯連城，勢甚猖獗，朝廷勅南贛軍門駐汀征勦。邦傑獻招安之策，軍門遣人袍營，袍摩厲以須，邦傑神色不異，從容諭譬，因與賦詩行酒，而陰行間諜之計，始則惑賜以貳袍，繼遂執袍而擒舜，功爲人冒，卒不自言。

林瑞 字朝興，郡庠生。嘉靖初將人貲胄監，偕友人應貢者彭翔、胡一貫同行。至京師，疫甚，翔、一貫先後被病，瑞晨夕治湯藥，滌臭穢。已，翔、一貫相繼死，爲治殯如禮，緘膝其餘囊，出貲扶二柩歸，行至留都，或勸其人貲南監，歎曰：「二柩誰託。」竟扶歸。

李元憲 字用中。敦本好賢，慷慨樂施，所交游終始不渝。晚隱南田，躬耕自樂。

童志召 字維翰，邑庠生。沉潛嗜學，事父母小心。母病，父納庶母，婉意承順。父沒，居喪守禮，寢苦枕塊，隆冬不殊。

永定縣(四)

宋

李穎

李穎 字士英。蚤失怙，事母極孝。家貧，重然諾，好古，讀書結詩社，而都授於鄉集先生長者。詩名杭川，風雅，有司將以遺逸舉，力辭。人稱梅隱先生。

皇朝

劉榮 賴希孔 黃科 賴相

劉榮 府學生。父厚，爲繼母所逐，榮以孝道幾諫，還，爲母子如初。縣丞繆宗堯知榮素行，令海仁梳亂後新民子弟，榮用禮義化其俗。亡何，賊首賴榮昌、劉元亨復反，用計緝捕之。撫臺虞守愚美之曰：「此有用之學也。」

賴希孔 縣學生。父玉，兄縉紳。希孔事父母盡孝，處兄弟怡怡。父病，祈以身代。邑令唐燦常詣其家，有師表鄉閭之歎。

黃科 字士登。學問淵美，博究群書，學者多師事之。將貢而歿，士類惜焉。子益純，領鄉薦。

賴一相字時望。諸生也。博學，篤孝友，讓產同生，而舌耕餬口。事繼母甚順，繼母化之。嘗入粵歸，遇盜舟次，忙迫呼天曰：「天乎，賴一相平生心事，豈宜至此？」盜聞其名，遂解去，曰：「乃孝友人也。」

興化府

莆田縣

仙游縣

平海衛

莆田縣

宋

林緒

徐復

劉字

徐壽仁

徐膺

陳清選

黃問

方絢

方審權

方士縣

方大壯

方未

方兼白

方汝一

翁亢

劉彌邵

何伸

林國鈞

陳均

黃畸翁

郭道卿

子廷樞附

彭受

黃希閣附

彭九萬

林緒

藻六世孫

五代末，杜門避世，窮索古典，常慕陶靖節、嚴光之為人。

大中祥符七年，詔舉草

澤，州郡以緒應，特授將仕郎、本軍教授，不出。

徐復

字復之，寅三世孫也。

舉進士不中，退而學《易》。

通流衍卦氣法，自筮無餘，遂絕進取。游

學淮浙間數年，益通陰陽、天文、地理、遁甲、占射諸家。他日聽其鄉人林鴻範說詩，且言詩之所以用於樂

者，忽若有得，因以懽氣求之，遂於五音十二律清濁次序，及鐘聲侈殺、匏竹高下制度，莫不洞悟。仁宗

朝，詔求天下之知樂者，大臣薦胡瑗，瑗作鐘磬，大變古法，復笑曰：「聖人專器以聲，今不先求其聲，而更

其器，其可用乎？」後緩制作皆不効。范仲淹過潤州，見復，問今四夷寧有變異否？復剋西方當用兵，推其日月，後無差異。既元昊叛，宋綬、林瑀以復薦。召見，帝問天時人事，復舉京房《易卦》推所配年月日，時當小過，剛失位而不中，宜在強君德。又問西方用兵何如，復對：「太乙守中宮，宜內不宜外。」帝善其言，復又獻所為《邊防策》、《太乙主客立成曆》、《洪範論》。帝欲官之，固辭。歲餘歸，賜號冲晦處士。補其子晞，試秘書省校書郎。復性高潔，而處世未嘗自異，後居杭州十數年，人以與林逋號二處士。晞，見縉紳。

劉宇 皇祐中，撰《毛鄭詩折衷》二十卷。

徐壽仁 字子繇。父確，兄師仁，並見縉紳。壽仁讀書追古，尤長於詩。出游遇佳山水，極興乃返。晚傍所居，築坡種菊，自號菊坡叟。中葺數椽，命菴曰夢蝶，軒曰觀魚，臺曰漣酒。泉守王十朋贈之詩：「南方有高士，仁義偃王裔。家山關幽陂，手不香草執。秋至有黃華，采采滿衣袂。客來酒盈尊，詩出語驚世。無心學淵明，偶與淵明契。」

徐膺 字思文，亦寅後。弱冠登名禮部，不報。念母年高，閉戶讀書，定省無遺。母病，備極扶持。既沒，摧毀骨立，負土為墳，蔬食廬墓，時時號慟。甘露一再降廬側。墳傍有深塹，非役千夫不能塞，一夕有聲如雷，旦視，塹平矣。鄉里歎異。

陳清選 字道山。師立從子。博學善持論，詩文清壯秀傑。入太學為上舍生，未廷對，卒。孫詔翁、壽翁、嚴翁、槐翁，並中童子科。

黃問 字公裕，校書璞曾孫。博通五經，創義齋以聚英俊，立五規：曰修身謹行，曰立志抗節，曰潛

心經術，口留意世務，日限日收功。既沒，左丞皇甫泌謚之曰義成逸士。子君俞，見縉紳。

方絢 字君素。父子容，見縉紳。絢篤學力行，好古文，工詞賦書篆。晚以八行舉，辭不就。隱居西山草堂，門人稱濯錦先生。

方審權 字立之。曾祖宙，見縉紳。父銓，以詩名，有《真審翁集》。審權幼從伯父鎬宦游江湖，所至交其豪傑，及歸，慨然罷舉業。先世積書甚富，環所居有田若干畝，曰：「吾耕讀於此，了一生矣。」與王邁、方蒙仲、劉克莊友善，平生志業，率於詩發之。

方士繇 字伯謨，一字伯休。曾祖會，見縉紳。父豐之，字德亨，仕至監建州豐國鎮，豪壯，工文詞。

士繇蚤孤，從母居邵武，以孝謹稱。及冠，入建安，師事朱文公。文公之徒數百人，士繇年少學敏，不數年稱高弟。因徙家從之籍溪之上，專以傳道爲後學師。初，德亨之文豪邁警絕，不可追及，而上繇之作，則閑談簡遠，一唱三歎，世莫能優劣也。書自篆、籀、分、隸、行、草諸體皆極其妙，又能講其時世之變與園方腴瘠之法，聽之終日忘倦。遺稿數百篇，與他著書甚衆。好方技，治疾有奇驗，能逆決生死。紹熙間，文公門人有至行在，公卿延致恐後，士繇聞之，歎曰：「異時必爲學禍。」又嘗勸文公少著書，以教人讀集註爲未妥。及偽學禁興，士繇獨無間言。子幽父，一作丕父。講學黃榦門，爲黃榦所稱許。

方大壯 字履之，廷範之裔。朱文公至莆，大壯舉所學就正，日與同志講明，自號履齋。性至孝，執父喪，三年不出戶。臨沒，戒冠衣束帶而逝，學者稱履齋先生。子東叔，澄孫，公權，見縉紳。

方禾 字耕叟。受學朱門，文公告以改過修己之方，莫切於《論語·弟子入則孝》一章，禾佩服之。

方秉白 字直甫。與群從秉侯同時隱居教授。孝宗朝，以孝廉薦，不起。有《草堂文集》。子阜鳴，

兄給紳。

方汝一 字清卿，秉侯曾孫。父仰子，登端平第，尉南海。汝一幼奇逸，薦於鄉，舉進士不第。考古著書，固窮力善，所著《易論》二十篇，《江東將相論》一篇，《訂兩漢史贊》若干篇。又有詩文，號《小園僻稿》。嘗袖所訂班書謁劉克莊，克莊曰：「范史，罕讀者。僕欲稍添註脚，祇未能也，君有意乎？」汝一遂接著《范史新訂》，甫脫稿，卒，年四十五。

翁凡 字柔中，一字子西，號荔枝臺。隱居漆林，教授後學。

劉彌邵 字壽翁，夙之子。夙盛年蚤沒，家貧，遺書數廚。彌邵卧起其間，晨夕抄纂，考論。斷制義理，以洙泗、關洛爲宗。嘗質經於陳宓，評史於鄭寅，問《易》於蔡淵，邵守楊棟創尊德堂於學宮以處之。及棟提點福建刑獄，復論薦於朝，未報。卒年八十一。彌邵素性狷介。字成，由科第，知古田縣。遇釋帝例，授彌邵京秩，詰已下，尚畏而不敢白。有《易稿》、《漢考》、《讀書日記》諸書，學者稱習靜先生。

何伸 曾祖清，死靖康勤士之役。祖德，以戰功宣差步軍指揮使。伸少嗜詩，德誚其不武，乃捐書習馳射擊刺，而舊學根著於心，感事傷時，憂憤激切，必於詩洩之。開禧用兵，伸應召以行，每春秋都試弓馬外，輒陳詩自見。復齋陳宓喜之，延入館中。劉克莊謁宓，必出伸并詩，克莊惜相知晚也。子謙，字光叔，詩視伸尤組織精密，而爲人狷介。陳韓自甫守起爲邊臣，從宓求一，宓舉謙，遂與同載。凡平寇誅叛，謀計皆預。嘗以成忠郎監福川作院。

林國鈞 字公秉，號固年。早游場屋，後絕仕進。鄉鄰有貧者，暗中投以貲財，不使知也。建紅泉學，延族子光朝爲師，置義田以贍四方從學之士。傾貲唱築白湖，砌黃石路二十里。年九十，齒髮落復

陳俊卿名其亭曰同年，因以自號。子充，南安軍司戶參軍，褒，建寧府司法參軍。國鈞因子貴，封承議郎。係恂如，少從光朝學，背傾貲彈力修築木蘭陂之南岸隄。

陳均，字平甫，俊卿從孫。肄業太學，及以累舉恩，當入對，不屑就。嘗參攷《宋史》及司馬氏《稽古錄》、徐氏《國紀》、李氏《續通鑑長編》諸書，用宋文公《通鑑綱目》義例，輯成宋編年《舉要》、《備要》二書，起太祖建隆庚申，迄寧宗嘉定甲申，凡八十卷。端平初，詔取其書，授迪功郎，不就。所居容膝，妻啼兒號，處之泰然。郡守楊棟時枉顧諸間，帥王居安延請至闕，甚禮遇之。年七十餘，卒。鄭性之題其墓曰篤行特了。

黃崎翁，年八十餘，喜作詩，嘗自詠云：「流落人間萬編」。

郭道卿，義重四世孫。母徐病劇，寢泣籲天祈代，母尋愈，後以壽終。景炎元年，元兵至，旁盜亦起，道卿日抱母板泣。官卒至，知其爲孝子也，爲白大將，遺一矢乃志，戒後卒無驚恐之。復與弟佐卿守義重孝子祠。盜猝至，被執，兄弟爭死，盜兩釋焉。子廷煒，以建寧路平準行用庫使歸侍養。時兵禍猶未解，廷煒扶道卿出避，倉卒相失，哭水滸。晝夜有神卒其心哀之，乃迹道卿所至。道卿嘗病疽，危甚，廷煒憂悴扶護，夕髮盡白。道卿卒，煒疑死者兩日。偶夢與父並枕而睡，視之，左頰生黑子，與父親益肖，號慟幾絕，每夜一鼓卽炷香悲哭，烏亦群集哀鳴，芝蔴園中。事聞，元武宗勅有司旌門。

彭受，爲太學生。親沒，廬墓，有白鵲之祥。郡表其居曰孝行卓異坊。又有黃希閔，提舉國鎮之子，父歿，廬墓，人號孤蘆黃家。

彭九萬，字好古。工詞賦。德祐元年爲太學生，上言賈似道誤國，不報。人元不仕，客崇安之石臼。

里中。至正二十年，黃華倡亂，以兵脅使從己，九萬斥之，卒遇害。

元

林以辯 王朝 劉有定 郭完 陳中立

林以辯 字子泉。祖應承，見縉紳。以辯通《易》、《書》、《春秋》，尤善說詩。皇慶中，詔以科目取士，以辯不苟求進，究心程朱之學。

王朝 字德輝。家甚貧，而喜不去色，臨財甚介，定見甚力。人叩其自得，則曰：「守陰之宅，蹈陽之庭。風行雨集，金春玉鳴。否非吾室，崇豈我榮。」

劉有定 字能靜。其先與夙、朔同出。元豐進士秘遠孫。少貧，性狂直，不嗜榮進，沉潛志學，嘗著《原範吟》三十七章，司業吳源謂：「推闡圖書之秘，發揮象畫之妙，究極先後體用之所以然，一部全《易》也。」學者稱原範先生。

郭完 字維貞，號滄洲。當元季，隱約壺山泉石間，與方時舉等二十一人結社，以氣節相高。疾革，自爲墳志，友人方用晦、王孟寬、釋清源輩爲之營葬，陳誠中哭以詩：「有妻正斜被，無子紹殘編。東野詩名在，樊川志稿傳。」吳源爲跋之。

陳中立 字誠中。受經於惠安盧琦，以文學著稱。作廟建學，以教鄉人，祀艾軒、晦庵、夾漈三先生，奉盧公主配之，日陳經傳，爲學者剖析。宋文憲濂銘其墓曰：「維古之世不以位，世降俗渝位斯貴。貴而無能冠狗彘，豈若夫君賤爲庶？居家孝友推以義，闢廬建學躬訓蒞。鄉髦如雲聆且肄，少長斷斷類洙泗。化罵爲良暴更懿，醇儒爲功斯小試。」

皇朝

陳淮曾孫宣

吳稔

朱煜

吳韶音

張元紳

劉文暘

方在淵族重杰

杰子夢升

陳壽徵

張瑾

黃乾綱族子鐵

洪永紹

陳汝瀾

王鑑

蕭儼

陳言

陳宜泰

鄭恢

林兆恩

陳士居

宋正孫光

台

莊賢

鄭自怡林邦慶附

鄭重

方濤

黃大全

陳淮

字巨淵

父賢，見縉紳。

淮幼有至性，在父母側必親視飲食起居。有疾，侍湯藥。

永樂間，賢

官南康，淮隨任，每日鷄鳴起，則備父母之所須。賢洪熙初卒京師，淮載喪南歸，輒夜宿柩旁。至寧化縣，河岸多虎，亦不引避。大雨河溢，柩且沒，撫柩呼號，雨忽止。後爲國子生，值限年例，衆謀爲匿年，淮曰：「吾不敢違魏司馬朗，寧黜歸。」因上疏言：「太學不論賢否，徒計老壯，啓人爲喪士心。」不報。歸置義塾訓鄉子弟，家門肅睦。令有不便，必白之郡邑。臺司一上官，拂然不納，淮厲聲曰：「天生君子，道固然耳。」淮與彭惠安相友善，而終身厚之。卒年八十二。子大同，亦有學行。林司寇俊題其居曰述孝。曾孫宣。

宣

字一通。

性至孝友，少依祖母，服勤不懈。祠宇丘隴，伏臘展謁，備極慕思。期功有六七喪不能

舉者，皆勉葬之。少困經術，挾策游荆楚百粵中，楚粵人士爭從之游。晚蒐擷天文、音樂、字韻、醫算、占驗諸書，又嘗著《自醫稿》藏家。子言，孫經邦，見縉紳。

吳稔

字時耕，宋叔告之後。

嘗賦《廬山瀑布》詩，有「人雲聲作雨，映地色涵秋」之句。初，嘗試鄉

闈，不利，遂不復應舉。中年被薦爲訓導，以母老不就。晚築草菴，蒔菊千餘本，花時，招致名流賞玩窮日，因以「菊泉」自號。

朱煌，字體光，龍巖縣令鍵曾孫。少而聲譽，顧偉丈夫也。分非世器，閉戶讀書。修身行善，接人自達，官貴人以至閭閻小子，皆本於至誠。年十七，輒爲鄉人師，人亦爭致爲師，有致之不能得者，乃贖舟河，請須之，來遂載以歸。成就甚衆，取人尤多。里有疑獄，太守潘本愚待煌以決，煌爲太守書之，繼有請，則以病辭矣。子愷，悌，並見縉紳。

吳韶音，字邦和。績學好古，實心爲善。事父母，生養死哀，撫育二幼弟，歲資束脯。術者言：「親墓不益長房。」曰：「益弟，何分焉！」子大揚，永康訓導。

張元紳，以字行。與吳繹思，縣丞魏時敏諸人結社，放情世外。性坦易多可，自稱坦齋山人。《興化志》：郡多章布獨行之士，往員肅林公以名節高士世，於時雲蒸躍起，不獨冠紳，卽如處士張元紳、劉文暘，方在淵，陳壽徵輩，咸鞠躬質行。貞肅居恒，數招邀此數人，獎引甚至，以故更相淬礪，以成一時之盛。

劉文暘，字徵仲。讀書秉禮，授徒尚誼，樹內無間言。郡守王弼造廬離門。卒年八十九。方在淵，父臨，見縉紳。臨有三子：璟、璐、璣。璣卽在淵，側室子也。璣舉鄉薦，卒，臨痛甚。在淵遂謝舉子業，志奉親，跬步不舍。父歿，而璟亦亡矣。嫡母陳病久，在淵事之十載，日置金錢枕側，以待陳需。陳感泣曰：「吾兒早失，非側室子疇依？」在淵生母蚤亡，春秋霜露，悲號哀痛，里人爲之擬夢我。子萬有，歷翰林院庶吉士，上科給事中。謫外，量移禮部主事，壯歲掛冠，留心著述。族子重杰。

重杰，字思興，尚書良永子也。少侍尚書仕粵中，黎人符南蛇構亂，尚書在軍者三年，所母夫人官

舍，病劇，重杰割左臂肉愈之。嗣有訛傳尚書遭兵劫者，母夫人驚怖卒。重杰哀毀隕絕，扶柩還，風雨露次，未嘗離側，蓋時方十九。尚書歿，廬墓側，有朱蛇盤旋廬舍中旬日，故實受業於東所張翹，正德己卯，舉於鄉，再上春官，不第，遂退居講學，著《希明錄》見志。後病卒。屬纊之日，令其子講《飯蔬飲水章》，歌《歸去來詞》自輓。嘉靖中，御史曾佩疏其孝行，詔書旌表。子夢升。

夢升 字君符。郡庠生。父麻疾，舐糞割臂肉，願以身代。督學出汝成置優等，廩之下將貢，卒。人稱世孝。

陳壽徵 以字行。少朱店，家故貧，事生母以孝稱。業經，考古文，工數種書。盛年以至衰白，周慎端慤，無少改度。林貞肅初聞壽徵名，以爲善八分篆者也，與談筆致，而壽徵時時以詩進，貞肅遂與唱和，從此書類貞肅甚。會有好事者以畫軸一通請作貞肅書，壽徵曰：「若以我爲贗人耶？」後遂不作貞肅書矣。卒年八十一。子自然，令四會，自引歸，亦篤行工書。

張瑾 老儒也。授徒爲業，動中繩尺。對諸生終日無惰容，至周旋進退，授坐授立，升降左右足之儀，皆指授，令諸生習之。學者始苦其難，既久習熟，各自得也。

黃乾剛 父仲昭，兄縉紳。其從兄乾亨，以行人使海外，封滿刺加國，還家別母，瞻戀泣下，謂叔仲昭曰：「茲行渺茫萬里，不可無骨肉相依。」仲昭聞，自悲之，遺乾剛偕行。乾剛初無難，至羊嶼，颶風大作，舟壞，乾剛漂而且登氣，顧乾亨急，不忍去，遂同溺。難不忘友，人咸哀之。子希英，係懸官，並兄縉紳。族子鉞。

鉞 字敬甫。明經修行，取與外語不苟，雖盛暑必衣冠，教人依古道，人稱木齋先生。子文炳，兄縉

紳。

洪永紹 以字行。業伏、毛二經，博涉群籍。郡太守馮馴以與處士黃宜實同延鄉飲，永紹儼然長揖，賓禮自居。宜實數引裾附耳請跪，永紹故不省。馮目之，賓退，召永紹，疾趨跽告曰：「頃者朝廷之禮，茲則細人之分。」馮大喜曰：「吾召公還，正質此耳。」復延坐，語良久，時兩高之。

陳汝瀾 字宗本。父鉞，見縉紳。鉞操行，有詩才。汝瀾習父業，知名士林間，中丞林大輅愛之，時與賡和。汝瀾修族譜，復祠田。有先塋十數丘，世久莫辨，考家志，窮山莽中，得之乃已。

王鑑 字美璞。讀書考禮，開塾授徒。先後廬父母墓凡九年，旦暮號哭，聲震林野。鄭司馬岳訪其處，廬僅尋丈，上漏旁穿，蓬蒿塞徑，障霧備加，時有毒蛇猛獸之恐，躬操薪水，而家中供餽多乏。林貞肅獎以詩，聞之郡邑吏，郡邑吏皆知鑑名。

蕭儼 父璇，以篤行稱。儼確敦倫本，兄弟白首不析。生平授徒所得束金，積置田園，曰：「後世以此合食也。」著家規三十餘條，每朔望開宗祠集內外子姓訓勅之。及歿，太守廖梯傳其行以比陶淵明、張公藝。子二：長文麟，次文鸞。文麟出教漳、泉間，而文鸞佐以孝弟力田，體父之意，斥田園而公之，一家合食者六十餘人。嘉靖中，文麟子桂應選貢，孫奇勳、奇熊，與文鸞之子標，先後登科第。桂仕博士，歷三任，俸人悉歸公費，歿之日，篋無遺金。標爲賀縣令，以廉慎卒官。

陳言 字于庭。善詩，長集句。評者謂其「裁錯揉合，匠意經營，若八金在鑪，五絲就軸，無牽比析奏之狀」。抱奇不偶，落魄江湖。一日過滌，上石惟信郡齋，商訂風雅，吐露胸中之奇。已，放舟東下，道潯陽，望匡廬，經采石，吊李謫仙。探靈谷牛首奇勝石，口占贈之曰：「西華山人海上來，獨騎黃鶴楚江隈。」

秣陵秋興三千首，又駕天風過鳳臺。」

陳宜泰 修朗方嚴。開家塾，課宗黨子姓。建橋濟行者，割田資族人貧及助死者櫬槨，其妻難之曰：「天遠。」泰曰：「天遠，吾高其心以就之。」三子簪、篋、篋，舉進士，見縉紳。

鄭恢 敦厚退讓稱長者。父司訓，卒官，千里扶柩，中途忽風雨晦冥，雷起咫尺，與人驚潰，獨拊柩哭。遇溪漲，岸滑，不可下，有老父持鋤從林莽中出，爲治磴道，忽然不見，衆異之，謂：「孝感致然。」年八十，以子弼封戶部主事。嫡係東白，登第。

林兆恩 字懋勛，少司馬富之孫。既補弟子員，棄之去，游湖湘十年，歸而有得，究心道妙，謂：「聖人之道所以不明者，二氏蠹之也。二氏之學，粗者吾儒所不屑，精者不出吾範圍，則莫若先之以三綱，本之以四業，使世無游民，民無廢倫，群而趨之。聖人之教，則其民莫不士農工商，其道莫不仁義。」嘗作書擬詣闕上之，欲朝廷即古黃帝、老子、釋迦之道以變今道釋無父之俗，俾天下寺觀僧道悉得娶妻生兒，以服行黃、老、釋迦之教，外住廨舍，日則至寺觀中迭主焚修，講明經典，兼以儒門《孝經》、《論語》等書，冠婚喪祭鄉射等禮，人而講經，出而事事，其不願者聽如儒門之子，爲農爲工商，歸還原籍，使生息滋熾，人民殷阜，無有自遺於人倫之外，而人行聖人之教。不果上。兆恩之學，自縉紳學士，下及甕子市人，莫不津接。又慮愚者之未易猝入，先引以行庭九序，卻病辟盜之方，使漸生其道心，而遺其外念。凡著書積萬言，無非此意。莆中從兆恩者，所謂與夫子中分，魯江以南，方內方外，聞風嚮至，北面師之，稱三教先生。嘉靖戊午，倭至莆城下，諸人姓與客兵約：能解賊圍者予千金。兵躍然殲賊魁，還，巨姓欲食言，並鵲散。兆恩出私財五百犒之，皆大喜。庚申季，莆城陷，賊據城中者百日，相戒毋犯陳孝廉及三教先生。

家。賊遇，兆恩吊死問孤，施棺給藥，又以數百金。年八十餘卒。前窮山極海，金土家聚落，莫不祀之。上而延、建、汀、邵，下而晉安、清漳，皆有二教堂以供遺貌。所著有《二教分內集》、《四書正解》、《四書釋義》、《老子臆》、《金剛經解》、《醒心詩》行於世。

陳士居 初籍郡諸生。嘉靖中，廷議正先師祀典，士居上書督學先生，謂先師不宜削王號也。乞除學籍，督學曰：「可。」即隱於下肆，日借下肆錢奉母。

朱正 字韓卿，宋棗裔也。游鄉校，精《春秋》。事父母孝謹，治父母塚，身自艾草擲土。兄寔，領正德癸酉鄉薦，無子，以子萬葉後之。所親風之曰：「君雅奇是兒，胡不以他兒後兄？」正曰：「正謂奇也。」以後吾兄。卒年八十，而萬葉於是春成進士，遺命爲伯氏後，毋以貴改。又語諸子曰：「吾友鄭中卿故絕，爲我置田數畝供其伏臘，令吾兒中卿九原，不相負也。」孫光台。

光台 字桂斯。萬曆壬午舉於鄉，內成落第。侍父萬葉廷評署中，值母張病，奉事無方，夜則焚香叩斗，願以身代。萬葉出守南安，命光台奉母舟行，至東流，母卒，拊膺幾絕，扶輿號慟，哀感途人。終三年，卧苦枕塊。服闋後，歲時伏臘，未嘗不流涕也，而竟卒。子楨漢，進士。

莊賢 字子勤，郡庠生。服父喪，蔬食麻衣草屨，夜不脫絰帶，卧柩下三年。事繼母至孝。嘉靖初，廣賊突至，賢負繼母逃，賊迫急，輒匿母叢薄中，身出見賊，曰：「寧殺我，勿傷母。」旁有識之者，語賊去，「此莊孝子。」賊釋之。

鄭自怡 字君哲。少從其兄授《春秋》。兄歿親老，自怡始冠，出爲弟子師，歸，上館殺於其嫂氏，俾事舅姑，爲諸侄婚娶。母病劇，不解帶，及卒，哀毀幾絕。壬戌之變，倭火人舍，自怡抱母柩呼天大慟，倭

爲絕火，道人指爲孝舍。又有林邦慶者，亦以孝行聞。

鄭重 故邑諸生。好施赴急，人稱行誼。

方濬 字子韓，方沆之弟。工詩，有《振蓬稿》。

黃天全 字全之。棄逢掖而從戚少保繼光，汪司馬道昆游，一意修古，語司馬曰：「唯王者黃屋左纁，玉食衮衣，僭擬者爲不臣。端章甫，路車鑾和，此亦人臣盛節矣。夫六經，聖者事也。沿屈、左、兩司馬而爲騷、賦、史、傳，此亦吾人之端章甫，路車鑾和也。」全之所爲詩，獨工五言古，司馬序之曰：「燕也，石巴也，琴牙也。琴直以音取重，全之五言古詩，一唱三嘆，廣樂畢陳，弗加此矣。」

仙游縣（一七）

宋

林立之 林蒙亨 李友文 傅蒙 林德遇 朱魯叔 陳正己 陳子常 林大有

林立之 字淑恭。通六經，以《禮記》三魁鄉書。聚徒縣庠，如林日選、丘敷、林從周、林志之、林顯、李夢龍、蘇國蘭、黃君任、洪天賦諸先達，皆出其門。仙游經學之盛，自立之始。

林蒙亨 字宿西。通貫天文地理、百家之書，莆、泉學士多從之游。子有之，見縉紳。

李友文 字仁可。儻有氣節，舉進士不第，即謝去場屋。愛人樂施，或捐負券。貢士貧無資者，爲之治裝。築精舍視學宮，迎師以教鄉弟子。邑西鄉，草寇嘯聚，率民伍奮前，以力不敵遁。寇定還鄉，招集流逋，人賴以寧。

傅蒙 字景初。少從林光朝學，工詞賦，兼五經。孝宗朝，嘗上萬言書，退而講學龍池，以淑後進。

林德遇 字若時。性質遲頓，一日，發憤鬻產裹糧，走武夷山中就學文公。久之有悟，暢所欲言。家居，與貫齋陳沂相友善。

朱魯叔 游文公之門。

陳正己 字思立。五薦不第，館泉州傅竹隱先生之門，邑學者多從之，與驪軒齊名。

陳子常 字常翁，可人之侄。精於周典，如井田、封建，先儒所未發明者，悉畫爲圖。有詩云：「爲成者十復爲終，終十還爲百里同。祇爲諸儒泥方法，不知起數總皆縱。」有《周禮解》。

林大有 字亨之。祖一鶚，見縉紳。父渙，知都昌縣。大有年十六，卽千里求師，不爲章句之學。招捕使者陳韓將聞於朝，授以官，搖手止之曰：「勿破我戒。」莫年，闢藏室徧讀方外書，老眼如月。咸淳初，以子雷龍預薦，賜迪功郎。命書下，僅一御冠裳拜於庭中，退卽易褐，語子孫曰：「生稱善人，死表於墓曰處士足矣。」及卒，黃仲元銘其墓曰：「吁！嗟夫君友，羊裘鼻端，不艱利名鈎。」子霖龍、雷龍。霖龍，承信郎，監潮州蛇浦稅。雷龍，見縉紳。

皇朝

吳覺 施大銓 柯一鯤

吳覺 學廩生也。西鄉之變，邑令文濟武多受賊金，以卑詞縱亂。後賊焚劫，覺詣軍門伏訴，軍門檄永春、德化并仙游三邑兵合擊之，而以覺爲部長。會天久雨，二邑兵失期，覺獨部本邑兵數百人往，猝遇賊於屏山，道隘，兵不得列，覺揮霍力戰，戰少利，賊分數匝圍之，不得脫，死之。

施大銓 邑增廣生也。嘉靖癸亥冬，倭寇圍城迫，而西北城低附山，賊因布梯魚貫而上。大銓率族人揮戈擊墜，遂中鳥銃死。知縣陳大有撫屍哭殯，總兵戚繼光親吊，賚以米幣。萬曆三十九年，御史陸夢祖建祠祀之。

柯一鯤 與兄一龍、一鯨，皆庠士。嘉靖間，寇亂頻仍，兄弟書餘輒習武技。鯤年少多力，善射，屢應募却敵，後歿於陣，里人爲立廟曰英烈。

平海衛（一八）

皇朝

朱應春

朱應春 衛諸生也。與吳紳友。所著有《正學管窺》二卷。

〔校記〕

〔一〕「英舊志」布，各本原作「草布志」，據本書體例改。

〔二〕「將樂縣」尤溪縣 順昌縣「九」字，各本原脫，據本書體例補。

〔三〕「南平縣」三字，各本原脫，據本書體例補。

〔四〕「將樂縣」上，各本原衍「延平府」三字，據本書體例刪。

〔五〕「尤溪縣」上，各本原衍「延平府」三字，據本書體例刪。

〔六〕「順昌縣」上，各本原衍「延平府」三字，據本書體例刪。

〔七〕「寧化縣」上杭縣 武平縣 清流縣 連城縣 永定縣「十八字，各本原脫，據本書體例補。

〔八〕「長汀縣」三字，各本原脫，據本書體例補。

〔九〕「寧化縣」上，各本原衍「汀州府」三字，據本書體例刪。

〔一〇〕「上杭縣」上，各本原衍「汀州府」三字，據本書體例刪。

〔一一〕「武平縣」上，各本原衍「汀州府」三字，據本書體例刪。

〔一二〕「清流縣」上，各本原衍「汀州府」三字，據本書體例刪。

〔一三〕「連城縣」上，各本原衍「汀州府」三字，據本書體例刪。

〔一四〕「永定縣」上，各本原衍「汀州府」三字，據本書體例刪。

〔一五〕「仙游縣」平海衛「六字，各本原脫，據本書體例補。

〔一六〕「莆田縣」三字，各本原脫，據本書體例補。

〔一七〕「仙游縣」上，各本原衍「興化府」三字，據本書體例刪。

〔一八〕「平海衛」上，各本原衍「興化府」三字，據本書體例刪。

閩書卷之一百三十

英舊志 韋布(二)

邵武府 邵武縣 光澤縣 泰寧縣 建寧縣(二)

邵武縣(三)

宋

杜杞 丘珏 李安期 張清 黃謙 黃孝恭 吳壽昌 劉炎 梁琢 馮允中 葉寅 黃仲本
嚴粲 嚴羽族人參仁 吳陵 上官怡 上官偉 賴均鑄 希賢附 丁時習 黃大昌 施霆亨

杜杞 字受之。有《三逕老人賦》、《集》十二卷，胡憲爲序。

丘珏 字玉父。從朱文公學，有《主敬問答》。

李安期 字泰伯。淹貫經史，援筆成文，尤以詩名。遨遊江湖間。岳飛死，作《表忠詩》百二十首吊之。一日，謁四川茶馬使王涯，因賦白鷺云：「漁父家風不設置，錦鱗爲飯水爲羹。銀袍只當簑衣着，自在江湖過一生。」王奇其材，將以賢良薦，因奔爭道，安期推枰曰：「公平章天下，亦可如此反覆乎？」拂衣去。王深自刻責以末藝失天下士。有集行世。

張清 祖暹，南軒先生次子也。淳熙間來樵，因家焉。雅志尚德，不慕榮進。暹次子定，亦隱居力田。(四)

黃謙 字德柄。游朱、呂之門，稱高弟。

黃孝恭 字令裕。從文公學，治身嚴整，論著確實。

吳壽昌 字大年。初謁佛者疎山，喜談禪。後從朱文公游，著《問答略》。

劉炎 字潛夫。從文公游。

梁琢 字文叔。從文公游，刻志勵學，所論爲學工夫，及體氣魂魄鬼神之說，文公多許可之。又輯《文公語錄》、《澹臺石刻》。

馮允中 字作肅。從文公游，嘗謂：「情本於性，故與性對，心則有知覺，而能爲之統御者也，未動而無以統之，則空寂而已；已動而無以統之，則放肆而已。」文公深然之。

葉寅 字直翁。少時飄蕩豪爽，甫方士繇語之曰：「以子才雋，何善不可爲？」寅感泣聞過，於是奮勵修飭，登文公之門，問學精詣，言行準繩，鄉人敬嘆。

黃仲本 從文公游，嘗作《朋友說》，文公爲跋。

嚴粲 字明卿。精毛氏《詩》，所輯詩名《嚴氏詩輯》。

嚴羽 字丹丘，一字儀卿，自號滄浪逋客翁。爲人粹溫，中有奇氣。自《風》、《騷》而下，講究精到，卽雜出古人之詩，隱其姓名，舉以相試，悉能辨別其世代門戶。嘗作《詩辯》，譬之樺乘；漢、魏、晉與盛唐，第一義也。大曆以還，小乘禪也。晚唐，聲聞辟支果也。學漢魏晉盛唐者，(五)臨濟下也。學大曆以還

者，曹洞也。又論詩法有五：曰體製，曰格力，曰氣象，曰興趣，曰音節。詩品有九：曰高，曰古，曰深，曰遠，曰長，曰雄渾，曰飄逸，曰悲壯，曰淒愴。其用工有三：（七）曰起結，曰句法，曰字眼。其大概有二：曰優游不迫，曰沉着痛快。其極致有一：曰人神。其自詡《詩辯》，自謂千百年公案，析骨還父，析肉還母，李、杜復生，不易斯言也。羽詩雖太祖唐人，然其體裁勻密，詞調清壯，無一語軼繩尺之外。同時台人戴石屏深加獎重。其子鳳山。鳳山子子野、半山，邑人上官閔風、吳潛夫、朱力菴、吳半山、黃則山，盛傳宗派，殆與黃山谷江西詩派無異。

參 字少魯，亦羽族。志則崖岸，外無廉稜，高卧中林，瞪視一時，自號三休居士。與丹丘次山齊名。

仁 字次山，羽族也。好古博雅。蜀吳曦叛，楊巨源誅曦，安丙甚而殺之，仁嘗作《長憤歌》，爲時所傳誦。又有《清江款乃集》行世。

吳陵 字景先，嚴滄浪表叔。能詩，嘗與滄浪論詩，滄浪謂其所論屈原《離騷》前輩未發。

上官怡 字友先，增之子。年十六，試太學第一。母年高羸疾，暑時晨夕侍側，以驅蚊蚋，不寢或逾月。居喪致毀。二兄繼歿，奉嫂撫孤，敬愛兼篤。

上官偉 長號閩風山人。與嚴滄浪友善，工詩。同邑人吳夢易字潛夫，其詩亦派出滄浪，叔大號力菴，官至通守，黃裳號則山，及正中子汝賢，字志學，俱有詩集行世。

賴均 字仲秉。嘗集郡人詩，名《碧環風月》。又著《素王世紀》等書。其族人有一曰鑄者，字成之，號竹莊，亦有文名。又有誼老者，字希賈，號南溪，本嚴氏子，出爲賴氏後，爲文恒慕三休而步驟之。

丁時習 字行可。父廷彥，爲太學錄，以忤蔡攸，辭歸卒。時習初試有司，不合，遂棄舉子業，僦舍掩籬，玩讀經史。晚年節益高，文益奇。妻危氏，同甘苦，未嘗以貧窘見辭色。子百之、千之，每夙興供洒掃，具蔬食畢，卽受業，恭謹終日。杜耒爲之傳。

黃大昌 字退圃，黃永存之孫。隱德不仕，所著有《兼山語錄》。子公紹，字直翁，所著有《韻會》。

施雲亨 字榮南，號雲溪。嘗師趙章泉，以道學教於鄉，人表其坊曰尊道。

元

李學遜 黃鎮成 陳士元 展伯興 上官祐

李學遜 忠定九世孫也。博學洽聞，善天文，尤邃於《易》。爲文典雅，片言隻字，人寶藏之。所著有《易精解》、《中星儀象》等圖。

黃鎮成 字元鎮。弱冠，卽慨然以聖賢道學自勵，學者號存齋先生。至正間，築室城南，名南田耕舍。作詩寫懷曰：「白日不停馭，頽波竟東馳。忽忽年歲改，念此將安歸。我欲驅車行，太行路嶮巖。我欲駕方舟，滄海無津涯。豈不願行邁？出門慎所之。有田南山下，可以供盛饗。中廬在中田，可以譚書詩。上探羲皇際，下及商周時。賢聖尚淪落，微生亦何疑？懷哉羨門子，千載以爲期。」部使者相繼論薦，授江西儒學提舉，不應。以壽終。集賢定謚曰貞文處士。所著有《尚書通考》、《周易通義》、《中庸章指》、《性理發蒙》、《秋聲集》。

陳士元 與黃鎮成同時，以文爲友，隱居不仕。有《武陽志略》、《武陽書舊詩宗》。學者號陽谷先生。

展伯興、上官祐 志列於文學傳。

皇朝

蔡元貞 王錫 朱昂 王岳 堯世美 朱汴 孫焯 王堪 段朝材 謝垣 任重 丘九奎

謝成 丘希周 陳講 王鏜 吳汝霖

蔡元貞 字吉夫。府庠生。純謹篤學。父疾，久侍湯藥，竟夕不寐。及卒，哀毀不自勝，治喪悉依家禮，寢苦食蠶鹽。至葬，廬墓三年。事母，視顏色爲憂喜，晝夜侍寢。有妹寡居，周其疾苦，誨以節義。友人孤子，養至長成，方許分異。歲饑，糶價取半，雖富而貧。及病革，惟以敬養老母一言諄諄囑妻、子。郡守史紳揭孝義之門以旌之。

王錫 字尚賢。三歲失父，痛母朱守節，克盡孝養。其孝敬兄也，如其父。領嘉靖甲午鄉薦，丁未會試，以母病不忍行。御史金應祥、趙孔昭先後旌以孝廉，造廬禮之。

朱昂 字德夫。郡庠生。穎異，有文才。嘗從教授周衡講致良知之學，銳然以聖賢自勵。事二親孝，待戚屬仁，郡守吳國倫稱有古人風，旌之扁。

王岳 邑庠生，資性純潛，喜譚性命。有志聖賢之學，聞四方高雅洞見性宗者，不憚跋涉北面之，游近溪羅先生門，以明德爲宗，遂爲羅門高足。生平矩步繩趨，有儼若思氣象。居家嚴正，動遵古禮。

堯世美 事養母菽水爲歡，推貲田以讓稚叔。領嘉靖丙午鄉薦。年三十餘卒。

朱汴 潛心正學，事親至孝。親沒，喪葬遵禮。領隆慶元年貢，卒。孫焯。

焯 字惟盛。邑學生。沈穎喜博古，世間種種奇書，無不披閱，有詢以典故者，旁引曲證，應答如流。

樵人士師事之，稱志菴先生。

王堪 勤苦博學，能文，有才名，尤長騷雅。以貢游北，廷試居首選。嚴分宜契重之，因萬壽表屬堪秉筆，上御覽大爲奇賞，推嚴表第一。嚴以堪對，上曰：「高才而阨下，第主司之過也。」嚴館之記室，未幾卒。

段朝材 庠生也。平生倜儻，晚節詩酒自娛，讓財還券，宗黨誦義。

謝坦 庠生也。有尊祖敬宗、孝親睦族之美。

任重 廩生也。謙和淡靜。凡子史諸編，皆手牘過。家最貧，毫無愠意。

丘九奎 字子聚。年未四十，謝去青衿。於凡經、子、史、百家、九流、三教，靡不擷咀。聞有奇書，不遠百里借閱，率手錄之。常曰：「聖賢心法，寄於六經。佛、老之精，不出吾道範圍。而諸子之散見者，亦足資羽翼，所謂莫不有文武之道者也。」居家燕處嚴駟。祭喪用《家禮》。所著有《弋獲解》六卷、《臺溪浣花詩集》。

謝成 字誠之。補博士弟子員。早失怙，事母孝，撫幼弟友。嘉靖九年，序應歲薦，有友丘姓者貧且老，遂讓之。乃自應明年貢，已領咨將赴部，忽染疾，府送路費百金，謝之曰：「此朝廷恩例郵達人京者。吾以疾不能廷試，可虛冒此物乎？」竟却之，以貽補貢者。

丘希周 字輔卿。恬澹端毅，事繼母至孝，撫弟友。嗜書喜內典。晚年爲閭里推重，有不平事，析得一言而解。

陳講 字師孔。仁厚恂恂，有如處女。博文廣記，手不停披。晚謝弟子員，築一屋，閉戶終日，獨以

一經教子。

王鏐 諸生也。孝友樂施。

吳汝霖 字用化。庠生。爲人厚重謙恭，言不亂發，見者咸稱長者。日游里中，勸人爲善，諄諄不倦，閭巷推重之。

光澤縣〔八〕

宋

李純德 子呂。呂子相祖。

李賈 危昂霄

李純德 字得之。少治《周禮》，兼《左氏春秋》。事親至孝，篤友諸弟。遇族黨有恩意，少有忿爭，卽爲居間極力平處，不令至官。不幸死喪，則爲經理家事，資助婚嫁。有以惡聲至者，未嘗與較。至其周急，輟衣食不恤也。平居方嚴，遇事輒應，無所凝滯。從弟郁，嘗面歎曰：「兄於答問，若不經意，而受其言者，反覆十思，終無以易。」子呂。

呂 字濱老。蚤孤，事母孝，育弟妹有成。聚族千指，昕夕序揖致禮，自少至老，不以寒暑少變。幼從學於從叔郁，郁學於楊龜山，家傳遠有端緒。晚見朱文公於廬阜，遂爲講學之友。邑令張訢病邑無社倉，以其事就而圖焉，呂爲條畫精明，綜理縝密，文公爲之記。呂學甚富，尤深於《易》，每言：「《易》在識時，和之以義，苟非真知義之所在，而喜言變，反害於《易》矣。」子閱祖、相祖、壯祖。閱祖、壯祖，見縉紳。相祖 字時可。在朱門，辯質詳明，用心精切。嘗以文公命編《書說》三十餘卷。

李賈 字友山。與嚴滄浪爲友，亦工詩。

危昂霄 字次房。耽嗜經史，雅意林泉，詩詞超曠豪俊，爲時所慕。

元

李應龍 危德華

李應龍 字玉林，郁之後。博學有節操，爲時師表。至元間，薦爲白鹿洞書院山長及漳州路教授，俱不赴。所著有《春秋纂例》、《孝經集註》、《四書講義》。

危德華 博覽經史，不慕榮達，善屬文，精於詩。

皇朝

郭正昇 鄧時通

郭正昇 廩生也。貫穿經史，喜賑施，篤宗盟。將貢而卒。

鄧時通 攻詩詞，放情山水，家傍蓮花山，日盤桓其間。

泰寧縣〔九〕

宋

鄒長孺 葉思溫

鄒長孺 字齊賢。初篤志問學，宋仁宗時，與太學試，居上第。聞父喪，哀毀踰禮，自京師至家三千餘里，冒暑跣歸，廬墓芝生。諸司以八行舉，不應。

葉思溫 字彥直。當宋末元初，遠跡榮利，闔戶高卧，惟詩酒自娛，年八十卒。

皇朝

李剛 廖霖 徐宗謐 黃克正 黃大任 江中山

李剛 爲邑學生。正統戊辰，沙、尤寇發，與鄉人同匿山間。一日出遇賊，脅剛從逆。剛以義數之，賊怒，令跪，剛不屈，罵不絕口，遂遇害。

廖霖 賦性淳篤，事親至孝。邑有顯安橋，其祖彥舉所建，嘉靖九年洪水，崩決，邑人病涉，霖捐己田數十畝，聚財重修，當道義之。司教陳某講程朱之學，延霖講論，深見器重。

徐宗謐 端重篤學，後學多所造就，而事母至孝。以貢人成均，卒。

黃克正 字世表。性資純朴，潛心道學，游李材之門，講修身爲本之學。

黃大任 字元明。博學，游江湖，所交皆當世名士。歸隱縣之龍溪，詩酒自娛。有集行世。

江中山 庠生也。潛心博學，時號爲五經笥。

建寧縣(一〇)

五代

廉若

廉若 與妻楊氏隱居於縣東楚上保，當亂離之後，教授鄉黨，以行誼稱。

宋

李琬 謝克仁 李杜

李琬 字粹之。學行爲鄉閭推重，同縣謝皓、謝黻皆受業其門。以八行薦，未受命，卒。有詩集行世。

謝克仁 字夢得。以文詞詩律游江湖間。淳熙初元，薦於鄉，有《題金山》詩云：「半夜鬼神朝水府，五更鼓角動揚州。」大爲張子湖所知，以國士畏友待之，謂其文如觴濫岷山，不捨晝夜，其爲蕩雲沃雨之浸，夫復何疑。有詩集行世。子驛，亦有詩名。

李杜 字元白，自號東坡。志尚恬退，常與劉後村倡和。其詩警句有曰：「眼花天易曉，足繭路偏長。」又曰：「蠟屐齒消因雨久，朱簾額動覺風來。」又曰：「轎角拂簷冰溜斷，車轅輾路雪泥分。」一時誦之。

皇朝

李秉綬 曾孫祚 黃喆 余伯宜 何伯誠 余鑑 吳孟楨 何珙

李秉綬 字彥宗。永樂鄉薦，累試弗售。築隱休齋，賦詩自娛。曾孫祚。

祚 友愛樂施予。父有未析基業，佗以百金求爲己物，祚不受金，輒義讓之。所著《養閑集》有「世情勘破只如此，好向西亭借一閒」之句。年幾七十，忽遭疾，一日，諄諄然戒諸子曰：「願汝輩作好人。」言訖而終。

黃喆 字用昭。精通百氏，尤善詩詞。笑傲林丘，經史爲伍。

余伯宜 幼善屬文，尤工詩。「綠陰移席就，黃鳥隔簾聞」；「半山雲過磬，深竹雨留禽」；「翠低垂雨

竹，綠碎受風蕉」，皆其警句。

何伯誠 樂易無競，嘉遯林泉，自娛詩酒。年八十餘。

余鑑 以貢入太學，奏南雍賦。其咏韓信詩云：「可憐千古英雄將，生死都歸兩婦人。」

吳孟禎 天資警敏，博覽史籍，遇古人事有難處者，輒掩卷以思其得失成敗，務求有得於己。招致文學，與論道理，談今古，聲譽弗厭。尤邃於醫，請治療必往，雖寒暑疾疫弗懈，起瀕殆不可勝計。

何琪 家貧務學，尤好詩賦。孝親，善待五弟。親病，籲天身代。弟疫，解衣襯斂。子孫中有暴戾者，徐徐勸諭，使自改處。鄉黨宗族，順事恕施，以「恕」名齋。年九十。

漳州府 龍溪縣 漳浦縣 龍巖縣 長泰縣 漳平縣 平和縣 詔安縣 海澄縣 鎮海衛〔二〕

龍溪縣〔二〕

宋

黃概 陳伯溫、王肩甫合傳。 余韶 吳獬 李唐咨、林易簡合傳。 施允壽、石洪慶合傳。 陳思

謙 朱飛卿 蔡汝作

黃概 字平叔。好學力行，事親至孝，父有疾，傾貲求醫。常語人曰：「學者，學爲忠孝而已。」子彥臣，見縉紳。

陳伯溫 元豐間以詞賦稱，中監元。同邑王補，字肩甫，詞賦與伯溫並名，不就特科。人言：「伯溫、

肩甫，賦中之虎。」

余韶 字道夫。舉八行，隱東湖，號東湖居士。

吳解 字清臣。兩請鄉舉有聲，又請漕舉及同文館舉。與陳知柔、林光朝諸公友善，知柔稱解「古心古貌，古文古學」。三山林子晦亦歎其爲天下奇才。學者號省齋先生。

李唐咨 字堯卿。林易簡，字一之。朱文公守郡日，延二人學宮，爲諸士楷式，稱二人者，或究索淵微，或持循稚飭，察其言行，久益可觀。

施允壽 字伯和。石洪慶，字子餘。朱文公守郡日，與唐咨、易簡並延學宮，稱其「以耆艾之年，進學不倦，強毅方正，衆所推服」。

陳思謙 字退之。嘗冠鄉薦，著《春秋三傳會同》及《列國類編》。朱文公喜之。後教授來學，多所誘進。

朱飛卿 受學朱門，自言：「窮理，而事物紛紜未能灑樂處，惟見得富貴果不可求，貧賤果不可逃耳。」

蔡汝作 建鄉學於平林，與陳安卿、高彥先齊名。

元

林逸 陳元善

林逸 字國安。篤行好學，自號愚愚。蚤喪父，奉母孝謹。一兄出贅，逸欲請歸同居，妻楊不聽，乃自撻以感動之，對案不食者累日，竟迎歸，所以事兄嫂甚謹。鄉人有不孝不弟者，諍之不從則榜書之，不

改則具酒勸之。人有乖詬，皆相指曰：「林先生來，林先生來。」

陳元善 淳之族，世以儒名。至正丁未，海隅逃兵作亂，凶渠薛均祥以元善鄉人所畏，欲先脅之，以爲衆望。執至，嚇之曰：「從我者生，否則刃矣。」元善大罵之，與其妻郭，子光遠、光達、光迪皆遇害。

皇朝

李誠之 王舉逸 伍性原、陳應宗、林珏、鄒君默、曾廷瑞、呂賢合傳。蘇元芳 蔡德 陳舒 丁

暉 策弟世平。黃文蘭 林祺 蔡烈 鄭榮 侄正學。張麟 盧玘 陳貫 侯任 吳一沛 高則賢

吳貞 張于壘

李誠之 事親克孝，踐履篤實。劉宗道歎曰：「吾漳有誠之，猶夜中之孤燈，涇中之脉涓。」

王舉逸 少甫知學，父兄相繼沒，卽奮自立，躬耕奉母，生養死葬，克致其誠。歲時祠祀祖考，遵用古禮。復酌古今冠禮而行之家，恤急難，賙貧乏。洪武中，郡推孝廉，以鄙陋辭。

伍性原、陳應宗、林珏、鄒君默、曾廷瑞、呂賢六生者，俱郡學生。革除詔至，從教授陳思賢爲舊君位哭臨如禮，思賢繫入京，六生成以身殉，事見陳思賢傳。

蘇元芳 持重好禮，事母孝敬，讓田與弟。永樂初，以懷才抱德薦。

蔡德 永樂間，薦賢良至京，以外艱歸，不復仕。爲人重默執禮。有盜其金者，曰：「彼困饑寒。」遺之半。有爭曲直者，反覆解之。

陳舒 景泰三年鄉舉。父璫，見縉紳。舒少善古文，才氣跌宕，忠壯自許。正統間，鄧茂七賊黨楊福等率衆數萬圍漳城，時指揮顧斌備倭海上，舒冒重圍詣斌，說以入援。舟師抵南河，糧食不繼，捐家貲給

之，仍越城潛往玉洲等處，勸諸富民輸粟助餉。賊用雲車臨城，舒募死士執長斧砍其輪，賊潰圍走。既舉於鄉，以母老無意仕進，與生徒講學芝田。家人百口，合食無間。僉憲呂昌、郡守姜諒每有餽遺，輒推以賙鄉里親戚。

丁暉策 宋知幾之裔也。博洽經史。正統間爲凶渠所獲，劫之爲主簿，曰：「不從，刃上汝頭矣。」暉策爲詩曰：「我祖知幾特奏名，區區也解苦窮經。青雲路杳身難到，白刃光芒膽乍驚。地下修文知有分，兵中主簿愧無能。高堂老母無人養，懇向庵前丐一生。」賊笑釋之。弟世平。

世平 字迂峰。從學陳布衣，布衣詣闕上書，世平詩送之曰：「先生學趣似陶淵，嗜酒忘形老益堅。心借程朱五百載，道憂孔孟三千年。一筇策破關山月，雙棹撐開泗水天。歌詠歸來吾與點，半生辛苦付怡然。」

黃文蘭 曾祖嵩，見縉紳。文蘭能詩文，善書。孝友安貧，隱居東山，娛心泉石。郡人林魁方之管寧。

林祺 邑庠生。少豪宕不羈，後乃收斂力行。母歿，哀毀骨立，足不出門。與人謙讓自下。所輯有《續伊洛淵源錄》、《考亭麗澤錄》、《高東溪遺澤錄》、《陳布衣文抄》、《漳獻備忘》、《漳文備忘》、《古文指掌錄》。祺得年僅三十餘，初著書時，人無知者，既歿，檢其篋，乃得七八種。

蔡烈 字文繼。父杲，見縉紳。烈弱冠爲諸生，受學泉中蔡介夫、莆中陳時周二先生，大有省悟，遂隱居鶴鳴山之白雲洞。時方壯歲，郡守潘旦勸之仕，對曰：「昔漆雕未信，若某則未見也。」嘉靖癸巳，詔舉遺逸，郡守陸金以烈應詔，藩司勸駕，力以母老足疾辭。御史李元陽檄府爲建書院，辭不受。忽鶴鳴山

鳴如雷者三日，而烈卒。烈初性剛方，晚年充養和粹，終日危坐，非劇病無惰容，雖大橫逆不見怒色。提學邵銳聞而訪之，談論終日，蔬食相對。副使柯喬嘗與劇談道體潛天潛地，烈徐應曰：「道固察乎天地，端則始於夫婦。若屋漏無愧天地自位。」邑簿詹道請論心，烈請論事曰：「孔門求仁，未嘗出事外也。堯舜之道，孝弟而已。夫子之道，忠恕而已。」學士豐熙成鎮海，見烈，嘆曰：「先生不言躬行，某心醉矣。」朱提學衡稱曰：「力行好學，老而不倦，漳南又一布衣也。」所著有《孝經定本》、《大學格物致知傳》、《道南錄》、《朱子晚年定論》、《諸儒正論》、《大儒粹言》、《讀書錄》諸書。

鄭榮 字邦信。少勤學，父業農，命往田所，懷書讀之。稍長，人郡庠爲廩生。孝事父母，父歿，奉母尤至，有疾不敢令知。妻小犯母怒，必衣冠負杖，端跪於庭，未命起不敢起。平生不妄出一語，不妄行一路。堂宇器物，皆極整潔。家計不充，而好周給族人。方及貢，卒。世居峻林，學者稱峻林先生。侄正學。

正學 邑庠廩。介操勵行，日與生徒講學論文，出其門者多名士。所著有《家祀辯》、《文山十不如前論》，皆有關世教。所居蓮潭，學者稱蓮潭先生。

張麟 父壇，見縉紳。麟器宇端凝，不輕然諾。孝弟睦友，不遺舊故。與人忠告，處鄉黨善下。應嘉靖間貢，卒。

盧玘 孝友端潔，丁內、外艱，苦塊三年，未嘗居內。事諸兄如嚴君，對妻子若賓客，朔望必肅衣巾人行衢道中，無疾趨旁睇。人以活孔子稱之。應嘉靖十八年貢，未仕，卒。

陳貫 嘉靖二十八年貢。著《八閩風物賦》。

侯任 字志尹。府學生。幼有大志，理學時務，詩賦古作，莫不淹貫。家貧，教授生徒以養親拊弟。與貢士潘鳴時、施仁往來講學，間有未合，便便不置。參政周賢宣稱其直諒多聞，命主石美拱辰會，立條規定鄉約，鄉父老子弟翕然信化。年六十餘，臨卒，命其子易牀，端拱正容而逝，遠近人士赴吊者五六百人，皆盡哀。所著有《論學大旨》、《讀左偶見》、《霞山雜錄》。子四人，俱讀書知禮。次子進裔，事繼母尤孝，中隆慶庚午武舉。

吳一沛 字學時。府學生。少志古人，聞潘鳴時得王文成之傳，徒步漳浦從之。潘方卧病，沛侍月餘不去。潘誨之，力學，自是有得。延請鳴時主會芝山，聯諸同志聽講，遠近從者二百餘人。及鳴時以貢赴京，復請連江陳第者主之，漳士翕興。沛學從汨沒中超出，初入手時，常於靜中念生生，其友曰：「一本無物，念生生多矣。」沛曰：「此繫馬椿法也。」嗣是，常以學須見相生相養，大意無事於念，而日以此意行之。臨卒，尚以學之未成爲恨。

高則賢 少孤，事母至孝，父視兄，兄視諸侄。居母喪，哭泣不言三年，如古制。善潘鳴時。其學以天下爲身，而人我無相，皆得諸力行者。督學姜寶與論道曰：「此吾老友。」超貢京師。萬曆己卯，中順天鄉試，尋卒。

吳貞 萬曆中，以貢士中式順天，秉禮好古。

張于壘 字凱甫，孝廉燮子。諸生也。年十七，長於詞賦，出游名山，具有撰述，竟卒，諸公爲立祠曰幼清。

唐

赫連韜

赫連韜 會昌、咸通間，士多困頓，而連韜與莆田陳黯並祭酒布衣，黃御史滔謂連韜「以不羈之材，出人之行，懇懇乎進趨，恂恂乎鄉黨，而自坎於命」。

宋

蔡元鼎

蔡元鼎 不登宦籍，文章自豪。所著有《中庸大學解》、《語孟講義》、《洪範會元》及《辯類詩》。

皇朝

陳銓 林賁 丘原高

陳銓 諸生也。忍讓持身，善處家族，能融乖爲順，嘗訓其子曰：「聖賢語言，終身可行，即用其半，亦可寡過。」子洙，見縉紳。

林賁 爲邑學生，嘗捐田租百餘石於學宮以贍士。歲荒，煮粥飼餓者，死爲具瘞埋之，贖人賊中以歸。督學邵銳榜其行於學。其後，子敬，孫紹，相繼登科第。

丘原高 字時讓。年十二補邑庠生。磊落不羈，既聞安成鄒文莊、吉水羅文恭講道江西，徒步從之，刻志苦思，屢空自如。鄒、羅二公深許之。歸，與同志切磨，期以倡明斯道。他日語人曰：「吾昔憑氣，今憑理，吾昔信理，今信心，然後乃知學之能變化氣質也。」

龍巖縣(一四)

皇朝

林京 王玄弼 蘇克善、丘存質、蔣永迪合傳。

林京 父瑜，見縉紳。京好讀書，每觀史，至忠臣義士，輒撫卷歎慕。正統丁卯，沙寇逼境，與同邑王玄弼謀請師要其去路，至龍門上坪遇賊，被執，脇使下拜，瞋目大罵。子綬爲跪請曰：「父老且病足，吾百拜代父。」京叱曰：「敢爲苟免，虧忠義耶！」父子俱死。鄉人義而哀之，求其屍暴骸中，面目如生，殮葬於死所。

王玄弼 與林京謀要賊，京被執死，度力不克，與兄用興匿山中。賊仇恨其兄弟，欲搜殺之，玄弼告兄曰：「我有二子俱長，兄子尚幼，我出就死，兄必得免。」次日，不令兄知，逸出就賊，賊殺之，兄亦竟死。

蘇克善 好學篤行。正統間，邑人王源爲潮守，奏舉克善與林洪中爲揭陽、程鄉學博，克善以書辭曰：「三代之士，皆有逸民。父母既逝，捧檄之念絕矣。」遂與勝友丘存質、蔣永迪隱居，立鄉約，遵行家禮。漳人尊爲龍溪三老。鄧茂七之變，都督范雄召致三人，卒賴畫策以平餘黨。雄欲奏請三人官，皆固辭。存質，字有文，鄉人稱爲丘園先生。其子昂，見縉紳。永迪子輔，亦見縉紳。

長泰縣(一五)

宋

楊珂 王德裕

楊珂 自號竹溪，胸懷灑落，徜徉林壑，有《夜泛西湖》詩：「明月期人醉不知，夜深偷人讀書闌。好將松戶牢關鎖，留此清光莫放歸。」

王德裕 年十三人邑庠充弟子員，十八而宋亡，聞元詔至，拜哭於庭，裂衣巾焚之。延祐初訪求遺逸，被徵，不就。教授生徒，學者宗焉。

皇朝

黃汝剛 林皞 劉常 楊應卿 林春谷

黃汝剛 隱居鴻溝，治田畝，好種時，讀書養志。中年以小學、四書教鄉人。鄉人有不平事，皆來質，輒爲解慰，皆退自說服。年八十五。子文史，見縉紳。

林皞 志行高亢，刻意學問。與林震同學，爲震所推。永樂庚子，與震同領鄉薦。後隱居不出，自號侯岡處士，後進皆師表之。

劉常 孝友清修，娛心山水，號湖溪先生。

楊應卿 縣學生。慷慨喜談兵。嘉靖三十九年，倭寇萬餘攻縣城，傅梯蟻登。應卿督游兵救援，下滾石壓雲梯，泰城獲全。四十一年，饒寇將來攻縣，復率鄉兵三百餘人覘賊，突遇接戰，被創陣亡，士民哀之。

林春谷 嘉靖中舉人。學問淵深，慷慨急窮，處家敦睦，恭遜孚於物議。

漳平縣(一六)

宋

陳備

陳備 元祐間與劉棠同里，俱有詩賦聲。時人稱曰：「劉棠、陳備，漳南賦虎。」棠既登科，備遂隱溪南不出。

平和縣(一七)

皇朝

張周民子濂，孫士琪。

柳文通 曾奇 林崇用

張周民 刻意力學，善爲詩，長真草書，與一時詞人陳子胖、林進卿、蕭子璣輩相倡和，有集若干卷。弟寬，見縉紳。子濂，孫士琪。

濂 字容潔。早尚不仕，母年未艾而眊，濂不離頃刻，行操杖，凡食授匙箸。母痢疾劇，爲嘗糞。有二兄，每事咨稟。置義田，築海堤，鄉族賴之。

士琪 以六行稱鄉閭，巡按、督學皆旌表之。

柳文通 父歿，既除喪，當就試，其母止之，遂不復出。居家教授生徒，戶屢常滿。所居西林，凡西林之占一經者，皆其徒也。

曾奇 字世英。南靖學廩生，弘治間當貢期，白督學不願仕，願養母。母病思食蠶肉，求之不得，一日，蠶忽自人後園，獲以供饌，人稱孝感。

林崇用 早肄學宮，事父以孝聞，奉繼母得其懽心。自創產均諸二弟，捐貲立祠堂、祭田，鄉族死無依者殯葬之。

韶安縣〔一八〕

皇朝

吳朴

吳朴 字華甫。書過目不忘，天文地理、古今事變、四夷山川道路遠近險易，無不在其胸中。所著有《龍飛紀錄》，紀太祖、成祖創業繼統之事，又有《醫齒問難》、《樂器》、《渡海方程》、《九邊圖本》諸書。

海澄縣〔一九〕

宋

顏唐臣子敏若、孫戴合傳

顏唐臣 慥之曾孫。所居巨族里有綠石渡，潮平可舟，潮退即淤，唐臣築隄北岸，從地跨石長二千七百八十尺，人免漚行。其後，子敏若復築南隄至新亭千九百尺。久而淤深，孫戴復砌石增高，行者便之。人爲謠云：「渡不艱，待三顏。」

皇朝

吳霞 陳薦 紀孚兆

吳霞 字汝華。邑庠生。天性孝友，篤志好古，卽所居傍築小室，扁曰顏巷，聚書其中。其潛玩程、朱，至忘寢食。國朝諸儒語錄、行錄，悉手抄讀。每語門弟子曰：「世無真儒，學之一字弗明也。學字既明，士風自變矣。」又曰：「其本在立志，其要在主敬。」所著有《射禮輯說》、《道原錄抄》、《義集抄》、《學則》、《拾棄稿》、《示兒編》，皆有關世教。年八十餘卒。長子邦懋，生員，有父風。

陳薦 字碩飛。與兄英及表兄長史林浩相師授，聞莆王侃齋以道德文章淑人，相與携笈從之。爲人飭修，禮度自閑，築室家廟傍，歲時展謁。閉戶杜門，非吊喪問疾不出。倦時散步郊原，下至藝圃樹木，亦必行立端整。處鄉里恂恂，待窮交，振急赴義，延納士類，溫和謙厚。正言格論，聳人聽聞。平生與游者有連耳順、林克諧，每往來，講議古禮不置。嘉靖丁巳，寇劫月港，所不焚者，獨薦居耳。當道有餽，不受，物色之，不見也。忽一日，謂家人曰：「吾將歸矣。」無一語及家事，惟召子弟示以喪禮，沐浴危坐而逝，年七十七。

紀孚兆 字道範。僻處海陬，卓然自奮。極力營辦，以事父母，授徒他鄉，朔望歸省，有餽送，懷歸。父母色不豫，率妻蔣跪問，必得其懽。居喪悲痛，不人卧房，廬墓三年。衣冠古朴，與人拜酬，輒命子弟執往，不屬僮僕。所教生徒，皆以正學爲本，兼及當世之務。晚年以程、朱爲的，其學益進，如蔡烈、林一陽、潘鳴時，皆傾心下之。所著有《心極圖說》、《皇祖訓辭》、《鄉約序》、《歲計序》。妻蔣，事姑愛謹，歲荒，樵山捕水爲奉。及歿，解衣具殮，躬自和土營墓，朝夕悲慟，聞者曰：「真孚兆妻也。」

鎮海衛〔二〇〕

皇朝

陳真晟

陳真晟 字剩夫。泉州人，鎮海衛戍籍。弱冠，入長泰山中從進士唐泰學舉子業。業成，薦有司，至省試，聞試防嚴，曰：「非所以待士，士不宜以此自待。」遂棄歸，一意聖賢之學。初讀《中庸》，覺無統緒，讀《大學》，乃知次第，執以爲據。又讀《大學或問》，得朱子主敬之說，曰：「此基本也。求所爲敬，則見程子以『主一』釋『敬』，而以『無適』釋『一』，遂推尋此心，求主於一，曰養一於靜，則客念不作矣；持一於動，則外誘不奪矣。《大學·誠意》一章，學者鐵門關，『主一』，玉鑰匙也。」又曰：「人於此學，誠真知之，則行在其中矣。然而氣質有偏勝，嗜慾有偏重，此學問思辯之後，所以加之篤行歟？」天順三年，用程頤故事詣闕，上《程朱纂要》。其書首採程氏學制，次採朱氏論說，補正學士夫。次作二圖，一著聖人心與天運，次著學者法天之運。次言立明師、補正學、輔皇儲、隆教本數事，以終圖說之意。書未上，先疏乞召見，而後陳說，不報。書上，下禮部，復爲當事者所寢。歸家，讀提學使臣頒行勅諭教條，有主敬窮理、修己治人、崇正學、迪正道等語，喜曰：「此正教也。然學官既崇正教，則科舉宜定正考。」因採勅諭中要語，參以程氏學制、呂氏鄉約、朱氏貢舉私議，作《正教正考會通》，欲定考德爲六等，考文爲三等，列爲條例，纂長書，告當路諸君子。當路漫不省。真晟學有所得者，至是皆無所遇。聞臨川吳與弼，欲往質之，行至江西，張學士元禎止宿，叩其學，大加稱許，曰：「先生得程朱以來正印矣。卽不見聘君，可也。」遂還，自以

布衣詣闕上書，因以「布衣」自號。既沒，郡守彭桓表其墓曰：「大明闕下兩上書詣補正學、泉南布衣陳先生之墓。」

福寧州 福安縣 寧德縣(二)

唐

薛芳杜

薛芳杜 太子補闕令之之孫，或云其弟之子。清簡寡慾，英明有斷，鄉人爭訟，不之官府，而之芳杜，得一言皆帖服。肅宗踐祚，念令之有啓沃舊恩，召用其子孫，芳杜固辭不赴。

宋

王鯨 王宗望 林維屏 孫調 黃館 謝翱 林仲明

王鯨 字彥龍。熙寧、元豐間，嘗兩請鄉舉，與尚書黃裳、秘閣陳覺民爲文字交。蘇軾守杭州，開西湖，鯨投以詩，大加稱賞。

王宗望 父模，執經義豐先生之門。宗望亦從學義豐，義豐稱其文似唐子西。宗望學有源委，而於器數制度考校尤精。

林維屏 字邦援。少從義豐游，通性理學，而於《易》、《詩》、《書》尤有造詣。梁克家判福州，延禮郡庠講道受業，一時學者雲集。所著有《易》、《春秋》等論，《韓柳辨疑語錄》諸書。學者稱榕臺先生。

孫調 字和卿。其學得朱文公之傳，以排擯佛老、推明聖經爲本。所著有《策府》五十卷、《易書詩

解》、《中庸發題》共五十卷，《浩齋稿》三卷，學者稱龍坡先生。

黃鎔 號古愚。力學，博通經史，善屬文，尤工詩。

謝翱 字卓羽。父鑰，性至孝，居母喪，哀毀廬墓，終身不仕，著《春秋衍義》、《左氏辯證》傳於時。翱世其學，試進士不中，落魄漳、泉二州間。文天祥開府延平，長揖軍門，署參軍，聲動梁、楚。已，別去。宋亡，天祥被執死，翱悲不能禁，隻影行浙水東，逢山川、池榭、雲嵐、草木，與所別處，及其時號相類，則徘徊顧盼，失聲哭。時天涼風急，挾酒登嚴子陵臺，設天祥主荒亭隅，再拜跪伏爵畢，號慟者三，復再拜。起，乃以竹如意擊石，作楚歌招之。歌闋，竹石俱碎。或時談勝國事，悲鳴煩促，涕泗潸然，聞者傷之。時時至鴈山、鼎湖、蛟門、候濤、沃州、天姥、野霞、碧鷄、四明、金華洞天，搜奇挾秘，歸作紀游之編，持以誇人，若載七寶。游倦輒憩浦陽江源，及睦之白雲邨，尋隱者方鳳、吳思齊，晝夜吟不休。其詩直溯盛唐以上，卓有風人之餘。文嶄拔峭勁，雷電恍惚，出人風雨中。當其執筆時，瞑目遐思，身與天地俱忘，自號晞髮子。婺、睦人士，翕然從之。至元甲午，去家武林，西湖上前代遺老尚多存者，咸自詫見翱晚。明年，以肺疾死，年四十七。溺死，屬妻劉氏曰：「吾去鄉千里交游，惟方韶卿、吳子善最親，慎收吾文及吾骨授之。」韶卿，鳳也，子善，思齊也。已，鳳、思齊至，與方幼學、方濤、馮桂芳、翁登、登弟衡葬翱子陵臺南，以文稿殉，伐石表之曰「粵謝翱墓」。

林仲明 字誠甫。以三舍法人太學，升上舍，博通經史，尤善詩文，將授官，以時事日非辭歸，不仕。

元

黃寬 林大興

黃寬 字洵饒。力學古文，耿介自重，能怡其親。世亂，避兵歸，益貧，父、母、兄、嫂四喪不能葬，以憂感卒。無後，袁天祿并其四喪葬之於石潭，宣城貢師泰爲志銘。所著有《四書附纂時事直紀》。

林大興 字子詩。性至孝，事父承顏順志。父歿，殯殮葬祭，一循《家禮》。當其父存之日，縛竹格護菊，忽枯，節生根，垂地茁筍。及父歿，居倚廬於中門之外，其年海棠不花，塘中紅蓮變白，屋後禽鳥喧啾不絕，至虞乃已，人謂慈祥之感。

皇朝

鄭轡 阮林 謝伯陽 陳迪 林文益(三二) 袁標 李中美 丁炷 林梁 陳坡 陳喜

鄭轡 字子乘。卅角卽與林珙結爲文友，同受業韓信同之門。信同卒，轡與珙俱心喪三年，而後歸。

阮林 字朝用。質樸自任，不尚浮靡，日惟吟咏自適，其雜見於留題者，人傳誦之。

謝伯陽 字廷復。能詩。

陳迪 字允吉。教授鄉閭，著《澹泊齋稿》。

林文孟 字用時。儻仗義，將合葬嫡母，啓父壙不利，出柩哭奠如初喪。以貢中應天鄉試，歸至池州，疾革，號老母者三，乃卒。子鴻，壽八十，有詩刻。次子況，字漢卿，幼孤，事母得懽心。鴻病，值妻病亦劇，況日侍兄所，或怪之，曰：「妻死可復，兄難再得。」教鄉子弟習古儀節，無慮百拜，讓語及書史無隻字。遺有《懶雲稿》。初，文孟與友龔敏善，龔貧而介，衣敝甚，難見踵。文孟直餽之，度不納，密量其尺度製之，曰：「吾以自着。」醉中取服，則陽嗔衣不稱躬，難不稱足，委置之。強龔試之，相宜也，曰：「君好着

之。」龔着以去，曰：「彼棄我取，奚所不可？」

袁樞 天祿公裔。樂易傲儻，輕財仗義。人深山中，苦耽經史。與李中美談詩，教子學古，諸兄弟服其友愛。

李中美 博學夙成，雖盛暑衣冠儼然。世廟晏駕，中美蔬素三日。與袁樞、林子燧、陳喜談詩，著《詩書玉篇直音》。

丁炷 早孤，孝事叔父。叔父亡，蕭然卧喪次。多游延、建、寧德及諸名山吊古。有作，傳汝舟校之。

林梁 字正夫。精天文、地理、數學。幼出後於叔，本生卒，枕塊哭奠。弟愛民，弱而孤，爲治產，愛民學宦無內顧。鄉人避寇托妻子焉。從子燧，工詩，有集古三百餘，與曹世長、李中美、陳喜爲世友。愛民，見縉紳。

陳坡 州廩生。嘉靖丙辰冬，奉州檄從往小金征勦，兵潰被害。事聞，贈本州同知。

陳喜 字希和。績學渾樸，蚤喪父，獨事母，孝養至老不衰。母年高多病，躬伴母寢，晨昏溫清，衣食櫛盥，至廁廁瑣穢，未嘗假他人。年九十四。

福安縣(二)

宋

劉現 陳元老 楊復 張泳

劉現 宣和二年，伏闕上書，言外寇猖獗，而王黼、梁師成之徒不恤國難，肆其奸貪。言甚激切，不報。三年，陳過成、張汝霖以直言爲黼所劾，又伏闕力爭，亦不報。遂拂袖東歸，賢士大夫多薦之，竟不起。

陳元老 學者稱城山先生。有《城山集》。

楊復 字志仁。受業文公之門，勁特通敏，考索最精。真德秀帥閩，卽郡學創貴德堂處之，學者稱信齋先生。著《祭禮》十四卷、《儀禮圖》四帙，又有《禮家雜說附註》二卷。

張泳 字潛夫。蚤志濂洛，家居授徒，多有顯者。慶元中，禁偽學，大比，試天下之言性論，有司讀其文，驚喜，以爲壓場策門偽學。泳抵排異端，力主朱文公之傳，學者稱墨莊先生。

皇朝

郭允美 鄭木 鄭伯英 劉汝瑞 詹鎬 左庾、陳以伸、林鐘合傳。

郭允美 名胥，以字行。博極群書，山水游覽，輒有題咏。守令請謁，並不克通。

鄭木 字孔材。與弟孔華，並有詩名。

鄭伯英 詩辭該博，居鄉教授。率衆勦捕官臺山寇有功，當道以聞，蒙鈔帛之賞。

劉汝瑞 孝，不離親側，與諸弟構四樓於蘇江，吟咏其上。友郎中三山陳良珍常通詩筒，號真逸叟。

詹鎬 嘉靖中備倭，守福寧南門，罵賊，受支解死。

左庾、陳以伸、林鐘 嘉靖中，邑中倭，被擄不屈，罵賊死。

寧德縣〔二四〕

宋

阮大成 高準 陳成父 許叔度 龔剡 鄭師孟 陳英 林翊 陳普

阮大成 字希聖。由舍選。靖康元年，與太學生陳東等伏闕上書，稱李綱社稷之臣。後爲韓世忠客，既而退隱。世忠平建寇范汝爲，道經寧德，造訪焉。時所過郡邑，例供芻糧錢千緡，寧德以大成獲免。縣令趙誦之集五百緡爲謝，辭不受。

高準 字平一。隆興元年，以舍選升國學。丞相湯思退主和議，太學生張觀等伏闕上書，乞除三賊，準與焉。乾道間，虞允文當國，獻《東南銷患書》一卷，因請入北界伺虜虛實，凡川山夷狹，道理遠近，郡邑兵賊強弱，悉錄以獻，并言恢復大要。時允文已去國，朝廷欲授以官，準曰：「準所以効命於虞相國者，政以復九廟陵寢爲念，非爲身計也。」拂袖歸，杜門不出。

陳成父 字美玉。父駿，見縉紳。成父學本家承，以立誠爲本。《近思錄》一編，口誦、心惟、行己皆有法度。一升上庠，兩預解選。有《律曆志解》、《默齋集》藏於家。

許叔度 字端大。淳熙七年鄉舉。工詩，嘗著《江東十論》，推原三國六朝離合之因，臞軒王邁爲註。兄弟五人，俱有才名。

龔剡 字曇伯。嘉定十三年特奏名。曾祖允昌，祖必俞，俱稱善士。剡克世其家，蚤從朱文公學，晚與同門友楊復論理氣先後之說，尤有造詣。自號南峰居士。

鄭師孟 字齊卿。家貧力學，受業文公之門，嘗著《洪範講義》，以發明文公《皇極辯》之蘊。

陳英 字義叟。博通經史百家學，一時江湖名卿爭致之。晚歸桑梓，以學淑人，執經北面者半青

紫。

林駟 字德頌。清修苦學，雖山經地志、稗官小說、老釋之書，無所不覽。景炎元年，以《易》魁鄉薦。江古心漕江西，駟謁之，試之曰：「盍以一而至十爲賦破乎？」應聲曰：「四後五六，一先二三，七八九而至十，奇偶位而揲參。」古心稱賞。著書授徒，鄰境爭迎師之。

陳普 字尚德，別號懼齋。邑之石塘人，所居有石堂山，學者稱石堂先生。初，淳熙間，朱文公過石塘，異其風土曰：「後數十年，此中當出儒者，能讀天下書十八九。」普生，當理宗淳祐甲辰，鷓鴣百數繞屋。稍長，入鄉塾，有大人志，聞韓翼甫倡道浙東，負笈從游。韓之學出慶源輔氏。輔，朱門高弟也。宋鼎既移，決意卷藏，朝廷三使辟爲本省教授，不起。開門授徒，歸然以斯道自任。四方及門，歲數百人，館里之仁峰僧舍，至不能容。建州劉純父聘主雲莊書院。熊勿軒留講鰲峰。丞相劉文簡屬修黃、楊二家喪祭禮，因并晦庵所纂，爲三十卷。尋講饒、廣，在德興初庵書院尤久。嘗與游翁山、范天碧、謝子祥極論太極之旨。晚在莆中十有八年，造就益衆，出其門者如韓信同、楊琬、余載、黃裳輩並以正學爲時所宗。嘗曰：「性命、道德、五常、誠敬等字在四書六經中如斗極列宿之在天，五嶽四瀆之在地，捨此不求，更學何事？」少壯時，銳然有經世志，謂三代之治，莫善井田，作書數千言欲上於朝，屬不仕而止。著《字義》一卷，凡百五十三字，出授門人。識者謂比之程正思、陳安卿，詳略適中，而立義指辭爲尤精。又有《四書句解鈐鍵》、《學庸旨要》、《孟子纂圖》、《周易解》、《尚書補微》、《四書六經講義》、《渾天儀論》、《天象賦》、《詠史詩斷》凡數百卷。元延祐乙卯卒於家，年七十二。普所著《天象賦》曰：「垂萬象乎列星，仰肆覽乎中極。一人爲首，四輔爲翼。鈞陳分司，內座齊飾。華蓋於是乎臨映，大帝於是乎游息。尚書諮謀以納言，

柱史私記而奏職。女史貽彤管之訓，御宮揚翠娥之色。陰德周給乎其隅，大理詳讞乎其側。天柱司晦朔之序，六甲候陰陽之域。其文煥矣，其功茂哉。環藩衛以列曲，儼閭闔以洞開。北斗標建車之象，移節度以齊七政。文昌制戴筐之位，羅將相以枕三臺。辟天牀於玉闕，乃宴休之攸御。肅天理於璇璣，執權衡而是預。天棓以相指，內廚、內階以分據。雙三夾斗而燮諧，兩一賓門而佐助。爾乃天牢崇圖，設禁暴之隄防。太尊明位，擬聖公之寵章。太陽接相以班跡，玄戈致杓而耀芒。勢微微而寫映，輔翼翼而流光。薦秋成於八穀，務春采於扶筐。天廚敞兮供百宰，傳舍開兮通四方。偉天官之繁縟，蓋人事之儀躅。七宿畫野以分區，五宮建都以炳燭。既已歷於中宮，乃迴眸而自東。覩角、亢於黃道，包分野於榮中。開天門之璀璨，立疏廟之隆崇。何大角之皎皎，夾攝提之融融。是携紀於變節，是正綱於大同。次則梗河豫備，招搖候敵。汎舟亢池，飛觸帝席。周鼎繁祉，天田望籍。披三條於平道，賓萬國於天門。置平星以決獄，列騎官而衛閭。陽門守於邊險，折威防於將奔。頓頑司於五聽，車騎參於八屯。望南門之峻闕，觀庫、樓之威府。偃蹇列於四衡，的歷分於五柱。或藏兵而蓄銳，或重扃而御侮。煥蒼龍之中宿，屬氏、心以及房。聽朝路寢，布政明堂。爰俾其地，於宋之疆。粵若大火，赫矣天王。鉤鈐儼於鳳闕，積卒穆於龍驤。天輻備於輿輦，鍵閉守於關梁。騎陣啓將軍之位，從官主丞豎之職。罰作贖刑，日爲陽德。二咸防非而體政，七公議賢而糾慝。陣車雷擊乎其南，天乳露滋乎其北。彼貫索之爲狀，實幽圉之取則。歷龍、尾以及箕，跨北燕而在茲。配四妃而有序，均九子而延慈。龜曳甲而波泳，魚迴鱗而水嬉。天江爲太陰之主，傳說奉中閨之祠。糠爲簋揚之物，杵爲舂臼之用。天鑰司其開閉，丈人存其播種。狗以吠守，姦回靡縱。却睇女牀，前臨天紀。曜棘庭之金印，粲椒宮之玉齒。中有崇垣，厥名天市。車肆中

衢以連屬，市樓臨箕而鬱起。帝座穎而獨尊，候臣熙而變理。宗星派疏而遠集，宦者刑餘而近侍。列肆與屠肆分行，宗正與宗人間峙。帛度立象以量用，斗斛裁形而取擬。若乃眺北官於玄武，泊南斗於牽牛。賦象通犧廟之類，司域蔭江淮之洲。建星合曜於黃道，天弁寫映於清流。河鼓進軍以嘈囂，兩旗夾道以飛浮。天象委輸於南海，狗國分疆於北幽。鷄揚音而顧侶，鼉躍影以來游。天田鄰於九坎，羅堰迫於天杼。是司溝洫，是制田疇，遽聳睇於漢陽，乃攸歸於織女。引寶疏圉，繰絲弄杼。輦道清塵而俟駕，漸臺飛灰而候侶，可以嬉游，可以臨處。覬須女之繒室，奄開邦於會稽。離珠曜珍於藏府，匏瓜薦果於宸闈。離瑜佩瓊而袷服，敗瓜委蔓以分畦。其外則鄭、越開國，燕、趙鄰境，韓、魏接連，齊、秦悠永，周、楚列曜，晉、代分罔。天津橫漢以離光，奚仲臨津而汎影。既編梁以虹構，亦裁輪而電警。列虛、危於齊濟，職悲哀於宗廟。墳墓寫狀以弧出，哭泣含聲而相召。敗臼察災以播暉，天壘守夷而駢照。司命與司祿連彩，司危與司非疊曜。同禍福之多端，總興亡之要妙。人掌詔以優游，儼爲人之質象；鈎主震而屈曲，宛如鈎而取像。車府息雷轂之音，造父曳風雷之響。杵軍給以標正，白年豐而示仰。土吏設備以司存，斧鉞用誅之所掌。虛梁闐寂以幽闕，蓋屋喧轟而宴賞。天錢納賁以山積，天綱憩輿而野饗。北落置候兵之門，八魁建張禽之網。瞻廟府於室壁，諒有衛之封畿。布離宮之皎皎，散雲雨之霏霏。霹靂交震，雷電橫飛。壘壁寫陣而齊影，羽林分營而折輝。土公司築而開務，天廐飛御而起機。騰蛇宛而成質，水蟲總而攸歸。動則飛躍於雲外，止則盤紮於漢沂。觀奎、壁之分野，辨鄒、魯之川陸。豢馴獸於園囿，隸封豕於溝瀆。左更處東而掌虞，右更居西以司牧。立囷倉之儲聚，樹洞屏之重複。司空主土以知祥，鐵鎖營芻而蓄畜。軍南門列轅而出衆，天將軍揚旗而示逐。惟王良之策馬，知車騎之滿野。蒙居河而路

塞策裁鞭而電寫。閣道佇游而據中，附路備闕而居下。巡胃倉之昴畢，直趙地之郊衢。昂旄頭而肅引，畢參車而迅驅。卷舌列天譏之表，附耳屬天高之隅。天高望氣，天譏備巫。卷舌安其寂默，附耳矜其諂諛。天船汎影於天瀨，天陵分光於碧虛。貯積水而窺害，包積尸於疊藹。礪石資乎銛刃，月宿歸夫大陰。天街畫於戎野，天河察於山林。天節宣威於邦域，天陰進謀於腹心。天庾積粟而標稔，天廩備稷以析歆。天園曲列兮儲芳樹，天苑圓開兮蓄異禽。芻蕘遵納粘之軌，殊日曉重譯之音。九游排鋒以進退，軍井依營而淺深。八關嚴扃於畢野，諸王列藩於漢潁。何五車之均明，而天柱之昭煥。納五兵之藏府，圖七國之邦貫。天潢利涉以淪漣，咸池浮津而森漫。闢岷峨之列壤，晞觜參之耀形。示斬割之明罰，收葆旅而獲寧。參旗懾於邊寇，王井通於水經。座旗肅穆而昭禮，司怪幽求而發冥。屏嫌於客，厠咎於圉。亦有天屎，資黃効靈。於是仰東井之興鬼，覽西秦之霸邑。質明祠而變生，鉞淬水而刑及。四瀆斷江淮之候，兩河占胡越之急。水位瀉流而迅奔，天罇奠羞而回集。軍市通貨而圓綴，五侯疑議而衡立。積水醞鸞酌之芳，積薪貯牲庖之給。野鷄候兵而據市，天狗吠狼而映漣。聞丘擬乎兩觀，水府司乎百川。狼授戈而野戰，弧屬矢而承天。老人祚主而秋照，丈人通臣而夜懸。扶柳星以及張，識周疆之爰啓。儼味頸以分噍，奉滋裳而賜醴。觀乎軒轅之宮，宛若騰蛇之體。交雷雨之藹藹，列后妃之濟濟。酒旗緝宴以承歡，內乎繩愆而執禮。燿含烽而諜寇，實防邊之有僎。長垣崇司域之備，少微尊處士之懿。外廚調別膳之滋，天相居大臣之位。天紀錄禽而獻齒，天廟嚴祠而毓粹。天稷播五穀之勤，東甌表三夷之類。爰周翼軫，厥上惟荆。驅風驛之千乘，奏雲門之六英。長沙明而獻壽，車轄朗而陳兵。青丘蔭於韓貊，器府總於琴笙。軍門坐屯於軍閭，司空掌土於司平。矚太微之崢嶸，啓端門之赫奕。何官庭之宏

敞，類乾坤之翕闔。四座謀一帝之神，九卿踵三公之跡。儲以太子，參之幸臣。從官肅侍，謁者通賓。郎將司戟於丹陛，郎位含香於紫宸。議淵謀於五位，警嚴衛於常陳。仍寄屏以持法，控端門之內闥。明堂演化，靈臺候神。虎賁之徵猛士，進賢之訪幽人。胡天漢之昭回，自陳震而繇絡。北貫箕而昭斗，南經說而躔、籥。合乘津之汎派，分漂杵而桴閭。歷五潢而浩漾，淪七星而迴薄。惟木宿之含精，嚳歲星之有麗。雖盈縮所察，禍福攸繫，然夫得之者降，失之者替。作明君而曜朗，罰昏主以光翳。下爲社靈，上儀人帝。如天胎而毀卵，具戢仁而弛惠。則回驚愆期，前馳舛契。奮檜楫而示懲，峙垣樓而表戾。奧若熒惑，火帝之精。每執法以明罰，必伺災而告誡。守其邦而歲戰，去其野而時清。若虧信而曠禮，則下乘而上征。居惟疊發，合與憂并。浮天機而聳劍，列蚩尤而曜旌。司危見而國失，昭明出而起兵。伊上位之播靈，有鎮星之曜質。尋所履爲休慶，視所居爲貞吉。廣邦徽而斯留，祐軒宮而載出。若崇奢而賤義，則行虧而度失。或含丹而舉兵，或擒玄而遭疾。旬始發而候起，獄漢明而主黜。彼金方之曜色，有太白之垂文。乃降神於屏翳，實建象於將軍。如用兵之不察，匪先達之攸聞。高出利於深載，順指著於宏勳。苟思徽之不溥，則禍變之斯分。或飛芒而飭月，或引彗而橫氛。六賊陳災而結禍，天狗殺將而破軍。咨太陰之粹靈，粵星辰之攸叙。乘四仲而顯晦，歷一周而市履。爲用罰之淵謨，爲出師之令軌。察亟劍之相去，候征旗之所指。非其出而憂寒，錯其宜而將死。若淫刑而縱欲，則委李而流失。白其角而延哀，黑其規而應水。於是乎究經緯之終始，微幽顯之機符。昭晰乎爲人主之明鏡，杳藹兮實冥祇之秘樞。固聲聞而響集，乃形移而影趨。若山石之旌處士，若谷風之應騶虞者也。若夫退寒暑而弗舛，中昏旦而無越。畢路雲滋，箕躔吹發。亦有樞降軒而繞電，景瑞堯而麗月。雖盼蠻之難尋，信英靈之未歇。嘉大舜

之登禪，曜黃星而靡鋒。壯高祖之叙歷，聚五緯之相從。殷馘縱眺，識曹公之潛跡，李郃流目，知漢使之幽蹤。荆軻入秦，白虹貫日；衛生設策，長庚蝕昴。悲夫，星隕如雨而周替，虹長竟天而秦滅。蛇隨楚則九域吁嗟，狗過梁則千里流血。晉君終而嫪妖現，漢帝園而參暈結。周、楚死而南衡，晉、齊殃而北列。自大辰以及漢，彰宋焚而衛蕪。或除舊以布新，顯陳盛而姜絕。諒吉凶之有以，匪災譴之虛設，實罔念以作狂。在恭己而成哲，是以昔帝王之有天下也，莫不宜設其官式司其告。唐則義和謹察，夏則昆吾演粵。或著殷巫之美，復登周史之號。宋述子韋，鄭稱裨竈，唐昧將尹皋宣範，甘德與石申垂誥，故能下守職而有恭，上聞變而無傲。此希微之妙象，豈蒙昧之專好？有少微之養實，無進賢之見譽。參器府之樂肆，犯貫索之刑書。恥附耳之求達，方卷舌以幽居。且瑾扉而絕駟，豈臨河以羨魚？望天門而屏跡，安知公卿之所如？詳哉！其言之矣。」

元

韓信同 鄭忠 陳原顯

韓信同 字伯循。幼穎悟，工文賦。既壯，受業陳普之門，遂刊落華藻，究心伊、洛、關、閩之說。普嘆曰：「吾耄矣，得斯人，飲水俟命復何憾哉！」延祐四年，應江浙舉，不合，歸卽杜門不出。自是四方書幣日至，弟子握衣請教，屢滿戶外。著有《書經講義》、《三禮》、《易經旁註》、《書解》、《集史類纂》及詩文十卷。

鄭忠 字伯直。雅好經術，或勸之仕，曰：「山林朝市趨一也。」著《家訓》，略曰：「讀書修德，以清白爲世規，力田務農，以勤儉爲家法。」

陳原顯 弱冠輜晦，與陳自新爲詩社，不干世務。雖處亂世，得以善終。子彥文，亦以儒隱。

皇朝

陳自新 林偉 陳璣 龔道 陳宇 林克誠 陳廣 林各 張綱 崔文舉

陳自新 字貢父。通五經，精《易》本傳義，而推衍以皇極經世書，從游者衆。子孟龍，見縉紳。

林偉 學問該博，與高頤、余復爲友，義方之教甚嚴。子仕夔，學行俱粹。孫祖、泰，俱登第。

陳璣 宣德九年舉人。與林尹爲友，尹在太學病劇，璣往問之，搜其囊遺金幾二斤，亟命僕封識。尹死，取金具斂，其餘爲携櫬歸。臨歸，就尹故榻前呼曰：「林君魂氣依我，毋流落天涯也。」

龔道 字士行。未冠領鄉薦，卒。爲詩矢口成章，趣致完足，書法遒勁圓融。林文安公悼之詩，比之賈生、李賀。

陳宇 無爲州學正和之子。不競聲利，闢園吟詩，自謂平生慕真隱，而有山水真樂，翫游真境，詩書真味，咏吟真趣，因號五真居士。子褒、褒，並舉進士。褒，見縉紳。

林克誠 性恬淡，好詩書，以吟咏自適，教諭戴本日與往返，稱爲高士。

陳廣 隱居授徒，多所成就，莊敏、林聰嘗受業焉。既貴，寓書於廣，稱其自得真趣，非語言所能形容者。

林各 嘗從林莊敏游。安貧樂善，恂恂言行，論學者必以養素自重爲先。年八十餘。

張綱 字美中，參議蘭曾孫也。惇尚孝友，篤志讀書，長於詞賦。阮雲塘、陳鰲溪以文章氣節相高，時號三傑。

崔文舉 字敷治。敦尚氣節，精古文詞。萬曆間，以貢選人太學，卒。

何子曰：凡志錄先輩，則首道德矣，是有政事、文學、忠節諸門。予論次《閩書》，第分縉紳、韋布，列於世次，以便流覽。是以朱文公不別於縉紳，李延平諸賢亦不離韋布。若夫名登薦書者，未經釋褐，當亦不離韋布。又有先則韋布，後以子孫貴爲封贈君者，所以得傳之縣，不緣封贈君，並列之韋布。

贊曰：德足代工，而無世柄。弋釣耕隱，各守其正。人爵旣之，天爵則敬。造有淺深，道同正應。戢景潛光，斯文之慶。

〔校記〕

〔一〕「英舊志韋布」，各本原作「韋布志」，據本書體例改。

〔二〕「光澤縣 泰寧縣 建寧縣」九字，各本原脫，據本書體例補。

〔三〕「邵武縣」三字，各本原脫，據本書體例補。

〔四〕「力川」下，疑有脫文。

〔五〕「晉」，各本原作「首」，據郭紹虞《滄浪詩話校釋》人民文學出版社一九八三年版改。

〔六〕「自古」，各本原脫，據郭紹虞《滄浪詩話校釋》補。

〔七〕「工」字，各本原脫，據郭紹虞《滄浪詩話校釋》補。

〔八〕「光澤縣」上，各本原衍「邵武府」三字，據本書體例刪。

〔九〕「泰寧縣」上，各本原衍「邵武府」三字，據本書體例刪。

〔一〇〕「建寧縣」上，各本原衍「邵武府」三字，據本書體例刪。

〔一一〕「漳浦縣 龍巖縣 長泰縣 漳平縣 平和縣 詔安縣 海澄縣 鎮海衛」二十四字，各本原脫，據本書體例補。

〔一二〕「龍溪縣」三字，各本原脫，據本書體例補。

〔一三〕「漳浦縣」上，各本原衍「漳州府」三字，據本書體例刪。

〔一四〕「龍巖縣」上，各本原衍「漳州府」三字，據本書體例刪。

〔一五〕「長泰縣」上，各本原衍「漳州府」三字，據本書體例刪。

〔一六〕「漳平縣」上，各本原衍「漳州府」三字，據本書體例刪。

〔一七〕「平和縣」上，各本原衍「漳州府」三字，據本書體例刪。

〔一八〕「詔安縣」上，各本原衍「漳州府」三字，據本書體例刪。

〔一九〕「海澄縣」上，各本原衍「漳州府」三字，據本書體例刪。

〔二〇〕「鎮海衛」上，各本原衍「漳州府」三字，據本書體例刪。

〔二一〕「福安縣 寧德縣」六字，各本原脫，據本書體例補。

〔二二〕「林文益」，本傳作「林文孟」。

〔二三〕「福安縣」上，各本原衍「福寧州」三字，據本書體例刪。

〔二四〕「寧德縣」上，各本原衍「福寧州」三字，據本書體例刪。

閩書卷之一百三十一

英舊志 閩巷〔一〕

福州府 閩縣 侯官縣 懷安故縣 古田縣 閩清縣 長樂縣 連江縣 羅源縣 永福縣 福

清縣〔二〕

閩縣〔三〕

唐

李相 林浦

李相 本壽州人，故姓少。跣跑好走馬，屠博。母李媪，家素豐，酤酒市中。王緒未起時，從媪貰酒，數負責，又醉毀媪酒舍。相怒，欲毆之。媪躡之曰：「天下方亂，此壯士也。」遂與爲刎頸交。王緒起兵，相從之。王潮殺緒，相匿其遺孤建齊於山中，以其少子與建齊易名而呼。居三日，潮果索建齊，其少子應曰：「諾」，遂見殺。卒與建齊俱從軍，居閩縣。冒姓李，至其曾孫榮乃復故姓。兩家以兄弟數。宋時，子孫咸至大官矣。

林浦 唐末避地海濱，凡山巔水崖可維舟處，皆鑿井以給行人，人名林公井。及卒，里人祀之。

皇朝

蔡梅 薩琅 鄭時進 陳伯亮 施綸 林燧 鄭汝信 董世道 齊德成

蔡梅 割股愈母，王偶爲書《孝子傳》，林誌爲贊以美之。

薩琅 系出西城。父仲禮，元時爲行省檢校，卽家焉。七歲，檢校沒，母沙氏齧指自誓，誨育甚篤。其後，家益落，琅採薪拾穗以養母，身饑寒而母恒飽暖。鄉人孝之。鄉值旱，若火，輒曰：「請薩孝子來。」皆有應驗。母病，禱北辰願代，母絕復甦，曰：「神告我，而子至孝，加壽三十四。」母愈三年乃卒，計三十四月也。一日，行廢圃中，得金珠首飾一囊，訪之數日，乃知里中家當籍沒，其女急擲寄鄰舍，誤落圃中者。悉歸之。馬某家被火，賣地於琅，掘得白金一罌，遂還之。馬願分半以謝，曰：「君方被災，何忍受此？」子琦，見縉紳。

鄭時進 參議觀子也。饒財樂施，嘉靖二十三年大饑，積粟一困，悉散家族。

陳伯亮 中允謹之父也。生平不食言，有糴粟者誤遺金，急追返之，曰：「更欲糴耶，而多與吾金？」嘉靖季，倭掠郊野，伯亮自鄉移入城，市屋以居。其故屋主訟求增直，官却減直以歸之，伯亮不可，勅中允曰：「得屋避寇，直孰大焉。多謝當道，無減爲也。」

施綸 善賈厚貲而好施，嘗以二百金託人貨鹽，其人易以贖金，鹽主詰綸，綸不辯也，笑而償之。除夜遇友人鄭建，建負人金五十，索者急，問曰：「券安在？」請至吾家。」遂出償之。

林燧 幼失父，奉母許甚謹。年五十餘，母色不怡，跪伏問故，待愉乃起。家有美田宅，同堂欲以瘠敝者易之，燧曰：「吾鮮兄弟，同堂猶同胞也。」遂與易。人有急，委曲相周。於是里中凡纖芥忿爭，兄弟

不睦，咸聽燧言。

鄭汝信 宋文肅公湜之裔。事繼母如所生，撫孤弟甚篤。年九十九卒。

董世道 假貸爲生，久漸饒給，遂節縮裘餼以置田宅，率與兒子中分。子姓不能婚葬者，皆爲舉之。居瀕海，屢燬於倭，大捐貲倡人城其地。春夏出粟鄉族，冬收率免其息。道拾遺金，候其人還之。貧負賁者，棄不取。見流殍，爲瘞。族有無賴者，素肆橫，尋被難，私爲脫焉。

齊德成 事親至孝。弟卒，無嗣，撫孤女如所生，營葬治奩悉從厚。世業醫，至德成擅國技，貧者施以良劑，更助之，不望報也。

侯官縣〔四〕

宋

楊文昌

楊文昌 造扇爲業，樸直安分，每售扇皆有定價，雖村人及過往收市未嘗妄有增加。所積餘錢，則專用養母，自奉甚薄，閭井重之。一日出街，歎悶仆地，逢黃衣持牒拜請，啓視之，曰：「楊文昌可作畫眉山上地，替鄭大朗。」少頃，蘇豁，心謂不佳。明日，別母、妻、子，沐浴而逝，時歲元年春也。歲晚有富客來買扇，楊子從客話及前事。客曰：「畫眉山正在西川秦州，群人盡談今年二月內多夢新土地到任，靈顯異昔時，一邦奉事甚謹。」楊子乃知父爲神云。

皇朝

高均 黃文會 孫炳 陳繼思 張天極

高均 江西僉憲旭子也。旭卒官，均聞訃慟絕，欲廬墓側，母不可，則以月朔之墓，哭甚哀。既，喪母，合葬，廬墓焉，苦塊悲號，三年乃返。弘治間，旌表。

黃文會 母高，得風疾，禱北辰求代。母卒，哀毀幾絕。父又卒，廬墓三年。喪畢，朔望及忌日齋戒住墓，或留旬日。弘治間，旌表。

孫炳 少孤。母謝，守節，炳事之孝謹。母疾，不離床側。父忌，悲號。母卒，三年不入內舍，日再蔬粥而已，刻木爲像，廬墓終喪。虎五遶廬，蛇兩護枕，神龜至，盆松花。里閭咸稱孝感。嘉靖中旌門。

陳繼思 嘉靖末，倭寇猝至鄉，人皆逃匿，繼思父母老疾，獨侍不去。寇憐而舍之。舟覆溺百餘人，繼思悉收瘞之。路得遺金，捐入里社，弗取也。卒年可百歲。

張天極 父領課鐵輸京師，死，同郡人爲槨葬叢塚中。天極聞訃，晝夜泣，徒步走京師，謀函父骨。窘不能歸，會王職方應時者代之函歸，捐金葬之。天極誓終身蔬茹，報之如父。竟卒，時尚未婚。

懷安故縣(五)

宋

林僂 陳顥 林元

林僂 生平輕財樂施。康定間，浙西寇鄂鄰倡亂，從海門窺福州。僂與其子衍傾貲募民船、水手，分隊守隘，賊至，從旁出戰，遂大捷。而官軍掩爲己功，僂曰：「吾計保鄉井耳，豈與卒伍爭哉！」衍曰：「吾

父子出萬死擊賊，功成見掩，死當廟食矣。」仰天而逝。優亦尋卒。鄉人哀祠之，朝賜廟額。

陳顥 性樂施與。子七人，孫二十八人，曾孫六十五人，玄孫一百三十人，世多顯仕。

林元 宋季，賊寇充斥，城外皆爲賊壘，元與子禮率鄉人保障，後卒。元大德間，現靈鄉人曰：「我常爲此鄉主。」鄉人遇水旱疾疫，悉求禱焉。

皇朝

林清

林清 每歲除，袖金數十囊，潛行里巷，有貧而愁歎者，擲金門內，不使其知。年九十四。曾孫庭學，見縉紳，庭彬，州學正。

古田縣〔六〕

皇朝

李墉 廖文 林堪 陳鉛 林逸夫 周志言 張炫

李墉 性孝友，母喪，不御酒食者三年。弟求分異，墉面壁應之，弟因取上田自私，磽确者付墉。墉曰：「均矣。」受而藏之。

廖文 父歿，事繼母至孝。侄少孤，撫如自出，產業均分。

林堪 仗信義，識權變。弘治間，赴闕請立城，凡所資費，悉經區畫。嘉靖初，賊首周馬良搆亂，參議魏榮知堪有俠氣，令往諭，賊即解散。嗣復集，益猖獗，御史王以旂勦捕，經年弗獲。堪復詣壘開譬，馬良

感泣歸命，鄉井就安。

陳鉛 少孤，事母至孝。善賈，饒貲，恤寡贍貧，多慷慨之行。

林逸夫 幼失母，撫於祖母甘。年十五，甘病篤，逸夫閉戶焚香，割左股藥之。少蘇，家人莫知。越三日，甘病復篤，逸夫復割於舊處，深人寸許。甘飲其羹，再蘇而逝。

周志言 少孤。母陳，哀痛成疾，志言割股和藥，未効，再割，母疾竟愈。

張炫 萬曆十年，割股食祖母陳氏。十七年，割股食其父大桐，二病俱瘳。

閩清縣(七)

元

許氏五兄弟

許氏五兄弟 逢言、知言、知白、知什、知億。母病，昕夕不離側，越三月，藥弗効，知言齋戒籲天，割股以進，病遂愈。及母卒，五人哀毀踰禮，用浮屠法，俱燃香於臂以資冥福。進士許叔度爲傳。

皇朝

林向榮

林向榮 父蚤世，母池，守節。嘉靖末，廣賊掠縣，榮與母逃匿。賊殺其母，向榮伏尸且哭，賊併殺之，時年二十。

長樂縣(八)

皇朝

范御 柯文基 謝介夫

范御 父瓊，洪武中任黃巖丞，徵糧稽違論死，御年十九，擊登聞鼓乞代。太祖嘉嘆，詔釋瓊，而御竟以擅擊登聞鼓斃杖下。時鄔孟妻王氏亦乞贖夫罪，自經死。京師爲之語曰：「范瓊子，鄔孟妻，貞與孝，有孰齊。」

柯文基 五歲失怙恃，依祖母陳，比長，備極敬養。陳九十六卒，居喪三年，衰經未嘗去體，盡力營喪，鄉黨稱焉。

謝介夫 故掾也，好勇喜俠。嘉靖季，倭屯福州南門外，旦暮酒酣皆荷戈寢，介夫結死士欲夜襲其營，時巡撫意在和倭，乃痛箠之。介夫既挫，村野居民雖得賊首級無敢報矣。其後巡撫被罪去，有司復遣介夫追賊，竟與戰死。而福清有夏叔慎者，亦死之。

連江縣(九)

皇朝

陳文亮 楊崇 倪神保

陳文亮 生七月而孤，事母篤孝，母得危疾，禱天減年，取糞嘗之。母沒，哀毀踰節，喪葬遵禮。以子鴻漸封刑部郎中。

楊崇 自其高祖宗連至崇六世，孫男七十餘人同居共食，一錢尺帛必籍貯之，婚姻、喪葬、祭祀、飲

食，分給有常數，一門肅雍，共守家法。故隸戎籍，當繼伍符，崇再從弟鐵及銅爭請行，適崇子孟外歸，請曰：「孟長當往。」成化間，有司以義行上聞。

倪神保 幼失父母，與妻林共禱於天，求得一木兩枝，刻二親像奉祀。遂入石芹山求之，果見二木相對，拜祝曰：「果可刻吾親像，木當自動者。」三祝畢，木果三動，即取歸刻之。既成，夫婦謹奉，溫清告面，一如事生。里人嘉其孝誠，白有司旌之。

羅源縣〔二〇〕

五代

陳霸先

陳霸先 爲王審知先鋒，戰勝攻克，以忠義勇敢名。追賊白塘嶺，馬踣而逝，人廟祀之。

宋

鄭伯淵

鄭伯淵 輕身好義，鄰里有急，暮夜赴之。淳祐間，大旱者再，伯淵年七十餘，偕衆遠至福源潭禱雨。有溪久淤，水無所泄，捐資倡濬。

皇朝

林懋孫 林辰孫

林懋孫 少孤，奉母。邑有寇，懋孫負母逃，採拾爲養，備歷艱險。寇定歸家，市薪自給，而尸饔潔

修，鄉人名其居曰孝巷。

林辰孫 家貧，自力養父。父病半載，辰孫籲天剔肝爲糜以進，父食遂愈。鄉耆合聞於官，厚宴餽之。

永福縣（二）

唐

王爽

事親居喪著至行，載名唐史。

皇朝

楊惟吉 黃東

楊惟吉 洪武四年，山賊溫九作亂，官軍捕之，居二年，逃復出，益猖獗。惟吉棄妻子訴官，官遣官軍破之，賊大潰，顧未得溫九。又三年，九潛回故山中，惟吉合鄉人圍之，賈勇先登，肩被鎗，衆隨入，獲九，械官，境內以寧。事聞，賜鈔錠。

黃東 正統、景泰間，邑罹兵燹，民苦浮糧被徵，東訴之鎮守、御史及按察二司，得免千四百餘石。明年，邑饑，通稅山積，復走京師，疏免千九百石。邑民至今賴之。

福清縣（二）

宋

林雄 林洞 吳齋

林雄 善方醫，閨門敦睦。政和七年，明堂成，肆赦，太學生劉特等以雄年百四歲，奏乞推恩，特賜勅授右迪功郎致仕。又二年，乃卒。

林洞 當紹興十年，一百三歲矣，而二子皆年踰七十。是年，張魏公浚奉母知郡，秦國夫人初度，縣宰林世修使洞二子衣綵，翼洞入爲壽。浚悅而禮之，以狀聞，勅授右迪功郎致仕。又十四歲，乃卒。二子皆終九十餘。

吳齋 紹興二十九年，顯仁皇太后八十，詔寵錫高年。齋年九十有一矣，侄芳居上庠以聞，勅特授右迪功郎致仕。又二年，乃卒。

元

陳譽父子。鄭天錫

陳譽 至元中，刲股療母。譽與其妻疾，子觀、泗復如譽所爲孝。

鄭天錫 至元間，忙古歹丞相統兵至境，天錫執旗詣軍曰：「此邦皆天子民，願禁侵掠。」丞相爲歛兵。卒年九十餘。

皇朝

何鐵 林元明 魏鐸 游僕生

何鐵 少孤，父客死連江，母已嫁矣。及長，乃扶父柩返鄉，迎母歸養。伯叔之子散四方者，招之聚居。婚娶喪葬，費皆已出。

林元明 刲股療母。及母喪，家貧未能葬，不酒肉者數年。

魏鐸 精地理，卜塚葬父，塚傍故有塚，其子請悉歸之，而謀徙之他所。鐸曰：「子欲歸地，苦貧耳。吾先人不願德鄰耶？遺子數金，慎毋言徙。」子文煊，登進士。

游僕生 父乙，郭主事萬程僕也。萬程少孤，其庶叔常欺壓之，乙所以防護萬方。亡何，郭族開殺人，主事被株繫，乙挺身走縣，求爲質，縣笞鉗甚酷，竟死獄中。及主事仕，貧不年臨，盡囑妻盧善視僕生也。僕生生而善食灰炭，及長，修幹強項，喜樗蒲，應募兵。潰賊來逐，僕生空拳力拔樹抵賊。嘉靖乙卯，僕生年二十四矣。郭故家海口鎮，海口被賊，盧及二子倉皇分避，盧入鎮東城，二子入田舍，相去二十里許。賊屯海口三月餘，僕生往來其母子間，踰垣送餉鎮東，城中驚服。僕生勇壯，以爲部兵，日先鋒追奔，後以糧乏散歸，策贏傭載。而其時，盧又避賊縣城東，去海口亦二十里許。戊午，縣城猝陷，僕生曰：「主家母子不免矣。」質贏值半值，自念：有不幸，以此收之。既聞主事子被虜，卽跳而投賊。既至，賊已去。頃復至，僕生夜負主事子，而扶盧山谷間，問關四句，乃抵郡城。有司聞其名，招募之。殺五賊於惠安縣，斬二賊，首髮結而繫之頸中。伏起，衆潰，賊憤並圍之，力殺賊，賊縛僕生樹間，叢矢亂刃，死。盧及其二子慟哭招魂而葬焉。

泉州府 晉江縣 南安縣 惠安縣 德化縣 安溪縣 同安縣 永春縣 (三)

晉江縣 (一四)

唐

黃嘉猷

黃嘉猷 事親居喪著至行，載名《唐書》。

宋

陳繼文 林頤壽 謝應瑞 黃章、劉祥、趙希琳合傳。 許康世、董之邵合傳。

陳繼文 累世同居。子嘉謨、嘉猷，相繼登第。守蘇壽名其坊曰孝悌。

林頤壽 以孝聞。守葉廷珪請爲鄉老，月致牢醴，名坊曰孝友。

謝應瑞 淳祐六年，郡饑，自出私錢四十餘萬，糴米賑人。詔補進義校尉。

黃章，取肝救母。劉祥，取肝救父。並見真文忠勸孝文。又有趙希琳，取肝以療母。

許康世、董之邵，並刲股療母。

元

黃道賢 陳成 趙深道 呂祐 楊郎

黃道賢 生母蘇，襁褓，以疾去。既長，力請父復之，與嫡母唐並奉，孝養備至。父疾篤，祝天減壽，尋愈，及卒，延一紀矣。廬墓終制。至元初旌門。

陳成孝 義重鄉閭。至元間，年九十餘矣，四世同居，六葉相見。監郡僕玉立表門曰耆德，率桐華社諸公賦詩紀之。河東張翥、臨川危素爲序記。

趙深道 至正甲午。歲大歉，深道設粥中和堂，列食饑人。已，復大疫，死者枕藉，深道造舟爲輪，用

長繩挽拽，沿門搜索，昇瘞之城外。朝廷表門曰義士。

呂祐 元末郡城兵亂，有卒拔刃脇母索財，祐奪刃裂手，被傷仆地，良久而甦，開目視曰：「母無恙，死可矣。」遂死。

楊郎 鐵右丞舍人兒也。右丞分治泉郡，皇朝湯信國取福州，郎奔告右丞曰：「官人世蒙國恩，郎世蒙官人恩，今國運已去，官人無死之耶？則請從。」右丞曰：「是也。」郎曰：「請從新橋而赴水。」右丞遂與俱至橋，憑欄良久，曰：「我且歸，尚有家事當處治。」翌日，復促之。右丞復往，復如前言。郎曰：「不復見官人矣。」遂投橋死。

皇朝

何大榮 顏黑子（五） 朱則文 李俊育 李思鄒 林茂森 史惠 鄭宣載 韋起宗 陳建沆
林肅 黃廷榜 黃深 張志越 潘泗子寬 徐行愷、潘文從、呂伯一、伯四合傳 王文昇 伍民憲
陳言 楊甫麗 陳文七

何大榮 以孝義稱。國初，郡學其所修建。

顧黑子 揚州人顧圭養子也。圭僑居晉江，洪武初以事繫獄累歲，黑子採薪資給。圭釋歸，復以薪易甘脆。圭隸戎籍，子閏童當補役，黑子請偕。閏童，宕子也，寔日甚，黑子仍爲酒家傭，贍其衣食，爲之娶妻。人歎黑子微賤，而有士君子之行。

朱則文 祖器高，元時任泉州書院山長。則文幼失怙恃，鞠於伯氏德春。德春遇賊，且被殺，則文抱號求代，得兩釋。一日，夢神告曰：「天賜汝金，助汝不給。」已，果獲金數十錠，悉出濟貧乏。後以子鑑

貴，贈右副都御史。

李俊育 鳳池里人。以貲豪里中，而急爲義，人目爲長者。縣洛陽橋，壯橋也，歲久，海沙日積，橋趾下沒。而風潮過當，水嘗漫橋，不得涉。守馮禎以委俊育。俊育出貲高之幾五尺餘，凡費貲萬計。今其子孫多衣冠，而鳳池之李爲華族。

李思鄒 有勇力，頗讀書，知大義。鄧茂七作亂，黨酋吳四官據黃山，脇思鄒往役。思鄒曰：「我太平百姓，從汝盜耶？」遂倡義立柵禦賊，鄉里從者四百餘人，屢戰屢勝。一日，晨霧昧咫尺，賊乘間襲之，思鄒率六七人力戰柵門，爲所殺。暨斂，顏色如生。

林茂森 年二十八喪妻，母氏撫孫哭曰：「哀哉！幼喪母，異時繼母苦汝矣。」茂森感言，終身不娶。有里婦善刺鞵，茂森與其子着鞵皆鬻諸里婦者，或戲之曰：「君以義自持，鞵從何來耶？」茂森歸，引刃碎鞵棄之，自後着皮鞵而已。平生莊嚴和易，里有是非，悉往質平。葬之日，環其居數百家，皆自悲哀出祖。玄孫甫任，見韋布。

史惠 父元吉，久羸疾，侍湯藥不解帶，滌澣必躬。居喪，廬墓禱號，終二年，衰麻蔬食，時有白鴉巢楸之應。成化七年旌表。以子盛貴，封中書舍人、大學士。繼偕，其裔孫也。

鄭宣載 封股以救母、兄。令錢梗贈之詩曰：「至信感豚魚，一誠貫金石。吾心一念良，萬善從茲立。書爾方寸間，與爾朝夕惕。」

韋起宗 生而孤，母蔡寡居守志。起宗每遇縉紳先生，長跪哀告，求文旌母，欲聞母節於朝。家貧，假貨圖之三十餘年，垂成矣，爲忌者所沮，涕泣痛恨，雙目俱盲。又十餘年，乃得聞朝，目盲復開。母死，

爲土屋墓傍，廬之三年。更念幼孤，缺於喪紀，更追服父，又以三年廬父之墓。近墓松蟲大生，楸櫨食盡，起宗抱樹而號，墓前後樹皆不被蟲。一日雨甚，聞有號廬外者，出視之，廬遽崩圯，起宗得無恙。廬畢之日，卽其處掘作己塚，曰：「死葬此。」子孫不得惑堪輿，數移徙，使我不得久久侍吾親。」起宗所居里，故名會通，鄉人以其母節與其孝行，群易之曰節孝。去之三十年，所居火，四鄰皆火，而起宗母棹楔如故。萬曆中，旌門。

陳建沆 父沒，母改適，與其祖母居。及五六歲，問祖母曰：「人皆有母，何我獨無？」祖母語故，輒掩涕不食。稍長，習攻金，跡母所在，時時持錢予母。母所改適死，無以爲生，卽迎歸，與祖母並養，旦夕訓飭家人：「母事吾母。」不至，少不至，卽忿恚自撻。晚歲母疾，親滌溺器，櫛笄總，視飲食，搔痛癢，設榻母傍，以待呼召，如是者三年。每食必祝曰：「天祐吾母，必使母死，先於吾。」

林肅 年十五，失父，母出父所遺金私之，肅不私也，卽以奉兄，與共葺祠宇。兄業儒，當直里役，怯自匿，肅卽代兄詣縣役。肅旣爲人孝友，曙大義，又知時善取予，以此致羨，而好行德。嘉靖季，邑值荒，召工作築室穿塚，而厚與之直，曰：「此古人荒政。」復率先爨粥以飼餓者。有小屋十數，召貧民居之，不責僦直。債券度不能償者，悉焚之。劇賊起，發塚質骸，肅母及兄之骸在質中，莫知其處。忽有樵夫引告之，至忽不見，得骸負歸。年八十餘。兒孫皆以文武科第顯。

黃廷榜 機織爲業，所嗣所生並隆孝養。一門三十口，合居共爨無間言。郡守令並致禮之。

黃深 事父母孝敬。兄潤，參政也。父母歲生日，深與潤更迭壽，母曰：「兄貴也，可獨當。汝寧須此？」深曰：「亦各言其子也。」父沒，旣葬，值嘉靖季賊發人塚，深直往，欲啓父墳出襯。人曰：「毋慮賊

獲耶？」深曰：「獲，請爲質，賊不過欲人金耳。」竟往，正值賊至塚次，欲發塚，顧饑頓走掠食，未遑也。深伏身灌莽中，人夜取櫬出，心念中途遇賊則奈何，會天驟雷雨，賊解散，得其渡溪棄船，載櫬以歸。

張志越 孝謹飭勵，父老廢明痿痺，志越日修甘旨寢處，隨之扶侍，十年身代几杖。母病瘤，五載莫醫，旦夕號天，忽夢老人撫背曰：「女醫來矣。」詰朝，果得女醫，授劑立愈。迨父沒，哀毀踰禮。俗於初死時縛紙轎及轎夫焚之，志越當其焚時，擗踊仆地，稽首再拜，叩首挽轎夫曰：「吾父痿痺，好扶持之。」母死，毀亦如喪父。

潘泗 賈於三山，與徽賈同舍。徽賈將行，誤遺橐金去，而泗亦將去而之他，過別於主人，見架有橐帶懸者，知徽賈所遺金，携往他舍，而時時之主家徘徊者四十日。一日，聞主人戶內有勃磳聲，人問故，主人具言，而且疑其妻與女竊之。女亡以自白，趣欲就死。泗曰：「吾徘徊此四十日爲此也。」立之他舍，持金還徽賈。徽賈感泣，願割半謝，誓不受。於是，諸賈義泗，稱泗爲真叟。子寬。

寬 兄實，爲諸生。寬入學舍省兄，兄方對友人弈，寬推下秤子，怫然曰：「父母望兄何事，乃作此戲。」友人大驚，此諍弟也。兄老晚子，一日病篤，割股療之。股尚未進，忽有鬼物語兄曰：「我且行矣。君有賢弟，割股食君，我則不敢侮君。」有頃，寬以股肉進，不言也。其兄大驚曰：「汝豈割股食我耶？人子事父母則爾，我兄也，敢累爾？」既瘞，語寬曰：「我老乃子，老人子寧知果我出耶？弟之事我，固卽子矣。寧必子也？」寬大驚曰：「兄何出此言。」兄死，爲兄子婚娶成立，支派以蕃盛。

徐行愷 訓蒙永春蓬壺山，且習醫也。嘉靖季，倭賊掠蓬壺村。村中巨姓有呂尚四、呂伯三、潘文備、林文煥等，率鄉衆擊走之，用是自喜負，頗有作賊心。文備之弟文從，知而力諫之，文備不聽。文從挈

室遁入郡城。倭賊駐石勒，謀薄郡，兵備使者萬民英檄蓬壺鄉兵與同安民兵往勦，兩兵不協，大敗歸，呂伯三等俱死。蓬壺衆方憤，萬兵備又檄縣追蓬壺衣糧，縛數兵繫治之。尚四等益憤，因結盟倡亂。而南安縣詩山下有褚鐸者，出應之，突入縣劫繫囚，執令林萬春去。萬兵備遣百戶王道成往擊之，賊佯降，并執道成，勢益猖獗。於是萬兵備廉知文從有諫兄之美，召使諭之。尚四等不聽，且欲挾留之，文從竟計脫。行愷雅與呂、潘諸家善也，時人賊壘爲賊看病，賊不疑。時林令亦卧病賊壘中，行愷謂尚四曰：「君出令君就醫我家，」（一六）「我不敢失。」許之。令既出，行愷因密以尹令號召諸里正，激以大計，又察其黨中有悔者，約爲內應，則皆諾。會尚四統諸賊攻德化，敗歸，行愷謂令曰：「可矣。」部分已定，行愷佯入壘看病，潛約王道成出，既出，火砲齊發，諸脇從者皆反殺賊。尚四等三十餘輩，狂奔走去之附倭，皆爲倭所殺。德化官兵來追尚四，至則尚四已敗，因攘以爲功。行愷不自列，賞不及，復歸郡城以醫自給。尚四之敗於德化也，亦其兄弟有呂伯一、伯四者逃入德化，與德化令張大綱叶義攻守。萬曆中，觀察陳學伊爲行愷、文從、伯一、伯四傳，曰四義士。

王文昇 父燭，瀧水訓導，見縉紳，孝子也。文昇年十二，隨父京師，授官以之瀧水。亡何，瀧水病免，歸途遇賊，欲劫之，奉父亡匿空館中，水適至床，不及者尺。文昇召瀧水上床卧，而自立侍水中三日，倍謹如不見水。居瀧水喪，如顏丁。居其嫡母喪，一如喪父。（一七）以母老故，遍結邑中醫。母病，邑中名醫弗請畢至，無不願爲文昇愈母者。

伍民憲 安平鎮人。嘉靖戊午倭至，扶父際會逃，反遇賊，民憲長跪曰：「勿驚吾父，餘任君欲。」賊不聽，刃其父。民憲挺身殺二賊，又傷數賊。後隊至，落其右手。卧草中，一手荷戈，口喃喃呼父，三日乃

絕。至今煙雨中見道傍有男子荷戈立者，人輒合掌呼「伍孝子」而過。

陳言（八） 邑掾也。性至孝，年十四，詣郡太守白父冤。平生然諾相許，濡足拯難。嘉靖季，倭寇縱橫，請放被虜八十餘人，憤誅納無策，上便宜七事，卿大府命人壘諭賊，賊皆開心回而，至爲抵賴，他賊以報。功上，得掾臬司，以母老竟棄去。

楊甫麗 襁褓喪母，事二繼母無違。繼母急之，甫麗愈以順，折券絕甘，鄉族誦義。

陳文七 福清人，梓匠於泉。無父母，家有祖父，一日，謂儕輩曰：「日吾心悸，豈吾祖有恙乎？」馳歸福清，祖果疾革。焚香籲天，願剖肝以療，援刀剖腹，覓不知肝處，恍有神人撫其背者，而肝出，割七匙煮粥以進，祖果瘳。自此皮膚突起一疤，人稱爲「疤孝孫」。祖終，爲泉人携販呂宋，呂宋聞其爲疤孝孫也，厚資之，數年間大獲計然矣。

南安縣（九）

宋

呂七十四（二〇）

呂七十四 呂晦文大奎之侄。幼主人閩，七十四率白徒千人迎而從之。幼帝義焉，封爲恭懿侯，食實封千戶。繇是黃姓、曾姓者聞風各以千人至。幼帝崩，杜名隱處不屬元人。按，七十四之得封爲侯也，蓋幼帝蒙塵，有如漢獻帝雖畫刻印，揚名安殿，故以侯封呂矣。

皇朝

諸葛麟 諸葛選 傅善同 王元謙(二) 黃繼芳 嚴開

諸葛麟 父隆，見縉紳。麟嚴厲方正，持身孝義。隆將之官，以母屬麟，(一)左右無方，一日病篤，夜分稽顙北辰，刃股起其疾。父沒，哀毀踰禮，踊絕方甦。弟駿，亦見縉紳。

諸葛選 叔訥夫，爲永嘉司訓，無子，以次立選爲後。訥夫沒，選以其所遺產業，與兄弟共之，曰：「吾嗣叔氏，豈利叔氏業哉？」歲時祭祀，曲極豐腆。處宗族內外，謙和懇惻，鄉里敬愛。

傅善同 孝於事親，好行其德。孫凱，見縉紳。

黃元謙 嘉靖間，泉中倭，無良之民相煽爲盜，永春、南安人呂尚四、陳子洪兄弟等剽掠鄉社，而有赤鬚兒者跳而往從。赤鬚兒，元謙從弟也。元謙伺其潛歸，執之，會族告祖，質以大義，投之水中。已，出之，所以自預凶具殯殮之，曰：「死之，爲其作賊，殮之者，以我弟也。」子洪兄弟聞之，擁衆至，執元謙，痛捶之。元謙不服，細致壘中，露刃劫之。元謙瞋目曰：「寧死，肯從賊乎？」子洪兄弟亦投元謙水中。

黃繼芳 屠者也。父好從客賭棋，繼芳陰出錢日佐客與父賭。父有所譽與有所愛，則輒厚與往來，(三)飲食餉之，人稱孝子。上事有司，有司曰：「是鼓刀以屠者，尼不行君子？」歎曰：「上而大公，下而聶政，彼何人哉！」

嚴開 嘉靖間，父爲賊獲，縛而焙之，開前代焙。已，復欲焙其兄，復代之。賊黨曰：「爲人子弟如此，尚可殺乎？」生之。

惠安縣(二四)

宋

黃旦 陳元吉

黃旦 刲股療兄。

陳元吉 年十二，隨父求喪牛，過石洞，虎躍出，啣父項，項笠齧虎牙，幸不殞斃。元吉直前，連擊虎，刺中虎目，虎乃釋父走，扶持歸。

皇朝

陳有禮 張頤 郭幹平 王定民 王陴 張粲

陳有禮 元末兵亂，回寇據郡，城邑人陳同與其姊夫柳伯順聚衆保鄉里。及陳友定帥閩，同等受友定約束，破寇復城，友定授同行省右丞，守漳州，授伯順興化府同知。友定敗，伯順已先死，同亦解甲歸，顧有司頗以新制繩之，同不能堪，復勸鄉人謀起兵。有禮責之曰：「今爲洪武三年，天下已定，君尚謀起兵，非叛也邪？」同怒，殺之，携其首去。其子號哭隨之，至西湖沙中乃投還。官軍是年誅同。

張頤 恤孤賑貧，作家塾，延名儒教子孫，親戚子弟來學者，悉廩之。歲大疫，鄉人或闔門病，頤持粉漿藥物沿戶省視。正統中，沙寇作亂，距縣四十里，衆惶惑，欲避。頤言縣尹：「當扼要堅守，毋自恆擾。」俄有令抽大戶轉米餉軍，人洶洶謀避。頤率先詣縣受米，尹大喜，即委頤督餉，頤勒什伍，止宿輸納，悉有次第，暨畢事，無一亂行者。

郭幹平 有武勇，兼能墨菊成花。初，海寇登岸，卒至其家，幹平操縱禦之，追及於隘巷，擒其渠魁，并黨從無遺者。有司上功，給冠帶。

王定民 家貧，鬻金楮，日度得贏錢半，市酒肉供父母。父老病，定民晨入省視，背父出坐堂中，請狎習父老過從談笑。父好賭棋，定民懷錢授父老爲賭資，且曰：「幸無勝也，以困吾父。」里社會，致父先之會所，數父坐次，設帷御風，迨暮，傭一役俟門外，與昇歸。葉令春及聞之曰：「此飲食跬步不忘親者。」造廬揖獎，厚餽之。

王阼 父鑑，爲巡檢，卒官。阼扶喪歸，未脫衰絰，不入私室。迨母歿，哀毀如禮。及葬，有鷹來集柩側，哀鳴三月。

張粲 萬曆中，割股愈父。

德化縣(二五)

宋

張興渭

張興渭 母病，百藥弗痊，興渭窮迫，籲天欲剖肝以進，母病立愈。淳熙六年表門。

安溪縣(二六)

皇朝

李炳

賦性剛毅，樂善好施。

同安縣〔七〕

宋

蔡挺卿

封股愈父。

元

顏應祐

顏應祐 母許，以兵難遷徙失所在，應祐行求二十六年，有告曰：「汝母在也，在雲南。」應祐卽入雲南求之，至蜻蛉嶺得焉，迎以歸。上官民望送祐詩云：「閩泉南詔天一隅，道途相去萬里餘。巴巫之水急於箭，關索嶺峻能摧車。顏生遠來憂且喜，視之不啻如平砥。客中兄母迎母歸，此生始信堪爲子。吁嗟世俗日已漓，爲臬爲獍不自知。事父與母能竭力，顏氏之子殆庶幾。」

皇朝

陳乾道 胡乾爲 葉秉乾孫元齡

張弘綱 王肇楨 劉震春 蔡憲曾 樓鳴鳳 蘇存明並子

孫 許鍾會 蘇龍

陳乾道 家富，好善，至老康寧，子姓滿前。曾孫華玖，領弘治鄉薦。

胡乾爲 服孝爲善，造余塘橋，立義塚，作《家訓》示子孫。父克裕，子廷銘，俱有孝德。曾孫明佐，萬曆中進士。

葉秉乾 正統中，出糧二千石賑饑，賜勅旌義，勞羊酒，復其家。沙、尤寇羅與甫作亂，秉乾請於官，督民壯殲之。十四年，山賊陳敬德攻縣，掠鄉村，秉乾募義兵千餘，從主簿蔡遴禦之。海賊張秉彝等圍永寧衛，復率兵却之。賊退，再犯高浦所，更率兵與戰，擒賊首十餘人，斬首數百級。賊怒秉乾捍己，合衆圍豪嶺，秉乾突圍被執，脇之從，秉乾大罵賊，賊肢解之。事聞，詔表秉乾門爲忠義。孫元齡。

元齡 嘉靖初，朝命大臣出勦汀賊，元齡以應義良民督機兵於上杭，荷戈裹足，崎嶇崖洞者幾一年。既與大兵奮討，渠魁折首，凶黨破滅。事聞，受幣帛之賞。

張弘綱 倭寇之亂，父遂夫與弟弘猷皆被虜，索金贖。自度家貧，莫得金，泣說賊曰：「某年幼，雖假貸無與者。請歸父，父得金矣。」賊質之，爲刻日，而歸父。父歸，終無所得金。至期，賊酋縛出，將與其弟斬之，弘綱復給賊曰：「父歸必得金，請遣弟速之。」賊又如言，而遣其弟。弟既脫，弘綱乃告賊曰：「家實貧，金終不可得。吾代吾父與吾弟耳。」賊怒曰：「點兒。」懸燒之。

王肇禎 與父伯騰網魚牛鼻溪，父溺，肇禎跳身援父，亦溺。會同儕者亟拯肇禎出，肇禎曰：「未出吾父也。」復投淵求之，竟偕父殞。

劉震春 侍疾廬墓。

蔡憲曾 善居喪。

樓鳴鳳 割股羞父。

蘇存明 蘇頌裔也。父死於外，不能返葬。存明請其母姨與母居，沒而奉以與母同穴。有子二人，曰潤，曰洧。洧嘗出，及暮乃歸，白存明曰：「適拾遺金，俟其人返之，是以歸遲。」存明曰：「何如勿顧。」明其人持金謝，存明曰：「吾所以謂不如勿顧也。」潤仕瀧水教諭，存明病，心動，棄官，人亦孝之。洧孫商霖，爲邑諸生，每言：「人於中夜，將古人好事思量一番，心便軒豁。」又曰：「念到堯舜禪受氣象，更有何物足掛胸中。」

許鍾會 淳誠古朴，課子讀書，終身不入城邑。子廷用，舉進士，服官，人莫知爲貴人父也。

蘇龍 少孤，倚祖爲命。萬曆辛亥，祖病，籲天刲股進，祖爲延數月。竟不起。里人欲白縣旌之，辭曰：「海濱人也，何知有楔棹事？」

永春縣（二八）

宋

陳士英 卓子信

陳士英 爲縣隅總。寶祐六年，山寇犯境，率民兵二百鼓行前，忽遇白刃如林，衆皆辟易，士英掀髯奮擊，力不支，死之。郡守吳昺表其門。

卓子信 亦爲縣隅總。開慶元年，寇薄縣境，子信率民兵前，賊驚駭，第以練習非素，猝戰而潰。子信被擒，賊惜其驍勇，使從己。不從，遂遇害。郡守吳昺表其門。

皇朝

潘學 陳福 陳永達

潘學 嘉靖甲申，汀、廣流賊寇德化，當道檄七縣官兵禦之，知縣柴鑣知學智勇，特加禮請，學率鄉兵，追至小尤中團，擒斬無遺。癸巳，賊又寇安溪，知縣陳瑀請學捕之，奮志擊賊，遂戰死。

陳福 善化里西溪農家也。其先自南宋以來，兄弟同居，家建二堂，以別男女，並食共衣，家範數條，整肅簡儉。世推一人長家政，婚娶祭葬，量力辦治，庭無門言。(二九)至福十一世矣，鄉黨尊之。寇入境，過門而不忍犯。其家曰三大，曰五千，曰十千，曰三萬，曰十四，曰廿九，曰同，曰中者，其尤著者也。世守忠樸，未嘗至有司之庭。令柴鑣遺吏禮獎，量免其徭役，始人見一謝，鑣欲爲上狀聞於朝，輒惶恐辭避。學使邵銳聞而嘉之，陳其孫之隸諸生者。

陳永達 永達兄弟也，爲宋陳知柔之後。達子興，遲子祖，祖無子，惟興有子孫。達目不知書，性友愛，與遲勤裔治生，白首不分析，男治外，女治內，各執世業，以昌其家。萬曆中有大晟者，五世矣，相安如故，當道旌之。

建寧府 建安縣 甌寧縣 建陽縣 崇安縣 浦城縣 政和縣 松溪縣 壽寧縣(三〇)

建安縣(三一)

宋

黃毅

黃毅 字公輔。初，郡治遷徙不常，民無定居。毅所居地舊爲茶場，盡獻之官，以立城郭，民立祠祀之。

皇朝

李埜 林釗 謝勳 劉楫 斐崇 徐岷

李埜 正統間，沙、尤盜起，民避而奔山，遂相攘略，惡少聚謀將犯高山。埜居鄰境，往叱之曰：「汝欲得米，何乃蹈死？」指囷示賑，諭以典憲，惡少散去，請諸有司撫而平之。有盜竊其廩，止左右勿追。豪讎賊其奴殺埜之驢，乃餽以驢肩。貧者負息，不責。得陶人謾甃直數萬，不與爭。疾革，語其子勿作佛事，第焚通券。埜，肅愍默祖也。侍郎安陽崔銳爲作墓表。

林釗 十歲喪父，葬而廬墓。雜作爲生，供母及弟。母病足，抱負出入二十餘年。家稍贏，置田產以畀弟侄。平生好讀馬伏波《戒子篇》。長子德卿，令博興，輒遺書戒勉之。知府王一鶚、邵廉圖釗像傳示鄉約。年及百歲，御史龔一清疏請詔賜絹帛四匹。德卿，見縉紳。

謝勳 蚤喪父，事母至謹。流賊寇建，突入其家，勳挺身衛母，被賊重創，母竟免。事二兄如父，同居四十載，析箸之日，田地廬舍惟兄所命。子璿，見縉紳。

劉楫 嘉靖丙辰郡饑，捐粟賑濟，脫妻簪珥施棺。丁巳歲，邊儲匱急，奉詔輸粟萬石，授指揮僉事銜，築紫芝山房居焉。

斐崇 幼喪父，事祖母、繼母孝。憫俗火葬，施棺捨地。歲歉，發穀平糶。

徐崑 壯年失偶，不娶。嘗有德於黃濡，濡報之百金，濡死，舉金還子。鄰有偷者，所藏贓露，備金爲

贖。

國寧縣(三二)

唐

柳宗彝

字孝翁，以正直聞於時。子三人，皆仕唐爲大夫。

宋

章參 童僧 黃昭武 劉純

章參 農夫也。仁宗元年，年百有二歲，賜勅慰勞，授承務郎，逾年卒。子珪，進士。

童僧 好道術，嘗佐州兵擒勦逆賊李如海，授建陽縣籌嶺巡檢，不就。景炎末，謝枋得信州兵敗入閩，見其英偉，以詩勉其招集義兵，用圖恢復。

黃昭武 簡肅公四世孫，其祖自邵武來徙居。昭武剛毅有謀，德祐間，閩浙騷擾，饑饉相仍，出粟賑其鄉人，且告之曰：「若輩當以忠孝存心，戮力捍守，毋効猖獗，噬臍無及。」衆感激，出死力，方怡然。

劉純 生有勇略，既歿，守王遂以聞，贈朝散郎，謚義莊，立忠烈廟祀之。

皇朝

陳榮 馮宣、羅佛童合傳。 謝言 鄭烈 劉瑛 陳嗣 葉桂芳 周鶴齡 任和

陳榮 忠肅公裔。少失怙，事母孝謹。母目失明，晝夜扶持，每夕叩天，似聞有人語曰：「舌舐可

愈。」榮如其言，一旦復明，時母年九十矣。後，母卒二日，心尚微溫，乃以藥灌入鼻，至夜復甦，年九十。永樂丙申，建大水，二子俱髻年，飄入水中，抵福之螺洲，遇衝逢岸。鄰家被火，及其廬數四，輒反風滅，人謂孝感。孫錢，兄韋布。玄孫應熙，見縉紳。

馮宣 有膂力，走及奔馬。正統間，沙尤盜熾，取建之吉陽，以邀截驛路。宣與鄉人羅佛童、范宗南、范永清糾衆攻之，斬馘無算。明年，知府張瑛征勦高陽餘寇，宣復與佛童隨行，至大湖嶺遇賊，衆駭皆奔，宣獨手殺數人，後無繼者，遂與佛童同死之。

謝言 正統六年，歲大侵，言如詔書，輸谷千石賑貸，勅賜羊酒，立旌義坊。

鄭烈 從本縣典史襲殺鄧茂七，斬首五百餘級，拔其寨，餘賊潰散。事聞，以爲巡檢。

劉瑛 屏山十一世孫也。失母哀毀，事繼母至孝，處異母弟鏞，友愛甚篤。鏞學成爲廣文。里人厄火，出金寄蘇氏，已，蘇亦被火，倉皇轉之瑛，後遂忘所寄。瑛出還之。

陳賙 與一僧人善，僧寄之百金，十年矣。僧病，賙往問之，僧喜，乃出金還僧。僧感其義，吞聲面壁，目隨瞑。其後僧徒反誣賙所寄金多，訟於官，賙卒不辯。

葉桂芳 七歲喪父，哭如成人。母毛，斷髮孀守，桂芳朝夕禱天祈母壽。嘉靖四十年，山寇突起，負母逃，遇寇，欲殺之。桂芳跪泣，請代。自此終母之世，不復一日離左右。

周鶴齡 燃指祝母病。

任和 父丞常熟，歿於官，和髻齒扶輿，菽水養母。弟嗣他支，分以腴田，悉讓不受。

建陽縣(三三)

唐

劉常 倪彥常 朱邦式

劉常 父喪，廬墓七年，廬前芝生兩莖。建中元年，刺史陸仲源、觀察常衮以聞，詔旌門，賜帛，改里曰忠孝。

倪彥常 昭宗時人。與弟彥春俱仗信義。年豐穀賤，輒糴藏之，遇饑饉，悉出以濟貧乏。兼精道術，能治旱疫。其卒也，鄉人廟祀之。

朱邦式 唐末，盜賊蜂起，率鄉人戰，死。邑人廟祀之。

宋

熊如圭 徐斌

熊如圭 邑崇德里人。乾道戊子，歲大饑，中產家無復閉藏，富人閉糴邀利。如圭素力田積穀，發粟遺里人，多至數斛，歲至廢斛。其里人愛之，如饑哺之母。又立義齋、義莊，教養及族人。

徐斌 端平初，隸建之十二指揮翼虎軍黃勇等叛，欲殺太守。侍衛者夙與約，三鼓突人郡治，至別廳之便門，斌適在，闔戶拒之，太守得逸去。賊誘以利，不聽，乃斬闔人，殺之。後守姚瑤立祠祀之。

元

詹翰

詹翰 生而雋異，操行正直，人信服之。元末寇亂，民賴保障。陳友定據閩，逼翰，不屈，遇害。鄉人爲立祠。

皇朝

黃應童 林惠 趙泰孫英附 劉天熙 張鏞

黃應童 正統六年，出穀千石賑貸，以應詔書。賜勅獎勞，旌以羊酒。

林惠 正統間，赴闕言三事：一，本縣鹽糧，市民折鈔，鄉民納米，緣鄉民多耕市民田土，收成還租之餘，僅足食用，鹽糧不能辦納，乞一例折鈔。一，本縣嘉禾里田土因水衝沙壅，不堪耕種，奏准停徵秋糧。

各里大户因見此里田不納糧，私將田畝詭寄其內，乞委官丈量。一，本縣武仙山銀坑年遠湮塞，此因本縣里老虛報額辦課銀一千三百餘兩，俱是煎銀夫甲陪納，乞於原額減除什伍，以甦民困。下戶部議，以鹽糧不分鄉市之民，俱令米鈔兼納，田糧宜移文本處布、按二司，委廉幹官丈量覈實，銀課已有定額，難准減。得旨：「事有病民，當爲除之，可膠定額漫不加意？」坑場銀課，即令布、按二司勘實奏聞區畫，餘從所議。」

趙泰 孝友嗜學。弘治中，邑令張津創祠祀劉文簡諸公，泰輸田爲助。歲大侵，作糜食饑。築油源三陂壞堤，澮水救荒。凡山溪險隘間，多建橋亭，甃石道，以便行旅。孫英，善方脉，亦樂爲義。長兄死，英子當嗣，推其業以與次兄。時時施藥物，出衣食，賑貧乏。

劉天熙 挾貲客江淮間，以廉賈名。創義田二百畝贍族。族有貧而鬻婦者，券成矣，天熙如券資之。有舟子受人寄金，爲寄者所窘，欲赴水死，天熙代還焉。

張鏞 父歿，繼母應將有他志，鏞哭曰：「母恐兒二心耶？」母亦感泣，遂爲拮据其家。其後資產饒益，恤寡施貧，備藥施病，多所全活。

崇安縣(三四)

元

江貴甫 徐奕老

江貴甫 友愛敦篤，嚴訓子弟，不遵者，常嚴撻而交責之。五世同居，大小無貳。延祐中，旌門曰義居，名坊曰仁義。

徐奕老 在襁失父，母孀守之。既長，克篤孝行，里黨無間。太守毛文豹大書「旌孝」表之，遂易興仁坊爲貞孝。

皇朝

暨椿、藍文煜、丁盟、詹保合傳。

暨孟舟曾孫鑑。

楊玉 祝諱 江珩 江白 楊沔

暨椿、藍文煜、丁盟、詹保 正統間，各應詔書出粟賑饑，並被旌賞。

暨孟舟 邑李南灣路，依山皆石，左臨溪水，正統初，洪澇嗽嚙，石崩路斷，孟舟捐金煉鑿，遂成坦途。又出谷千石賑饑，六百助餉，邑人義焉。曾孫鑑。

鑑 亦以好義名。邑有七星岐路，當巨崖之曲，下臨重淵，隘險多陷，鑑捐金煉石，鑿而廣之。參政蔡潮鑄崖表曰義路。又結砌南源嶺通衢數百餘丈，以便往來。

楊玉 儉而能散。邑上梅里以東，經五夫境以外，直達松溪、政和諸邑，五十里間，古道崩仄，往來苦之。玉捐金數百結砌。嘉靖中，邑三饑，計口給米，等差賑給，先後散穀四千餘石。

祝諱 農家子也。貌甚朴野，粗衣惡食，人咸輕之。一日，捐數千金爲邑造二橋，人名橋曰祝渡。

江珪 宋灝之裔也。父病，延醫弗痊，徬徨失措，或語之曰：「古有割股可瘳者。」珪曰：「恐股非藥。」或曰：「豈真在股耶！」君子以誠感天，堅冰爲泮，冬植爲萌，故愚夫愚婦齋戒沐浴，可祀上帝。」珪感泣謝之。中夜，瓣香籲天，割左股投藥進，父飲之，驟然愈，延一年乃卒。珪慟幾傷性，葬，廬墓側，疾風寒雨，悲號益甚。監司李鳳翔表以「孝子之廬」。

江白 家貧，躬耕爲養。父有食癖，不飲新茶，不食新粟，不食禽卵。白時時儲畜茶、粟，或舊沒，必握新者易之。家所畜鷄鴨，下卵隨多寡，持就屠家易肉。於田之間，輒入溪澗取魚蝦充饌，而自與弟啖蠶蠶。父或有憂色，寢立不安，父復初，白亦復初。里中有拗逆其親者，父母輒曰：「不觀江氏子也！」

楊沔 邑有青雲橋，屢遭崩毀。隆慶間，沔捐金五百觔，令修建。

浦城縣(三五)

宋

沈氏 陳子文 陳御幹

沈氏 年荒平糶，郡守旌門。

陳子文 好賑施，浦城貴糶，而子文賤糶之。真文忠爲作《勸糶詩》：「陽和二月春，草木皆生意。那知田野間，斯人極憔悴。慙慙問繇來，父老各長喟。富室不憐貧，千倉盡封閉。只圖價日高，弗念民已敝。去年值饑荒，自恨無噍類。幸哉活至今，且復遇荒歲。庶幾一飽樂，養育謝天地。豈期新春來，米穀

更翔貴。況又絕市無，縱有濕且碎。何繇充饑腸，何繇飽孳累。恨不死荒年，免復見憂畏。我聞父老言，痛切貫心肺。行行至平洲，境象殊頓異。白粲玉不如，一升纔十四。問誰長者家，作此利益事。父老合掌言，子文姓陳氏。起家本儒生，曠昔樂賑施。憶昨艱食時，巨室爭謀利。米斗三百餘，獨收七十二。三都數千口，受彼更生惠。開庫質敝衣，假此賑貧匱。取本不取息，所活豈勝計。我曹非此翁，久作溝中黃。吁嗟薄俗中，乃有此高義。吾邦賢使君，愛民均幼穉。一聞平糶家，褒賞無不至。或與旌門閭，或與錫金幣。獨有潁川翁，寵光未之被。故作行路謠，庶徹鈴齋邃。且俾殖利徒，聞風默知愧。」

陳御幹 好賑施。有鐵笛道士過御幹，御幹延款無怠，相與往來城北和豐道院，久之別去，留鐵笛爲贈。御幹遂得出神之術，遇州縣有貨缺乏者，多先知其直，而以奇中致富。

元

祖浩然

祖浩然 至元二十一年，建安、政和有黃華之亂，浩然母爲官軍所虜。去之廿有八年，母寄信曰：「在河南。」問來人，不能名其地。於是，浩然之生三十有三年矣，亟告父往求之，往復奔走，幾遍河南諸州，卒得之唐州境上，奉以來歸。楊載以其事與朱壽昌大相類，爲之求詩以傳之，揭傒斯詩：「浦城孝子身姓祖，自憐性命如糞土。生才五歲遭亂離，有母更被官軍虜。零丁二十八春秋，母縱得生何處求？天地茫茫明月恨，江山漠漠白雲愁。忽得母書驚母在，看書未盡淚先流。書云流落河南縣，河南踴遍無繇見。唐州境上忽相逢，白髮蕭蕭霜滿面。誰知喜極情轉悲，旁人更問初別時。千生萬死到今日，始爲母子東南歸。」

皇朝

張添保 周寧父子合傳 王存 蘇森 徐彪 吳昂 徐育父子合傳 徐鎮 徐瑄 周松 孫椿

陳椹

張添保 痛父蚤世，言及涕下。母患癰，吮之。及卒，殯殮葬祭，一依《禮經》。家貨有餘，即推以濟貧。子善，永樂進士。

周寧 讀書好義，賑饑恤寒，鄰人有不能葬者，輒出貲賻之。子秉孜，能紹先志。適甌寧舊識徐希和將之京，因於無貨，贈白金一鎰。及希和登仕，酬以金，却還之。

王存 年十四，刲股愈母。既長，客福州，道拾遺金百餘，立而俟其人，盡歸之。出穀貸人，不責息，遇歲歉，悉賑鄰貧。後夫婦皆九十五歲，無疾而終。

蘇森 精醫。刲股愈父母疾。或以疾告，輒施方劑。凡學宮傾頹，橋梁圯壞，並捐貲葺治。景泰中，輸粟五百石助賑，朝廷旌之。及卒，翰林學士張元楨銘其墓。

徐彪 父疾，嘗藥，衣不解帶。父母卒，廬墓，刻木像事之，食必薦，出必告，遇忌晨，素服哭泣。疏屬有貧而鬻男嫁妻者，皆爲償之。盜入其家，既獲，諭遣焉。

吳昂 父患癰，百計攻治，以口吮血。里門火，相距二十舍，母病篤，驚悸，負母遠避之，火將及屋而熄。人謂孝感。

徐育 於鄉里多所周急。既老，諸子設席上壽，酒數行，命曰：「業醉飽，可徹以食貧人。」子希勉，正德戊辰歲大侵，傾廩設粥，全活甚衆。里兒有業網鳩者，諭之曰：「太上好生。鳩，上天生命也。」遺之資，

而焚其網。

徐鎮 孝友義讓，處兄弟不計財產。傾囊樂施，雅好賢士，凡名公過其里第，必延款移日，或得其議論，輒筆記之。無貴賤，親戚，無不愛服。子伯相，舉人。

徐瑄 孝友，好施予，民有負債鬻妻者，輒貸償之，厚賙遺去。後負債家其子姓繁衍，飲食恒尸祝焉。孫民式，仕都御史，見縉紳。民式子庚，領鄉薦。

周松 字喬齡。母寡居，每念外氏窘迫，卽迎養外祖母於家。母九旬始逝，作廬墓側，當道旌之。

孫椿 字永齡。家貧業繪，躬治饘飧以事二人。母病，刲股愈之。父憲，年踰八旬，或赴讌集，雖嚴寒溽暑，必執燈潛候於主人戶外，俟席散扶歸。旣，父失明，背負出人，滌洗穢溺。里中回祿，僮不能負，號泣號天，反風滅火，父竟無恙。憲年九十有二，椿年七十有四，至愛若孩提。萬曆間，縣邑賚以帛粟。

陳樅 有孝友之譽。子紀，見縉紳。

政和縣(三六)

宋

吳公

吳公 廣信吳武陵之後。太平興國時，至關隸里，見其田野荒蕪，遂率鄉人十餘家請耕於官，不數十年而富饒，號伯倉。凡有貧乏，輒賑施之；疾病者，濟以藥餌。其沒也，人爲立祠。

皇朝

王鎮、楊相、吳伯起合傳。趙陞 王恣 范敬 陳修 王道章 張宗囊 邵棟 張思曾

王鎮、楊相、吳伯起 正統間，各輸粟數千石賑貸，並賜冠帶，復其身。邑人號爲三老。

趙陞 事父母以孝名。成化間，學使周孟中訪求邑之孝子順孫，父老舉陞。孟中召問曰：「何如爲孝？」對曰：「非曰能之，不敢忤耳。」孟中喟然曰：「足矣。」贈之詩，引曾參養志以獎之。

王恣 成化十一年縣饑，散粟賑濟，僉事章懋召而獎禮之。又推贊造朱氏父子祠，學使周孟中贈以詩云：「晦庵續道脉，千古扶綱常。孰知本厥祖，源深而流長。飲水必思源，培根乃蔭芳。吾徒食其利，而忍愬然忘？莽莽護國寺，孤墳荒草鄉。慷慨王氏子，仗義立祠堂。庶幾晦翁心，泉下亦孔康。」

范敬 孝慈惇睦，德聞一鄉。嘉靖間，浙江坑盜蜂起，入疆，聞敬善里，斂手歸遁，鄉人賴其德庇。

陳修 好義濟貧，津梁廣濟。嘉靖末，島寇陷城殺傷，無主者，悉埋瘞之。

王道章 事母至孝。產業讓兄，仗義好施，人稱隱德。

張宗囊 以積善好義聞。

邵棟 守禮耽書史。嘉靖中，倭陷城，棟出穀賑民。凡遇凶年，減價零糶貧戶，矜助過於族里。

張思曾 喪妻不娶，鰥居五十餘載。嘉靖壬戌，避寇東平里，有衆貧民負債爲豪商所逼，思曾與侄宗壩出金貸償，邑人義焉。

松溪縣(三七)

皇朝

葉惟周 葉奇 夙希達、魏永嘉合傳。 陳閭 張德 葉伯生兄弟合傳。 葉大成

葉惟周 少孤，事母竭力。母多病，躬究醫書。一日，母自外家遭疫還舍，家人死者六七人，惟周頃刻不離，疫不能染，母病亦愈。母沒，哀毀骨立，喪葬一循《家禮》。

葉奇 少孤，事母孝謹。母歿，竭力葬祭，鄉人稱之。

夙希達、魏永嘉 正統六年，並出穀千石助賑，事聞，賜勅旌勞。

陳閭 少習經史，事母盡甘旨。賊至，負母避山林，得免。母終，廬墓三年，朝夕哭奠。

張德 雅負義氣，膽力過人。嘉靖間，倭攻縣城，城中死守，相去三越月。倭造天車，高與城等，一倭跳入，手舞大刀，衆驚走。德奮勇前斬之，餘倭不知也，相尾闐上者五六人，德手不停刀。尋擲火藥燒之，明日，賊不敢近，止以銃彈遠擊。德不避險，竟爲流彈所斃，倭亦解去，松人祠祀之。

葉伯生、伯英 父潤秀，爲宛平丞，卒官，兄弟哭泣盡哀，扶柩歸葬。伯英因以家事屬兄，築廬墓側，哀毀二十餘年。兄弟居喪行古禮，怡怡征邁。嘉靖中，監司、守令先後旌獎。後皆年八十餘。

葉大成 母嚴，孀守四子，家教謹肅。大成居次，兄大雅，髫年能文，母屬意課讀，以家務任大成。大成事母盡歡，克莊厥兄，又愛養二弟，皆爲知名士。母喪，哭泣盡哀，不茹葷齒決者三年。

壽寧縣〔三八〕

皇朝

王秀 孫政

王秀 父伯資病危，禱天請代。父曰：「無以爲也，第成吾志。」秀跪請，曰：「壽寧、福安交界處，有竹江渡，會流湍悍，歲溺數人，吾欲易竹牌爲舟，令人操渡焉。」父死，秀如父言，復置渡口膏腴九畝，爲操渡者資費。

孫政 正統六年，出穀千石助賑，被賜獎勅。

延平府 將樂縣 沙縣 尤溪縣 順昌縣 永安縣 大田縣〔三九〕

將樂縣〔四〇〕

宋

陳選 鍾元龍 陳髦

陳選 字舜舉。世以豪貴爲鄉閭大姓。晨興，正冠修容坐堂上，夫婦相對如賓。非慶吊未嘗出門，雖連牆有經時不見其面者。間有所之，必筮而後往，家人俟其歸，其迹可數也。平居恂恂，不見喜怒，遇人無長幼，必盡誠敬，雖橫逆有惡聲至，如弗聞，視其容貌，泊然無所芥蒂者。楊龜山爲傳，陳瓘、鄒浩、游酢、李綱各爲之跋。

鍾元龍 字善甫，舊名禪保。寶祐二年夏，水漂田，秋，霜殞稼，元龍發倉廩，減價賑之，所活甚衆。但受封命，不願祿仕。卒，朝廷命有司營葬，建墓祠。

陳髦 號太君。每歲發廩濟貧，隨其自斛，不計償貸。間有償者，必置一木錠斛中量之，示不全取。

鄉民感德，爲扁曰惠施。

皇朝

白必安

白必安 正統十三年，沙、尤叛寇嘯聚，圍城凡四旬餘，必安出資造銃箭，分給銃手射賊。賊退，民苦饑饉，僉憲曾簡勸出米賑濟，必安以二百石輸公。三華橋燬，鳩材募工，復奉例出粟三百石。朝廷旌之冠帶，固辭弗受。

沙縣(四二)

宋

祝染 羅義明

祝染 遇歉歲，爲粥食貧。後生一子，赴舉時，忽有夢報狀元之捷者馳，而手旗大書曰：「施粥之報。」及榜開，其子中特科狀元。

羅義明 建炎末，鄰寇俞勝犯境，率兵拒之，與其子俱遇害。邑人祠之。

皇朝

樂哥 曾仙廣 黃文訪

樂哥 字景福。厚待兄子，存外家之孤。天順二年，大歉，代輸國邑胖襖。成化間，輸粟四百石賑邊。其孫進德，亦有施舍名。

曾仙廣 字孔大。與兄隆俱遺腹失怙，相依爲命。正統戊辰，避鄧茂七亂，至半溪遇賊，將俘以去，兄弟俱弗從。賊刃挾之，直前爭死，賊兩釋之。

黃文訪 尚義賑捨。萬曆中，修學宮，散穀五百餘石以濟饑疫，有司旌門。

尤溪縣(四二)

皇朝

張焯 蔣倫

張焯 至孝守貧，與妻林事父母，色養善養，無不盡力，邑人歡羨之。

蔣倫 素闢勇。嘉靖癸未，漳寇攻尤邑，倫憤激逆戰於馬坑，奪其旗，敵氣懾。拔劍擊旗者，室溢不可拔，縱之。旗者佯死，復進擊一人，佯死者起而操刀斷倫左股，遂遇害。弟瑞，痛兄死，亦死之。

順昌縣(四三)

宋

范旺

范旺 巡司軍校也。初，順昌盜俞勝等作亂，官吏皆散，土軍陳望素樂禍，與射士張袞謀舉皆應之，旺叱曰：「吾等父母妻子，皆受國家廩食以活。今力不能討，反助爲虐，是無天地也。」凶黨忿剔其目，殺之。一子曰佛勝，年二十，以勇聞，賊詐以父命召之，至則俱死。其妻馬氏聞之，行且哭，賊脅污之，不從。

節解之。賊既平，旺死迹在地，隱隱不沒。邑人馮異爲設像城隍廟，歲時祭享。紹興六年，轉運使以狀聞，詔贈承信郎，更立祠，號忠節。二十八年，復詔立愍節廟祀之。

皇朝

馮景文 陳嘉謨 陳清 廖篴 任琬 鄭金、呂崇年合傳。

馮景文 僻居村落，甘守貧素，善事繼母。母死，廬墓三年，朝夕哭泣。

陳嘉謨 十歲失怙，哭奠如成人。奉養母黃，先意承順，眠食親自抱持，雖已兒，弗使代。母高年下世，哀毀骨立。既葬，廬墓，寒雪不移，竟遭疾卒。

陳清 年三十餘喪妻，不娶，曰：「有子矣。」飲食起居，不近嫗婢，衣冠澣濯，不假其手。

廖篴 造石橋以濟渡，貲不足，竭產業之。其子婦亦罄所有助成焉，人名橋曰濟川。

任琬 生六月，父死，母吳節撫之。及長，奉母無怠。母有疾，燃臂籲天。及卒，殯葬如禮，廬墓哀毀若初喪。

鄭金、呂崇年 二人相善共財，而賈金置鄭舍，適被盜，鄭曰：「無使呂疑，稱貸償之。」呂一日販鹽水口，所得值倍，鄭初不知，呂與公之。二人身藏一鎰二匙，出人各不相問，置有產業，盡屬之，鄭、呂無幾微貳。呂遭回祿，鄭營室甚壯，既成，與呂居之，有司扁曰「義重管鮑」。

永安縣〔四四〕

皇朝

賴預

賴預 性至孝。喪母，柩未葬，權厝郭外。嘉靖丙辰夏，水暴漲，預同僕渡河，縛母柩於大樹。既而，水愈盛，遂皆溺，越二日，獲其尸。有司題門曰孝子。

大田縣(四五)

皇朝

陳倫 廖旻 郭仁顯 吳廣二

陳倫 自始祖壽山至倫凡六世，同居共爨，長幼雍睦。

廖旻 通詩書。師辛大韶沒，埋葬之，爲服心喪三年。居家不事浮圖，婚祭如禮。

郭仁顯 喜施與，樂教誨，以公直表率鄉人。嘉靖初，邑薦饑，盜四起掠食，惡少効尤，部署已定。仁顯知其謀，盡籍居人聯爲保伍，日聽爲生，夜按籍閱之，出藏粟，貸貧乏，遂無一人得爲亂。復推其法於他族，一鄉以靖。

吳廣二 自其祖江八迨廣二凡六世，同居共財，應門主客，歲遴直一人。婦女相從夜績，男子力田畜，非稼穡桑麻不衣食，人稱懷葛之民。

〔校記〕

〔一〕「英舊志問卷」，各本原作「問巷志」，據本書體例改。

〔二〕「侯官縣 懷安故縣 古田縣 閩清縣 長樂縣 連江縣 羅源縣 永福縣 福清縣」二十八字，各本原脫，據本書體例補。

〔三〕「閩縣」二字，各本原脫，據本書體例補。

〔四〕「侯官縣」上，各本原衍「福州府」三字，據本書體例刪。

〔五〕「懷安故縣」上，各本原衍「福州府」三字，據本書體例刪。

〔六〕「古田縣」上，各本原衍「福州府」三字，據本書體例刪。

〔七〕「閩清縣」上，各本原衍「福州府」三字，據本書體例刪。

〔八〕「長樂縣」上，各本原衍「福州府」三字，據本書體例刪。

〔九〕「連江縣」上，各本原衍「福州府」三字，據本書體例刪。

〔一〇〕「羅源縣」上，各本原衍「福州府」三字，據本書體例刪。

〔一一〕「永福縣」上，各本原衍「福州府」三字，據本書體例刪。

〔一二〕「福清縣」上，各本原衍「福州府」三字，據本書體例刪。

〔一三〕「南安縣 惠安縣 德化縣 安溪縣 同安縣 永春縣」十八字，各本原脫，據本書體例補。

〔一四〕「晉江縣」三字，各本原脫，據本書體例補。

〔一五〕「顏黑子」，本傳作「顏黑子」。

〔一六〕「君出令君就醫我家」，據文義，當作「君出令就醫我家」。

〔一七〕「一如喪父」，各本原作「二如喪父」，據文義改。

- 〔一八〕「陳言」傳，原置「王文昇」、「伍民憲」兩傳上，據傳記目錄移。
- 〔一九〕「南安縣」上，各本原衍「泉州府」三字，據本書體例刪。
- 〔二〇〕「呂七十四」四字，各本原脫，據下文及本書體例補。
- 〔二一〕「王元謙」，本傳作「黃元謙」。
- 〔二二〕「麟」，各本原作「駿」，據文義改。
- 〔二三〕「則輒厚與往來」，據文義，當作「輒厚與往來」。
- 〔二四〕「惠安縣」上，各本原衍「泉州府」三字，據本書體例刪。
- 〔二五〕「德化縣」上，各本原衍「泉州府」三字，據本書體例刪。
- 〔二六〕「安溪縣」上，各本原衍「泉州府」三字，據本書體例刪。
- 〔二七〕「同安縣」上，各本原衍「泉州府」三字，據本書體例刪。
- 〔二八〕「永春縣」上，各本原衍「泉州府」三字，據本書體例刪。
- 〔二九〕「門」疑爲「聞」之誤。
- 〔三〇〕「甌寧縣」建陽縣 崇安縣 浦城縣 政和縣 松溪縣 壽寧縣「二十」字，各本原脫，據本書體例補。
- 〔三一〕「建安縣」，各本原脫，據本書體例補。
- 〔三二〕「甌寧縣」上，各本原衍「建寧府」三字，據本書體例刪。
- 〔三三〕「建陽縣」上，各本原衍「建寧府」三字，據本書體例刪。
- 〔三四〕「崇安縣」上，各本原衍「建寧府」三字，據本書體例刪。

〔三五〕「浦城縣」上，各本原衍「建寧府」三字，據本書體例刪。

〔三六〕「政和縣」上，各本原衍「建寧府」三字，據本書體例刪。

〔三七〕「松溪縣」上，各本原衍「建寧府」三字，據本書體例刪。

〔三八〕「壽寧縣」上，各本原衍「建寧府」三字，據本書體例刪。

〔三九〕「沙縣」 尤溪縣 順昌縣 永安縣 大田縣「十四字，各本原脫，據本書體例補。

〔四〇〕「將樂縣」三字，各本原脫，據本書體例補。

〔四一〕「沙縣」上，各本原衍「延平府」三字，據本書體例刪。

〔四二〕「尤溪縣」上，各本原衍「延平府」三字，據本書體例刪。

〔四三〕「順昌縣」上，各本原衍「延平府」三字，據本書體例刪。

〔四四〕「永安縣」上，各本原衍「延平府」三字，據本書體例刪。

〔四五〕「大田縣」上，各本原衍「延平府」三字，據本書體例刪。

閩書卷之一百三十二

英舊志 閩巷

汀州府 長汀縣 寧化縣 上杭縣 武平縣 清流縣 連城縣 歸化縣(二)

長汀縣(三)

宋

陳氏兄弟

陳大忠、大節、大勇、大智兄弟 爲漳人禦寇有功，漳人祀之。

寧化縣(三)

元

賴祿孫

賴祿孫 延祐初，贛寇作亂，祿孫負母伍氏逃於邑之南山。時母渴甚，祿孫下山含水，以濟母渴，遂被賊衆縛以尋母。祿孫見母，呼天號泣，願以身代。賊相顧駭嘆，反取水與之，復遺以斗粟、豚蹄。頃之，

有掠其妻去者，衆賊曰：「奈何辱孝子？」并歸之。

皇朝

官友基

官友基 事母至孝，母病，飲食湯藥必身親，病劇，割股肉進。母歿，哀毀，廬墓。有司欲以聞，懇辭而止。

上杭縣〔四〕

皇朝

周子禮 張愛 陳德沂 劉敬 張秉和 吳海 丘金 李日杭 張璧秀、周効良合傳。

周子禮 洪武二十年，盜鍾子人等同廣寇寇縣，子禮挺然告衆曰：「毋避，能捍拒者，罄家餉之。」時張愛爲民丁隊長，偕其侶龍文彪率所部應子禮。子禮斷左手食指爲誓，衆感奮爭先，賊敗。子禮出金餉衆，金盡，出其家人首飾、布帛、器物繼之。又盡，曰：「請券田。」仍出粟米賑城中饑人，而縣恃以安。

張愛 鍾子人之亂，愛爲隊長，備禦之。子人攻縣，愛與龍文彪等力戰，殲其渠魁，斬首數百級，賊敗而退。復隨官軍深入賊巢，被執，罵賊不屈，死。民哀祀之。

陳德沂 與弟德漢友愛，四世同居，孝事二親。元季兵亂，負親避難福安縣，展轉流離，遇賊傷臂。本朝更化，復奉親還，承歡至老。

劉敬 幼孤，事母至孝。正統己巳，沙寇攻縣甚亟，敬母年八十有二，負之出城，西奔二里許，賊追及

之，簞楚索金，杖及於母，敬抱號乞免。母傷杖，敬含哺飼之。賊退，貧甚，日採拾爲養。母卒，終喪而瘠立。

張秉和 天順六年，溪南寇至，秉和被執，令之跪，罵曰：「我良民，跪爾耶？」賊欲殺之，傍賊曰：「跪則免矣。」秉和厲聲曰：「死強盜，恨不噉爾血！殺卽殺，何跪者？」遂遇害。

吳海 富而尚義。成化己亥冬，溪南民標掠其鄉，流移者衆，海散粟濟之。明年春，賊復發，海率民兵擒斬賊首鍾三等若干人，戰於峽頭之麓，已，中伏，死。

丘金 繼母疾篤，賊且至，負逃以免。終喪，不入私室。年八十五疾革，命子孫就正寢習喪禮焉。

李日杭 嘉靖二十年，盜寇鄰境，與戰死之。

張璧秀 縣卒長。嘉靖季，饒寇起，璧秀應募禦之黃舖間，敗而死之。有周効良者，亦不屈，裂尸死，從者以數人。

武平縣(五)

皇朝

鍾廷才 修仁禮 修仁忠 程廷秀 鍾浩 鍾周賢 李弘政 林乾亨 劉澄浩 鍾廷鸞 鍾瑄

李子穆 陳積玉 程仲武 舒經 李寶成 王子銘 林鐸 劉皓 劉金綸 劉僑

鍾廷才 愷朴通經史，舉動遵禮。繼母病篤，禱神願代。爲橋濟涉，凶歲出粟賑饑。所著有《古民日

錄》。

修仁禮 志行謹飭，嗜《小學》書，夜坐呼兒孫講說故事，曰：「此作人樣子。」家本饒也，有逋負者輒焚其券。時斗斛漸大，仁禮獨用舊量收稅。汀士紳作《樂善卷》贈之。

修仁忠 弟仁志蚤沒，收孤侄撫教成立，割產畀之。民爲賊誣及有罹非辜抵死者，出財救免。荒歲穀貴，則平價濟人，每朔望施飯獄囚，邑稱其義。

程廷秀 耿介好義。嘗曰：「骨肉鬩牆，類起利昏。」每臨財產，輒退讓不言，任尊長處判。兄弟怡愉，以終其身。

鍾浩 性純謹，不喜浮偽。族有窮乏，給田贍之，死不能葬，買棺殯焉。年八十卒。

鍾周賢 言行真率，遇貧乏，隨分量濟。族鄰暴侮，避不與競。

李弘政 孝友恬靜，誦玩詩史。遇饑人，輒飲食之。

林乾亨 以耿直公正名族里間。善居室，知取予，尊禮賢士，恐弗及也。

劉澄浩 孝事二親，讓貲於其兄弟。

鍾廷鸞 年甫二十，父鐫病篤，感痛呼天，割左股烹進。父沒，與弟侄共爨者三代。

鍾瑄 質朴篤孝友，周急慕義，恒恐不及。

李子穆 愚直質朴。天順七年，草寇犯境，鄉多脅從，惟子穆闔門堅守，遂俱被害。

陳積玉 性慈善。與人處，煦煦有恩，雖蟲蟻不忍傷之。家非甚裕，而喜周急濟難，力所能爲，恐弗及也。歲荒，穀價騰踴，則糴之富室，減價以糴，價爲之平。

程仲武 正德間，賊經武平，挺身赴敵，被鎗死。

舒經 正德七年，江、廣寇發，攻武平，所城幾陷，捐貲犒衆，出力併禦。寇息疫興，且饑，又爲之恤，人多德之。

李寶成 豐寶祀，躬儉約。江、廣賊發，捧檄督軍餉，防守蟠龍崗。民被賊株連，力爲辯雪。族里貧乏，捐貲助之。

王子銘 遇寇荒，煮粥濟人。受委築城，竭力秉公。勸族里和睦，以身先之。

林鐸 有膽力，能役使族里。里居近山寇，寇知其能，脇之同盜，誓死不從。嘉靖丁巳秋，程鄉賊賴楠等流劫經落畚，令徐甫宰以鐸爲千長，鐸衝鋒破賊，斬首級數十，獲牛馬鎗重甚多。明年春，賊過白鶴嶺，鐸挺身先衆與戰河背，賊退走，乘勝深入，後援不繼，賊攢鎗刺之，手刃數人，乃死。

劉皓 嘉靖丁巳秋，廣寇出劫，被虜脇，不從，死之。

劉金綸 嘉靖丁巳，廣寇出劫，金綸以鄉長領兵至小溪口與戰，死。

劉僑 嘉靖戊午春，寇經白鶴嶺，率義兵迎戰，死之。

清流縣〔六〕

元

賴生 雷添祥 伍宗堯

賴生 貢性之有《送賴孝子詩序》：「賴生，閩清流人也。國初大軍下閩，生兄弟俱幼，母陷軍中。生既長，南北走萬里尋母，不得。閱二十年後，始克見於浙之杭州，以母名在官籍中，求去，不許。錢塘人柴

芝塢聞而憫之，力陳膏道，始得奉母南還。時清流茂宰方謝官歸里第，亦克相之。其行也，黎陽端木作詩以饒。杭去閩路尚半萬，或途窮旅逆中，豈無好義之士如二公者。因述之，使觀吾詩，則孝悌之心油然而矣。」

雷添祥 至正庚子，江西寇鄧克明掠邑，添祥兄弟三人從父吉匿山中。吉患喘多嗽，賊聞聲拽出之，索無財物，欲殺之。添祥號泣求代，賊縱父而殺添祥，年二十二。

伍宗堯 元末盜起，邑人推宗堯爲長。江西寇鄧克明來侵，宗堯禦之經月，弗克。說之降，曰：「吾生爲元人，死爲元鬼。」明日，與其子希稷、希明、希周、希孔，率兵決戰，奮勇突圍，父子五人俱死，賊亦退去。

皇朝

雷得昌 子良合傳

葉崇 伍佑 丘銅寶 雷稔 鄧珪 謝禮敬

雷得昌 奉親甚謹，滌衣裳，滌溺器必躬。或過姻戚，與兄弟共舁之，不任童僕。歲時祀先，涕泣交下。子良。良孝事二親，愛弟事姊，撫侄教甥。成化中，邑大饑，慨然以五百出貸，不能息者，免之，甚者，爲裂券。鄰里歿無以殮，施之棺。道路圯壞，加修治焉。

葉崇 讀書好善，尊儒鄙佛，待賢接上，惟恐不至。

伍佑 宣德間，邑大流散，就食日千計，佑大粥饑民於白石橋以閱月。

丘銅寶 正統間，沙寇作亂，挈家寓汀。賊首陳正景擁數萬攻汀城，銅寶請擇里人善戰者數百爲陣，三挑三捷，擒斬頗多。次日復戰，又捷。深入賊巢，遂及於難。

雷稔 正統中寇至，稔母方死，守柩不去。寇執之，以賂免。歸化人來邑，失金六十餘，稔仲子拾得之，稔曰：「可還人。」伺其覓處，語而歸之。

鄧珪 豫也。景泰間，草寇縱亂攻掠，村民駭竄至楊梅逕，逕狹，賊追及之。珪挺身與戰，自午至申，賊亂鎗傷珪胸，珪死，弗知也。賊退，猶倚石僵立。

謝禮敬 五世同居，力田供家，不分勞逸。婚姻宴饗，皆裁以禮，戶內雍如也。年七十，知縣余珙召而賓禮之，謝曰：「野人也，敢見令？」

連城縣〔七〕

元

李仲德父子合傳。

林茂輕

李仲德 暨子良能、良弼、良智、良明，素負義勇。元末，紅巾寇連，突城屠殺，仲德倡衆遏之。乘勝，被重圍，父子五人皆死焉。

林茂輕 恬淡寡嗜。歲歉，出米賑給，捐貲爲鄉人建林公、晝錦二橋。復作遺訓，以教子孫。自號清隱居士。年八十四卒。

皇朝

李青員 李應鍾 李乾 黃表 戴景禎 童志伋 沈長權 孫文沂合傳。 李學默 黃一魁 李仕康 李洧 童瑗 丘瑾 陳璣 童體和 謝纓〔八〕

李青員 孝友樂施。有張姓者，鬻田於員，得價五十金，醉卧，失之，號泣欲死。員曰：「無害，金可得也。」復如數與之。張匍匐感謝。是夜，夢神人授榆一枝曰：「爾多陰功，錫爾佳兒。」亡何，舉一子，遂以名之。榆後以貢知靈山，判處州，有治聲。聞母病，卽棄官歸，絕跡公門，當道重焉。

李應鍾 少失母，二弟俱幼。事繼母沈，孝聲無間。友幼弟，休戚共之。季弟應開早逝，竭力撫其孤子。仲弟應全年踰七十，相友無間。生平言動醇謹，至事關人利害冤枉，直爲出身，事成冤白，不受其口謝。子汀，潛心理學，連人號爲東奎先生。

李乾 善事繼母。少隨祖華宰保定，適華卒，與父青陽扶柩還家。途遇盜，窘祖母及父甚急，乾號哭哀告，願以身代，賊爲感動去。

黃表 成弘時人。孝友樂義，喪祭遵《家禮》。人有橫觸，不較。儉己濟物，以應公家，千金不吝矣。

戴景禎 成化間賑濟饑民，賜旌義，授官。

童志伋 竭力二親。事其兄義寧令最謹。年八旬，與弟白首相愛，人比椿津焉。子大猷，通徹三教，兩任縣令，有政聲。

沈長權 素性友義。修先塋，給貧族，重建學宮，倡築城隍，構東城樓，焚債券，施貧棺，創砌崩坎，後埔等橋路。每歲歉，減糴出賑。湖口溪當連孔道，商旅行人艱於得橋，民以請吏，吏搖首不問。長權垂老，以語子廷翰曰：「吾必橋此，而後瞑目。」久之，長權沒，廷翰踵成之。邑令金榜請李肅愍公默記其事。孫文沂，敦本急公，捐屋地一區，廓大賢宮。湖口橋燬，文沂曰：「我祖繫心。」出千金重建之，他諸睦

族庇鄰、救災賑恤，有長權之風。

李學默 孝友敦朴，務施。兄早逝，^(九)置田養嫂，以助其節。買族人田，有十餘年不收其人者。捐貲修學，擬置學田，未就而卒，尚囑其子廩生穩必成之。

黃一魁 善事寡母，奉兄恭謹。在鄉間，解忿周貧，庶幾陳實之風。子思德，丞臨臬，有聲，亦能孝事母。

李仕康 孝親恤族。邑有建庠、造梁之役，常捐貲先倡。

李洧 事父竭力無方。父卒於外，冒險歸櫬。嘗捐田助學，處鄉黨傾誠週恤。所至，縉紳多與交游。

童瑗 秉性慈厚，享年百歲。郡守有司皆與爲禮。令方公造訪長生之術，瑗以「愛人濟物，清心寡慾」對。

丘瑾 母張，瘋疾不能舉動，與妻楊更代侍奉，歷年如一。寢則夫婦卧側，日則共扶坐廳堂。令徐大化以夫婦同孝旌之。

陳璣 嘉靖初，寇楊廷蘭等劫掠鄉落，執甚猖獗。璣不俟召，募集儕輩，自爲什伍。行至陳屋坪，會中食草舍中，賊潛入，執其兵革，環攻之。璣與儕輩手刃數十。賊見其勁，火之，遂遇害。

童體和 少孤，事母孝敬。嘉靖中，寇亂，歲大饑，縣命爲鄉約長，發賑公平。寇伏城北，夜梯城將登，體和守陴甚謹，覺而統衆逐之。故攻岐黃術，施人藥不問直也。晚而耽詩史。

謝纓 少順父志。自任家督，推誠待諸弟，一錢尺帛不私。嘗捐金重建文川橋，鄉人便之。子必歌，

司訓永福，文雅有聲。

歸化縣（一〇）

皇朝

揭雀 夏玄接子一鼎合傳。

黃盛 陳珪侄鐸合傳。

揭宗 李世英

揭雀 家貧，母老，樵採爲養。母病篤，思肉，貧不能市，割股以進，母病尋愈。舍旁火，時母病臥，雀急負母走，反而火人其舍矣。

夏玄接 幼孤，奉母切至。年三十，忽痛哭曰：「視吾父棄世之年，不啻過矣。」於是衣粗茹素，以終其身。嘉靖初，疫癘大作，玄接懼染母，焚香手掌，泣淚籲天，疫果不侵。母疾，嘗藥試冀。母以壽終，哀毀廬墓。子一鼎，兩奉繼母，具得驩心。行賈楚中，一日，驚悸見夢，旦起，徧謁明神，願捐年益父。尋棄歸，歸則玄接患癰，現夢之日正父疾始。舍旁十里許曰燕子巖，有神靈應，巖執峻絕，一鼎朔望膝行往禱，卽風雨晦冥無怠。

黃盛 父永，年八十五，疾幾殆，盛密禱求代，永復起，年八十八而終。將終前一日，諄諄如夢中語曰：「吾得享此三年，汝力也。汝必得吾壽。」後如父壽而終。

陳珪 珪侄鐸，通武藝，有膂力。嘉靖初，流賊攻城，藉叔侄二人守護得全。其後三有禦寇功，被賞道旌獎。三十六年，賊劫沂洲，邑令敦請珪、鐸赴之。旣陣，殺十餘人，賊敗走。二人盡力追之，官兵不前，孤戰而死。

揭宗 通經史。家稍饒貲，儉朴持之，而好爲惠。嘉靖中，令李邦光旌之曰好禮。
李世英 精醫施藥，事繼母孝，處二弟有恩。令李邦光旌其門。

興化府 莆田縣 仙游縣 興化故縣(二)

莆田縣(二)

唐

陳寅

陳寅 觀察使陳巖之侄，卽家於莆。好善樂施，年九十餘卒。未卒先一日，歷言百紀事，皆驗。莆人廟祀之。

宋

陳應功 方祐 陳某 吳稟

陳應功 宋初，勸陳洪進納土。游洋草寇竊發，自詣軍前，請往討賊，越溪谷磨戰，竟死之。

方祐 慎從曾孫。好禮厚施，高價買產，賤價糶廩。每幅巾野服，徜徉道旁，野叟村童爭出迎曰：「長者來矣。」饑食，寒衣，病藥，死棺，人人滿意。其孫萬，少時讀書至，已所不欲，勿施於人，祐語之曰：「此吾平生受用處，小子識之。」

陳某 有心計。昔人未知曝鹽，陳某私取海水，日曝鹽園中，鹽成，乃教鄉人爲之。

吳稟 父世寧，客游蜀，卜居青城山。及卒，稟尚未冠，謀迎父喪。季父憐其少，留不遣。稟日夕悲悼，竟沿峽扶柩歸。舟人盤渦，幾覆，若有物負之者。後以子贊贈奉議郎。

元

黃巳 許天麟 陳孔有

黃巳 事繼母至孝。庶弟出後從父，從父愛其女，盡以腴田嫁之，巳割私田予弟。族人以田來鬻者，巳不忍取，與以直，而歸之。以貨多爲里正，出私財爲里中民代輸逋負鹽稅。有受誣者，諍縣庭，得解乃已。每歲首，縣次民貨力多寡，定征斂之籍，巳發一言，皆稱平當。有爭訟者來質是非，告以理法，舉酒飲之，人各謝去。人佃人粟，用小量。逢凶歲，出大量減價以糶。郡南有僻壤，盜常狙關以攘行旅，巳構廬棲僧，佛燈達曙，皆不得有所爲以三年。施貧死者棺，野無暴骨焉。元末兵亂，縣命巳帥兵扼險，巳畫捕賊策上陳，民藉以安。

許天麟 家故饒，闢居仁堂以處貧族，與合爨。父應祥，喜佛好施。天麟事父甚謹，父疾，憂鬱百方，冠衣不脫，及卒，苦塊三年。既葬，廬墓三年。又刺血寫佛經，集千僧誦之。其日，四方雷電，繞壇五里，天朗日明，人皆驚歎。郡守將聞於朝，曰：「民何善哉？彼雨此晴，往往有之。」後生母卒，送終廬墓，一如其父。

陳孔有 性至孝，天爲雨錢，孔有不有之，以修佛寺。

皇朝

丘添德 陳睿傑 吳富 周志 林書童 林軻 朱寵 林本著 蘇潛龍 戴欽 李頌 戴俛

林賢 陳廷聲 常白 陳主亮父子

丘添德 年幾弱冠，父以事上京師，念添德奉養大父。及父歸，卧疾於建寧，添德亟趨視之，醫藥罔効，刲股以進。父竟死，竭力營兆以葬。洪武初，有城平海衛之役，戶有三男子者抽一人往，工畢就成焉。大父憂之，添德請前。戍後，復調鎮海，不問家人代也。凡戍所中所得貲產，悉分與貧昆弟，撫弟子如己子。晚年乃歸。孫天祐，見縉紳。

陳睿傑 早失怙，事母盡孝，母病，籲天刲股。母老患目，旦夕舐眊，左右扶持，污穢躬滌。母歿，蔬粥終喪，忌日悲痛尤至，雖老不懈。一時鄉士大夫稱爲孝子。（二三）

吳富 樂善好施，鄉邦推重。一日，里中市戒於火，將及其家，富禱天，風轉火熄。曾孫希昊，見縉紳。

周志 爲人以「行方便」爲三字符。每歲窮夜行里巷間，聞有嗟怨聲，旦召其人問之曰：「不足乎？」探囊授之。莊治棺，藏密室，遇死而不能殮者，令舁去。偷兒夜入室，審諦識其人，偷兒驚叩首，志授之米布，使逸去。其他復寺、建庵、築亭、砌路，人稱似宋林回年之爲人。

林書童 祖廷綱，見縉紳。書童幼孤，強立植家，稱貸取息，視時之最下者，不能償者，予之。景泰、天順間，歲多災沴，前後施棺踰千數。

林軻 學士文之侄也。散穀捐金，以好義聞。郡守修木蘭陂，委軻督役。軻請闢萬金陡門而寬之。守如軻言，今蘭水紆迴繞郭，匯一郡靈秀，且以溉北洋田，莆人世世食其利。

朱寵 給事中寬之弟。與孝子劉閔爲莫逆交，劉常稱其行誼。卒年九十七。

林本著 嘉靖癸未，流寇申大總突至莆城，時衛帥以下各按兵不動，本著率健卒數十人嘗賊，與接戰，不敵死。

蘇潛龍 家貧，鬻書自給。謂人曰：「吾從鬻書識人多矣。科舉士也，鬻我經義。好古士也，鬻我古文詞賦。學道士也，鬻我宋儒書。其有篤志士也，家貧無書，就求爲借閱。其有孝敬士也，人吾肆尋訪有其先世遺文否。若夫有其以家之藏書來鬻者，此世之不肖子也。」潛龍雖鬻書乎，時時執書讀肆下，士過而笑之曰：「肆而讀耶？」潛龍曰：「某孤且貧，不克讀書，而托鬻以讀。世固有讀書而書肆者矣，夫我也，書肆而讀書。」黃鞏爲作《拙修小傳》。

戴欽 嘉靖十四年歲歉，出所積穀麥損價市之。二十四年，復大歉，率弟鏗治粥賑饑，遠近咸至。葬之日，甘露降墓所。子洪謨，以鄉薦歷守眉州，有廉能聲。

李碩 家貧，道拾金一橐，候之達旦，有行哭者曰：「失金三十餘。逼徵逋，鬻田而得此。」碩曰：「握歟？橐歟？」曰：「橐也。」曰：「橐在矣。」出與之。失金者願割半酬，碩不受，強之不得，仰天拜且祝曰：「願以冥報答叟也。」後子廷春、孫宗著，俱鄉薦。

戴俛 歲饑，稱貸遠羅，煮粥以濟貧人。妻唐，脫簪珥佐之。夜半，夫婦乘比舍未炊起，假其釜鑪，大爲粥，旦拂坐滌器，迓來食者。齒序堂上，無敢僑泄，賤者、丐者、病者，散置別屋，恣食不爲量。唐主女若婦，亦無所情。遠近悅其齋邀，日一再餐，凡數百人，兩月乃已。後十一年，孫科登第，則有神授夢於主司曰：「此積德家子，宜錄之。」又六年，倭寇將火其宅，係繫者群泣曰：「幸無焚我施粥公居。」倭嘆不止，復書壁，戒後至者。卒年九十六，唐齊算焉。

林賢 事親至孝，親歿，手刻像奉之，廬墓六年，朝夕泣血。歲饑，賑貧掩骼，爲誼甚高。

陳廷聲 嘉靖辛酉，率鄉兵應募，與倭奴力戰於南郊，死之。

常白 郡掾也。嘉靖辛酉，自縊西門下，伏莽射倭，倭斫其首去。

陳主亮 性良厚，好行德。每訓其子澄、渙、熙，輒歎曰：「安得世無分異，如古張陳哉？」嘉靖壬戌，熙死於倭，澄號天咬指出血，遂得熙亂屍中，抱歸殯之。賊執熙子，澄與妻黃詣賊請曰：「吾季亡矣，僅此一孤，願以子代。」賊義並釋之。澄沒，渙持家秉，大書「孝友」二字於堂，曰：「父訓也，吾兄力踐之。吾其忍忘？」拮据聯屬，建置祠田，與子侄公財無私。萬曆中，三房五世，中外六十餘人尚未分異，有司旌之。

仙游縣（二四）

宋

洪忠 丘杞 鄭振 陳亨運 傅孝明 郭濟

洪忠 慶曆初，出家貲造楓亭、沙溪諸橋凡七所，邑人陳高立石紀事。蔡襄持節本路，以勞績奏，勅賜本軍助教，仍蠲其役。子範，大觀進士，知安溪縣。孫處厚，見縉紳。

丘杞 紹興間，山寇起，與鄉人爲忠義社以自固，竟戰死。

鄭振 建炎中，盜楊勍起，令檄振集民兵禦之，一夕遁去。紹興癸亥，曾沙龍等衆至數萬，帥司檄振行，盜素聞其名，不戰自屈。丙寅，詹鐵父者，入振井里，振率衆拒之，殺數十人，遂遇害，廟食里中。孫知微，見縉紳。

陳亨運 性最孝。父母繼沒，廬墓三年，常倚墓木而哭，木爲之枯。乾道間，朝廷舉薦孝廉，鄉人張欲率衆白縣，以其名應詔，亨運臥廬不起，令餽粟帛旌之。

傅孝明 母蔣疾篤，刲股粥以進，疾遂瘳。陳侍郎謙名其堂曰孝感，作詩紀之。令許伯翊偕同官載酒宴其母子，盡歡。

郭濟 家貧，至孝。寶祐五年，父病，刲股以進，遂瘳。庶母病篤，亦刲股者再。鄉人白令，趙與泌旌以錢米。

皇朝

陳雄 李潮

陳雄 陳易裔孫也。母病，設榻卧側者九年。每食，嚼而飼之。山寇至，欲刃其母，請以身代，賊俱釋焉。

李潮 有司以善舉，嘗著《義方遺訓》及《勉學詩》。

興化故縣（五）

宋

黃廓

黃廓 平江令徹子也。事親孝，芝產於廬者三。鄭夾漈樵爲文記之。

邵武府 邵武縣 光澤縣 泰寧縣 建寧縣(一六)

邵武縣(一七)

唐

吳桓、(一八)張巨錢、吳海合傳。

黃桓、張巨錢、吳海 三人俱見唐史。桓母喪，廬墓三年，芝產墓側，鶴巢林，人名其地曰鶴林坪。貞觀中旌門。巨錢母喪，廬墓三年。永淳初，觀察李承昭奏蠲其賦役。海母喪，廬墓十三年，墓側產芝，至二十莖。

宋

鮑老 上官濟 張士昂 何宗善 張子惠

鮑老 事母至孝，母病革，鮑取肝啖之。插刃於脅，探肝未得，忽聞空中有語云：「蹲地。」鮑從之，肝卽出，以進母，母病隨愈。

上官濟 淳熙間，其父病重，濟鑿脛取髓。其妹二娘同時割股爲湯以進，父病遂愈。縣官給錢米酒帛以旌異之。

張士昂 寶祐元年，祖病，士昂年甫童孺，焚香告天，割股爲羹以進，祖病愈。郡守特以錢米錦繒旌之。

何宗善 事兄嫂，抚孤侄，曲盡恩禮。

張子惠 字仁叔。少失怙恃，本生母、義父收鞠之，以底於成。及本生母、義父俱卒，子惠乃葬本生母於和平里之鶴巢原。有田四十畝，及蔬圃竹林之利，悉以施報德堂奉佛者，擇其徒一人守塚，歲時使收其田園之人，以奉祭祀。而自居茅屋，聚數十學子教之，以給饗餼。事叔父如親，愛堂侄如子，鄉人咸以孝弟稱之。

元

郭回 陳道

郭回 性至孝，家貧，竭力養親。母年九十八卒，傭身得錢以葬。每旦詣墓哭祭，如是者十有四年。守臣以聞，詔旌異之。

陳道 至正中，隨父樵採，父被虎噬，道以柴擔奮前縱擊。虎舍父，噬道，啖之盡，鄉人爲塚焉。有留題者曰：「虎口猶能奮父屍，天胡縱虎害斯兒。行人不爲呻吟喙，此孝何從得盡知。」

皇朝

謝恩 陶鉞 王顯 黃文慶 葉慶二 侯關 張遇 朱承宗 余廷梓（一九） 傅三 蕭瞻（〇）

謝恩 幼失怙。母朱，少寡，撫之。成化六年，母卒，慟絕復甦。既合葬，負土成墳，結廬墓側。三年間，非奉祭祀，夫婦未嘗一相見。服闋，每歲忌，輒齋戒終其月。月朔望，必詣墳拜掃。郡守夏英疏乞旌異，以勵風俗。

陶鉞 邵武衛軍也。嘉靖季，流賊逼郡城，有逃賊者被迫急，鉞舉空銃向賊，賊驚，逃賊者得脫。竟

爲賊所毒殺。有司爲葬塚，豎碑。

王顯 字希文。怡情泉石，尤工丹青。母病，忽盲，朝夕路拜禱於城隍廟，以口舐之，母目復明。母卒，卜葬扶柩登山，會天大雪，寢處柩傍凡三晝夜。雪霽，葬畢，始歸。撫兄子如己生，收私產均之。

黃文慶 割股愈父。

葉慶二 邑之龍關人，龍關近溪，故慶二幼卽善操舟。延平下十里許有蛟潭，龍戴其中，而無尾。俗傳：見龍者吉。慶二泊舟潭渚，蚤起作飯，見龍負舟，亟以衣覆之，龍蜿蜒去。乃自負貿易，遂獲大利，不數歲爲鹺商，積貯鉅萬。而性謙下，好與賢豪長者交，有學而奇窮者，捐貲助之。自水口至杉關，凡橋梁、路埠，樂施罔倦。置義田於學，以助月課。所謂富而好行，其德者矣。其後，以鹽舶至南臺，無倉可貯，多壞於潮汐。慶二沿河築倉，築用磚石，商人稱便焉。乃爲強有力者反噬張弧，而慶二竟死，人惜之。

侯關 幼喪父，事母勤至，見母少不愉，卽不自安，多方探慰，時或舞戲其前，致滿堂嘻笑，以取親歡。事兄猶父，兄家居奉母，關跣踰經商，增置厚產，至分爨，惟兄意所欲。一日在途，欲歸視母，遇風不便，私禱曰：「得風當酬以巨魚。」忽順風。不能泊岸沽魚，將銀簪投河代之。到岸，有提一巨魚貨錢者，關買以還願。同舟者曰：「適已投簪，復買魚何爲？」關曰：「投簪，權也。今幸得魚，何爲不買？」剖之，得原簪，人謂孝感。

張遇 幼失父，事母至孝，兩刲股以愈母疾。有司旌門曰刲股活母。

朱承宗 事母周盡孝。母病，昕夕不離床側，聞有能醫治者，不遠數百里請致之。湯藥親嘗，母不食，宗亦不食。母死，哀毀，勺水不飯，絕而復甦者再。旣葬，結廬墓側，寒暑風霜，三載未嘗一至家，鄉人

稱頌之。

余廷模 幼喪父，傭酷以供母。妻死不娶。母病瘋，竭力醫治，撫摩不停。母稍寐，即焚香手膊，跪禱代死，如此者三年。母死，號天幾絕。既葬，架廬墓前，朝夕拈香焚楮省拜，日惟一粥，以延殘喘。鄉人咸服其孝。

傅三 家貧，傭耕奉母。一日，母病，思肉食，無錢買，剗股和湯以進，母病遂愈。

蕭贍 善事父母，至老不倦。鄰族中多爲感化。

光澤縣(三)

宋

危翁 梁從光一作實 李穆 何福 高談 上官超

危翁 一家貧業樵。靖康中，聞徽、欽二帝北行，哭三日，骨立死。寄庵季炳以詩弔之云：「南鄉老人危翁一，歲晏雨晴扶杖出。驚聞二聖塵再蒙，歸闔柴門哭三日。眼空愁絕聲遂止，里人唁翁翁死矣。」

梁從光 淳熙間，邑饑，發積平糴。來糴者，近者餉以角黍，遠者遺以米，日計數百人。終其身，凡遇歉歲，皆如之，州縣監司旌賞焉。

李穆 字景仁。商於淮，主家病疫，病者夢崇相告曰：「明日大富長者至，吾屬遠去。」是夕，穆果至，病者以絲求麥，穆曰：「乘病取財，罪莫大焉。」予之。金陵饑，運米數千斛平糴。一夕，夢神人告曰：「君速之五羊城。」及覺，如其言，得海客奇貨趨都下，其息倍什。孫邵，官至太守。

何福 幼孤，行傭養母，最孝，鄉人廟祀之。

高談 平居謹禮，鄉人敬附。紹定間，旁郡盜起，諸子請避，曰：「四方皆盜，避之何所？」及盜人，諸子又請。曰：「有廟柘在。」盜至，談出曰：「時和歲豐，何忍爲此？」盜曰：「民苦吏貪，我爲白之。」談曰：「獨不能搥鼓上愬乎？且夫何爲殺民？」盜怒，執談庭，遣以牛酒金帛皆不釋。談曰：「然則何爲？」盜曰：「吾方東破武陽，爾能率是鄉子弟，吾其濟乎。」談曰：「斯言奚爲至我！」唾賊大罵，遂遇害，而里人賴以免。

上官超 母病篤，割肝愈之。令張碩名門曰孝感。

皇朝

龔仲賢 陳溶 汪繼瀾 吳尚淳 李文通 王貴、鄭旻、周志和、李文讓、梅清合傳。(三三) 李玄

奉 張拱

龔仲賢 少孤，母忍貧撫之。洪武壬戌，母以壽終，仲賢痛念不已，刻木肖像，衣服飲食，出告，反面，奉之如生。妻王氏，亦與偕敬，凡十八年如一日。

陳溶 卒業耕讀。居喪不用浮屠，惟讀《孝經》。寢苫枕塊三年，無異初喪。

江繼瀾 少失母，父又雙瞽，奉之靡不遂意。俗尚誦經，父常往經堂會誦，及暮，繼瀾必負以歸，歷三、十年如一日。妻危氏，成室卽夭，遺男二歲，自撫養之。菽水，身求井，曰親操，皆人所難。

吳尚淳 質行樸魯，少孤，養母無怠。

李文通 正統中，兩出穀備賑，先後輸千百五十石。賜勅書羊酒，命有司表坊、免役。

王貴、鄭旻、周志和、李文讓、梅清 並以正統中出穀千石備賑，賜勅褒諭。

李玄奉 捐金修建，賑貧助喪，終老不息。

張拱 二弟：仲曰玄淡，季曰玄端。兄弟孝友，事親定省不息。親歿，絕口不及家貲。

泰寧縣(三)

皇朝

廖宗元等八人 江寧宗 李泰 李文憲(二四) 李純行 涂文煥

廖宗元、吳景齡、葉廷春、蕭福壽、黃綱毛、汪元鼎、江洪、江留富 並於正統、弘治中有賑施者。

江寧宗 正統十三年，與兄寧祖同奉父母避寇登雲寨，日久乏食，寧祖出求糧，爲賊所縛，索財不得，欲殺之。寧宗聞，即奔請代。寧祖曰：「弟亟歸，善養父母。吾有子矣。」寧宗曰：「弟冥頑蠢愚，營辦養父母必兄。」相讓久之。寧宗乃謂賊曰：「家財悉掌於嫂，兄去乃可得也。」賊聽寧祖歸，踰日無耗，遂爲所殺。

李泰 父死，行傭供母，得甘旨，即手爨待食，不以命婦。冬寒，傍母寢。夏則先寢母床，以饒蚊蟲。母壽終，泰尋卒。

李文憲 萊夫也。縣有晝錦橋，久燬，文憲忍饑積錢獨力重建。每遇水漲，竭力防守，人皆義之。邑令旌門。

李純行 幼習儒，以親老就賈。後家至四十口，猶不忍與兄弟分析。嘉靖辛酉，流寇入城，民皆竄山

寨，純行被獲劫，問鄉民藪穴何在？行死不肯吐，以身所懷十金與之，寇遂去。後出賣兩京，輒空返，或問故，曰：「某客死，吾贈之。某遭風失貨，欲自經，吾財活之。」郡有武弁，頓於京，窮不能襲。贈之金，俾世其爵，而又載之歸。自是貲漸竭，猶濟里中之待舉火者。嘗訓其子：「讀書非爲溫飽，須體聖賢濟人利物之心。」

涂文煥 忠誠質直，任事無私，兄產蕩盡，取己貲與侄均之。督造學宮，拮据料理，毫無點染。爲邑人作靈傑塔，木石磚甃之類，皆定其厚薄，均其斤兩，規制結構，種種絕人。後凡鄰壤有事於浮屠者，爭推以爲祭酒。

建寧縣（二五）

元

張子英 馮順德 丘敬 黃權 馮真卿

張子英 幼孤，侍母獨居。元季盜起，妻子俱被虜，子英負母逃，備經險阻。後寓居黃溪，傭書爲養。母思婦，孫寢食不安。子英跪曰：「但得母安，妻子可復返。」賊退，奉母歸，妻子亦還故里。

馮順德 蚤孤，奉母至孝，飲食必親供。時遭離亂，負母逃山谷，孝敬不懈。母多病，順德或終夜不寢，勵志學醫，調藥躬奉。母病遂愈，老而益康，年八十三卒。

丘敬 幼孤，母爲賊擄，敬求不得，刻木肖像，晨昏侍奉。一夕，妻饋莫悞，侵像仆地，敬哭泣擗踴幾絕。卜葬交溪之上，服喪三年，春秋祭享，人稱里曰孝鄉。

黃權 以孝義施與聞縣。東北將溪，徑寬平地餘一十里，人大溪，歲泛溢侵畷爲患。權自募夫，力遷之東山下，人賴其利。

馮真卿 元季紅巾寇擾，真卿召募義勇，戮力禦寇。已，出資創縣治，建學校，造橋梁。年八十一終。

皇朝

陳孟溫從侄翰合傳

陳順、甯宗佩合傳

吳孟楨

何琪

熊高

曾元宇

陳孟溫 父歿，廬墓三年，常有玄兔、烏鴉集墓所。有司爲立孝子坊。從侄翰一，父病篤，嘗糞驗瘥劇。母日久盲，舌舐之，明如故。

陳順、甯宗佩 武勇有略。鄧茂七倡亂，鄉民推順主盟。順與宗佩集練少壯。是冬，寇屯軍口，二人統衆與戰，潰，宗佩死焉。已，順與寇戰饒村水西營，大勝之。寇益兵奄至，復率往禦，方戰，衆潰，猶挺前，手殲十數人，力竭被害。鄉人義而祀之。

吳孟楨 涉覽史籍，遇古人事有難處者，輒掩卷思其得失成敗。愛好斯文，日與談計。尤精診脉，人請治療，不計貧富。後，子綱登第。

何琪 恂雅務學，事父至孝，父病，籲天請代。年九十卒。子乾成，名宦。

熊高 父苦痺病，百方調治，湯藥親嘗。以腴田歸庶叔，自居其磽。歲饑，出粟千餘石以賑。有司上事，賜冠帶旌楔。

曾元宇 年十七，刲股愈父。母雙瞽，醫言當用人血和藥，卽引鍼刺取，日夜拜禱，以舌舐之，母目復

明。

漳州府 龍溪縣 漳浦縣 龍巖縣 長泰縣 平和縣 詔安縣 海澄縣 鎮海衛(二六)

龍溪縣(二七)

宋

陳湜 陳昌祖

陳湜 政和間人。拾遺不取，有還金還珠之高。

陳昌祖 淳熙中，漳大饑，粥郡城四門，以食餓者。

元

胡景清 蕭景懋 林元佐(二八)

胡景清 元兵下漳南，景清甫五歲，隨父母逃難，母倉卒失之。既長，念至，輒涕下。一日，辭父往尋，抵幽薊，知母在矣，猶未詳其處。踰歲，始得。蓋母子相別四十餘年。事聞，旌表，給驛以歸。

蕭景懋 至元中，李志甫作亂，景懋與兄佑率鄉人立柵保險，堅不可入。賊乃從間道至，執景懋，使拜，不可。欲脅之降，大罵之。賊怒，縛之樹上，剗其肉，使自啗。景懋且嚼且罵曰：「我食我肉，無若汝輩賊行狗彘所吐也。」賊怒，刃其口，至耳傍，罵不絕，竟死。事聞，詔褒旌，給錢以葬。

林原佐 居龍溪之文山。至正間，海寇薛均祥犯境，鄉數千人築砦自保。官軍意其皆均祥黨，因砦

甚急。時原佐避難郡城，自備牛酒，挑而謁主帥，告以此鄉之人，素守禮義。帥感其言，解圍去。

皇朝

呂崇爵（侄宗述合傳）

謝以敬 唐孟元兄弟 莊伯和 郭秉敦 黃秉蘭三兄弟 郭良、洪順合傳。

王彝 蕭壁 丘子能 方安榮父子

呂崇爵 父疾，夙夜扶持，歷十餘年不懈。父沒，持喪盡禮。母卒先葬，以家貧不備，啓斂易棺，與父同窆。侄宗述，輕財樂施。有養魚塘，捐爲族人供祭。三拾遺金，悉以還人。孫景鳴，見韋布。曾孫旻，見縉紳。

謝以敬 性至孝，父歿，事母尤謹。母有疾，躬視湯藥，日夜不脫巾帶。母歿，哀毀成疾。歲時祀先，病室隘，作寢廟大之。故人子逋負官錢，以所乘馬與償。有坐事繫獄者，其妻携金泣拜求解，以敬拒之，密爲規畫，事竟白。子璉，見縉紳。

唐孟元 正統間，叛賊掠郡，孟元泊其弟孟遠，一作遜。誓衆拒戰，自辰至酉，衆不支，欲退去，孟元語孟遠曰：「我死之，爾可去。」孟遠曰：「忍哉？」益力戰，賊勢稍緩，衆因得退走，而孟遠與孟元竟死之。

莊伯和 正統間，爲鄧茂七賊黨所獲，欲脅之，大憤罵賊。拘之三日，迫以威，罵益甚，遂被殺。

郭秉敦 鄧茂七攻郡城，秉敦運私米千餘石助防守。寇滅，事聞，賜旌表。

黃秉蘭、秉衡、秉遜 兄弟也。天順間，漳大荒，三人共發粟千餘石以濟饑餓。事聞，旌表。

郭良、洪順 並天順間出米麥助賑，賜勅旌。

王彝 父昇，見縉紳。彝性至孝，父患病，親爲嘗糞。母病，眼患瘡，朝夕吮舐。成化八年旌門。

蕭壘 父璿，見縉紳。璿卒官，壘五歲，撫柩哀臨，鄉人異之。及長，事三母如一。嫡母陳病癰，吮之至愈。庶母阮楚撻之，承顏跽受，阮終感悟。遇風雨，輒至父墳哀號。西鄰失火，將及父坊表，號天而火滅。

丘子能 安貧好義。事繼母得歡心。田宅令異母弟自擇，撫幼孤侄如己子。嘉靖中，旌表賜秩。方安榮 屠者也。家貧，養母必不敢失肉。母病，刲股食之。子穹錫，亦刲股以愈安榮。鄉稱世孝。

漳浦縣(三〇)

宋

薛半千兄弟 蔡青

薛半千 母病嘗藥，視食飲。疾轉劇，刲股進。其伯兄亦鑄血調藥，仲兄復焚香於頂，以資冥福。母疾隨愈。兄弟三人怡怡雍雍，鄉里誨子弟，必舉爲法。

蔡青 紹興間與縣人鄒進、熊保俱爲左翼軍步兵。山寇焚縣治，郡使臯甫某領步兵二十五人禦之，青與進、保俱屬焉。方屯縣北門，賊率三百餘人突至西關，郡使曰：「我曹當効力血戰。」三人被髮瞋目，操戈先登，自卯至酉，殺傷甚衆。賊分兩道遁，三人乘勝追之，窮而反鬪，皆被傷，歿。邑人哀之，爲具殯合葬西關門外，名曰勇士墓。同時又有陳姓者，舊志逸其名，嘗爲長泰尉，發兵捕賊，力不能拒，亦遇害。

皇朝

徐仕耕 盧元 游宜 沈暹父子

徐仕耕 家學舍傍。宣德間，縣令修學，勸仕耕割地廣學，仕耕與侄朝紳欣然與，償直不受。繼鑿泮池，復捐地數畝爲助。孫鼎，見縉紳。

盧元 景泰間父卒，貧不克葬，鬻兒襄事。錢主欲就携兒去，元曰：「請少需，使侍宦多事畢，謹如約。」居數日，採薪山中，忽得金三錠，就謝錢主，贖兒以歸。

游宜 家貧力學。年荒，賣薪鬻子爲養。親沒，盡賣屋地殯殮。令鄭禧憐之，賜錢助葬。宜事兄如父，事嫂如母，家有犬乳貓子之祥。

沈暹 富而好義。構書屋所居旁，廣置書籍，請名賢劉宗道輩從之講誦。冠婚喪祭，悉依古禮，割租千石以贍族人，復延師教里族子弟，歲人稻數萬石爲款師費。正統七年，出粟七千石賑饑。事聞，璽書獎勞，榮以冠服。子同尚，事繼母至孝，撫所出弟妹，不異同胞，分資，自居其瘠。祀田有廢者，贖券復置之。好士，延師一如其父。所著有《家規》三十餘條。

龍巖縣(三)

元

李繼善 林用作

李繼善 至正十三年，山賊曾飛與其黨管得勝率強徒百餘襲縣治，執達魯花赤納習、主簿篤堅海牙囚之，逼取縣印，改縣爲寨，署其黨黃得恭爲寨主。繼善率衆曾元德掩誅得恭，勦絕之，出納習、海牙於

繫。

林用作 至正末，流寇攻龍巖，急率衆擊滅之。分帥上其功，授長泰簿，以母老辭。後寇復作，右丞羅良授之百夫長，亦不就。隱居耕讀，以壽終。子瑜，見皇朝縉紳。

皇朝

王璟、翁實、陳邦止、鄧肅、林丘興 同傳。

王璟、翁實、陳邦止、鄧肅、林丘興 正統間，沙寇作亂，大軍南征，糧餉弗贍。景泰元年，五人罄家財應詔給軍，並賜冠服。

長泰縣(三)

宋

陳耆公

陳耆公 邑人和、彰信二里水利未通，捐田二百餘畝易他人田，鑿陂塘三十六所，水圳三百餘道，立牐堰，時開閉，旱潦無害。卒而里人祀於鄉。

元

王初應 施合德

王初應 至大四年，隨父樵山，虎來傷父，抽鎌刺虎鼻，虎轉噬初應，然父子竟無害。詔書旌門。

施合德 泰定二年，從父耘田，有虎攫其父，與從弟發持斧奮前，格殺之。父得生，詔書旌門。

皇朝

薛子義 楊復一 盧道明 吳汝韜一門 林周夫

薛子義 好義樂善，捨地建泰寧書院以祀朱文公。復捐田百畝，充師生廩穀。

楊復一 敦禮養恬，賙婚葬，蠲償負，三度賑饑，穀粥並給。祖稷，見韋布。子釜，見縉紳。

盧道明 有族子與邑子共主縣庫，邑子盜庫金，佯爲失之，連及族子，道明鬻己田償之。子岐嶷，見縉紳。

吳汝韜 嘉靖三十七年，倭寇入境，首率子廷爵、侄廷喬、廷蘭應縣令募，手刃倭首二人，益與子侄力戰死。縣令聞，痛憤，欲身督戰，賊乃懼遁。事寧，令旌其一門忠義，給地葬之。

林周夫 嘉靖四十年，山海賊數千攻縣，屯溪東。衆議破其營，莫先往。周夫率衆過溪直抵營門，砍折賊旗，殺其數人，因無後繼，爲所殺。而城中人望見賊旗仆，以爲周夫無恙，賈勇從之，賊疑遁出，闔邑賴焉。

平和縣(三三)

皇朝

陳馬生 龔祥魁 謝弘凱 陳國萃 曾敦立 朱孟崇 朱玉真

陳馬生 正統己巳盜起，兄與侄被執，馬生奔往請代，賊怒，俱縛而投之江。

龔祥魁 子岳。期功總麻，同居和好，一囊四十餘口。

謝弘凱 幼孤，躬耕養母。張鬚獅等作亂，脇之，不從；欲污其母，將死之，母以得免。吳侍郎原號之曰獨醒翁。曾孫瑚，領鄉薦，璫、珊，俱歲貢。

陳國萃 幼時母爲父出，比長有知，輒涕泣幾諫，卒感父還母。讓財異母弟，時賑其不贍。

曾敦立 正德間，蘆溪寇亂，鄉導官兵勦滅之。倡議白撫、巡置縣。既立縣，遷四祖墳以便成城。開山伐木，用助城築。

朱孟崇 以驍勇名。官兵征蘆溪，孟崇爲首陣，獲渠魁。又招象湖賊唐流斌等，一方寧息。官賞金二百，辭不受。

朱玉真 嘉靖甲寅等歲，前後出粟數百石賑饑。瘞背掩骼，不知其數。

詔安縣(三四)

皇朝

許福海 涂膺 許尚端 沈胄 陳仕祿

許福海 元時，羅良守漳，大興屯田，以備潮寇，給屯戶耕牛六百頭。至陳友定時，牛數尚存，每一頭稅米二石。入皇朝，歸附版籍，數額並載，稅米至千餘石矣。養牛戶四百餘家，不勝賠納之困。永樂二十一年，福海赴京陳奏，以爲：「屯種牛自羅良時給民，迄今垂五十二年矣，古今豈有五十二年之牛？稅米千餘，民病莫甚。恭惟皇帝陛下踐祚，革除弊政，如恐不及。臣遠方小縣，政弊如此，一經聖目，必加憫恤。臣入京陳奏時，被害小民祝臣必允。臣辭誓父兄，不允不歸還，輒敢冒昧。」成祖覽奏，下旨曰：「我

皇考初定閩中，隨調長興、江陰等衛官軍分鎮戍守，復遣侍郎夏原吉巡撫，釐革弊政。今覽福海所奏，朕爲憫悼。該屬有司視福海愧矣！戶部其速行福建布政使司，盡行蠲免。別行吏、兵二部，推選忠勳大臣領勅前往福建巡撫，凡吏弊民害，盡革除之。」

涂膺 好義有謀。正統己巳，沙寇作亂，漳寇乘之，漳浦縣尤罹害，縣令奔入潮州。詔安孤城不支，相與謀曰：「涂翁長者，可共詣之。」膺慨然入城，圖指方略，督衆協守。凡山海賊謀欲入城者，皆破其機牙。既而，山賊爲雲梯攻城，膺鎔鐵汁，矢石交下，賊被傷死者十二三。明日，海賊至，衆亦如之。夜遣強徒密入賊營，殺其酋首。仍乞援於潮，刻期而至。賊見內守外援，自相怨罵，相率遁去。衆喜拜謝，膺曰：「諸君力也，不佞何功？」

許尚端 蚤孤，事母至孝。母卒，廬墓三年。沙寇作亂，散財募衆，與涂膺並有全城功。

沈胄 字尚寬。幼孤，事母至孝。所置產，悉分諸弟。立書田，以助弟侄之爲庠士者。沙寇作亂，與涂膺等並有全城功。

陳仕祿 善事嫡母。父苦風疾，醫云：「得蝻蛇酒可愈。」仕祿入山月餘，求得以進，父疾尋愈。與兄仕國分業，後仕國貧困，仕祿請父分以己業。教讀於鄉，所得束修，與兄中剖。兄歿，其子負債，捐己田使鬻以償。族有喪暴露者，助之葬。遇荒歲，以錢米賑貧鄰。見餓婦竊其園中荳，走避之。

海澄縣（三五）

皇朝

周世綱 陳孔葉 蔡彖 李俊 周玉質 陳孔志

周世綱 正統間，鄧寇攻郡，世綱運私米四百餘石助防守。寇滅，詔書旌門。子朝恩，弘治中屢以家丁擒海寇，功著於時。

陳孔葉 知書重義。正統十一年，饒賊千餘流劫漳浦等市鎮，孔葉料其必至月港，散家財，募義勇，扞水城，樹樓棚爲備。賊果至，孔葉率衆與戰，自辰至巳，殲其渠魁，連斬十六人，奪還被擄數百人。知府鍾湘犒以金帛，鄉人立石頌功。

蔡彖 治家嚴整，嘗立家法十條，內外長幼五十餘口同居共爨，一錢尺帛不私，姊妹亦雍睦無間。自彖至孫，曾且四世，義讓之風不絕。

李俊 年十六，母潘寢疾莫療，聞其祖良嘗割股愈母，乃默禱於天，踵祖故事，母疾遂愈。

周玉質 拳勇過人。嘉靖十二年，山寇毒亂漳、泉，官兵捕禦不服。府縣舉玉質統率民夫與戰，斬賊數百，奮勇追逐，被傷身死。有司給葬祭，鄉人立祠祀之。

陳孔志 漳州衛納粟鎮撫孔成之兄。天性孝友，膂力絕人。嘉靖己酉夏，夷船數隻直抵安邊館劫掠，海道柯喬、通判翁璫急徵孔成，孔成曰：「非吾兄不可。」孔志慨然領命，乘巨艦衝鋒，殺獲甚衆。賊懼，灼炮中孔志胸而死。然自是解脫，地方寧靜。喬立石紀功，遣官致祭。

鎮海衛〔三六〕

皇朝

姚仲敬 戴璋 翁伯全 武守爲 龔玉節 石平翁一門

姚仲敬 性至孝，在親側，無疾言遽色。父喪，哀毀骨立。家貧養母，結簞供食。母疾，祈療無應，刲股和酒粥給母食之，疾尋愈。

戴璋 衛軍也。行傭供父，每得錢卽市甘旨以進。冬寒，以身溫被，抱父而寢，父以壽終。

翁伯全 衛軍也。幼喪父，極貧，事母游至孝。既娶，令妻從母寢，而自獨寢。得一錢，卽以歸母。母死，哀毀三年，雖蔬食菜羹，亦必以祭。

武守爲 事父母孝，撫孤侄如其子。三世同居，錢帛不入私房。內外姻戚之貧者，每捐財穀贖之。葬期，功親凡五喪，埋覆舟之屍三十有六。築土堡，鑿陂渠，修嶺路，助建書院。士民上事，當道旌之。

龔玉節 嘉靖二十三年以來，連歲凶荒，玉節給粥分錢。疫死無托者，助之棺。客商被盜，資路費焉。石平翁 一門尚義，曰石輝，曰石輔，曰石祿，並有助公賑急之行，人稱世德。

福寧州 福安縣 寧德縣(三七)

皇朝

林坤 周冕 張子成 池斌 鄭旭 林文盛父子。李然 蔣文臺 俞棫(三八) 吳楠 池貴遠

陳炤 繆文昂 胡昇 吳克恒 游德 周大賢 顧中孚 鄭宗遠 程伯簡 白受采

林坤 淳篤孝友。兄思齊，早卒。兄子琦、璧、璿，躬誨之。嘗道行，得囊金，蒼頭請拾去，坤止之曰：「歲正歉，留以饒後來者。」琦，見縉紳。

周冕 自營生產，盡以祖田遜弟。妻卒，年方三十七，終身不再娶，亦無女侍。婦翁死，有義子謀爲嗣，內外諸親皆許以田百畝，賂冕主其事，冕拒卻之。

張子成 有友人通官銀，被責甚急，將鬻妻女以償，子成代之輸。佃私割其田稻百餘石而逃，鄰佃追獲其妻子，佃妻欲投死橋下，子成親詣慰釋之。浙人有同姓者，年十六，自遠而來，零丁困苦，留撫之，長爲娶妻，分產給贍。子成卒，浙人服喪如服父。

池斌 正統末，鄧茂七黨至其鄉，時斌外出，賊擄其父，炙之，以脅財。斌聞匍匐至，抱泣請代，賊曰：「詐也。」遂釋其父，而炙斌。斌以壽終，背有炙痕。

鄭旭 蚤孤。未冠，母病劇，籲天刲肝，母病遂痊。

林文盛 母疾，剪腕肉糜以進。粥沸異常，母疑之，不敢實對，家人亦無知之者。後見腕痕，乃得狀。父嗜驢肉，恒致以薦。子涓，廣孝好施，終身無遽色疾言，卽戚獲有失，第謹戒之。人竊其物者，偵知不取。

李然 父人城，每出二三里迎之，未返，雖暮不歸。弱冠時，父苦臀瘡，晝夜侍，供食飲，徧求醫藥，有膿污，手承之。父病篤，割股和粥，父食之，輕爽數日。父沒，母病痺八九年，扶持浣滌。及沒，負土石以葬。

蔣文臺 有善行。

俞穢 孝友，無私財。及分產，念兄子衆，遂以五之三。平生不匿人善，不言人過，解紛息爭。及沒，所居火，穢柩在殯，寢門重閉，穢子昌文號扣，門忽自開，柩以獲免。兄稷，亦有善行。

吳楠 性謹信。處必衣冠，口無戲辭，面無厲色。事兄彥高敬讓。教人先不妄語，應人求必稟命所尊，而後與之。鄉人有爭，爲解釋。一日，同二人赴省，貲各百金，一出稱貸，一爲嫁女。至寧德遇賊，其二人以目指楠，楠出己金悉與之。賊詰取二人貲，楠悉爲隱諱，至脅以刃，割其耳半，卒不言也。

池貴遠 平生不跡官府。正德三年，里大饑，典業市米以粥施餓。里人祝曰：「願翁百歲。」後壽至九十一。

陳炤 少孤貧。母病劇，籲天減年，復刲胸取肉調粥。母痊，炤竟以創歿，年二十四。

繆文昂 母陳，孀居六旬，病甚，告天割左股煨粥，母食即愈，壽八十一。初無子，至五十連生二男，壽亦八十三。

胡昇 每夏秋之交，輒出貲賑不給，不足，出其妻及婦釵珥羅米繼之。道拾遺，還焉。正德九年，率子弟捍海寇，被創死，鄉里哀悼。

吳克恒 以膏腴田遜兄，自取瘦瘠。兄有孤侄，凡徭役之費，悉爲辦之。

游德 幼穎異，受經史即通大意。母念其羸瘠，遂束書課田，築室奉親，與弟廷奎友愛。里有爭者，輒相譬曉，謂：「不見游德兄弟耶？」子朴，見縉紳。

周大賢 在姪三月，父亡。成童，依戀母側，夜必拜斗祝母壽。世隸戎籍，嘗戍海上，哀思不已。御史聶豹得其情，爲脫籍，且白其母節，旌之。

顧中孚 事二親，愉愉色養。壯歲喪妻，弗娶。母死，哀毀啜粥三年。

鄭宗遠 造船沙井濟人，捨田六畝給渡夫。構亭兩岸，以憩候渡者。

程伯簡 嘉靖丙辰，倭萬餘攻堡，伯簡編甲伍，選游兵，精壯前噪，弱者次之，婦女裹首運石傳餐立於後。倭更番挑戰七晝夜，伯簡誓衆死守。倭見衆皆稟命伯簡，知其爲魁首也，爭向射之。伯簡殊不撓沮。賊馳二雲車至，伐樹杈格，使不得薄堞，遂以草烏弩及銃斃數倭，倭乃宵遁。伯簡死城上，鄉人李春榮等爲立祠，并共難四十餘人，並祀之。

白受采 百戶麟子。麟守白鶴嶺，寧德城陷，坐累繫獄。萬曆改元，漳寇訐海上，采與弟祥自陳願擊賊贖父，竟以失援，偕劉把總死松山。當道嘉其志，厚恤之。

福安縣(三九)

元

陳預九

陳預九 至正十二年，賊康二知預九有才勇，將招爲亂，置酒飲預九，將半，出寫偽劄授之。預九驚皇馳歸，自縊而死。

皇朝

郭鐸 阮貢 林子隱 劉泗 陳叔達 郭惟周 陳鐸 李應奎 鄭伯起

郭鐸 少孤，恨不逮事父。母病劇，割股愈之。一妹廢疾，親爲理髮澣衣，或外出，必囑妻可善視。妹亡，悲痛懇切。葬母，躬築墳，闢室祀二親遺像，忌日必變服致哀。鄉士鄭伯英扁其堂曰終慕。

阮貢 三歲而孤。母卓氏，力貧守志。母病，日夜奉侍，籲天減年，母果壽八十。居喪盡禮，蔬水百

日，卧起棺傍，朝夕哀慟。群烏集屋者三。既葬，刻木像事，有遺髮，寶藏之。所居延火，貢惟奉母像及遺髮以避。貧益甚，僦居察陽，奉像益謹，三十年如一日。州判李長爲市屋給粟，且躬禮焉。

林子隱 事父母盡孝，居喪哀毀，終慕不衰。

劉泗 少孤，患瘋癲，母吳抱護之。吳卒，泣絕仆地。因習堪輿，得吉以葬，罄囊裹事，晨夕登哭，烈風甚雨，望墳悲號。

陳叔達 里有爲盜者，諭之曰：「爾爲此，小則殞身，大則滅姓，奈何？」答曰：「貧耳。」叔達給田數畝，資以牛種，盜自是改行。

郭惟周 歲饑，倒廩賑人，不問姓名，不責其償。有賣薪者，失金路哭，有陳、周二者，欲鬻妻償負，惟周並出囊中，如望與之。其他建梁砌塗，爲德甚多。

陳鐸 有鄰人鋤地，獲金數百，恐見奪，夜寄鐸舍，託鐸安置。人問：「曷不取之？」曰：「天與也，託我而我取之乎？」

李應奎 嘗造棺百餘給貧死人，有匍匐救喪之義。

鄭伯起 處衆粥粥，好義如赴。嘗兩出囊金爲人贖妻。其於橋道，多所修建。

寧德縣〔四〇〕

宋

余夢明

余夢明 字明甫。事親至孝。一日，庭生異花，逾月不變，人謂孝感。子士武、士成，並登右科。

元

周汰

周汰 專力農圃，以養二親。二親繼亡，哀毀骨立。會鄉人合造神廟，約不得留喪於家，以厭神靈。汰奉橫山坎，歲月未協，守橫四載，未嘗少離。嘗病甚，恍惚神人語以無恙，果愈。

皇朝

彭冀兄弟 李宗敏 陳轅 王壽 張仲業 鄭仁 彭濬 龔松 林元慶兄弟 陳榮 湯農 徐

元吉 張文綸 陳仲飾 陳廉 陳祥 顏公武 林佐 林宸 林崇仁 龔仰

彭冀、彭騰 異母兄弟也。性友愛，財帛不私，禮敬不弛。或遠出還家，恒携酒遠迓，叙悲歡涉歷，情好狎至。年並八十，終不分異。祖棣，見縉紳。

李宗敏 性質直，取與不苟，治家嚴肅，諸子整如。平生好濟人，每曰：「用天之道。」成化十三年大饑，傾產出賑。又罄器皿首飾，拉鄰里赴本州文崎林家質粟數百石分給，咸賴以濟。有司加重，給以冠帶。

陳轅 豁達能施，成化間輸粟千六百石，給賜冠帶。

王壽 居家孝友，有子七人，女四人，孫十餘人，隨緣婚嫁。子孫，擇其能者應門戶，餘使竭力農圃。諸婦各勤女事，同居共爨，庭無間言。

張仲業 性友愛，處兄弟族黨有恩。年四十，無子，娶妾陳，與其妻姚睦如姊妹。已而生子同時刻，

稍長，相讓爲兄，有士人曰：「嫡宜兄，庶宜弟。」仲業卒，二子，男女孫輩數十人，三世同居。雍睦之風，不媿古人。

鄭仁 事親至孝。年六十，喪母。父年八十，出入扶持，夜侍寢宿，冬被夏扇，概身親之。父歿，葬祭如禮。子永，存有父風。

彭濬 奉庶母，處幼弟，皆得其道。以謹厚稱宗間。

龔松 數歲喪父母，哀慕不已。稍長，痛父母嘗罹饑困，懸像中堂，每食必獻，雖一瓜一果，不獻父母，不分其姊，不輒食。既冠，或勸其娶，泣曰：「親未歸土。」越數年，葬畢始娶。孤侄患惡瘡，躬爲扶抱洗滌傳藥。其妻恐相染，松曰：「兄僅此子。」

林元慶 輕財樂施，爲德鄉族。弟元魁，亦稱善人。子以謨，有父風。

陳榮 少孤，事母孝。妻亡，恐再娶不當母心，不復娶。母久病，躬侍湯藥，不離側。洩溺，必躬浣濯之。

湯農 母七十，病劇，思瓜，時冬月，無有。農遍至，霍童朱氏存一瓜，願納值。或戲之曰：「鬻一金。」農曰：「貧，納八錢。」母曰：「費矣。」農曰：「但得母痊，何論賤貴。」母食果愈。

徐元吉 年十七，祖母病重，刲股食之。

張文綸 貧甚。母年七十矣，倭至，挈妻子避之。爲倭搜得，綸舍妻子，負母逃。夜寒，噓爐火。遇母誕，肩酒饌爲壽。人謂：「方避賊，何必爾？」曰：「不爾不安。」

陳仲飾 務本力穡，出貸貧族，貧里佃逋租，必加濟焉。盜數人，竊其廩百石，事露，願還，仲飾曰：

「貧，不爾罪。但不可再行取敗耳。」盜感泣去。

陳廉 孝友，與人處，未嘗少失言色。

陳祥 年八十，知詩書，莊嚴有法，雖寒暑，衣冠儼然。

顏公武 以不爭勸俗，以循禮教家，有儒者風致。

林佐 事嫡母，若自出。事嫡兄，如同產。二婦亦相睦好，一錢不私。

林宸 三歲，父母俱喪，伯父爲之草率異穴。及長，改葬，不知母骨與否，日夜悲哭。一老云：「血滴之，滲入者，親骨也。」宸嚙指血滴骨，人之如蜂蠅，乃奉合父葬，築廬墓側。僉事舒春芳親至其廬而禮之。

林崇仁 事祖父以孝稱。

龔仰 輸財助公賑施。親舊解忿息爭，里閭雍睦。自傷早孤，思慕不替。令高愈旌之。

何子曰：匹夫修之家，而著於世，其必有合君子之道，出乎天稟者耶！人之秉彝好是懿德，性無有不善也。予雖得若人也，或其附立言之士，及借賢子孫乃見。至其湮滅深山窮谷之中，姓名翳然，可勝道哉？可勝道哉？

贊曰：編戶閭閻，刺草笠簪。我躬不閱，能計幾何。鞠錄疾力，忠信靡他。以美七尺，若切若磋。掌竅可粟，聖閭可綱。我志其人，執柯伐柯。

〔校記〕

- 〔一〕〔寧化縣 上杭縣 武平縣 清流縣 連城縣 歸化縣〕十八字，各本原脫，據本書體例補。
- 〔二〕〔長汀縣〕三字，各本原脫，據本書體例補。
- 〔三〕〔寧化縣〕上，各本原衍，汀州府〕三字，據本書體例刪。
- 〔四〕〔上杭縣〕上，各本原衍，汀州府〕三字，據本書體例刪。
- 〔五〕〔武平縣〕上，各本原衍，汀州府〕三字，據本書體例刪。
- 〔六〕〔清流縣〕上，各本原衍，汀州府〕三字，據本書體例刪。
- 〔七〕〔連城縣〕上，各本原衍，汀州府〕三字，據本書體例刪。
- 〔八〕〔謝纓〕，各本原脫，據本傳補。
- 〔九〕〔兄早逝〕，各本原作「早兄逝」，據文義改。
- 〔一〇〕〔歸化縣〕上，各本原衍，汀州府〕三字，據本書體例刪。
- 〔一一〕〔仙游縣 興化故縣〕七字，各本原脫，據本書體例補。
- 〔一二〕〔莆田縣〕三字，各本原脫，據本書體例補。
- 〔一三〕〔鄉士大夫〕，各本原作「鄉大夫士」，據文義改。
- 〔一四〕〔仙游縣〕上，各本原衍，興化府〕三字，據本書體例刪。
- 〔一五〕〔興化故縣〕上，各本原衍，興化府〕三字，據本書體例刪。
- 〔一六〕〔光澤縣 泰寧縣 建寧縣〕九字，各本原脫，據本書體例補。

〔一七〕「邵武縣」三字，各本原脫，據本書體例補。

〔一八〕「吳桓」，本傳作「黃桓」。

〔一九〕「余廷梓」，本傳作「余廷模」。

〔二〇〕「蕭瞻」，本傳作「蕭瞻」。

〔二一〕「光澤縣」上，各本原衍「邵武府」三字，據本書體例刪。

〔二二〕「梅清」，各本原脫，據本傳補。

〔二三〕「泰寧縣」上，各本原衍「邵武府」三字，據本書體例刪。

〔二四〕「李文憲」，各本原脫，據本傳補。

〔二五〕「建寧縣」上，各本原衍「邵武府」三字，據本書體例刪。

〔二六〕「漳浦縣 龍巖縣 長泰縣 平和縣 詔安縣 海澄縣 鎮海衛」二十一字，各本原脫，據本書體例補。

〔二七〕「龍溪縣」三字，各本原脫，據本書體例補。

〔二八〕「林元佐」，本傳作「林原佐」。

〔二九〕「挑」，各本原作「跳」，據文義改。

〔三〇〕「漳浦縣」上，各本原衍「漳州府」三字，據本書體例刪。

〔三一〕「龍巖縣」上，各本原衍「漳州府」三字，據本書體例刪。

〔三二〕「長泰縣」上，各本原衍「漳州府」三字，據本書體例刪。

〔三三〕「平和縣」上，各本原衍「漳州府」三字，據本書體例刪。

〔三四〕「詔安縣」上，各本原衍「漳州府」三字，據本書體例刪。

〔三五〕「海澄縣」上，各本原衍「漳州府」三字，據本書體例刪。

〔三六〕「鎮海衛」上，各本原衍「漳州府」三字，據本書體例刪。

〔三七〕「福安縣 寧德縣」六字，各本原脫，據本書體例補。

〔三八〕「俞斌」，本傳作「俞穉」。

〔三九〕「福安縣」上，各本原衍「福寧州」三字，據本書體例刪。

〔四〇〕「寧德縣」上，各本原衍「福寧州」三字，據本書體例刪。

閩書卷之一百三十三

英舊志 僑寓〔一〕

福州府 閩縣 古田縣〔二〕

閩縣〔三〕

南唐

崔道融 張睦

崔道融 荊州人。以徵聘爲永嘉令，避地閩中，依王審知，竟卒閩中。道融與黃滔相善，其卒也，滔祭之文，其辭曰：「識通龜策，耀握蛇珠。數百篇有唐之詩，數千字中興之書，〈國風〉、〈騷〉、〈雅〉。五佐謀訏，袁安之涕泣泫然，劉氏之宗祧莫扶。」

張睦 固始人，從王氏入閩。及審知封瑯琊王，授睦三品官，領榷貨務。佐審知甚忠，能於搶攘之際，雍容下士，招求蠻夷商賈，斂不加暴，用日以饒。後睦卒，薛文傑代之，察民間陰事，致富人以罪，籍沒其貨。閩人益思睦，像祀之。睦長子居仁，孝友謙抑，仕閩爲殿中侍御史，甚有風裁。

宋

鄭居津

鄭居津 字知要，河南人。高宗南渡，隨徙人閩，仕終浙東路提舉。秉性鯁直，遇時政有不便，輒抗疏論之。歸老卒家。

古田縣(四)

皇朝

陳敏政

陳敏政 其先浙之錢塘人，後遷吳興。父胤，爲古田教諭，卒官，因家焉。敏政遂就閩試，應宣德丙午鄉薦。丁未，舉進士，授潛江令。胤卒，敏政奉父櫬歸葬錢塘。服闋，以本非閩籍，改調閩令。時有中貴人司閩市舶，惡少避役者，多竄籍其中，敏政以正詞白而驅之。又有中貴人來求方物者，聚城中，旁午敏政以智應變，中貴人不敢爲暴。沙、尤寇亂，流民多避人閩，閩城洶洶，敏政曲爲撫納，民賴全活。歷南康知府，致仕。卒，葬古田。次子良器，復應浙江鄉試，舉成化辛丑進士，歷官福建布政使。正統十一年，言四事：「一，鹽糧出於戶口，戶口有多寡，則鹽糧有增減，固無一定之額也。今各處鹽糧之徵，悉使從舊額，如本縣舊額戶口，比之新冊，多糧九百一十餘石，逐年分派里甲，陪輸於民，^(五)甚有所損。乞勅戶部，今後鹽糧，止依新冊徵收。一，輪班諸匠，正班雖止三月，然路程寫遠者，往還動經三四月，則是每應一班，須六七月方得寧家。其三年一班者，常得二年休息，二年一班者，亦得一年休息，惟一年一班者，奔走

道路，盤費罄竭。乞令改作二年或三年一班，如有修造，將二年一班者止工四個月，一年一班者止工六個月，庶各匠皆得休息。一，《大明律》：「娶同母異父姊妹者，以奸論，并離異。」近見世人有以後妻所携前夫女爲子婦者，有以後妻所携前夫男爲女婿者，不惟兄妹男女之別不明，亦且父母舅姑之名不正。乞今後若此，依「娶同母異父姊妹律」，減等科斷，庶有以別男女，厚風俗。一，禮制榜文：「庶民房舍不得過三間五架。」今福州街市，民居有七架、九架，其架或過於五，而一間、二間，其間不止於三，隣家健訟指爲口實，官府丈量，俱論遺式，紛紜拆改，不得安居。乞今後房舍架多而間少者不罪。庶刁頑息告訐之風，良善遂安居之樂。」事下禮部會議，多從之。

泉州府 晉江縣

宋

李邴字漢老，濟州鉅野人。 王柎

李邴 字漢老，濟州鉅野人。崇寧五年進士，爲兵部侍郎時，以一言定苗劉之變。累官參知政事，後除資政殿學士，提舉洞霄宮。寓居泉州，幾二十年，因家焉。邴多游佳山水，讀書作文，雖病不廢。延納後進，教誘無倦。稱人之善，覆護所短。若親舊行己未至，則質問再三，使歸之正。奉養簡薄，賑恤宗族，治家嚴而恕。每愛徐孺子、申屠子龍、陶淵明之爲人。晚棄世故，深造以道。累贈太師，謚文敏，後改謚文肅。有《草堂前後集》百卷，號雲龕先生。真文忠稱其文爲中興第一。其事蹟載《宋史》。子績、維、紀、綸。孫訥。

續 字伯玉。伴親，不忍去左右。任福建漕幕，兩易主管睦院，以便親。丁內外艱，服除，連乞宗院及奉祠館，買園結廬，自號萬如居士。常誦其先訓曰：「與其有求於世，曷若無欲於己？與其爲人所賤，不若以賤自安。」知通判福州事。後力請祠歸，二年而卒。有文集十卷、《梅花百詠》一編。

綸 字世美。以父任仕官。提舉廣東常平日，適其兄維出守恩平，酌於江濱，清節自勵，綸臨江矢言曰：「倘負吾民，有如此水！」遂投盃於江。時江流洶洶，盃停不沒者久之，觀者驚歎，民歌之曰：「石門之水清且停，晉吏一插千古榮。爭如李公投盃盟，江流洶湧盃停停。」至今刻石與吳隱之《酌貪泉詩》對焉。

訖 字誠之。少傳家學，有聲。歷官知黃州，歲饑，以緡錢傭饑民開河澳，賈行賴之。改知袁州，蓄米二萬石以備凶險。累遷大理卿，修斷獄例，以麗死而獲生者，示好生之仁；以生比而論死者，存止殺之義，遂著爲令。權戶部侍郎，乞正鄧友龍、蘇師旦罪以示天下。除集英殿修撰、知靜江府，廣右多宦歿家流落者，積錢置局，周其歸。改知建寧，斲道建橋，民免險涉灘之虞，惡道之困。號曜庵。有《文稿談叢》。朱文公與相友善，爲銘其墓。子亢宗，修謹有家法。

王柁 字嘉叟，比獄人。父辟章，官著作郎，娶丞相趙挺之孫女，建炎南渡，從諸趙卜居於泉。柁，少負才，雖以蔭補官，諸公競推挽。繇勅局刪定官登對，改樞密院編修官，歷刑部侍郎。在官抗疏，言論切直，後乞祠歸泉南，寓僧寺，未嘗一問貲產。其詩有「投老歸來乏一錢」之句。

元

王彙

王彙 字並君，邵陽人。曾祖元，爲元翰林學士，卒，贈潞公。彙登至正庚辰進士，歷貴州行省參政。順帝時，言天下群盜蜂起，直諫內廷之非。權臣河沙不花譖以忤旨，取譴人泉。與學士稍講經義，朝野交薦，固辭不往。人明，遂家於泉中。

建寧府 建安縣 建陽縣 崇安縣(七)

建安縣(八)

宋

豐稷 林公武 華岳

豐稷 字相之，鄞人。哲宗初，累官吏部侍郎，出知河南府。入對，與蔡京遇，京越班揖曰：「天子自外服召公中執法，今日必有高誼。」稷正色答曰：「行自知之。」是日，論京奸狀。時宦官漸盛，稷懷《唐書·仇士良傳》於帝前，讀數行，帝曰：「已諭。」稷若爲不聞者，讀畢乃止。曾布得助，嬖暱，將拜相，稷約其僚共論之。俄轉工部尚書兼侍讀。布遂相，稷謝表有「佞臣」語，帝問爲誰？對曰：「曾布也。陛下斥之外郡，則天下事定矣。」改禮部。哲宗升祔，議功臣配享，稷以爲當用司馬光、呂公著。以連忤貴近，出知越州。京得政，修稷故怨，連貶除名，安置建州。

林公武 不知何許人。建炎初，避地城南，時葉儂作亂，挺身持帛書詣壘招降，賊疑爲間諜，執而且殺之。賊取攻卜神曰：「必立攻乃免。」攻下，倚案而立，賊異釋之。

華岳，池州人。寧宗時爲武學生，上疏極數韓侂冑之惡。侂冑大怒，下岳大理，貶建寧園土中。郡守傅伯成憐之，命獄卒使出繫。伯成去郡，岳遂病死獄中。

元

石抹宜孫

石抹宜孫，字申之，處人。以副都元帥守處。我朝獲其弟及母，以書招宜孫，宜孫不至，遁入建寧。復出，與我師戰，敗走，死於桃坂。高帝嘉其盡忠，遣使諭祭，州民祠祀之。

建陽縣（九）

唐

翁郃

翁郃，字季長，長安人。唐昭宗朝，官至尚書左僕射、河西節度使。朱梁僭竊，恥事二姓，以父祖宦閩，知其地僻靜可避亂，遂携家至建陽考源，後徙居義寧莒口。裔孫泳，見韋布。

宋

呂祖謙 鍾季玉

呂祖謙，其先河南人，後徙金華。與朱元晦、張敬夫友。嘗入閩中從林之奇講學，久之乃歸。時稱東萊先生。

鍾季玉，字之純，樂平人。擢淳祐進士，累江西運判、提點都大坑冶。元兵渡江，歎曰：「偷生陷地，

吾不爲也。」徙寓建陽。兵至，不屈死之。

崇安縣（一〇）

梁陳

顧野王

顧野王 字希馮，吳郡人。隨父烜之官建安，作《建安記》二篇。仕梁，爲臨賀王記室。侯景之亂，野王先以父憂歸，吳城陷，逃之會稽。陳天嘉中，仕至光祿卿，後爲從官奉使。復悅武夷之勝，遂卜居崇安。野王通經史，善丹青，尤精字學，著述甚富。崇人知學，自野王始。

南唐

鍾謨

鍾謨 字仲益。先會稽人，徙居崇安，仕南唐李景，爲翰林學士。周世宗征淮南，景遣謨與文理院學士李德明奉表稱臣，割壽、濠、泗、楚、光、海六州以求罷兵。世宗留謨不報，謨請歸取景表，盡獻江北地。許之，而第遣德明。德明歸，景臣宋齊丘、陳覺皆言德明賣國不忠，景怒殺之。遣齊王景達與齊丘、覺等率兵禦周，已皆敗，乃使覺捧表臣，周世宗始歸謨。蓋被留者三年。謨歸，景以爲禮部侍郎，謨故與德明同使相善，既歸，問其繇齊丘、覺見殺，欲爲報冤，未有會也。覺與景相嚴續有隙，覺使周還，言世宗以景不卽聽命，謀皆繇續，勸景誅續謝罪。景心疑之，既割地稱臣，再遣謨朝謝，謨爲續寬釋，世宗大驚曰：「續爲主謀，是其忠也，朕豈殺忠臣乎？」謨還言覺詐，景遂殺覺。後景長子卒，欲立其次子煜，謨言煜輕

肆，請立煜弟從善。景怒，貶謨國子司業，流饒州，殺之。謨博識工文，最好古碑，奉使中原，每道旁碑碣，必立馬駐觀，嘗見飛跌大碣，半沒水中，忻然解衣，以手捫揣，默記其文。他日水涸，證以所錄，不失一字。二弟訓、譚，俱官南唐。訓，建州司馬。譚，太常寺奉禮郎。

宋

張仲隆 葉味道

張仲隆 營丘人。游閩，客光化禪室，淨几明窗，環列《資治通鑑》百帙，焚香玩誦。晦翁爲之記，其亦辟地隱君子也。

葉味道 初名賀孫，味道其字也，以字行，更字知道，温州人。師事文公武夷山中，學禁開，登嘉定進士。理宗朝遷宗學教授。所著有《四書說》、《大學講義》、《祭法宗廟享郊社外傳》、《經筵口奏》、《故事講義》。

延平府 尤溪縣 順昌縣(一一)

尤溪縣(一二)

唐

范元超 范機

范元超 字仲達，唐節度使希朝之子。咸通八年進士。廣明元年，避黃巢亂，客杭州。後仕至御史

中丞。天復中，復避朱全忠亂，寓劍州。天祐間，因子子高典務尤溪縣，遂卽豐城鄉小田定居焉。

范機 字純之。其先幽州人，後徙毘建，又徙延平。乾道初，任甌寧簿，歷撫、池二州司法參軍，福州懷安丞。機在甌事梁文靖，在懷安事趙忠定，並見器重，稱道弗置。及二公爲相，機以調選，至都城門，亡一迹。終湖廣總領所幹辦公事。機邃《易》學，長歌詩，意度閒雅，介直以和。其仕勇於及物，畜於營已。開禧間，權臣驟開兵端，三邊震擾，而根本日蹙，識者凜焉，有朝夕一憂。大官貴人，沉酣寵利，曾無出一言救時病。機青衫老州縣，獨隱憂憤懣，顧位下官薄，不得薦所聞於朝，則傲風人托物之誼，爲詩以諷，其詞明白痛切，一倡三歎，冀在位者聞而悟，悟而改也。未幾，權臣誅，天子躬親聽政，更大政令數十條，往往與機言合，而機久倦游，無意於仕矣。

順昌縣(一三)

宋

張纂

張纂 固始人。宣和間拜朝散大夫。金人入寇，扈高宗南渡，官於閩，愛順昌山川佳勝，因宅焉。

汀州府 長汀縣

宋

孫升 曾肇 李光 蕭規

孫升 字君孚，高郵人。治平二年進士，簽書泰州判官。哲宗立，爲監察御史。朝廷更法令，逐奸邪，升多所建明。請於耳目之臣，論議之際，置黨附之疑，杜小人之隙。遷殿中侍御史，出知濟州。踰年，提點京西刑獄，復拜侍御史。論翰林承旨鄧溫伯草蔡確制，稱其定策功比漢周勃，欺天負國，豈宜親承密命？不報。以天章閣待制知應天府，改集賢院學士。紹聖初，翟思、張商英擢升過，劾之，削職知房州，又貶果州團練副使，汀州安置。卒年六十二。所著有《談圃》。

曾肇 字子開，建昌人。累官翰林學士。自熙寧以來，大臣更用，士邪正相軋，肇數不合。崇寧元年，出知岳州，繼貶濮州團練副使，安置汀州。四年，歸潤而卒。

李光 字泰發，上虞人。宣和間，爲侍御史，以論蔡攸、朱勔，謫監汀州酒稅。高宗朝，再除御史，遷參知政事。謚莊簡。

蕭規 臨安府學生也。與葉李上書，譏買似道，似道怒，令士人林德夫告李，規用金飾齋扁，黥配汀州。

興化府 莆田縣

宋

趙仲白 徐林

趙仲白 寓居興化軍。趙紫芝爲晚唐詩，名冠四靈，而仲白亞之。其《歲除卽事詩》云：「連夜縫紉辦，今朝杵臼頻。買花簪釋女，送米贈窮鄰。宦薄惟名在，年華與鬢新。桃符詩句好，恐動往來人。」有

《山中集》。

徐林 字釋山，吳人。宣和中第進士。少有操持，王黼與林有連，林獨不附麗。紹興初，上書言事，召對，累遷江南轉運副使，劾秦檜親黨，貶興化軍。於鄭樵極所敬慕，每聞樵語，必手錄之。仕至吏部侍郎，以敷文閣直學士奉祠，除知平江府，乞致仕。以給事中再召，不起，加龍圖閣學士。卒年八十餘。

邵武府 邵武縣

宋

張清 吳昇

張清 祖暹，南軒次子也。恬退不仕，淳熙間來家邵武。次子定，亦力田隱居。至清，雅志尚德，不慕榮進。

吳昇 字養晦。其先姑蘇人。幼能文，酒酣，落筆飄飄，有神仙意。有集行世，號《梅邊小稿》。

皇朝

劉最

劉最 字振廷，崇仁人。正德丁丑進士，知慈利縣。嘉靖初，擢禮科給事中。時朝廷欲論二三大臣迎立功，予以封爵，最首疏其叨天之功，事竟阻遏。復疏中官以齋醮糜內帑，忤旨，左遷廣德州判官。道用夫舟，重爲中官所中，下獄，謫戍邵武。七年赦歸。最爲人曠達，臨終，妻子皆哭，最猶口占二詩，諧笑而逝。

漳州府 龍溪縣 漳浦縣 長泰縣 鎮海衛〔一四〕

龍溪縣〔一五〕

宋

唐介 岳震 向士璧

唐介 字子方，江陵人。父拱，官漳州，介隨侍焉。父卒，官州人合錢以贖，介年尚幼，謝不取。後累官至參知政事。介爲人簡伉寡言，爲御史時，論文彥博罷相，安置萊州別駕，天下稱爲真御史。

岳震 飛之子也。飛被誣，震謫嶺南，後量移於漳，家焉。孝宗嗣位，始召還，官至戶部郎中。子玘，以祖澤補任連城尉，卒。

向士璧 字君玉，常州人。景定中，以權兵部侍郎制置湖南。會元將兀良哈攻圍潭州，士璧極力守禦，聞後隊至，遣將却敵有功，潭州圍遂解。事聞，直拜兵侍兼轉運使。賈似道以其不關白宣撫司，諷臺諫摺拾其罪，劾罷之，送漳州居住。

漳浦縣〔一六〕

唐

長孫冲

長孫冲 無忌子也。官秘書。高宗欲立武昭儀爲后，無忌諫之彊，爲許敬宗所陷，誣以謀反，坐削官爵，封戶，安置黔州。冲等流嶺外，蓋漳土也。後數月，詔覆按反獄，敬宗令大理正袁公瑜等卽黔州暴訊，無忌投繯卒。冲免死，卒其處，竟葬焉。今墓在漳浦縣東壠塘。

長泰縣（一七）

宋

楊令問三世

楊令問 其先蜀人，殿中丞仕休之子。登淳化三年進士第一甲，歷職方員外郎。咸平、景德間，北虜寇邊，選任防禦使，璽書褒寵者三。天聖初，奉旨謫居漳。其弟令緒，官至奉禮郎。令問不願仕，封泰嶽先生。二世孫友諒，惠州推幕，先爲興寧尉，捕賊有功。子日應、日博。應，授宣州文學，尋監潭州南嶽廟，郡守趙伯駿以年德俱高，延爲學正。博，慶元進士，歷知潭州醴陵縣，真西山帥潭，甚重之。

鎮海衛（一八）

皇朝

豐熙 邵經邦 陳九川 李材

豐熙 字原學，鄞人。弘治己未進士及第第二人，歷翰林學士。嘉靖初，以議禮忤旨，謫戍鎮海衛，寓居雲洞講學著書，絕口時事，或有感慨，於吟咏發之。以陳布衣、周翠渠二先生生長鎮海，爲理學名臣，

倡率衛諸生言當道，爲立祠。重龍溪處士蔡烈，與游處。已，過莆，交契方簡肅、鄭山齋、林翠庭諸公，羈居會城十有三載，卒。熙博極群籍，爲文古雅典則，金石之作，尤所擅長。

邵經邦 字仲德，仁和人。正德辛未進士，授刑部主事，歷員外郎。嘉靖八年，因日食建言，謫戍。苦心嚮道，竭力啓蒙。所著有《三弘集》，曰弘道、弘藝、弘簡，而《弘道錄》尤深於理。

陳九川 字惟濬，撫州人。正德甲戌進士，歷官郎中，因事謫戍鎮海，嘗從王文成學，爲高第。與鄒文莊諸公往還，文成稱其進德有一日千里之勢，文莊亦稱其學問日新日富。在戍不久，後卒於家。

李材 字孟誠，豐城人。嘉靖中進士，歷官撫治鄖陽、右僉都御史。坐爲雲南參政時征緬報功不實，下獄論死。久之，得出，謫戍鎮海。揭修身爲本，以括學旨，其言廣大浩博，承其開示，多所悟人。所傳《語錄》甚多，無非反覆修身之意。居數載歸，卒於家。

福寧州 福安縣

皇朝

何競

何競 蕭山人。父舜賓，嘗爲御史，坐事謫戍廣西慶遠衛，被赦爲民。家居，數持吏短長貪暴，其縣中前後令皆憚之。令當塗人鄒魯者，亦嘗爲御史，坐罪貶官，稍遷蕭山。魯爲人亦貪暴狡悍，自爲御史時，誣奏何喬新，爲之罷官。至是，在蕭山大興營繕，科斂倍尅，少不辦，即榜繫之，民多至死，鄉民供役歲滿，盡破家，一縣不勝毒。魯惡舜賓，數抑之。舜賓時時對人發魯陰事，未有以中之也。會舜賓怨家奏舜

賓充軍潛逃，冒冠帶家居者，朝廷下所司治問，魯故隱舜賓被赦文牒曰：「赦歸無驗，當送故戍所求問，乃可知。」所司不可。訓導童顯章者，舜賓門人，知魯陰事，魯陷以他獄，論絞。獄上，憲司疑之，下府覆治。顯章送獄時，道經舜賓家，人與謀。魯問曰：「舜賓輒敢篡取重囚人其家。」發卒圍之，毀門入，并捕舜賓送獄，不更白上可。令卒十餘人解赴舜賓慶遠，令塗中屏奪其衣服，窘辱之，置之死。行至餘干，宿昌國寺，卒夜以濕衣閉壓舜賓口，舜賓呼曰：「枉生七十二歲。」遂死。魯還，欲捕舜賓妻、子，競與其母棄家逃匿。久之，魯陞山西僉事，競乃募死士數十人，艤舟潛歸，伺其出，扼之塗，手袖鐵椎擊魯，傷其兩目，盡拔魯髮，反接曳登舟，更相與溺之，乃與魯連綫赴訟。按察使、鎮巡諸司，驚愕不知所爲，竟不能決。魯逃歸當塗，競走闕下訟冤，并告魯不法事，命刑部郎中、刑科給事中，會浙江巡按御史往按，競、魯俱坐死罪。競母擊登聞鼓訴冤，復遣大理寺正覆按，下三法司詳議，坐魯死，以競爲父報仇，引例編戍福寧。競竟赦還，而閩浙間稱之曰孝子。

何子曰：鴟鶚所至，而人逐之；鳳凰所至，而人喜之。彼能重我山川，吾能尊其名姓矣。

贊曰：人生應迹，泥印鴻爪。語默出處，棲托異抱。或過者化，或儉自保。或挾遨遊，悅此陵隄。或隕顛沛，羈於樞臬。並發德音，遠垂周道。苟非斯人，孰載孰討。用比嚆箭，紛胡之苛。

〔校記〕

〔一〕「英舊志」，各本原作「僑寓志」，據本書體例改。

〔二〕「古田縣」三字，各本原脫，據本書體例補。

〔三〕「閩縣」二字，各本原脫，據本書體例補。

〔四〕「古田縣」上，各本原衍「福州府」三字，據本書體例刪。

〔五〕「陪輸」疑爲「倍輸」之誤。

〔六〕「比獄」，疑有誤。

〔七〕「建陽縣 崇安縣」六字，各本原脫，據本書體例補。

〔八〕「建安縣」三字，各本原脫，據本書體例補。

〔九〕「建陽縣」上，各本原衍「建寧府」三字，據本書體例刪。

〔一〇〕「崇安縣」上，各本原衍「建寧府」三字，據本書體例刪。

〔一一〕「順昌縣」三字，各本原脫，據本書體例補。

〔一二〕「尤溪縣」三字，各本原脫，據本書體例補。

〔一三〕「順昌縣」上，各本原衍「延平府」三字，據本書體例刪。

〔一四〕「漳浦縣 長泰縣 鎮海衛」九字，各本原脫，據本書體例補。

〔一五〕「龍溪縣」三字，各本原脫，據本書體例補。

〔一六〕「漳浦縣」上，各本原衍「漳州府」三字，據本書體例刪。

〔一七〕「長泰縣」上，各本原衍「漳州府」三字，據本書體例刪。

〔一八〕「鎮海衛」上，各本原衍「漳州府」三字，據本書體例刪。

閩書卷之一百三十四

英舊志 裔派(二)

福州府 閩縣 侯官縣 連江縣 福清縣(三)

閩縣(三)

五代

林鼎

林鼎 父無隱，以詩名，寓居明州慈谿之大隱村，鼎從焉。鼎善屬文，能書，仕吳越爲丞相。有集數十卷。

宋

連舜賓

連舜賓 字輔之。祖光裕，見縉紳。至舜賓，居楚德安，少習《毛詩》，悉散家貲周恤鄉閭。教二子庶、庠曰：「此吾貲也。」嘗有盜牛者，官捕之急，其人以牛歸，舜賓厚遺遣之。往雲夢省其弟，得疾卒，邑人爭迎哭，爲之罷市。歐陽修表其墓。子庶、庠，並舉進士。庶，仕職方員外郎。庠，都官郎中。

皇朝

林興祖

林興祖 洪武初，從父宦游，遂家潮之海陽。事母以孝聞，以才行舉官，終廣西參議。

侯官縣〔四〕

宋

王回 弟向，附。〔五〕 陳壇

王回 字深甫。父平，仕御史，見縉紳。平死，葬潁州，即家焉。回敦友孝行，質直平恕，造次稽古。舉嘉祐二年進士，爲衛真簿，有不合，稱病自免。久之，在廷多薦者，治平中，以爲忠武軍節度推官，知南頓縣，命下，卒。王安石誌其墓曰：「吾友深甫，書足以致其言，言足以遂其志，志欲以聖人之道爲己任，蓋非至於命，弗止也。故不以小廉曲謹，以投衆人耳目，而取舍進退去就，必度於仁義。世皆稱其學問、文章、治行，然真知其人不多，而多見謂迂濶，不足趣時合變。嗟乎！是乃所以爲深甫也。今深甫而有以合乎彼，則必無以同乎此矣。」曾鞏序其文曰：「回當六藝殘缺、道術衰微之後，奮然獨起，因先王遺文，以求其意，得之於心，行之於己，作爲文辭，反覆辨達，有所開闡，其卒蓋將歸於簡也。其破去百家傳註，推散缺不全之經，以明聖人之道於千載之後，振斯文於將墜，回學者於既溺，可謂道德之要言，非世之別集而已。」弟向，字子直，與回同舉進士，仕縣主簿。爲文故有英氣，而能力自蟠屈以就法度，自其少時，則已著數萬言，馳騁上下，偉麗可喜。晚自爲不足，而悔其少作，更欲窮探力助，極聖人之旨要，大行

則欲發而見之事業，窮居則欲推而託之文章，將與《詩》、《書》之作者並，而未知其孰後先也。問，字容季。孝弟純篤，自少能爲文章，長於敘事，所爲文，出輒驚人。其爲人自重，不馳騁銜鬻，亦不子子取名。日與其兄講唐、虞、孔子之道，以求其內。言行出處，擇義而動。其磨礱灌養而不止者，方未量其所至，而皆不幸蚤卒。向、問與兄回之文，皆宗歐陽修正氣大家，欲與曾、蘇上下。曾鞏序向之文，誌問之墓，深推服之，而悲其蚤世。

陳壇 字子爽，襄曾孫也，占籍嘉興。端平二年登第，累官右文殿修撰，知平江府，兼淮浙發運使。以戶部右侍郎趙必愿舉最，詔特轉一官，遷大府卿，官終端明殿學士，謚清毅。屢歷節麾，軍士愛戴，而猶樂薦士。其爲司農時，嘗上疏請進恬退，斥容悅，以勵士大夫廉耻、養難進易退之風。

皇朝

許穀

許穀 字仲貽，籍上元縣。嘉靖十四年會試第一，仕太常少卿。穀仕不耦，時林居讀書賦詩，有唐人致之。

連江縣〔六〕

宋

李彌遜 弟彌大、彌正，係文饒，曾孫韶附。

李彌遜 字似之。其先世唐宗室，八世祖永嘉澄，始遷連江。曾祖餘慶，知常州，卒於官，因居蘇

州。彌遜，大觀三年進士。靖康中，直寶文閣，知吉州，遷起居郎。彌遜自政和末，以言獲譴二十餘年，再居是官，直前論事如故。遷中書舍人，條上六事。尋試戶部侍郎，會秦檜再相，力乞外，不允。未幾，趙鼎罷，檜專國，決意主和議。胡銓、范如圭、曾開諸人，相繼竄斥，彌遜請對，言其不可，高宗以爲然。詔廷臣大議，卽日人奏，彌遜力陳不可者三。檜邀彌遜至私第曰：「政府方虛員，苟和好無異議，當以兩地相浼。」答曰：「彌遜受國恩深厚，何敢見利忘義。顧今日之事，國人皆不謂然，獨有一去可報相公。」檜默然。次日再上疏，言愈切直。又言送伴使揣摩迎合，不恤社稷，乞別選忠信之人，協濟國事。檜大怒，彌遜引疾。高宗諭大臣留之。九年春，再上疏乞歸，以徽猷閣直學士知瑞州，改知漳州。復學宮舊址，以興科第，諸生相與崇學祠生祀之。十年，歸隱連江西山。十二年，檜乘金兵旣敗，收諸路兵，復通和好，追仇向者盡言之臣，嗾言者論彌遜與趙鼎、王庶、曾開四人同沮和議，於是彌遜落職。二十三年，卒。朝廷思其忠節，詔復敷文閣待制。弟彌大，工部尚書，彌正，吏部郎中。孫文饒，司理參軍。曾孫韶，韶字元善。與兄寧同登嘉定中進士，初教授南雄，調慶元，遷太學博士。上封事，諫濟王竑獄，且以書曉史彌遠，言甚懇。又救太學生甯式，迂學官，丐外添差，通判泉州。郡守游九功素清嚴，獨異顧韶，改知道州。紹定四年，行都災，詔應詔言事。提舉福建市舶。會星變，又應詔言事，人爲國子監丞，改知泉州，兼市舶。端平中，爲殿中侍御史，論救魏了翁，乞召還，處以台輔。又劾奏宦者陳洵益、女冠吳知古，理宗怒，韶還笏殿陛，乞歸。會祀，明堂雷電，免二相，韶權工部侍郎。正言，遷起居舍人。復疏洵益、知古，不報。辭新命，不許。應詔上封事，幾數千言。理宗曰：「李韶真有愛朕憂國之心。」凡三辭，不獲。以生死祈哀，理宗蹙額曰：「曲爲朕留。」退復累疏乞補外，以集英殿修撰知漳州，號稱廉平。朝廷分遣部使者諸路，稱

提官楮，韶疏極言其弊。嘉熙二年召，明年上疏，乞寢召命。四年，韶趣赴闕，辭。遷戶部侍郎，再辭，不許。五年，改禮部侍郎，辭，不允。令所在州軍護遣至闕，兼侍講，累辭。兼國史編修，實錄檢討，辭。遷吏部侍郎，兼中書舍人。三辭不許。淳祐二年，又及濟王、國本、宮媼，三上疏乞辭，以寶章閣直學士知泉州，辭，乞界祠，不許。既歸，三辭，仍舊職，提舉鴻慶宮。淳祐五年，被召，再辭。韶本州通判勸勉赴闕，遷禮部侍郎，三辭，遷權禮部尚書，復三辭，不許。人見，又及濟王、國本、宮媼三事，乞還，不許。兼侍讀，三辭，不許。又三疏乞歸，擢翰林學士，兼知制誥，兼侍讀，不拜韶，不許。又三辭，不許。終奉祠萬壽，兼侍讀。韶忠實簡粹，所至廉直著聲。理宗有意大用之，自以不合當塗，屢辭召命。其卒也，謚曰忠清。

福清縣(八)

宋

林憲 王蘋 林夢英弟文仲附。(九)

林憲 父旦，見縉紳。旦父概，早卒官。憲從母居吳門，遂爲吳人。少穎悟絕人，伯父希獲古鏡，間有「龍朔」二字，憲從傍曰：「非唐太帝時物乎？」希異，而稱其文名當繼祖，遂以德祖字之。孔常父掌揚州學，憲年十七，試冠諸生。會神宗初罷尊號，坐客或論尊號所起，憲避席對曰：「宇文周宣帝生號天元，唐高宗自稱天足，自是美稱寢多矣。」元豐中，試太學第一，後屢試高等，爲連黜於禮部。旦當任子，憲遜其弟膚。旦不許，憲卽取膚名止之。會韶必以序，乃詣書諫官曰：「憲當以廢疾自棄矣。」膚乃得人仕。登紹定進士，教授常州。大觀三年，廷試常士，選者五十三人，徽宗賜韶，特轉一官，州立進賢坊，榮賜亭修

之。在職六年，用法官薦，不詣政事堂，遷揚州教授，擢河北西路提舉學事，除開封府左司錄。以府尹不之禮，請老，夜自書牘，旦報可，家人乃知。卽日出國門，士大夫奔餞不及。爲人強敏，有志操，錯綜貫串，文敏暢而有抵宿。有《易說》、《書義》、《禮記老子解》、《神宗聖訓》十卷、《大雲翁集》一百卷。

王蘋 字信伯，唐水部粲之後。程門高弟也。自其父徙居平江，資稟粹清，充養純固。平居恂恂儒生，及語當世之務、民俗利病，乃若習吏。紹興間，以守臣孫祐薦，召對，賜進士出身。除秘書正字。言於高宗曰：「人心無垠，萬善皆備，盛德大業，皆繇此出。陛下欲傳堯、舜、禹、湯、文、武之道，擴充是心而已。」高宗善之。官至左朝奉郎，中書舍人。朱震保文、直學士胡安國、徽猷待制尹焞，皆嘗舉蘋自代，因爲秦檜所惡，會其族子誼，爲文詆檜，遂坐法文致，奪官，卒。所著有《論語籍解著作稿》。

林夢英 字叔虎，一字子應，林公選之孫也。自福清徙臨川。夢英與象山年相若，篤信其學，遂師之。登淳熙二年第，調祁陽簿，再調衡州法曹。所至整飭精明，爲部使者及郡守所知。一日改官，五刻俱集，改知武陵縣，寬民戢奸，興學作人。通判靖州，討平洞蠻。知武岡軍，未上，退居城西金石臺，建樓藏書，徜徉其間。累秘書丞、權司封，奉祠，歸。年踰八十，人稱山房先生。弟文仲，與文英同第進士，〔一〇〕歷官成都漕，政事和平，蜀人愛之。

泉州府 晉江縣

宋

王曾 徐定子瑄、璣附。〔一一〕

王曾 字孝先，濬州五世孫也。父克，太平興國間任益都尉，因家焉。曾，真宗咸平中鄉貢，試禮部，廷對皆第一。累遷右正言、知制誥，兼史館修撰。時瑞應沓至，真宗嘗以語曾，曾奏曰：「此誠國家承平所致，然願推而弗居，異日或有災沴，則免輿議。」及真宗受符命，大建玉清昭應宮，臣下莫敢言，曾陳五害以諫。累遷參知政事、吏部侍郎，兼太子賓客。仁宗立，遷禮部尚書，正色獨立，朝廷繫以爲重累。以門下侍郎兼戶部尚書，爲昭文館大學士，監修國史。景祐二年，拜右僕射，兼門下侍郎、平章、集賢殿大學士，封沂國公。久之，以左僕射、資政大學士判鄆州。卒，贈侍中，謚文正。曾，資質端厚，眉目如畫，在朝廷，進止皆有常處。每進見言事，審而中，多所薦拔，人莫知者。自奉甚儉，有故人子孫來京告別，曾留之，具饌食，後合中送數軸簡紙，啓視之，皆他人書簡後裁取者也。皇祐中，仁宗爲篆其碑曰旌賢之碑。大臣賜碑篆，自曾始。仁宗既祔廟，擇將相配享，以曾爲第一。

徐定 字德操。釋褐，調處州教授，娶永嘉鮑氏，因家焉。通判宣州。妖民胡木匠誘聚數千人，縛一巡檢，貫其耳以徇，人心胥恐。漕司俾定攝州事，定馳入境，令自首亡罪，衆咸從令，境遂安。擢守湖州，卒。子瑄、璣。瑄，字純中，爲大理少卿，會濟邸獄興，不受史彌遠囑，謫象州。璣，字致中，工詩，世稱「四靈」，璣其一也。終長泰令。

皇朝

丘濬 梁儲

丘濬 字仲深，瓊山人丘葵之後。弘治中，仕至戶部尚書，兼武英殿大學士，卒，謚文莊。濬博學多文，所撰著有《世史正綱》、《大學衍義補》。〔二二〕其著《正綱》，謂朱子《綱目》以正統爲主，然秦隋之未有

不可遽奪，漢唐之初，有不可遽予者，乃作《正綱》以著世變之升降，明正統之偏全。其《補大學衍義》，謂真氏《衍義》之作，有資治道，而獨缺治平，乃采經傳子史，附以己見，首補誠意、正心之要曰：「審幾微，以發明慎獨之旨。」爲卷百有六十。弘治初，上之朝，孝宗喜甚，賜金幣。其相業具載於《廣志》。

梁儲 字叔厚，順德人，宋梁文靖之裔也。正德中，仕至吏部尚書，加特進、光祿大夫、左柱國。嘉靖初，乞歸。世宗手詔褒諭曰：「張九齡忠藎，崔與之風概，卿可謂兼之。」卒，謚文康。其相業具載於《廣志》。

建寧府 建陽縣 崇安縣 浦城縣（一三）

建陽縣（一四）

宋

楊澈

楊澈 字晏如，楊徽之宗人也。世家建陽，父思進，晉天福中北渡海，因家青州，累佐使幕。澈幼聰警，七歲通《左氏春秋》，思進爲鎮趙從事，會昭慶令缺，使府命澈假其任。河決鄰郡，府督役甚急，澈部徒數千，徑大澤中，使多刈澤中葦爲筏，順流而下。既至，執事者責其後期，俄，葦筏大來，乃更嗟賞，時年方十六。建隆初，舉進士，調補河內主簿，再遷青州司戶參軍，鞫獄無阿畏。太祖知其名，召試禁中，改著作佐郎，出知渠州。江南平，改通判虔州，令就大將曹彬，分兵以行。既入境，偽帥郭再興擁兵自固，不肯受

代。澈單騎趨壘，論以威信，再興唯唯，乃悉料城中壯勇，送京師。復革除土豪黎、羅二姓之依山謀亂者，累祠部郎中。子巒，淳化進士，職方員外郎。

崇安縣（二五）

宋

吳玠弟璘。璘子挺。

吳玠字晉卿。少知兵，善騎射。未冠，出隸涇陽軍，遂爲德順軍人。政和中，夏人犯邊，以功補進義副尉，稍擢隊將。從破臘及擊河北群盜，累功，擢涇原第十將。靖康初，夏人攻懷德軍，玠以百餘騎追擊，斬首百四十級，擢第二副將。建炎、紹興中，以擊敗兀朮太子功，金人來請和，以玠功高，授特進開府儀同三司，遷四川宣撫使，陝西階、成等州皆聽節制，遣內侍奉親札以賜。未幾卒，年四十七，贈少師，謚武安。淳熙中，追封涪王。玠善讀史，凡往事可師者，錄置座右，積久，牆牖皆格言也。用兵本孫、吳，務遠略，不求小近利。御下嚴而有恩，虛心詢受，雖卒伍至下者，得以情達。選用將佐，視勞能爲高下先後，不以親故權貴撓之。玠死，胡世將問玠所以制勝者於璘，璘曰：「璘從先兄，有事西夏，每戰不過一進卻之，頃，勝負輒分。至金人，則更進迭退，忍耐堅久，令酷而下必死，每戰非累日不決。勝不遽追，敗不至亂，蓋自昔用兵所未嘗見。先兄與之角逐滋久，乃得其情，於是選據形便，出銳卒，更迭撓之，與爲無窮。至決機於兩陣之間，則璘有不能言者。」弟璘。子五人：拱、扶、搆、擴、摠。拱亦握兵柄。

璘字唐卿。少好騎射，從兄玠攻戰，積功至閣門宣贊舍人。玠與金人戰箭箬關、戰和尚原、戰仙人

關，皆璘出死力其間。累除秦鳳路經略安撫使、知秦州。玠卒，授璘神龍衛四廂都指揮使，同節制陝西諸路軍馬，鎮西軍節度使，升侍衛步軍都虞侯。孝宗初，兼陝西河東路宣撫招討使。隆興二年，宋人主和議，與金人罷戰。乾道元年，詣闕，遣中使勞問，召對便殿，許朝德壽宮，兩宮存勞之使相踵。又命皇子人謁，拜太傅，封新安郡王。越數日，詔仍領宣撫使，改判興元府，及還鎮，兩宮宴餞甚寵。璘人辭德壽宮，泣下，高宗亦爲悵然，解所佩刀賜之。三年，卒，年六十六。贈太師，追封信王。璘剛勇，喜大節，略苛細。讀書曉大義，代兄爲將，守蜀餘二十年，隱然爲方面之重。病篤時，呼幕客爲草遺書曰：「願陛下毋棄四川，毋輕出兵。」不及家事。璘拒金用疊陣法，每戰以長鎗居前，坐不得起，次最強弓，次強弩，跪膝以俟，次神臂弓。約賊相搏至百步內，則神臂先發，七十步，強弓併發，次陣如之。凡陣，以拒馬爲限，鐵鉤相連，俟其傷，則更代之。遇更代，則以鼓爲節，騎兩翼以蔽於前，陣成而騎退，謂之疊陣。諸將始猶竊議，璘曰：「此古束住令也。軍法有之，諸君不識爾！」戰士心定，則能持滿，敵雖銳，不能當也。」遂用以勝金人。

挺 字仲烈。以門功補官。紹興中，拜熙河經略安撫使。瓦亭之戰，金人精兵數萬，獨身冒矢石，追奪其將。授郢州防禦使。孝宗朝，拜武昌軍承宣使，尋加龍神衛四廂都指揮使、熙河路經略安撫使、中軍統制，時年二十五。而其後宋人主議和，罷軍矣。淳熙中，累知興州、利州西路安撫使，特加檢校少保。光宗卽位，御筆獎勞。紹熙四年，以疾乞致仕，詔加太尉。卒年五十六，贈少師，開府儀同三司。挺少起勳閥，弗居其貴，禮賢下士，雖遇小官賤吏，不敢怠忽。拊循將士，人人有恩，璘故部曲拜於庭下，輒降答之，卽失律，誅治無少貸。孝、光二宗，以挺世將子，有才略，皆厚遇之。按《宋史》載吳玠，璘十人，而《崇安志》謂

玠、璘生五大里，祀在鄉賢，必其父祖徙居於龍干。

浦城縣（一六）

元

楊載

楊載 字仲弘。其先本縣人，徙居杭州。少孤，博極群書，年四十，薦爲國史院編修官。延祐中，舉進士，歷寧國路推官。其文以氣爲主，每大衆廣席，占紙命辭，瞭睨橫放，盡意而止。而詩尤有法，與虞集、范梈、揭傒斯齊名，時號虞楊范揭。

汀州府 長汀縣 寧化縣（一七）

長汀縣（一八）

皇朝

曾蘭

曾蘭 博學藝文，爲時所稱。宣德四年，中廣東解元，授瓊州文昌訓導，善訓迪，教有成績。

寧化縣

皇朝

伍伯遜兄弟

伍伯遜 徙居南昌，與弟伯暘、伯達並力學，務信義。同居數百口，雍睦無間。胡祭酒儼數嘉歎之。子恒，受業吳聘君之門。景泰中，應賢良聘，以親老辭，不赴。

興化府 莆田縣

宋

余靖 方惟深 陳居仁父子 黃士毅

余靖 字安道。世莆人，五代之際，逃亂於韶州。至靖，舉天聖二年進士，累進賢校理。范仲淹以言事觸宰相，得罪諫官，御史不敢言。疏論之，追奪，貶監筠州酒稅，徙秦州。已，仁宗感悟，亟復用仲淹，因之被斥者皆召還，惟靖以便親，乞知英州，累官經制廣東西賊盜，平儂智高亂。靖經制五管，前後十年，凡治六州，所至有遺愛。英宗卽位，拜工部尚書，代還，卒，贈刑部尚書，謚襄靖。

方惟深 字子通。父龜年，景祐元年進士，與蘇軾齊名。仕至屯田郎中。有《經史解題》四十五卷，《群書新語》十卷。卒，葬姑蘇，惟深因居吳。舉進士不第，卽棄去，樂吳中山水，吟咏自娛。其《吟古栢詩》云：「四邊喬木盡兒孫，曾見吳宮幾度春。若使當時成大厦，也應隨例作埃塵。」又《舟下建溪詩》云：「湍流怪石礙通津，一操舟若有神。自是世間無妙手，古來何事不繇人。」又如：「客帆收浦月黃昏，野店無燈欲閉門。半出岸沙楓欲死，繫舟猶有去年痕。」王荊公甚喜之。自是隱然有聲東南，與樂園朱長文

並隱吳中。長文，晚起爲太學博士，獨惟深高卧不應。錢正老云：「近時士大夫中，若使蹈鼎鑊，臨白刃而不可回者，除是方子通。」時流但以詩篇見稱，其末事耳。」後以薦授興化軍助教，就賜勅牒，袍笏於家。

陳居仁 字安行，莆田太府少卿膏之子。娶明州汪氏女，因家焉。居仁，紹興二十一年進士，秦檜與膏有故，有勸以一見，可得美官，居仁終不自通。虞允文建恢復之策，欲引爲用，與論兵，謝不能，退而貽書，謂有定力者，乃可立事。嘗轉對，言立國須立定規模，帝曰：「朕於規模未嘗不立。」居仁奏：「陛下銳意恢復，繼乃通和，和、戰、守三者，迄今未定，孰爲規模耶？」允文聞之曰：「陳君此言，正前日定力之論，某今益知其當也。」累遷禮部郎中，請外，知徽州。人對，孝宗稱其治行天下第一。集英殿修撰，「二九」知鄂州，進煥章閣待制，移建寧府。歲饑，出儲粟平其價，弛逋負以巨萬計，代輸畸零繭稅。有告糴殺人，會赦免，居仁曰：「此亂民也。」遂誅之。觀察推官柳某貧，死不克歸，二子行乞於道，憐，予衣食，擇師教之。鎮江大旱，又移守鎮江，區畫有方，所存活數萬計。加寶文閣待制，知福州。再進華文閣直學士，提舉太平興國宮。卒，贈金紫光祿大夫。有制稿、詩文行世。子卓，端平初，簽書樞密院事，以資政殿學士奉祠，卒。平生不管產業，葬事不能具，丞相吳潛移書制置使助之。謚清敏。

黃士毅 字子洪。徙居吳，既長，徒步還閩，求朱文公而師之。文公授以《大學章句》，終其身，從事於斯。知府王遂稱爲考亭名士，閩郡黃邃又謂之有道君子。所著有《類註禮》，撰次《文公書說》七卷，《文集》百五十卷。又因《語錄》成言，分門序次，爲《語類》百三十八卷。

元

劉漢 方全翁

劉洩 字聲之，占籍杭州。與劉汶、師魯並以德行、文章稱一時。

方全翁 字希玄，鄞人軫之裔。敦行博學，志不仕元。方國珍據有明州，致書以宗人稱，欲強起之。全翁歷叙世次，不敢附籍，且謂大明真天子出，懇辭勸之奉圖歸順。國珍不從。遂與絕，號遯菴，以明志。

何子曰：唯楚有才，晉實用之；維閩有才，出而累世。天下君，四海一國，溯所自出，不亦大乎？贊曰：古人族望，必著本始，維桑與梓，乃恭敬止。儀操南音，念舊是美。丘也殷人，則我孔子。我傳諸公，意亦如此。

〔校記〕

〔一〕「英傳志府派」，各本原作「裔派志」，據本書體例改。

〔二〕「侯官縣」連江縣 福清縣「九字，各本原脫，據本書體例補。

〔三〕「閩縣」二字，各本原脫，據本書體例補。

〔四〕「侯官縣」上，各本原衍「福州府」三字，據本書體例刪。

〔五〕〔七〕〔九〕〔一〕「附」字，各本原脫，據本書體例補。

〔六〕「連江縣」上，各本原衍「福州府」三字，據本書體例刪。

〔八〕「福清縣」上，各本原衍「福州府」三字，據本書體例補。

〔一〇〕「文英」疑爲「夢英」之誤。

〔一二〕「《大學衍義補》」，各本原作「《大學書衍義補》」，據文義及《明史》本傳改。

〔一三〕「崇安縣」浦城縣「六字，各本原脫，據本書體例補。

〔一四〕「建陽縣」三字，各本原脫，據本書體例補。

〔一五〕「崇安縣」上，各本原衍「建寧府」三字，據本書體例刪。

〔一六〕「浦城縣」上，各本原衍「建寧府」三字，據本書體例刪。

〔一七〕「寧化縣」三字，各本原脫，據本書體例補。

〔一八〕「長汀縣」三字，各本原脫，據本書體例補。

〔一九〕「集英殿修撰」上，當有脫文。

閩書卷之一百三十五

方伎志

福州府 閩縣 侯官縣 懷安故縣 長樂縣 福清縣(二)

閩縣(二)

唐

黃徹

黃徹 閩小吏也。常衮爲觀察時，有僧某者，善占色，言事若神。衮惜其老，命弟子就其術，僧云：「此事天性，非可造次爲傳。某嘗於君左右見一人可教。」遍招，得徹。衮命就學老僧，遂於暗室中致五色綵於架，令自取之，日但熟看之。旬日後，依稀認其白者。後半歲，看五色，卽洞然矣。命之曰：「以若閩中之視五綵，迴之白晝占，人可神其術。」因傳方訣，且言後代當無加也。李吉甫稱徹神占可亞袁許焉。

宋

何希彭 賴先知 黃撥沙

何希彭 蔡襄知州日，作《太平聖惠方後序》，親書於碑，其略曰：「太平皇帝，一平宇內。集古今名

方與藥石、診視之法，勅國醫詮次，類分百卷，號《太平聖惠方》，詔頒州郡承之，大率嚴管籥，謹曝晾而已，吏民莫得與利焉。閩俗左醫右巫，疾家依巫索祟，而過醫門，卜纔一二，故醫之傳益少。余治州之明年，議錄舊所賜書，以示於衆。郡人何希彭者，通方伎之學，凡聖惠方，有異域環怪難致之物，若食金石草木，得不死之篇，一皆置之，酌其便於民用者，得方六千九十六。希彭謹愿自守，爲鄉閭所信。因取其本，謄載於板，列牙門之左右，所以尊聖主無窮之澤，又曉人以巫祝之謬，使之歸經常之道，亦刺史之一職也。」

賴先知 長水城之學。漂泊嗜酒。客臨川羅豫章所，羅敬愛之，言喪妻，命卜地，得一處耳。穴前小澗水，三道平流，唯第三道不過身而徑入田。賴笑曰：「此三級狀元城也，恨第三不長，若子孫他年崇試，正可啓於榜眼耳。」羅子邦俊，挾十三歲兒在傍立，拊其頂而顧賴曰：「足矣，足矣。若得狀元身邊過也得。」所謂兒者，春伯樞密也，年二十有六，廷唱爲第一人。賴竟沒於羅氏水城。文字雖存，莫有得其訣者。

黃撥沙 善相塚，畫地爲圖，卽知休咎，因號「撥沙」。婺人有世患左目者，問之，曰：「祖墳木根傷葬者左目。」發塚，果然。出之卽愈。

皇朝

鄭昭甫 鍾誌 陳旭 張子絃 鄭彥初 周文靖 朱孟淵 林質齋 邵文恩 沈政 馬景約
趙迪 高鳳 任綱

鄭昭甫 善山水，兼寫真。有節操，駙馬都尉王恭逼之寫像，投筆徑去，因大哭。恭無如之何。

鍾誌 字汝持。精地理，善楷法。剛中少容，片語不合，輒拂袖去。或時面折人，貌發亦不少恕，然動止依禮法。與人交，不以勢利。衣食或不克，略不介意。自號樂壽山人。

陳旭 字叔旦。善楷書。

張子絃 工畫梅。林膳部鴻有《題子絃畫梅歌》。

鄭彥初 永樂初，工畫墨梅。

周文靖 善山水，蒼潤精密，筆力古健，醞釀墨色，各臻其妙。人物、草、竹、石、翎毛、樓閣、牛馬之類，咸有高致。宣德間，以陰陽訓術徵直仁智殿，御試枯木寒鴉第一。歷官鴻臚序班。子鼎，亦善畫，徵襲錦衣衛鎮撫。

朱孟淵 善寫人物、番馬，効李伯時，獨得其奧。與修撰林誌、舍人陳登、太傅楊榮友善。嘗繪蘭亭記、淵明歸去來圖、西園雅集圖、滾塵騷之類。同時楊文敏、楊立貞、林太史諸公，皆爲題跋。

林質齋 善山水人物，清幽瀟灑。子玘，見縉紳。

邵文思 字仁甫。工行草。選直誥勅房。又工山水，師法非苑，古雅可觀。累官尚寶卿。

沈政 字以政。工花竹翎毛。官至順天府丞，直仁智殿。

馬景約 字自牧。善山水，逼真高彥敬，出人董、米間。談笑揮酒，曲臻其妙。

趙迪 字景哲。工水墨山水，師法二米。

高鳳 掾也。以意遇物，推卜輒中。士人傳鼎求鳳，占試曰：「君第人也。」既，果然。人怪問之，鳳曰：「吾適剖椰子而傳至，其象解員，故占當爲解元。」後閩縣林上元亦舉第一。先數日，鎮守內臣欲豫知其人，書「興」字，命之占。鳳曰：「竊觀尊意，在興化乎？不然也。公所書『興』字，從俗省書也。其人在中，八府俱下，必闔城矣。」時時語人：「鳳小吏耳，卜若可信，當至五品京職。不審何從也？」弘治

中，果蒙召。占驗，恩授工部郎中。

任綱 字必用。精堪輿，所著有《陰陽述而賦》。性耿介，鄉人有居官鉅富者，以厚幣求卜宅兆，綱深拒之，退告人曰：「若得吉壤，豈天道耶？吾術固擇人耳。」

侯官縣

皇朝

林垺 林文卿

林垺 字惟堅。善墨竹，海內貴其尺幅。信陽何景明極推重之，贈之詩有「臨風寫雨奪天巧」之句。

林文卿 工山水，筆氣清勁，濃淡得宜。亦精於寫照花竹、人物之類。

懷安故縣

宋

楊士瀛 費道寧

楊士瀛 字登父。精通醫學。嘗著《活人總括》、《醫學真經》、《直損方論》行於世。
費道寧 大觀中，以丹青召入畫院。善花草，多作交枝。

長樂縣

皇朝

鄭漿 劉祥 林真士 林景時 張士達 林輔 高維端 林銘 高景度 林宏顯 李煊 張德輔 林遵性

鄭漿 字孔濟。工醫學，其診脉，能知三五年後生死，活人甚多。亦能詩。

劉祥 字瑞初，號雪溪。精醫。善畫龍虎。

林真士 工山水。與高棟友善，棟題真士畫云：「楚雲天外數峰青，春水桃花滿洞庭。落日樓臺明鏡裏，欲停瑤琴候湘靈。」

林景時 善畫山水。自號虛白子。專學二米，間効商、高。竹木林泉，有意外趣。

張士達 善畫龍虎、蘆鴈，墨筆尤奇。

林輔 字叔弼。善畫，張士達授以筆法。山水、蘆鴈、龍虎，皆臻其妙。

高維端 號正翁，高棟之族。善畫蒲萄，得陳天民體。

林銘 字良箴，號琴樂子。工山、水、物、竹、石，得宋元遺意。

高景度 工山水。

林宏顯 號洞陽。以畫梅名。効楊補之、王元章。

李煊 號十洋子，善畫龍虎。亦能詩。

張德輔 善畫魚。

林遵性 隱居煥南董山之下。善墨竹。

福清縣

宋

陳天民

陳天民 幼隨父宦山東，游泰山日觀，有道士知歸子善於蒲萄，天民學之，遂得其妙。

皇朝

鄭環 朱宗明 鄭克剛 周文靖

鄭環 父麟，善畫，善醫。環世父業，醫術尤精。

朱宗明 性耿介，善鼓琴。永樂初，徵入京。卒，賜棺衾，給驛歸。貧不能葬，其徒馬鐸率士流爲營塚。

鄭克剛 善畫馬，得韓幹、趙仲穆筆法。宣德間徵入京，賜御畫。

周文靖 善畫，尤長古松。嘗徵人直仁智殿。

泉州府 晉江縣 南安縣(四)

晉江縣(五)

漢

陳寨

陳寨 巫者也。善禁祝術，治病多愈者。有漳州逆旅蘇猛，其子發狂，人莫能療，乃往請陳。陳至，蘇氏子見之，戟手大罵，寨曰：「疾人心矣。」乃立壇堂中，戒人無得竊視。至夜，取蘇氏子劈為兩片，懸堂東壁，其心懸北簷下。方在堂作法，所懸之心，遂為犬食，求之弗得。寨驚懼，乃持刀宛轉於地，出門而去。主人弗知也。食頃，持心而入，內於病者之腹，被髮連呼，其腹遂合。蘇氏子既寤，但連呼：「遞舖，遞舖。」初，南中驛路二十里置一遞舖，驛吏持符牒，以次傳授，欲近前舖，輒連呼，以警之。蘇氏子既呼「遞舖」，家人莫測，乃其日去家數里，有驛吏手持官文書死道傍，蓋寨取驛吏心，而活蘇氏子。

皇朝

余廷端 蘇朝傳 史朝定 李元達 陳從堯

余廷端 世業醫。至廷端，而得張長沙五運六氣之妙，用藥鮮不効者。洪武中，薦授郡醫學正科。

閩郡鄭定，廬陵胡廣為賦《橘井秋香》詩。

蘇朝傳 善鑄銅，凡彝鼎博山之屬，一經鑄作，無不精美。尤善為仙人之像、海鶴之形，至有高丈餘者。人莫知其藝之所師也。

史朝定 善畫美人寫真。有割股之孝，敬先字孤之美。

李元達 善寫竹。

陳從堯 精弈。同時有蔡學海者，亦以弈名。

南安縣

皇朝

蘇璿 傅金山

蘇璿 字孔璣。精脉訣，能診知生死休咎。病者求藥，無不樂與，而不受其直。
傅金山 善畫菜。

建寧府 建安縣 甌寧縣 建陽縣 崇安縣 浦城縣^(六)

建安縣^(七)

宋

張霖

張霖 字材叔。以善寫晦翁名公卿間，而氣象猶儒者。郁英爲文送之，稱其老而益窮，南北逐食無定歲。

皇朝

許宏 雷伯宗孫時中。姚子清 王彥真 陳子和 雷鯉

許宏 字宗道。幼讀書，精醫，能起奇証異疾。又善詩文，寫山水。年八十餘。所著醫方有《通玄錄》。詩有《南窗草錄》。

雷伯宗 名勳，以字行。讀書明醫，尤精小兒科。洪武間，授醫學正科。所著有《千金寶鑑》行世。子野僧，亦明醫，爲鄭府良醫。裔孫時中。

時中 精《易》學及岐黃諸書。醫有奇中。貧者暮夜叩之，必攝衣往。與之錢，則辭。

姚子清 善山水。

王彥真 善墨竹。道遇新寧林彥時，寫《歲寒煙雨圖》爲別，王典籍恭爲之題詩。

陳子和 專工人物，筆意散逸，自號洒仙。山巖樹木，奇怪蒼潤。評者謂在吳偉、郭誦間。

雷鯉 字惟化。學沈周，寫山水、花草，老筆蒼然。又善詩篇。工篆隸。

甌寧縣

元

劉畝

劉畝 字扣中，輪九世孫，自號和齋。業醫而精，性樂施與，人感其惠。

皇朝

鄭福 趙希朴 林一清 黃錦 葉汝楠 潘承秀

鄭福 字魯濟。業醫，善察脉，逆知人死生於數載之前。遇奇痘，他醫不能治者，福投數劑輒愈。嘗

手集經驗良方十卷。仲子遜，世其業。季子員，領鄉薦，任連山知縣。

趙希朴 字宋卿。家貧，尚氣節。工繪畫，善鼓琴，長於詩。徐中行子與來閩，其加敬禮。

林一清 字源潔。善繪事，筆法蒼古。年八十餘，信手揮染，無不妙絕。

黃錦 字子綱。祖世德，太醫院判，授秘術，錦學而精之，治傷寒、痘疹尤有奇効。子洛，孝友慷慨，活人衛生。

葉汝楠 字子林。精醫，尤善治痘疹。

潘承秀 字君實。孝友，精醫。

建陽縣

宋

張、黃合傳。 余煥

張彥悅、黃某 《朱文公文集》云：「鄉人新作聚星亭，欲畫荀、陳遺事於屏間，而窮鄉僻陋，無從得本。張、黃二生能考究車服制度，想像人物風采，觀者皆歎其工。」

余煥 工大小篆書，筆勢奇偉。真文忠公嘗使書聖賢言揭坐側，稱其如正人端士，服古衣冠，巍然拱手，使人望之起肅敬。雖嚴師善友，曾不過是。

皇朝

熊宗立 程伯昌

熊宗立 通陰陽醫卜之術。註解《天玄》、《雪心》二賦、《金精熬極難經》、《脉絕》等書。撰《藥性賦補遺》及集婦人良方行於世。

程伯昌 善醫。又授雷霆秘訣，祈禱驅除，大驗。尤妙催生法。好象棋，對局終不釋。有急叩者，令持一棋子，胎卽下。一日，於郡城遇一乞者，貌甚惡，伯昌教市童呼之「千年不死鬼」，乞者指伯昌罵曰：「饒舌哉！雷部判官精。」蓋其降世云。

崇安縣

宋

劉伯桓

劉伯桓 一名元伯，輅六世孫。嘗遇異人，授以岐黃之術，自是病者求治，無不全活。

元

空空子

空空子 江姓，名無外，少徵五代孫也。幼誦群書，輕視榮利。凡梓匠、丹青、陶冶、塑刻之技，不借師資，特發妙巧，雖專門莫及。

皇朝

范川莊

范川莊 國初人。善畫，有欲薦爲金門畫士者，川莊自謀曰：「廡廊畫工，必極天下之選，豈易應

邪？」徑游金陵，訪金門畫客有程姓者，求見，請曰：「川莊貧無以活，願傭門下供薪水，暇則洗硯研墨，執事左右。」許之。川莊觀程畫出已下。一日味爽往汲，奔歸。程急驚愕不能聲，詢之，曰：「適見群怪，莫能形容，請貌之紙。」程見其備寫幽怪屈伸、牽挽、奔跳之狀，大驚曰：「子吾師也。」即下拜。歲暮，無以供臘，其鄰嘲之，范曰：「吾有一鵝，勞子市之。」鄰曰：「諾。」乃取紙畫鵝，張翼威頸，作將鬪狀。鄰曰：「除夕矣，孰用此也。」川莊曰：「汝候富家有鵝歸者，汝黏之壁，人必取之。」如其言，見童子驅鵝者，隨之，黏諸壁，鵝見畫鵝，即雄聲展翼，作鬪狀。既近畫，鵝遂戢翼垂頭而走，主人出金求之。

浦城縣

宋

章友直

章友直，卓犖不羈。通相術，知音樂，書畫、弈棋，皆有名。族人得象爲相，欲奏以官，不起。皇祐中，太學篆石經，有言友直善篆，召之。石經成，除試將作監簿，不就。

皇朝

詹林寧

詹林寧，字必泰。工山水、花鳥。天順間，召入京師。成化元年，授工部文思院副使，直仁智殿。

延平府 將樂縣 沙縣 永安縣（八）

將樂縣〔九〕

元

伍元如 鄭鏗

伍元如 專工山水，愛作煙雲出沒，竹木變怪之勢。

鄭鏗 字子聲。性嗜學，攻詩，尤長於畫。鏗死，黃鎮成有詩懷之云：「能畫能詩鄭廣文，丹成揮手謝塵氛。不知笙鶴游何處，留得瀟湘一片雲。」

皇朝

鄭文英 王人佐

鄭文英 工人、馬，學趙承旨，得其大略。

王人佐 善畫梅花，枝葉點綴，多師王冕。

沙縣

皇朝

羅汝文 張宗華 邊孟屯 邊景昭 鄧文明、羅續、劉琦、盧朝陽合傳。 張一奇 俞必興

羅汝文 善山水。

張宗華 字穎之。清介絕俗。善詞章、草書，人稱如秋雲捲雨，蒼石纏藤。元季，晦匿不出。洪武

初，詔徵，以老辭。子允厚，知霍州，允繼，獲嘉教諭。

邊孟屯 善山水人物。

邊景昭 字公進。夷曠洒落，博學能詩。精花果、翎毛。宣德間，召至京師，授武英殿待詔。子楚芳、楚善，並世其業。楚芳，占籍錦衣。至其婿張克信，甥俞存勝，亦能之。

鄧文明、羅續、劉琦、盧朝陽 俱邑人。善翎毛，工巧處，間似景昭。

張一奇 字彥卿。自號散仙。善翎毛、山水，名聞於時。嘉靖間至京師，召畫便殿，稱旨，授錦衣千戶。

俞必興 工翎毛。

永安縣

皇朝

李宗謨

李宗謨 號小樵，又號占楫子。工人物，間寫山水。白描亦精緻秀雅。

汀州府 長汀縣 寧化縣 武平縣 連城縣 歸化縣（○）

長汀縣（二）

宋

李交

李交 善圖猫，世人珍之。

寧化縣

皇朝

楊英

楊英 精畫樓閣。嘉靖間，屢徵直畫院，不往，自傷其目。

武平縣

皇朝

鍾尚端

鍾尚端 善畫，尤工傳神。

連城縣

皇朝

李學仕 童養靜兄弟

李學仕 受業莆中林兆恩，傳修煉功，雲游方外。闡繹養生術，隨在有驗。易名遁跡，莫知其處。

童養靜、養廉 兄弟也。養靜慕玄，養廉善操，俱工於畫。

歸化縣

皇朝

孫萬益

孫萬益 善寫翎毛。子孫世習焉。

興化府 莆田縣 仙游縣〔一三〕

莆田縣〔一三〕

皇朝

周春谷三世。方用晦用晦族子。〔一四〕 劉菽 李在 林時詹

周春谷 號樂真。年十五走江右，遍謁諸名醫者，得其秘術。凡診脉視病，斷其生死，無不驗者。一夕，夢人語之曰：「聞君醫國手，請上玉華樓。」既覺，即戒家人治喪，具示以死之月日。人初以爲狂，及期，果卒，年僅二十八。弟善卿，亦業醫，與兄齊名。善卿子用文，精瘍醫，洪武初以行省檄，爲郡惠民藥局瘍醫之師；用中，善療猝中之証。用文子弼，自號穀城子，兼通內外科，尤精百草之性。鄉落中凡牛羊、鷄犬之疾，野老村嫗走求之，略投以草藥一二品，無不瘥者。蓋周氏精醫三世矣。

方用晦 善詩。學醫於蜀人虞仲文。其察病，治不治，率一言決。莆中名能醫者，皆廢。歲大疫，設鼎孔道，來求療者，先使其徒診視，相與審訂，而後施治，活人甚多。有酬之貲者，貧則却之，富則受而散之，以濟窮乏，或以畀造橋砌路者。自號杏翁。所著有《杏林肘後方》、《傷寒書》、《脉理精微書》傳世。用晦詩如《哭郭維貞山人》：「破屋瀛洲上，清貧獨可憐。書存無子讀，詩好有僧傳。葬卜中元夜，墳臨北源邊。窮交共白首，莫贈買山錢。」淒斷可誦也。用晦門徒曰鄭德孚，亦精用晦術。

士用晦族子。精醫，濟人。自奉甚約，惟尊祖敬宗之爲拳拳。侄顯，傳士學，自號橘泉翁。莆人稱爲「方一劑」，而亦推重其文行。

劉菽 諸生也。因病學醫，遂多奇中。於醫經本草，多所發明。以貧求者，不受其謝，人益謝之。李在 字以叔。山水細潤者宗郭熙，豪放者宗夏珪、馬遠。筆氣生動，四方寶之。宣廟喜繪事，一時與戴文進、謝廷循、石銳、周文靖同待詔，直仁智殿。

林時詹 環從子。善繪事，尤長山水。天順六年，召詣京師。成化初，賜冠帶，直仁智殿。繼除工部文思院副使。同郡許伯明亦爲文思院副使，與時詹同被召，善寫花鳥、竹石之類。

仙游縣

宋

鄭德孚

鄭德孚 耕老之裔。初從吳司業源讀書，後學醫，精其術。

邵武府 邵武縣 建寧縣(一九)

邵武縣(二八)

元

李中明 上官伯達

李中明 工山水，甚爲鄉人黃鎮成所推。

上官伯達 畫神佛人物，傳色既真，神采亦備。

皇朝

王顯(二七)

王顯 號西涯。善繪事，師竹鶴老人。

建寧縣

皇朝

廖壽山

廖壽山 精醫，輕財，活人甚衆。

漳州府 龍溪縣

宋

康庶

康庶 字達先。家貧，博覽經史，取予不妄。通邵氏數學，善觀天文，占休咎，隱居名第山。郡守欲延以學職，辭不起。一日，自題於壁云：「某日太守至。」及期，守傳伯壽果至。嘗謂人曰：「某日朝廷有變。」既而，光宗崩。又曰：「庚午詔書，鄉里不薦士。」所言皆驗。

皇朝

詹永達 林存祥

詹永達 得異書水中，遂誓而精卜。有媼子病，持米詣卜。永達外出，先留字遺之曰：「升米買一哭。」俄家人走訃，果哭婦。嘗爲陳氏卜宅，曰：「某郎某時當生一子，官主事。自此，後陳不如前陳。」其人笑曰：「兒貧安所得婦，家故零落，後尚不如前耶？」既，兒果得耦，生男，官主事。而前里有陳人來居，起家至兩御史，前後之說始驗。

林存祥 善醫，用藥詳性味而變通之，不拘方類，經治療者多愈。年七十卒。

福寧州 福安縣 寧德縣（一八）

宋

曾世賢

曾世賢 工山水、翎毛，點染綽有神氣，傳真亦臻妙境。

皇朝

丁杞 謝四 陳顥 林亮圭、林璧附。 詹仲至 周廉 林裕 高坤 劉滋 何雪澗 徐昆 盛接(一九)

丁杞 號種松子。三世業醫。杞診脉能決生死。正德辛未大疫，萬州守一家皆病，服其劑，盡愈。人覲，携杞隨行。杞兄故死非辜，杞赴闕伏訴，讎家竟坐罪，亡何，死獄中。杞方病革，聞之，嘆曰：「死無憾矣！」

謝四 精太素脉。盛衰齊七十病篤，謝曰：「尚可十餘年。」盛媼黃氏陳於夷牀矣，亦如許盛。林愛民母將六十，病甚，謝曰：「未也。過八十以往，未之或知也。」後皆驗。

陳顥 故釋氏子，人稱「良醫和尚」。又有林亮圭、林璧，皆以善醫稱。

詹仲至 善山水。

周廉 善繪，工翎毛。自重不輕售。

林裕 善畫。

高坤 工畫，尤長於梅。

劉滋 善畫鷹，尤長於竹。年九十餘。

何雪澗 善畫龍虎，遠近爭求，沒後益貴重。

徐昆 善篆隸，旁通琴、詩、草、畫。

福安縣

皇朝

鄧彥仁

鄧彥仁 精醫，急於救人，不責其償。

寧德縣

皇朝

陳寧

陳寧 學正和之子。精醫術，有士行。

〔校記〕

〔一〕「侯官縣 懷安故縣 長樂縣 福清縣」十三字，各本原脫，據本書體例補。

〔二〕「閩縣」二字，各本原脫，據本書體例補。

〔三〕「楊立貞」疑爲「楊文貞」之誤。

〔四〕「南安縣」三字，各本原脫，據本書體例補。

〔五〕「晉江縣」三字，各本原脫，據本書體例補。

〔六〕「順寧縣 建陽縣 崇安縣 浦城縣」十二字，各本原脫，據本書體例補。

〔七〕「建安縣」三字，各本原脫，據本書體例補。

〔八〕「沙縣 永安縣」五字，各本原脫，據本書體例補。

〔九〕「將樂縣」三字，各本原脫，據本書體例補。

〔一〇〕「寧化縣 武平縣 連城縣 歸化縣」十二字，各本原脫，據本書體例補。

〔一一〕「長汀縣」三字，各本原脫，據本書體例補。

〔一二〕「仙游縣」三字，各本原脫，據本書體例補。

〔一三〕「莆田縣」三字，各本原脫，據本書體例補。

〔一四〕「用晦族子」，各本原作「上晦族子」，據本書體例及本傳改。

〔一五〕「建寧縣」三字，各本原脫，據本書體例補。

〔一六〕「邵武縣」三字，各本原脫，據本書體例補。

〔一七〕「干顯」二字，各本原脫，據本傳補。

〔一八〕「福安縣 寧德縣」八字，各本原脫，據本書體例補。

〔一九〕「盛接」，各本原闕本傳。

閩書卷之一百三十六

方外志 釋衲

福州府

唐

懷濬 弘濟 懷海 大智 頭陀 靈訓 普光 楚南 慈慧 文矩 了拳

僧懷濬 有《上歸州刺史》詩二首：「家在閩中東復東，其中歲歲有花紅。如今不在花紅處，花在舊時紅處紅。」家在閩川西復西，其中歲歲有鶯啼。如今不在鶯啼處，鶯在舊時啼處啼。」

僧弘濟 齋戒精苦。嘗於沙岸得一顛骨，遂貯衣籃中。歸寺數日，忽眠中有物齧其耳，以手撥之，落聲如數升物，疑其顛骨所爲也。及明，果墜在牀下，遂破爲六片，零置瓦溝中。夜半，有火如鷄卵，次第人瓦下，燭之。弘濟責曰：「爾不求生人，大何憑朽骨？」

洪州百丈山懷海禪師 長樂人，姓王氏。卅歲離塵，三學該練，屬馬祖闡化江西，傾心依附，與西堂智藏、南泉普願，同號入室。海侍馬祖，言下有悟，被祖振威一喝，直得三日耳聾。自此，雷音將震，檀信請於洪州新吳界，住大雄山，以居處巖巒峻極，故號「百丈」。處未期月，參玄之賓，四方麇至。潯山黃

藥，實當其首。每上堂，有一老人隨衆聽法。一日，衆退，惟老人不去。海問：「何人？」老人曰：「某非人也。於過去迦葉佛時，曾住此山。因學人問：『大修行人還落因果也無？』某對云：『不落因果。』遂五百生墮野狐身，今請和尚代一轉語，貴脫野狐身。」海曰：「汝問。」老人曰：「大修行人還落因果也無？」海曰：「不昧因果。」老人言下大悟，作禮曰：「某已脫野狐身，住在山後。敢乞依亡僧津送。」海令維那白椎告衆：「食後送亡僧。」大衆聚議：「一衆皆安，涅槃堂又無病人，何故如是？」食後海領衆至山後巖下，以杖挑出一死野狐，乃依法火葬之。海凡作務執勞，必先於衆，主者不忍，密收作具而請息之。海曰：「吾無德，爭合勞於人？」既徧求作具不獲，而亦亡餐，故有「一日不作，一日不食」之語流播寰宇矣。元和九年歸寂，謚大智禪師。

百丈山大智禪師 長樂人。初事龍泉禪師。一日，師令浣巾於井，見青、黃二龍戲井中，玩之，歸遲，其師詰之，遂以鉢探二龍獻師。師奇之，令削髮游方，臨行囑之曰：「逢馬則參，遇丈則止。」果至百丈山，參馬祖師，遂得道於其山。後復歸龍泉，立道場，製叢林規傳於世。

頭陀 俗姓李。幼從百丈禪師住洪州，後還，葬母於沙堤閭前，廬墓三年，題詩石上曰：「守墳三載念生緣，種樹爲陰出世恩。劃石寄言相付囑，一重孫付一重孫。」題畢，石自開，頭陀遂端於中，與石復合。

本州芙蓉山靈訓禪師 初參歸宗智常，問：「如何是佛？」宗曰：「我向汝道，汝還信否？」和尚誠言，安敢不信？」宗曰：「汝便是。」曰：「如何保任？」宗曰：「一翳在眼，空華亂墜。」訓辭，宗問：「將何處去？」曰：「歸嶺中去。」宗曰：「子在此多年，裝束了却來，爲子說一上佛法。」師結束了上去，宗曰：

「近前來。」訓近前，宗曰：「時寒，途中善爲。」訓聆此言，頓忘前解。

本州普光禪師 得青原行思禪師之傳。

杭州千頃楚南禪師 參黃蘗，蘗問：「子未現三界影像時如何？」曰：「卽今豈是有邪？」曰：「有無且置。卽今如何？」曰：「非今古。」蘗曰：「吾之法眼，已在汝躬。」住後，上堂：「諸子設使得三世佛教如餅注水，及得百千三昧，不如一念修無漏道。」僧問：「如何是易？」師曰：「著衣喫飯，不用讀經看教，不用行道禮拜，燒身煉頂，豈不易耶？」曰：「如何是難？」曰：「微有念生，便具五陰三界，輪回生死，皆從汝一念生。所以佛教諸菩薩云：佛所護念。」大順三年，宣州孫儒寇錢塘，發塔，覩師全身儼然，爪髮俱長，拜謝而去。

本州九峰慈慧禪師 初在鴻山。鴻上堂曰：「汝等諸人，祇得大機，不得大用。」慧便抽身出去，鴻召之，慧更不回顧。鴻曰：「此子堪爲法器。」一日，辭鴻山曰：「某甲辭達和尚，千里之外，不離左右。」鴻動容曰：「善爲。」

泉州國歡文矩禪師 生而有異，長爲縣獄卒，每每棄役，往神光觀和尚及西院安禪師所。後謁譚空，落髮，不披袈裟，不受具戒，惟以雜綵爲挂子。復至神光，光曰：「我非汝師，師禮西院去。」師携一小青竹杖，入西院法堂，遙見笑曰：「人涅槃堂去。」師應：「諾。」輪竹杖而入。時有五百許僧染時疾，師次第以杖點之，隨點各起。

了拳 咸通間，修行廣東陰那山。解法悟道，行雨露間不濡。臨沒說偈，趺坐而化，號慚愧祖師。

五代

如敏 契盈 師解 古文遂 道虔 洪薦 月輪 師護 微 無殷 從範 嚴 慧宗 從展
 師彥 弘教 可觀 玄通 皎然 從弇 契璠 永泰 元儼 如體 寶聞 守訥 文超 神祿 紹
 孜 義因 重滿 契符 道希 明法 契如 神祿 慧覺 洪儼 慧朗 常慧 靜 清換 契訥
 弘辨 可隆 守玘 令含 澄靜 從瓌 文欽 了覺 瀛 守清 契穩 智嵩 文義 了宗
 宗曉 冲煦 妙行 照 智遠 師貴 義聰 從貴 藏用 彦端 志端 明 祥 清皎 玄
 旨 清慕 志恩 洞明 玄亮 清聳 慧居 圓明 行雲

韶州靈樹如敏禪師 廣主劉氏奕世欽重，署知聖大師。四十餘年，教被嶺表。廣主將興兵，就決臧否，師已先知，怡然坐化。主怒知事，曰：「和尚何時得疾？」對曰：「初無疾，適封一函子，令呈大王。」主開函，得一帖子云：「人天眼目，堂中上座。」主悟，遂寢兵。

契盈 從錢吳越王登淶波亭，時兩浙貢賦，繇海上達青州登陸，凡三千里。王命對曰：「三千里外一條水」，契盈應聲曰：「十二時中兩候潮」。人稱駢切。

本州壽山師解禪師 闕帥問：「壽山年多少？」師曰：「與虛空齊年。」曰：「與壽山齊年。」

本州雙峰古禪師 本業講經，因參先峰，後到石霜，但隨衆而已，更不參請。衆謂：「古侍者嘗受雙峰印記。」往往聞於石霜，霜欲詰其所悟，而未得其便。師因辭去，霜將拂子送出門，召曰：「古侍者。」古回首，霜曰：「擬著即差，是著即乖。不擬不是，亦莫作箇會。除非知有，莫能知之。好去，好去。」古應：「諾。」即前邁。尋屬雙峰示寂，乃繼續住持。僧問：「和尚當時辭石霜，石霜何如道？」古曰：「教我

不著是非。」

澧州欽山文遂禪師 僧問：「如何是祖師西來意？」曰：「梁公曲尺，誌公剪刀。」問：「一切是諸佛法，皆從此經出。如何是此經？」師曰：「常轉。」

瑞州九峰道虔禪師 僧問：「人人盡言請益，未審師將何拯濟？」虔曰：「卽道巨嶽曾乏寸土也。」問：「祖祖相傳，復傳何事？」虔曰：「釋迦慳，迦葉富。」曰：「如何是釋迦慳？」虔曰：「無物與人。」曰：「如何是迦葉富？」虔曰：「國內孟嘗君。」曰：「畢竟傳底事作麼生？」虔曰：「百歲老人分夜燈。」

本州覆船山洪薦禪師 將示寂三日前，令侍者喚第一座來。薦卧，出氣一聲，座喚侍者曰：「和尚渴，要湯水喫。」薦面壁而卧。臨終，令集衆，乃展兩手，出舌示之。時第三座曰：「諸人，和尚舌根硬也。」薦曰：「苦哉，苦哉。誠如第三座所言，舌根硬，去也。」言訖而寂。

撫州黃山月輪禪師 福唐許氏子。上堂：「祖師西來，特唱此事，自是諸人不薦。向外馳求，投赤水以尋珠，就荆山而覓玉，所以道從門人者，不是家珍。認影迷頭，豈非大錯？」

廣州光聖院師護禪師 僧問：「學人乍入叢林，西來妙訣，乞師指示。」師曰：「汝未入叢林，我已示汝了也。」曰：「如何領會？」師曰：「不要領會。」

本州牛頭微禪師 僧問：「不問驪龍領下珠，如何識得家中寶？」曰：「忙中爭得作閒人。」

吉州禾山無殷禪師 七歲從雪峰出家，依年受具。謁九峰，^{〔五〕}問：「汝遠遠而來，暉暉^{〔六〕}隨衆，見何境界而能修行？繇何徑路而能出離？」曰：「重昏廓闢，盲者自盲。」峰乃許入室。後住禾山，學徒濟濟，諸方降歎。

本州香溪從範禪師 披衲衣次，說偈曰：「迦葉上行衣，披來須捷機。纔分招的箭，密露不藏龜。」
本州聖壽嚴禪師 補衲次，僧參，師提起示之曰：「山僧一衲衣，展似衆人見。雲水兩條分，莫教露針線。」

吉州靈巖慧宗禪師 僧問：「如何是靈巖境？」師曰：「松檜森森密密遮。」曰：「如何是境中人？」曰：「夜夜有猿啼。」問：「如何是學人自己本分事？」曰：「何爲拋却真金拾瓦礫？」

漳州保福院從展禪師 年十五，禮雪峰爲受業師。游吳楚間，後歸執侍。梁貞明四年，潭州刺史王公創保福禪苑，迎請居之。開堂之日，王公禮謁三請，躬自扶掖陞座。

台州瑞巖師彥禪師 初禮巖頭全禪，歲每與語，微醺無忒。後謁夾山，尋居丹丘瑞巖，坐盤石終日如愚。每自喚主人公，復應「諾」。乃曰：「惺惺著他，後莫受人謾。」師統衆嚴整，江表稱之。一日，有村媼作禮，師曰：「汝速歸，救取數千物命。」媼回舍，見兒婦拾田螺歸，遂放之水濱。師之異跡頗多，不繁錄矣。

泉州睡龍山道溥弘教禪師 僧問：「凡有言句，不出大千頂。未審頂外事如何？」曰：「凡有言句，不是大千頂。」曰：「如何是大千頂？」曰：「摩醯首羅天，猶是小千界。」

南嶽金輪可觀禪師（六）

本州太普山玄通禪師 問：「如何是祖師西來意？」師曰：「敲骨頭漢出去！」問：「撥塵見佛時如何？」曰：「脫枷來商量。」

本州長生山皎然禪師 久依雪峰。一日，與僧斫樹次，峰曰：「斫到心且住。」師曰：「斫却著。」峰

曰：「古人以心傳心，汝何道祈却？」師擲下斧，曰：「傳也。」

本州蓮華永福院從弁超證禪師 上堂：「長慶道：『盡法無民。』永福即不然。若不盡法，又爭得民？」

本州南禪契璠禪師 上堂，僧問：「如何是第一義？」曰：「何不問第一義？」曰：「見問。」曰：「已落第二義也。」

本州永泰和尚 問：「如何是天真佛？」師拊掌曰：「不會，不會。」

本州極樂元儼禪師 僧問：「如何是極樂家風？」曰：「滿月看不盡。」

本州芙蓉山如體禪師 僧問：「如何是古人曲調？」師示頌曰：「古曲發聲雄，今時韻亦同。若教第一指，祖佛盡迷蹤。」

南嶽般若惟勁實聞禪師 師雪峰而友玄沙，深入玄奧。嘗續《寶林傳》四卷，紀貞元後宗門繼踵之源流。

池州壽昌院守訥妙空禪師 僧問：「未到龍門如何湊泊？」師曰：「立命難存。」

泉州開元寺文超禪師 策經爲僧，去游四方，於時哲匠壹奧咸入。博洽內外學，聲聞朝野。刺史王延彬以其能詩，構院開元殿東，曰「清吟」，居之。門弟子多賢者，無晦文章尤知名。

温州瑞峰院神祿禪師 久爲瑞巖侍者，後開山創院，學侶依附。有偈曰：「蕭然獨處意沈吟，誰信無絃發妙音。終日法堂惟靜坐，更無人問本來心。」

本州羅山紹孜禪師 定慧禪師自西川來參，至法堂嘆曰：「我在西蜀峨嵋山脚下，拾得一隻蓬蒿箭，

擬撥亂天下，今日打羅山寨，弓折箭盡也。」

本州羅山義因禪師 僧問：「承古有言，自從認得曹溪路，了知生死不相聞。曹溪路即不問，如何是羅山路？」因展兩手。僧曰：「怎麼則一路得通，諸路亦然？」因曰：「甚麼諸路？」僧近前叉手，師曰：「靈鶴煙霄外，鈍鳥不離窠。」

本州興聖重滿禪師 上堂：「覲面分付，不待文宣。對眼投機，喚作參玄。上士若能如此，所以宗風不墜。」

本州升山白龍院道希禪師 問：「如何是西來意？」曰：「汝從何處來？」問：「如何是佛法大意？」希曰：「汝早禮三拜。」

本州螺峰冲奧明法禪師 問：「牛頭未見四祖時如何？」曰：「德重鬼神欽。」曰：「見後如何？」曰：「通身聖莫測。」

本州大章山契如庵主 素蘊孤操，志探祖道，預玄沙之室，穎悟幽旨。不務聚徒，不畜童侍，隱於小界山，剝大朽杉若小庵，但容身而已。清豁冲熙，二長老嚮師名，未嘗會遇，一旦同訪之，頗味高論。晤坐左右，不覺及夜，覩豺虎奔至庵前，自然馴繞。二公尋於大章山創庵，請師居之。兩處孤坐，垂五十二載而卒。

本州蓮華山永興神祿禪師 閩王請開堂，僧問：「大王請師出世，未委今日一會何似靈山？」師曰：「徹古傳今。」問：「如何是和尚家風？」曰：「毛頭顯沙界，日月現其中。」

本州報慈院光雲慧覺禪師 閩王問：「報慈與神泉，相去近遠？」曰：「若說近遠，不如親到。」

本州水陸院洪儼禪師 上堂，大眾集定，師下座捧香爐巡行，曰：「供養十方諸佛。」便歸方丈。

本州報慈院慧朗禪師 問：「三世諸佛盡是傳語人，未審傳甚麼人語？」師曰：「聽。」曰：「未審是甚麼語？」曰：「你不是鍾期。」問：「如何是學人眼？」曰：「不可更撒沙。」

本州長慶常慧禪師 僧問：「不犯宗風，不傷物議，請師滿口道。」師曰：「今日豈不是？」

本州古佛院靜禪師^(七) 僧問：「學人欲見和尚本來面目。」曰：「洞上有言親體取。」曰：「恁麼則不得見去也。」曰：「灼然，客路如天遠，侯門似海深。」

本州枕峰觀音院清換禪師 上堂：「諸禪德若要論禪說道，舉唱宗風，祇如當人分上，以一毛端上有無量諸佛轉大法輪，於一塵中現寶王刹。佛說衆生，說山河大地，一時說未嘗間斷，如毗沙門王，始終不求外寶。既各有如是，家風阿誰欠少？」

本州東禪契訥禪師 僧問：「如何是現前三昧？」曰：「何必更待道？」

本州長慶院弘辨妙果禪師 僧問：「海衆雲臻，請師開方便門，示真實相。」師曰：「這箇是方便門。」曰：「恁麼則大眾側聆去也。」曰：「空側聆作麼？」

本州東禪院可隆了空禪師 上堂：「大好省要，自不仙陀。若是聽響之流，不如歸堂向火。」

本州萬山令含禪師 上堂：「還恩恩滿，賽願願圓。」便歸方丈。

本州祥光院澄靜禪師 僧問：「如何是道？」曰：「長安路上。」曰：「向上事如何？」曰：「谷聲萬籟起，松老五雲披。」

杭州報慈院從環禪師 僧問：「承古有言，今人看古教，未免心中鬧，欲免心中鬧，應須看古教。如

何是古教？」曰：「如是我聞。」曰：「如何是心中鬧？」曰：「那畔雀兒聲。」

本州報慈院文欽禪師 僧問：「如何是平常心合道？」師曰：「喫茶喫飯隨時過，看水看山亦暢情。」

鼓山智嚴了覺禪師 上堂：「多言復多語，絲來反相誤。」

本州永隆院明慧瀛禪師 上堂：「日出卯用處，不須生善巧。」便下座。

洪州清泉山守清禪師 問：「諸餘即不問，如何是向上事？」師曰：「消汝三拜，不消汝三拜。」

本州康山契穩法寶禪師 初開堂，僧問：「威音王佛已後，次第相承，未審師今一會法嗣何方？」師

曰：「象骨舉手，龍溪點頭。」

本州龍山智高妙虛禪師 僧問：「古佛化導，今祖重興，人天輻輳於禪庭，至理若爲於開示。」師曰：

「亦不敢孤負大眾。」曰：「怎麼則人天不謬殷勤請，頓使凡心作佛心。」師曰：「仁者作麼生？」曰：「退身禮拜，隨衆上下。」曰：「我識得汝也。」

本州龍山文義禪師 僧問：「如何是人王？」師曰：「威風人盡懼。」曰：「如何是法王？」曰：「一句令當行。」曰：「二王還分不分？」曰：「適來道甚麼？」

本州鼓山智嶽了宗禪師 上堂：「我若全舉宗乘，汝向何處領會？所以道古今常露體用，無妨。」

鼓山清諤宗曉禪師 僧問：「亡僧遷化，向甚麼去也。」曰：「時寒不出手。」（△）

本州報國院照禪師 上堂：「我若全機，汝何從摸索？蓋爲根器不等，便成不具慙愧，還委得麼？如今與諸仁者作箇人底門路。」乃敲繩床兩下，曰：「還見麼？還聞麼？若見便見，若聞便聞，莫向意識裏卜度，却成妄想顛倒，無有出期。」

復州資福院智遠禪師 上堂：「祇據諸賢分上，古佛心源，明露現前。匪天徧地，森羅萬象，自己家風，與衆生本無差別。涅槃生死，幻化所爲，性地真常，不勞修証。」

本州白鹿師貴禪師 問：「牛頭未見四祖時，百鳥啣花供養，見後爲甚麼不來？」師曰：「曙色未分人盡望，及乎天曉也如常。」

本州羅山義聰禪師 上堂，僧問：「如何是出窟獅子？」師曰：「甚麼處不震裂？」曰：「作何音響？」曰：「聾者不聞。」

本州安國院從貴禪師 僧問：「請師舉唱宗乘。」師曰：「今日打禾，明日搬柴。」問：「牛頭未見四祖時如何？」曰：「香爐對繩床。」曰：「見後如何？」曰：「門扇對露柱。」

本州怡山長慶藏用禪師 僧問：「如何是伽藍？」曰：「長溪蒲田。」曰：「如何是伽藍中人？」曰：「新羅白水。」問：「如何是靈泉正主？」曰：「南山北山。」問：「如何是和尚家風？」曰：「齋前厨蒸南國飯，午後爐煎北苑茶。」

本州永隆院彦端禪師 上堂，大衆雲集，師從座起作舞，謂衆曰：「會麼？」對曰：「不會。」師曰：「山僧不捨道法而現凡夫事，有底不會？」（九）

本州林陽瑞峰院志端禪師 初參安國，見僧問：「如何是萬象之中獨露身？」國舉一指，其僧不薦，師於是冥契玄旨。僧問：「如何是佛法大意？」師曰：「竹箸一文一雙。」有僧夜參，師曰：「阿誰？」曰：「某甲。」曰：「泉州砂糖，舶上檳榔。」僧良久，師曰：「會不？」曰：「不會。」師曰：「會卽廓清五蘊，吞盡十方。」

本州仙宗院明禪師 上堂曰：「幸有如是門風，何不烜赫地紹續取去，若也紹得，不在三界。若出三界，卽壞三界。若在三界，卽礙三界。不礙不壞，是出三界，是不出三界。怎麼徹去，堪爲佛法種子，人天有賴。」

本州安國院祥禪師 問：「如何是宗乘中事？」曰：「淮軍散後。」問：「如何是和尚家風？」曰：「衆眼難漫。」

蕪州四祖山清皎禪師 臨終遺偈曰：「吾年八十八，滿頭垂白髮。顚顚鎮雙峰，明明千江月。黃梅揚祖教，白兆承宗訣。日日告兒孫，勿令有斷絕。」

本州廣平玄旨禪師 僧問：「如何是法身體？」曰：「廓落虛空絕玷瑕。」曰：「如何是體中物？」曰：「一輪明月散秋江。」曰：「未審體與物分不分？」曰：「適來道甚麼？」曰：「怎麼則不分也。」曰：「穿耳胡僧笑點頭。」

本州昇山白龍清慕禪師 僧問：「一切衆生日用而不知，如何是日用底曾？」曰：「別祇曾與爭得耶？」（一〇）

本州靈峰志恩禪師 僧問：「如何是佛？」曰：「更是阿誰？」曰：「既是如此，爲何迷忘有差殊？」曰：「但自不亡羊，何須泣岐路。」

本州仙宗洞明真覺禪師 仙宗符禪師法嗣也。

本州東禪玄亮禪師 僧問：「祖祖相傳傳法印，師今繼嗣嗣何人？」曰：「特謝證明。」曰：「怎麼則白龍當時親授記，今日應聖度迷津？」曰：「汝莫錯認定盤星。」

杭州靈隱清聳禪師 初參法眼，眼指雨謂師曰：「滴滴落上座眼裏。」師初不喻旨，後因閱《華嚴經》感悟，承眼印可。回止明州四明山卓庵，節度使錢億執事師之禮。後居靈隱上寺。

杭州龍華寺慧居禪師 自天台領旨，錢王俶命住上寺，開堂示衆曰：「大施門開，何曾壅塞。生凡育聖，不漏纖塵。言凡則全凡，舉聖則全聖。凡聖不相待，箇箇獨稱尊。所以道：山河大地，長時說法，長時放光。地水火風，一一如是。」

廣州文殊院圓明禪師 參大滂，得旨。後造雪峰，請益法無異味。嘗游五臺山，覩文殊化現，乃隨方建院，以文殊爲額。開寶中樞密使李崇矩巡護南方，因人院覩地藏菩薩，問僧：「地藏何以展手？」僧曰：「手中珠被賊偷却也。」李却問師：「既是地藏，爲何遭賊？」師曰：「今日捉下也。」李禮謝之。

行雲 自福州來泉，陳洪進禮之。一日，謂洪進曰：「君當主此山河。」及洪進牧泉，復謂之曰：「凡世報莫不前定，苟懷疑殺人，鮮能令終。」故陳雖廢張漢思，終不殺之。

宋

遇安 道臻 可仕 本逸 可瞻 文德 慶閑 有諫 宗一 義隆 師木 道誠 象敦 常委
擇要 可真 淨空 顯端 海印 慎微 惟禮 可遵(一一) 如璨 惠暹 繼超 善秀 守恩 圓瓊
康源 祖瑋 最樂 達杲 粹珪 體淳 大智 齊心才 合文 慧空 表自 元禮 知藏 僧
珣(一一) 達珠 隆義 初慧 深昭 慧琳 慧忠 了朴 彌光 鼎需 思岳 守淨 曇懿 坦
遵璞 可封 祖元 慧溫 咸傑 安水 志清 宗逮 宗穎 南書記行者妙心附。

温州瑞鹿寺上方遇安禪師 本郡人也。閱《首楞嚴經》到「知見立知，卽無明本。知見無見，斯卽涅

槃」，師乃破句讀曰：「知見立句，知即無明本句。知見無句，見斯即涅槃句。」自喜曰：「此我悟處，畢生不易。」時謂之「安楞嚴」。至道元年春，將示寂，有嗣子蘊仁侍立，師說偈示之。付囑已，澡身易衣，昇棺自人。經三日，門人啓棺，觀師右脇吉祥而卧，四衆哀慟。師乃再起，陞堂說法，訶責垂誡：「此度再啓吾棺者，非吾之子。」言訖，復入長往。

道臻禪師 古田戴氏子。持一鉢走江淮，遍參知識，得旨於浮山遠師。游京師，謁大覺璉禪師於淨因，璉使首衆僧於座下。璉歸吳，衆請師繼住淨因。開堂日，英宗遣中使降香，賜紫方袍、徽號。年八十，說偈坐化。

可仕 天聖間詩僧。有《送僧詩》云：「一鉢卽生涯，隨緣度歲華。是山皆有寺，何處不爲家。笠重吳天雪，鞋香楚地花。他年訪禪室，寧憚路岐賒。」

智海本逸禪師 閩縣人。九歲出家，參廬山禪師，入室頓悟宗旨。元豐中詔住大相國寺，賜「正覺禪師」。上堂：「開口是，合口是，眼下無妨更著鼻。開口錯，合口錯，眼與鼻孔都拈却。佛也打，祖也打，真人面前不說假。佛也安，祖也安，衲僧肚皮似海寬。此乃一出一入，半合半開，是山僧尋常用底。」

蘇州淨慧寺可瞻禪師 長樂羅氏子。熙寧辛亥，鳴鼓坐化，偈云：「佛法本無事，本來須自知。汝心若不了，向以消白日。」後七日茶毗，獲舍利五色。

本州靈光院文德禪師 坐化，偈云：「四大本空，十大何有。澄澄秋月，瀝瀝寒泉。古岸孤舟，鐵帆高掛。去則去，住則住，謝三不上釣魚船，雒陽城裏東西路。」

吉州江山隆慶院慶閑禪師 古田卓氏子。蘇子繇碑云：「閑禪師者，臨濟玄公九世法孫，面黃龍南

老嫡嗣也。南老以道化江西，其徒常數百人，而師爲高第。南雖在世，學者歸之已如雲矣。南既寂，一時尊宿，無有居其右者。熙寧間，廬陵太守張公鑑請居隆慶。未期年，鍾陵太守王公韶請居龍泉。不逾年，以病求去。廬陵人聞其捨龍泉也，舟載而歸，居隆慶之西堂。三事之愈篤。居三年，元豐四年三月十三日，浴訖趺坐，以偈告衆以將人滅，遂泊然而化，神色不變，鬚髮鬋而復出。廬陵守與其人來觀者如堵，皆願留事真相。長老利儼稟師遺言，闡維之，薪盡火滅，全身不散，以油沃薪益之，乃化。是日，雲起風作，飛瓦折木，煙氣所至，東西南北四十里。草木沙礫之間，皆得舍利如金色，碎之如金沙。居士長者，購以金錢，細民捨而鬻之，數日不絕。計其所獲，幾至數斛。」

本州長樂報恩有諫禪師 元祐丁卯，作頌坐化。

本州廣平院守威宗一禪師 上堂：「達磨大師云：『吾法三千年後不移絲髮。』山僧今日不移達磨絲髮，先達之者，共相證明。若未達者，不移絲髮。」

本州玉泉義隆禪師 上堂：「山河大地，盡在諸人眼睛裏，因甚麼說會與不會。」時有僧問：「山河大地眼睛裏，師今欲更指歸誰？」師曰：「祇爲上座，去處分明。」曰：「若不上來伸此問，焉知方便不虛施？」師曰：「依稀似曲纔堪聽，又被風吹別調中。」

本州嚴峰師術禪師 開堂陞座，極樂和尚問曰：「人衆願望，請震法雷。」師曰：「今日不異靈山，乃至諸佛國土。天上人間，總皆如是，亘古亘今，常無變異。如何會無變異底道理？若會得所以道無邊剎境，自他不隔於毫端，十世古今，始終不離於當念。」

本州保明院道誠通法禪師 僧問：「如何是和尚西來意？」師曰：「我不曾到西天。」曰：「如何是學

人西來意？」曰：「汝在東土多少時？」

本州雪峰象敦禪師 僧問：「如何是佛？」曰：「把火照魚行。」曰：「如何是法？」曰：「唐人譯不出。」曰：「佛法已蒙師指示，未審畢竟事如何？」曰：「臘月三十日。」

本州廣明常委禪師 僧問：「知師久蘊囊中寶，今日當場略借看。」師曰：「看。」曰：「怎麼則謝師指示。」師曰：「等閒垂一釣，容易上鉤來。」

本州廣因擇要禪師 僧問：「佛未出世時如何？」曰：「隈巖傍壑。」曰：「出世後如何？」曰：「前山後山。」

洪州翠巖可真禪師 上堂，舉龍牙頌曰：「學道如鑽火，逢煙未可休。直待金星現，歸家始到頭。」神鼎曰：「學道如鑽火，逢煙即便休。莫待金星現，燒脚又燒頭。」師曰：「若論頓也，龍牙正在半途；若論漸也，神鼎猶少悟。在於此復且如何？諸仁者今年多落葉，幾處掃歸家。」上堂：「臨陣抗敵，不懼生死者，將軍之勇也。人山不懼虎兇者，獵人之勇也。入水不懼蛟龍者，漁人之勇也。如何是衲僧之勇？」拈拄杖曰：「這箇是拄杖子，拈得、把得、動得，三千大千世界一時搖動。若拈不得、把不得、動不得，文殊自文殊，解脫自解脫。」

處州遂昌縣龍安洞淨空禪師（一四） 初創精廬於遂昌之大樓巖，既徙居龍安，振錫龍井之側，有黃龍出，受戒。至其巖，虎狼蹲踞，叱之曰：「亟去，吾欲此居。」遂結庵其中。後歸弋陽白花巖寺，未幾，人寂，寺塑像祀之。既百年矣，一夜，假夢僧徒欲還本寺，乃迎以歸。遂昌人遇水旱，昇像出禱，願往，則輕如一羽，不即數夫莫致也。

本州白鹿山顯端禪師 問：「如何是無相佛？」曰：「灘頭石獅子。」曰：「意指如何？」曰：「有心江上住，不怕浪淘沙。」問：「凝然湛寂時如何？」曰：「不是闍黎安身立命處。」曰：「如何是學人安身立命處？」曰：「雲有出山勢，水無投澗聲。」問：「如何是教意？」曰：「楞伽會上。」曰：「如何是祖意？」曰：「熊耳山前。」曰：「教意、祖意，相去幾何？」曰：「寒松連翠竹，秋水對紅蓮。」

本州大中德隆海印禪師 上堂：「法無異法，道無別道。時時逢見釋迦，處處撞著達磨。放步即交看，開口即敲破。」

本州天宮慎徽禪師 上堂：「八萬四千波羅密門，門門長開；三千大千微塵諸佛，佛佛說法。不說有，不說無，不說非有非無，不說亦有亦無，何也？離四句，絕百非，相逢舉目少人知。昨夜霜風漏消息，梅花依舊綴寒枝。」

本州衡山惟禮禪師 上堂：「若論此事，直下難明。三賢罔測，十聖不知。到這裏須高提祖令，橫按鐵鐺。佛尚不存，纖塵何立？直教須彌粉碎，大海焦枯。」

本州妙峰如璨禪師 上堂：「今朝是如來降生之節，天下緇流，莫不以香湯灌沐，共報洪恩。爲何教中却道如來者無所從來？既是無所從來，不知降生底是誰，試請道看。若道得，其恩自報。若道不得，明年四月八，還是薦頭澆。」

本州長慶惠暹文慧禪師 僧問：「離上生之寶刹，登延聖之道場，如何是不動尊？」曰：「孤舟載明月。」曰：「忽遇艣棹俱停，又作麼生？」師曰：「漁人偏愛宿蘆花。」

本州棲勝繼超禪師 上堂，拈拄杖，良久曰：「三世諸佛，盡在這里踣跳，大眾還會麼？過去諸佛說

了，未來諸佛未說，現在諸佛今說。敢問諸人作麼生是說底事？」卓一下，曰：「蘇嚧，蘇嚧。」

本州普賢善秀禪師 僧問：「如何是正中偏？」曰：「龍吟初夜後，虎嘯五更前。」曰：「如何是偏中正？」曰：「輕煙籠皓月，薄霧鎖寒巖。」曰：「如何是正中來？」曰：「松瘁何曾老，花開滿來萌。」曰：「如何是兼中至？」曰：「猿啼音莫辨，鶴唳響難明。」曰：「如何是兼中到？」曰：「撥開雲外路，脫去月明前。」

本州地藏守恩禪師 上堂：「衲僧現前三昧，釋迦老子不會。住世四十九年，說得天花亂墜。爭似饑餐渴飲，展脚堂中打睡。」

金陵保寧寺圓璣禪師 上堂：「廣尋文義，鏡裏求形。息念觀空，水中捉月。單傳心印，特地多端。德山、臨濟枉用功夫，石鞏、子湖翻成特地。若是保寧總不恁麼，但自隨緣飲啄，一切尋常。深遁白雲，甘爲無學之者。敢問諸人，保寧畢竟將何報答四恩三有？」良久曰：「愁人莫向愁人說，說向愁人愁殺人。」

本州興福院康源禪師 上堂：「山僧有一訣，尋常不漏泄。今日不囊藏，分明爲君說。」良久曰：「寒時寒，熱時熱。」

潭州大潯祖瑤禪師 上堂：「道無定亂，法離見知，言句相投，都無定義。自古龍門無宿客，至今鳥道絕行蹤。欲會箇中端的意，火裏蜘蛛吞大蟲。」

本州寶壽最樂禪師 古田人也。上堂：「諸佛不真實，說法度群生。菩薩有智慧，見性不分明。白雲無心意，灑爲世間雨。大地不含情，能長諸草木。若也會得，猶存知解。若也不會，墮在無記。去此二途，如何卽是？海濶難藏月，山深分外寒。」

本州廣慧達杲禪師 上堂：「佛爲無心悟，心因有佛迷。佛心清淨處，雲外野猿啼。」

本州越峰粹珪妙覺禪師 僧問：「機關不到時如何？」曰：「抱甕灌園。」曰：「此猶是機關邊事。」曰：「須要雨淋頭。」

本州鼓山體淳禪師 上堂：「繇基弓矢，不射田蛙。任氏絲綸，要投溟渤。發則穿楊破的，得則修鯨巨鼉。隻箭既入重城，長竿豈釣淺水？而今莫有吞鉤齧鏃底麼？若無，山僧卷起絲綸，拗折弓箭去也。」擲拄杖，下座。

本州雪峰大智禪師 僧問：「如何是祖師西來意？」師卽拂柄示之。僧曰：「此是香嚴底，和尚又作麼生？」師便喝。僧大笑，師叱曰：「這野狐精。」

吉州青原齊禪師 二十八辭父兄，從雲蓋智禪師出家。執事首座，座一日秉拂罷，師問曰：「某聞首座所說，莫曉其義，伏望慈悲指示。」座諄諄誘之，使究無著說這箇法。踰兩日，有省，以偈呈曰：「說法無如道箇親，十方刹海一微塵。若能於此明真理，大地何曾見一人。」座駭然，因語智，得度。徧扣諸方，後至石門，深蒙器可。出住青原，一紀示寂。

潭州上封佛心才禪師 上堂：「達磨未來東土已前，人人懷媚水之珠，箇箇抱荆山之璞，可謂壁立千仞。及乎二祖，禮却三拜之後，一一南詢諸友，北禮文殊，好不丈夫！或有一箇半箇不求諸聖，不重己靈，匹馬單鎗，投虛置刃，不妨慶快平生。如今有麼，自是不歸，歸使得。五湖煙景有誰爭？」

福州玄妙合文明慧禪師 僧問：「如何是道？」師曰：「私通車馬。」僧進一步，師曰：「官不容針。」本州雪峰東山慧空禪師 上堂：「俊快底點著便行，癡鈍底推挽不動。便行則人人歡喜，不動則箇

箇生嫌。山僧而今轉此癡鈍爲俊快，去也！」彈指一下，曰：「敢問諸人，所做底是何佛？空王佛邪？燃燈佛邪？釋迦佛邪？彌勒佛邪？所說底是何法？根本法邪？無生法邪？世間法邪？出世間法邪？若道得，山僧出世事已畢。如或未然，逢人不得錯舉。」

蘄州五祖表自禪師 僧問：「如何是祖師西來意？」曰：「荊棘林中舞柘枝。」曰：「如何是佛？」曰：「新生孩子擲金盆。」

元禮首座 受業焦山。初參演和尚於白雲，言下豁如，且曰：「今日緇素明矣！」終於四明之瑞巖。普融知藏 至五祖入室次，祖舉倩女離魂話問之，有契，呈偈曰：「二女合爲一媳婦，機輪截斷難回互。從來往返絕縱繇，行人莫問來時路。」

本州鼓山山堂僧珣禪師 上堂：「朔風掃地卷黃葉，門外千峰凜寒色。夜半烏龜帶雪飛，石女溪邊皺兩眉。大家在這裏，且道天寒人寒？」喝一喝，云：「歸堂去。」

鎮江府甘露達珠禪師 上堂：「聖賢不分，古今惟一。可謂火就燥，水流濕，鑿井而飲，耕田而食。大衆，東村王老去不歸，紛紛黃葉空狼籍。」

本州雪峰隆禪師 上堂：「一不成，二不是。口喫飯，鼻出氣。休云北斗藏身，說甚南山鼃鼻。家裏運出任交關，勸君莫競錐頭利。」

本州龜山義初禪師 上堂：「久默斯要，不務速說。釋迦老子寐語作麼？我今爲汝保任，斯事終不虛也。大似壓良爲賤。既不恁麼，畢竟如何？白雲籠嶽頂，翠色轉崔嵬。」

本州雪峰慧深首座 示衆：「未得人頭應切切，人頭已得須教徹。雖然得人本無無，莫守無無無間。」

歇。」

本州玄沙僧昭禪師 上堂：「天上無彌勒，地下無彌勒，且道彌勒在甚麼處？」良久曰：「夜行莫踏白，不是水，便是石。」

安吉州道場普明慧琳禪師 上堂：「一即多，多即一，毗盧頂上明如日。也無一，也無多，現成公案沒淆訛。拈起舊來瓊拍板，明時共唱太平歌。」

本州雪峰毬堂慧忠禪師 上堂：「終日忙忙，那事無妨，作麼生是那事？」良久曰：「心不負人，面無慚色。」

慶元府天童慈航了朴禪師 上堂：「觀音巖玲玲瓏瓏，太白石丁丁東東。西園菜蠟，似不堪食。東谷花發，却無賴紅。且道是祖意教意，途中受用，世諦流布。若辨不出，雪峰覆却飯桶。若辨得出，甘贊禮拜蒸籠。」

泉州教忠晦庵彌光禪師 出嶺謁圓悟禪師，於雲居次，參黃蘗祥高庵悟，機語皆契。以淮楚盜起，歸謁佛心，會大慧寓廣，因往從之。久承教旨，既大朗悟。慧颺鼓告衆曰：「龜毛拈得笑哈哈，一擊萬重關鑰開。慶快平生在今日，孰云千里賺吾來。」師亦以頌呈之曰：「一拶當機怒雷吼，驚起須彌藏北斗。洪波浩渺浪滔天，拈得鼻孔失却口。」

本州西禪懶庵鼎需禪師 上堂：「句中意，意中句，須彌聳於巨川。句刻意，意刻句，烈士發乎狂矢。任待牙如劍樹，口似血盆，徒逞詞鋒，虛張意氣。所以淨名杜口，早涉繁詞。摩竭掩關，已揚家醜。」本州東禪蒙庵思岳禪師 上堂：「達磨來時，此土皆知梵語。及乎去後，西天悉會唐言。若論直指

人心，見性成佛，大似羚羊挂角，獵犬尋蹤。一意乖疎，萬言無用。可謂來時他笑我，不知去後我笑他。唐言梵語親分付，自古齋僧怕夜茶。」

本州西禪此庵守淨禪師 上堂：「若也單明自己，不悟目前，此人有眼無足。若也祇悟目前，不明自己，此人有足無眼。直得眼足相資，如車二輪，如鳥二翼。」又云：「善鬪者，不顧其首，善戰者，必獲其功。其功既獲，坐致太平。太平既致，高枕無憂。罷拈三尺劍，休弄一張弓。歸馬華山陽，放牛桃林野。風以時而雨以時，漁父歌而樵人舞。雖然如是，堯舜之君，猶有化在，爭似乾坤收不得。堯舜不知名，渾家不管興亡事，偏愛和雲占洞庭。」

本州玉泉曇懿禪師 久依圓悟，自謂不疑。紹興初，出住興化祥雲，法席頗盛。大慧人聞，知其所見未諦，致書令來，師遲遲。慧小參，且痛斥，仍榜告四衆，師不得已，破夏謁之。慧鞠其所證，既而曰：「如此見解，敢嗣圓悟老人耶？」居亡何，語之曰：「香嚴悟處，不在擊竹邊。俱胝得處，不在指頭上。」懿遂頓明。後住玉泉，爲慧拈香，繼省慧小溪。慧陞座，舉「雲門一日拈拄杖」示衆，曰：「凡夫實謂之有，二乘折謂之無，緣覺謂之幻有。菩薩當體卽空。衲僧見拄杖子，但喚作拄杖子。行但行，坐但坐，總不得動著。」慧曰：「我不似雲門老人，將虛空剗窟籠。」慧拈拄杖曰：「拄杖子不屬有，不屬無，不屬幻，不屬空。」卓一下，曰：「凡夫、二乘、緣覺、菩薩，盡向這裏，各隨根性，悉得受用。惟於衲僧分上，爲害爲冤，要行不得行，要坐不得坐。進一步，則被拄杖子迷却路頭；退一步，則被拄杖子穿却鼻孔。卽今莫有不甘底麼，試出來與拄杖子相見。如無，來年更有新條在，惱亂春風卒未休。正恁麼時，合作麼生。」下座，煩玉泉爲衆拈出。師登座，叙謝畢，遂舉前話，曰：「適來堂頭和尚，恁麼批判，太似困魚止藥，病鳥棲蘆。若是玉泉

則不然。」拈拄杖曰：「拄杖子能有、能無、能幻、能空，凡夫、二乘、緣覺、菩薩。」卓一下，曰：「向這裏百雜碎，惟於衲僧分上，如龍得水，似虎靠山，要行便行，要坐便坐。進一步，則乾坤震動，退一步，則草偃風行。且道不進不退，一句作麼生道？」良久曰：「閑持經卷倚松立，笑問客從何處來。」

本州清涼坦禪師 有僧舉大慧竹篋話請益，師示以偈曰：「徑山有箇竹篋，直下別無道理。佛殿厨庫三門，穿過衲僧眼耳。」

慶元府育王大圓遵璞禪師 幼同玉泉懿問道圓悟，數載後還里，佐懿於莆中祥雲。紹興甲寅，大慧居洋嶼，師往訊之，入室次，問答，慧欣然許之。

常州宜興保安復庵可封禪師 上堂：「天寬地大，風清月白。此是海宇清平底時節，衲僧家等閑問著十箇有五雙。知有祇如夜半華嚴池，吞却揚子江開明橋，撞倒平山塔，是汝諸人還知麼？若也知，去試向非非想天道，將一句來。」其或未知，擲下拂子曰：「須是山僧佛子始得。」

温州鴈山能仁枯木祖元禪師 上堂：「鴈山枯木實頭禪，不在尖新話句邊。背手忽然摸得著，長鯨吞月浪滔天。」

通州狼山蘿庵慧溫禪師 上堂：「釋迦老子，四十九年坐籌帷幄。彌勒大士，九十一劫帶水拖泥。凡情聖量，不能剷除。理照覺知，猶存露布。佛意佛意，如將魚目作明珠，大乘小乘，似認橘皮爲猛火。諸人須是豁開胸襟寶藏，運出自己家珍，向十字街頭，普施貧乏。衆中忽有箇靈利漢，出來道：『美食不中飽人喫。』山僧只向他道，幽州猶自可，最苦是新羅。」

慶元府天童密庵咸傑禪師 自幼穎悟，出家爲僧，不憚游行，遍參知識。後謁應庵於衢之明果，庵孤

硬難人，屢遭呵。一日，庵問：「如何是正法眼？」師遽答曰：「破沙盆。」庵領之。未幾，辭回省親。庵送以偈曰：「大徹投機句，當陽廓頂門。相從今四載，徵詰洞無痕。雖未付鉢袋，氣宇吞乾坤。却把正法眼，喚作破沙盆。此行將省覲，切忌便踪跟。吾有末後句，待歸要汝遵。」出世衢之烏巨，次遷祥符、蔣山、華藏，未幾，詔住徑山、靈隱，晚居太白。

本州鼓山木庵安永禪師 上堂：「要明箇事，須是具擊石火、閃電光底手段，方能峻峻巖頭全身放捨，白雲深處得大安居。如其覷地覓金針，直下腦門須迸裂。到這裏假饒見機而變，不犯鋒鋦，全身獨脫，猶涉泥水。」

本州天王志清禪師 上堂，豎起拂子云：「只這箇天不能蓋，地不能載，徧界徧空，成團成塊。到這裏三世諸佛向甚麼處摸索？六代祖師向甚麼處提持？天下衲僧向甚麼處名邈？除非自得自證，便乃敲唱雙行。雖然如是，未是衲僧行履處，作麼生是衲僧行履處？是非海裏橫身人，豺虎叢中縱步行。」

本州鼓山宗逮禪師 上堂：「世尊道，應如是知，如是見，如是信解，不生法相。」遂喝曰：「玉本無瑕却有瑕。」

本州乾元宗穎禪師 上堂，卓拄杖曰：「性燥漢祇在一槌。」靠拄杖口：「靈利人不勞再舉，而今莫有靈利底麼？」良久曰：「比擬張麟，兔亦不遇。」

南書記者 久依應庵，於趙州狗子無佛性話，豁然契悟。有偈曰：「狗子無佛性，羅睺星入命。不是打殺人，被人打殺定。」庵見，喜其脫略。紹興末，終於歸宗。

本州西禪寺行者妙心 母患瘋疾，累年不能步履。受本寺差監作碓坊，嘗用紙糊一毯，實以紙錢，焚

香告天曰：「妙心母老而苦瘋疾，聞世人取肝割股，以行孝者，今願破腦出髓救母。餘年望三界賜祐。妙心今貯火毬內，若使紙錢成灰，而外毬不損，當即償答。」已而果然，遂對空再拜，以左手持斧置顙門，右手執木椎擊之，應手頭裂，暈倒在地不自知，忽有神人呼之曰：「汝適禱何事，乃不起耶？」始甦捫其頂，則髓已出，如鴨卵大，殊不痛楚。漫覆以藥，急走歸。母云：「吾兒將何藥來？」吾已聞馨香矣。」對曰：「昨遇道人，與我此藥。令煮粥和服。」粥成，一室皆香。母一啜而盡，便覺手足輕快，呼曰：「試扶我行。」比下床，若無疾者，母子俱喜。妙心還碓坊，掌事者欲糾其夜出，乃以實告監寺。僧驗之不誣，具白長老，達於州，時王與道尚書作牧，賜錢五十千，絹二十疋，以爲孝養之勸。士夫多作詩贊詠。紹興三十年九月也。

皇朝

文謙 正淳 獨芳 洽 惠顙 照中 法闡 至剛 古鑑 明秀 無可

文謙 十一出家。游吳楚，歷金陵諸山，住台之鴻福寺，振揚宗教。洪武初，召至京師，言論稱旨。居久之，忽謂其徒曰：「吾將去矣。」援筆書偈云：「有世可辭，是衆生見，無世可辭，是如來見。踏倒須彌廬，空虛無輩面。」遂端坐而化。

正淳 字古心，閩縣人。洪武中詩僧，詠苔：「青如蚌血染頰垣，漢寢唐陵幾斷魂。莫笑貧家春寂寞，漸隨積雨上青門。」

獨芳 閩縣人。洪武中鼓山白雲寺詩僧。

神光寺洽上人 精通内外典，戒行高峻，一時林鴻諸公，俱與爲方外之游。

惠顓 閩縣人。洪武中鼓山寺詩僧。

松溪照中禪師 連江繆氏子。出就建寧光孝寺可庭禪師學佛，未幾得度，道資天成，不斷而器。

法闡 閩縣人，鄧定之兄。永樂中鼓山白雲寺詩僧。

至剛 閩縣人。永樂中鼓山湧泉寺詩僧。

古鑑 閩縣人。成化中鼓山湧泉寺詩僧。

明秀 侯官人。嘉靖中鐘山寺詩僧。有《哭鄭善夫》詩：「少谷高人無日起，百年清淚幾時收？嗚呼

滄海談詩夜，翻作延陵掛劍秋。」

無可 詩僧也。有「虹收千嶂雨，湖展半江天」之句，世人誦之。

〔校記〕

〔一〕「鴻山黃蘗」，各本原作「鴻山紅蘗」，據《五燈會元》卷三改。

〔二〕「守拙」，各本原闕本傳。

〔三〕「冲煦」，各本原闕本傳。

〔四〕「妙行」，各本原闕本傳。

〔五〕「揭九峰」，各本原作「偈九峰」，據文義改。

〔六〕「南嶽金輪可觀禪師」，各本原闕本傳。

〔七〕「古」下，常有脫文。

〔八〕「時寒不出手」，各本原作「時寒不出于」，據《五燈會元》卷八改。

〔九〕「有底不會」，《五燈會元》卷八作「什麼生不會」。

〔一〇〕「……如何是口用底曾？」曰：「別抵曾與爭得耶？」，《五燈會元》卷八作「……如何是口用底？」曰：「別抵對你爭得。」

〔一一〕「可遵」，各本原闕本傳。

〔一二〕「僧詢」，《五燈會元》卷十八作「僧洵」。

〔一三〕「西堂」，《五燈會元》卷十七作「東堂」。

〔一四〕《淨空傳》，各本原置《顯端傳》下，據傳記目錄移。

閩書卷之一百三十七

方外志 釋衲(二)

泉州府

唐

匡護 常岌 全藏 懷祐 景欣 弘則 叔端 道昭 瓦棺寺和尚

匡護大師 泉州開元寺世祖也，姓王氏。律行良謹。夏講《上生經》，輒致千人，門徒甚廣。

本州開元寺常岌禪師 九坐智廣之法昆鹽官無等之門人。清儉中食，足不妄履，雖比鄰不一至。周朴、吳軾咸與之游。

鄂洲巖頭全藏禪師 少禮青原誼公，落髮，往長安寶壽寺，稟戒，習經律諸部，優游禪苑，與雪峰、欽山爲友。嘗謂衆曰：「老漢去時，當大吼一聲。」光啓之後，中原盜起，衆皆避地，師端居晏如。一日，賊大至，責無供饋，遂傳刃焉。師神色自若，大叫而終，聲聞數里。卽光啓三年丁未四月八日也。門人焚之，獲舍利四十九粒。

廬山棲賢懷祐禪師 僧問：「如何是祖師西來意？」師曰：「井底寒蟾，天中明月。」

台州湧泉景欣禪師 上堂：「我四十九年在這裏，尚自有時走作。汝等諸人莫開大口。見解人多，行解人萬中無一。見解言語總要知通，若識不盡，敢道輪回去在。爲何如此？蓋爲識漏未盡。汝但盡却，今時始得成立，亦喚作立中功。轉功就他去，亦喚作就中功。親他去。我所以道，親人不得度，渠不得度親人。」

本州開元寺弘則禪師 林性簡素，^(二)不求贏餘。稍食亡有，雖王公予膏腴，却不納。刺史王延彬贈句，有「莫怪我來偏禮足，蕭宮無个似吾師」之語。

本州開元寺叔端禪師 俗氏陳。咸通初，出錢塘道常鴻受學，通維摩、俱舍。遂如蘇臺，傳因明契宗。卒業，去習《唯識》，洛陽義飯，所得之教，洞達真源。後製《義苑搜隱》、《宗鏡四緣》諸抄數十卷。以黃巢亂，歸隱鄉山。生不知酒，州牧延彬問亡恙，端曰：「老苦難寐耳。」延彬遺之酒，而漫之曰藥，曰：「服之寢矣。」端服，果寐也。

泉州開元羅漢閣道昭禪師 姓王氏。從叔端懷倣連學《上生》、《唯識》，悉臻其奧。有僧清信者，將禮文殊五臺，道逢老人問：「何之？」信具爲言，曰：「嘻！五頂遼復，跋涉良苦。泉之開元羅漢閣鈔《唯識論》者，文殊子也。何不卽求而遠爲也？」信如教，請昭，一見而拜。昭曰：「固有衆也，而何拜我？」信具言故。昭曰：「我文殊耶？」信去，昭曰：「此吾土地易言耳。」棄其象於外。夜深，人聞若有號訴者，曰：「我羅漢閣土地也。和尚擯我，君幸哀存。」明求之，得棄象，爲叢祠隘街，戶祝之。昭所抄《唯識論解真書》八十卷，有魏晉筆法。

瓦棺寺和尚 初爲游山侍者，後參雪峰，有契。

五代

雲頂 朝悞 從允 法輝 行通 行修 棲霞 懷岳 弘瑫 知瑤 魏通 義英 師郁 紹卿 行瑫 東禪和尚 清稟 清運 睡龍山和尚 從琛 行欽 玄應 宗顯 行言 法憲 後昭慶和尚(二) 琛 疆

福州東山雲頂禪師 上堂：「儒門畫八卦、造契書，不救六道輪迴。道門朝九皇、鍊真氣，不達三祇劫數。我釋迦世尊洞三祇劫數，救六道輪迴，以大願攝人天，如風輪持日月，以大智破生死，若劫火焚秋毫。人得我門者，自然轉變天地，幽察鬼神，使須彌、鐵圍、大地、大海人一毛孔中，一切衆生，不覺不知。我說此法門，如虛空俱含萬象，一爲無量，無量爲一。若人得一，卽萬事畢。」

本州開元寺朝悞大師 至自西域，以名語人，人稱「大頭蛇」。以其神於燈，人又名之「挑燈道者」。凡暮夜明燈知殿事者，必告之，則其光達曙，不則不爾。

本州開元寺九佛從允禪師 清慎寡欲。夜誦晝習。後唐長興三年，省詢禪師游闕，允參謁，一言而契，詢奇之。自爾誼靜一致，心境同如。閩通文二年五月，取筆寫伽陀告寂。火浴，舍利有數百顆。

本州開元寺法輝禪師 禪餘頗以詩自娛，與呂縉叔、石聲叔、陳原道、釋居億、居全爲同社。嘗題憲師壁曰：「遠浸谿光碧，寒生松檜陰。漁舟驚暮雨，高吹入秋林。此境長年在，吾師靜隱心。」

本州開元寺行通禪師 一食三衣，恬能苦澹。博洽經論，教觀無懈。州刺史陳洪進以旱請雨，通期三日，果如言。洪進奏賜命服，名「法慧大師」。

杭州西湖南山法相院僧行修 陳氏子。生而異香滿室，長耳垂肩。迨七歲猶不言，或曰：「痘

耶？」忽應聲曰：「不遇作家，徒撞破煙樓耳。」長游方外，至金陵瓦棺寺祝髮受具。參雪峰義存。後梁開平間，至四明山中，獨棲松下說法，天花紛雨。又跌坐龍尾巖，結茅爲蓋，百鳥啣花飛繞，經歲爲常。後唐同光二年，至杭之法相，依石爲室，禪定其中。乏水給飲，卓錫巖際，清泉迸出。錢越王以誕辰飯僧，永明禪師告王曰：「長耳和尚，定光佛應身也。」王趣駕參禮。師默然，但云：「永明饒舌。」少頃，跏趺而化。久之，益膚革津澤，爪髮復長，月必三淨。寺僧恐其久而毀也，乃以髮塗骸體。宋咸寧三年，賜號慧大師。

本州開元寺棲霞禪師 與世無競，以道自高。有斗升儲，召之齋，則辭曰：「受別請。」有包笠至者，宿其庵中，顧其寒色滿屋，解包出鍛金子之，霞置諸床下。去七年復來予，霞笑曰：「卿惠尚存。」出視，封塵厚矣。包笠歎曰：「如此道人，誰能垢之？」俛取舊物去。

漳州報恩院懷岳禪師 僧問：「十二時中如何行履？」師曰：「動卽死。」曰：「不動時如何？」師曰：「猶是守古塚鬼。」問：「如何是學人出身處？」師曰：「有何纏縛？」曰：「爭奈出身不得何？」師曰：「過在阿誰？」

福州安國院弘瑄明真禪師 陳氏子。僧問：「凡有言句，皆落因緣方便。不落因緣方便事如何？」師曰：「桔槔之士頻逢，抱甕之流罕遇。」問：「如何是高尚底人？」師曰：「河濱無洗耳之叟，磻谿絕垂釣之人。」問：「十二時中如何救得生死？」師曰：「執鉢不須窺衆樂，履冰何得步參差？」

本州開元寺律泗州知瑤師 王氏子。事觀音甚謹，預知休咎。知軍州事王延彬問：「寺近何祥？」曰：「寺西地湧者數十尺，一二年矣，莫省謂何？」未期月，閩王審知來造七級木塔於此，延彬嘉嘆。

初，玲因感痞疾，塑觀音禱於堂，日誦其名萬，其品百。一夕，夢人嚙以丸藥，既覺，得遺丸床蓐間，痞疾遂愈。

本州福清院師魏通玄禪師 僧問：「如何是西來的的意？」師曰：「立雪未爲勞，斷臂方爲的。」曰：「怎麼則一華開一葉，芬芳直至今？」師曰：「因圓三界外，果滿十方知。」

本州開元寺義英禪師 陳氏子。厲精佛書，浹洽空妙。闕王審知造金銀二藏經，聞英善筆札，致之繕寫，厚資之。不得辭，以買田歸粥院，爲千人結夏鹹粥。疏詞略曰：「天边之無兔無烏，斯緣方泯；世上之有僧有佛，此會長新。」學者紛涌而就，司南無虛日云。

杭州西興化度院師郁悟真禪師 僧問：「如何是隨色摩尼珠？」師曰：「青黃赤白。」曰：「如何是不隨色摩尼珠？」曰：「青黃赤白。」問：「維摩與文殊對談何事？」師曰：「惟有門前鏡湖水，清風不改舊時波。」

漳州隆壽紹卿興法禪師 侍雪峰，山行見芋葉動，峰指動葉示之。師曰：「紹卿甚生怕怖。」峰曰：「是汝家物，曷生怕怖？」師便有省。尋居龍溪，示法僧徒。

福州仙宗院行瑄仁慧禪師 僧問：「如何是西來意？」師曰：「白日無閑人。」

本州東禪和尚 僧問：「如何是佛法大意？」曰：「幸自可憐生，剛要異鄉邑。」

瑞州洞山清稟禪師 參雲門印悟。金陵主請居光睦。未幾，命人澄心堂，集諸方語要。經十稔，迎住洞山。

本州萬安院清運資化禪師 僧問：「如何是萬安家風？」曰：「苔糞倉米飯。」曰：「忽來上客，將何

祇侍？」曰：「飯後三巡茶。」

本州睡龍山和尚 上堂，舉拄杖曰：「三十年住山，得他氣力。」時有僧問和尚：「得甚氣力？」曰：「遇溪過嶺，東拄西拄。」

本州鳳凰山從琛洪忍禪師 僧問：「學人根思遲回，方便門中乞師傍瞥。」琛曰：「傍瞥。」曰：「深領師旨，安敢言乎？」琛曰：「太多也。」

本州福清行欽廣法禪師 僧問：「如何是佛法大意？」師曰：「諸上座，大家道取。」

漳州報劬院玄應定慧禪師 僧問：「如何是第一義？」師曰：「如何是第一義？」學人請益，師何倒問學人？」曰：「汝適來何請？」曰：「第一義。」曰：「尚謂倒問耶？」

本州報恩院宗顯明慧禪師 僧問：「昔日靈山一會，迦葉親聞，未審今日誰是聞者？」師曰：「却憶七葉巖中尊。」

金陵報慈行言玄覺導師 江南國主建報慈院，命師大闡宗猷，海會二千餘衆，別署導師之號，上堂：「此日英賢共會，海衆同臻，諒惟佛法之趣無不備矣。若是英鑒之者，不須待言也。然言之本無，何以默矣？是以森羅萬象，諸佛洪源，顯明則海印光澄，冥昧則情迷自惑，苟非通心上下逸格高人，則何以於諸塵中發揚妙極，卷舒物象？縱奪森羅，示生非生，應滅非滅，生滅洞已，乃曰真常。言假則影散千途，論真則一空絕跡，豈可以有無生滅，而計之者哉？」

隆壽法騫禪師 有僧來參，次日請問「心要」，師曰：「昨日相逢序起居，今朝相見事還如。如何却覓呈心要，心要如何特地疏。」

本州後招慶和尚 僧問：「如何是和尚家風？」師曰：「一甌兼一鉢，到處出生涯。」問：「如何是佛法大意？」師曰：「擾擾忽忽，晨鷄暮鐘。」

本州西明院琛禪師 僧問：「如何是和尚家風？」師曰：「竹簪瓦椀。」曰：「忽遇上客來時，如何祇侍？」師曰：「黃齋倉米飯。」

本州鳳凰山疆禪師 僧問：「白浪滔天境，何人住太虛？」師曰：「靜夜思堯鼓，回頭聞舜琴。」

宋

谷泉 自然 有評 從顯 法周 景彬 元璉 宗已 法殊 宗永 壽長 契稠 本觀 至聰
清錫 戒環 律 昭慶 永程 守卓 有朋 守仁 繼松 粥主 因 普吉(三) 文淑 敦照 法
瑄 太初 宗達 令岑 傳宗 仁岳 德懷 洞淵 祖派 石 講 捷 雲 圓慧 了璨 慈覺
叟 雪徑

文照尼 無着尼

南嶽芭蕉庵大道谷泉禪師 受法汾陽，放蕩湖湘。後省同參慈明禪師。慈明遷住福嚴，師又往省之，少留而還，作偈寄之曰：「相別面今又半年，不知誰共對談禪。一般秀色湘山裏，汝自匡徒我自眠。」

本州開元寺自然禪師 僧問：「老胡出世，目顧四方。和上出世如何表示？」然云：「清氣爲天，濁氣爲地。」曰：「恁麼則信手拈來？」然云：「有甚交涉。」

本州棲隱有評禪師 越天衣義懷之嗣。僧問：「如何是平常道？」曰：「和上合掌，道士擎拳。」問：「如何是無位真人？」曰：「無面目。」

洪州觀音院從顯禪師 上堂，衆集，良久曰：「文殊深讚居士，未審居士受讚也無？若受讚，何處有居士邪？若不受讚，文殊不可虛發言也。大衆作麼生？會若會，真個納僧。」僧問：「居士默然，文殊深讚。此意如何？」師曰：「汝問我答。」曰：「忽遇恁麼人出頭來，又作麼生？」師曰：「行到水窮處，坐看雲起時。」

開元寺法周禪師 同安王氏子。宋初，三應詔講淨名、法華、楞嚴，稱旨，賜章服、師號。咸平初，太守宿翰尊禮之。翰一日相引行殿墀，見其下數莖草，指問曰：「古語道：紫雲蓋地，凡草不生。今何却有？」周應聲曰：「地因培客土，凡草有時生。」

本州開元寺僧景彬 善爲瑜伽，梵人目曰「僧瑜伽」。束已勤甚，寢而安陀會不去身。凡筆道場疏，必薰盥而楷畫，端謹爲之。其《六波羅蜜詠》、《熾盛諸星贊》、《香水偈》，傳瑜伽學者。

汝州廣慧院元璉禪師 楊億侍郎問：「天上無彌勒，地下無彌勒，未審在何處？」師口：「敲磚打瓦。」

本州開元寺宗已禪師 智辯過人，理教俱邃，最爲守湯夏、蔡襄、呂縉叔、劉忠順所知。夏貽詩有「淨瓶常帶水，破衲任生塵」之句。忠順貽詩：「展榻殊無地，看山別有門。潮來供菜圃，雲過隔城村。」

泉州開元寺法殊禪師 晉江柳氏。於內外學，研覈原本。從宗已受佛頂金剛說，復卽法凝學四分，悉通。其義講，輒合數十百人。

本州開元寺宗永禪師 從宗已教授，善講四部經，聽者雲集。

本州開元寺僧壽長 字道融。風度凝遠，行粹識彊。呂縉叔、蔡若水、陳嘉謨皆與游。丁守竦、蔡守

寢並禮重焉。

撫州崇壽院契稠禪師 僧問：「如何是佛？」師曰：「如何是佛。」曰：「如何領解？」師曰：「領解卽不是。」

本州開元寺本觀禪師 去謁法超道者，超豎拳曰：「一塵纔舉，大地全收。古人豎指，便有悟入。汝今何爲觀禮拜？」超曰：「汝何見道便拜？」觀曰：「一塵纔舉，大地全收。」

本州開元寺至聰禪師 說經妙乎空有。人滅，舍利迸棺而出。

南康軍雲居山清錫禪師 僧問：「如何是佛？」師曰：「容顏甚奇妙。」

本州開元寺戒環禪師 開元千佛有某主者業誦《蓮華經》，(四)一鴿日至其前，若聽之者。一日不至，主怪之。夜夢告曰：「我鴿也。得師經力，轉身爲人矣。生某氏，而掖有白毛可識。能一視我乎？」主求視，果然戒環也。空寂自頤，深造道妙。嘗病華、楞嚴舊釋詞義淵渺，作《二經要解》。又論《般若》、《楞嚴》、《法華》三經，前後印：「《般若》之後，慧學方盛。定力未全，故首以楞之大定，使定、慧合一。則是先藉《般若》發明，次繇《楞嚴》修證，終繇《法華》印可。序固如是，奈何耘耨於穫拾之際，敷華於廢落之餘乎！」

本州開元寺本宗律師 胡員外靖季父也。宗律業成，學者南鄉。又，其詩名獨步天聖間。

高郵醴泉寺昭慶禪師 晉江林氏。少跣地任氣，爲賈客往來閩、粵、山東海道，資用甚饒。皇祐中，祀明堂，恩度天下僧。師爲兒時，父母嘗許爲僧，名隸漳州開元寺籍，至是輒謝同賈，以財物屬同產，使養其親，徒手入寺，毀鬚髮受具戒。居無何出，遍參知識。至禾山楚才禪師會中，因看風幡話，忽然有悟，以

爲道妙盡此矣。及見黃龍惠南禪師，示以佛手驢脚，因緣輒漫不省，因服役左右，數年不去，始盡得黃龍之道。熙寧中，游淮南，往來廣陵、天長、高郵間。三邑之人，見師如舊識，莫不靡然心服。師所得法，廣大微妙，又學術無不通達。爲人說法，或以經論，或以老莊，或以卜筮，或以方藥，下至種種一切俗諦之事，隨其根器，示之大方，不獨守古人言句。與孫覺、秦觀、僧道潛相善，觀爲作塔銘。

泉州南峰永程禪師 示衆：「始自鷄峰續焰，少室流芳，大布慈雲，宏開慧日。教分三藏，直指一心。或全提而棒喝齊施，或縱奪而賓主互設，或金剛按劍，或獅子翻身，或照用雷奔，或機鋒電掣，無非剪除邪妄，開廓玄微，直下明宗，到真實地。諸仁者，到此方許一線道，與爾商量，苟或未然，盡是依師作解，無有是處。」

東京天寧長蘆守卓禪師 上堂：「釋迦掩室，過犯彌天。毗耶杜詞，自救不了。如何如何？口門太小。」宣和五年臘七，示寂。闍維日，皇帝遣中使賜香，持金盤求舍利。燕香罷，盤中鏗然。視之，五色者數顆，其大如豆。使者持還，上見大悅。

本州開元寺有朋禪師 心宗爲根，名相爲葉。宣和六年甲辰九月，忽筆偈曰：「張公喫酒李公醉，歸去來兮何所泥。打破虛空笑一場，金剛脚柱帝釋鼻。」踟躕蛻去。守鄭南送其闍維，舍利如雨，壽九十二，而臘七十有二也。《兩會語》、《驚世頌》、《禪餘咏》行世。

漳州羅漢院守仁禪師 僧衆晚參，師曰：「物物本來無處所，一輪明月印心池。」

本州開元寺繼松禪師 清修自最，未嘗惰游。夏則取水，以飲行喝。歿數年，人見其笠蒲葵，擔水市中。

本州開元寺粥主 亡名氏，主千僧粥者也。誦《法華》，律最嚴。有官人來，輒取其盛粥器去，以受摧秣。主厭護神象，磨下，責以守不力。夜行道次，神見粥主，祈請，主曰：「爾護謂何，尚請耶？」神謝曰：「必歸器。」黎明，所養果歸器，且曰：「夜斃二馬矣。」神請如前，主笑曰：「爾罪未追，尚有何功？」神乃乞自効僧庖中，鼠雀無犯者。主位神如故。今祠目「訶責王」。

本州雲臺因禪師 上堂：「菩薩子不在內，不在外，不在中間，且道何處？」良久曰：「南瞻部洲，北鬱單越。」

本州開元寺文淑禪師 嘉意講解，恪勤課誦。嘗失其所常持數珠，心殊念之。俄有鳥群噪生臺，起視之，珠在其上。

本州開元寺敦照禪師 嘗正僧筵內，其徒萬人，照嚴毗尼，以身範物。匡衆之暇，覽《南山圖經》，因太息，以寺之戒壇制度粗陋不盡師古，與其徒作新之。既成，恐來者誕之也，使崇灌者序表法，刻之石。其略曰：「按《圖經》，壇五級者，五分法身也。位北向南者，生善滅惡也。第一級高一肘者，制心一處也。第二級一肘半法輪王壇量者，紹法王位也。第三級高二指者，真俗二諦也。巽方七尺者，七覺意也。下二級，闊陋隨宜，不表法也。四階道者，便陟降也。中尊象者，佛在臨其上也。上三珠中天建壇釋梵所獻者，戒珠瑩也。佛後四位一樓，至二豆田邪、三馬蘭邪、西土請立壇，主四南山師，此方弘律祖也。東西相望十坐者，十師位也。下級十金剛者，不壞也。四圍神象者，護久住也。下列龕穴者，准《灌頂經》：護三歸各十二神，合三十六；護五戒各五神，合廿五；有六十一龕也。上級四王環十六神者，並以本願在處護法也。龕列廿八宿，出沒照臨同護也。欄柱金翅啖龍者，制除業惑也。欄柱下多獅子者，出

家稟具魔外無敢犯，如彼威伏百獸也。內有九龍擎珠，効祇園鐘臺下龍水沐者，灌頂相也。中置法界輪者，以法界境界開悟受者，萬法惟心，無始倒迷，翻惡成善也。爲屋而塗繪者，俾登之上敬也。」

本州開元寺釋法瑄 紹熙五年，朱守佺延之。主尊勝，有行解。

本州開元寺太初禪師 字子愚。世儒者，棄而選佛。於開元尊勝專嚴律行。南劍守陳宓致主報恩。亡何，真文忠公延之大瀉，匡衆二十年，至千人。初以純實接學者，會儒釋大同，爲門使人，終則示本法之圓極以爲室，使宿而不去。嘗出《孟子·夜氣章》以授學者，名《牛山經》。

本州開元寺宗達禪師 字無外。有詩聲，與郡人王顯世、趙彥慧、韓雲瑞、翁定及釋太初同社。

本州雲臺山令岑禪師 僧問：「如何是雲臺境？」師口：「前山後山。」如何是境中人？」師曰：「瞌睡漢。」

本州承天傳宗禪師 僧問：「如何是般若體？」師口：「雲籠碧嶠。」如何是般若用？」師曰：「月在清池。」

廬州興化仁岳禪師 僧問：「如何是和尚家風？」師曰：「曲彙禪牀。」曰：「客來如何祇侍？」師曰：「拄杖子。」問：「一大藏教盡是名言，離此名言如何指小？」師曰：「癩馬揩枯柳。」曰：「學人不會。」師曰：「駱駝好喫鹽。」曰：「畢竟如何？」師曰：「鐵鞭指處馬空嘶。」

本州承天德懷禪師 開化說法，度人甚衆。

本州涼峰洞淵禪師 僧問：「佛與道相去幾何？」曰：「龜毛長一丈，兔角長八尺。」

本州承天寺祖派慈惠禪師 述南北《華嚴》懺文，極詣精妙，至今行世。

本州承天寺珍藏石禪師 有《金剛經註》。

本州尊勝有朋講師 卅歲試經，中選下髮。多歷教肆，嘗疏《楞嚴》、《維摩》等經，學者宗之。

本州資壽院捷師 僧問：「如何是佛法大意？」師曰：「鐵牛生石卵。」曰：「如何是接人句？」師曰：「三門前合掌。」曰：「如何是大用句？」師曰：「腦門着地。」曰：「如何是無事句？」師曰：「橫眠大道。」曰：「如何是奇特句？」師曰：「的。」

本州慧明雲禪師 僧問：「般若海中，如何爲人？」師曰：「雲開銀漢迥。」曰：「畢竟如何？」曰：「棒頭見血。」問：「毗婆尸佛早留心，直至如今不得妙。意旨如何？」曰：「醜拙不堪當。」

本州乾峰圓慧禪師 上堂：「達磨正宗，衲僧巴鼻，堪嗟迷者成群。開眼瞌睡，頭上是天，脚下是地，耳朵聞聲，鼻孔出氣，敢問雲堂之徒，時中甚處安置？還見麼？可憐雙林傳大士，却言祇這語聲是咄。」

漳州淨衆佛真了燦禪師 上堂：「重陽九日菊花新，一句明明亘古今。楊廣棄駝無覓處，夜來足跡在松陰。」

衢州光孝普印慈覺禪師 泉州許氏子。問：「僧父母未生已前在甚麼處行履？」僧擬對，卽打出。或曰：「達磨在你脚下。」僧擬看，亦打出。或曰：「道道。」僧擬開口，復打出。

本氏承天寺叟禪師 道行高潔。作放生池寺中，大旱不涸。

本州承天寺雪徑淨明禪師 奉詔至京說法，稱旨。有金襴袈裟、御扇之賜。

尼附

平江府妙湛寺尼文照禪師 上堂：「靈源不動，妙體何依？歷歷孤明，是誰光彩？若道真如實際，大

似好肉剗瘡。更作祖意商量，正是迷頭認影。」

平江府資壽尼無着妙總禪師 丞相蘇頌孫女。年三十許，厭世浮休，脫去緣飾，咨參諸老，已入正信，作夏徑山大慧陞堂，舉藥山初參石頭，後見馬祖因緣，師聞，豁然省悟，於是聲聞四方。隆興改元，舍人張孝祥來守是郡，以資壽挽開法入院。上堂：「宗乘一唱，三藏絕詮。祖令當行，十方坐斷。二乘聞之，怖走下地，到此猶疑。若是俊流，未言而諭。設使用移星換斗底手段，施擣旗奪鼓底機關，猶是空拳，豈有實義。向上路，千聖不傳，學者勞形，如猿捉影。靈山付囑，俯徇時機。演唱三乘，各隨根器。始於鹿野苑，轉四諦法輪，度百千萬衆山僧。今日與此界地方，乃佛乃祖，山河大地，草木叢林，現前四衆，各轉大法輪，交光相羅，如寶絲網。若一草一木不轉法輪，則不得名爲轉大法輪。所以道於一毫端現寶王刹，坐微塵裏，轉大法輪，乘時於其中間，作無量無邊廣大佛事，周遍法界。一爲無量，無量爲一。小中現大，大中現小。不動步，游彌勒樓閣，不返聞，入觀音普門。情與無情，往相平等。不是神通妙用，亦非法爾。如然，於此個儻，分明皇恩佛恩，一時報足。」且道如何是報恩一句：「天高群象正，海濶百川朝。」

元

契祖 有杰 大圭 如熙 崇會 祥上人 用平

本州開元寺契祖禪師 同安張氏子。妙恩禪師主開元，名僧也，以西禪淨淑，請致祖爲堂中上坐。至，敬愛之。祖嘗疾，恩餽資，不受。偈曰：「政坐虛消人信施，生身受此鐵圍殃。鎔銅熱鐵都吞了，那更教人入鑊湯？」恩益愛其爲人，後使嗣位，代行其道。祖善說法，語渾然天成。真首坐有能，頌聲叢林間，以上隱頌要祖作，祖曰：「自斷胸中更沒疑，行藏那許鬼神知？直饒天下藏天下，未是羚羊掛角時。」真嘆

服，湖江往往傳焉。

有杰道者，頗清狂，出言無度。恒掃除街市，所至童稚群譁之。杰於尊養之者，終必以褻語絕其人。一日澣所垢衣，曰：「明日行矣。」至明日，求僧粥，不予。杰請曰：「求之不再幸予我！」還置粥於几，危坐而化。祖爲闡維曰：「一生杰斗，打硬參禪。街頭巷尾，掣風掣顛。若無末上一解，不直一半文錢。杰道者，誰信寒灰有暖煙？」

釋大圭，姓廖，字恒白，晉江人。博極儒書，兼精內典，常曰：「不讀東魯論，不知西來意。」自號夢觀。有《夢觀集》及《紫雲開士傳》。嘗作《窮箴》曰：「家無其寶，君子不窮。德不有諸己，其窮也。耻彼何人？斯饑乎陳之都，其善自謀，即衆人不如。」

如熙，血書《華嚴》、《楞嚴》、《法華》三經，以精進聞。

崇會，蒞衆嚴，喜興構。

祥上人，號麟叟。受業禪大圭。爲人修靖，喜究內典，若《蓮經》數萬言之廣，誦之如流。又善書，得歐陽率更法。

本州東禪寺用平禪師，與釋大圭善，其沒也，大圭祭之文曰：「公以碩朴，謙而彌尊。遇人以德，亦莫不親。春風無言，勾萌津津。厥行孔淑，維道之醇。人徒知之，謂鳴以文。公推緒余，齎齎其身。四方問奇，繭足造門。公志堅高，却掃深雲。室曰寒趣，藝惟松筠。」

皇朝

原輔 清源 本原(五) 道超 真空 靜 正森

本州承天寺仁山原輔 邑邵家子。戒行精專，道學著聞。洪武初，授本寺僧綱，晝講夜誦，示誨僧俗。南京天界寺清源上人 洪武間，歸省泉州，宋學士濂送之文，稱其「歷抵大方，期於深詣，雖嘗絕學，不廢明倫契經最神之訓，如來孝親之戒，服行不悖」。

僧本源 不遁腥葷，誦經通奧。嘗游漳浦，坐道傍大石上，夜輒放毫光，人異之，爲構靈嶺巖居焉。永樂中，勅召至京，譚論稱旨，屢受獎賞。

釋道超 安平人。能詩。有《雲外語錄》。

真空禪師 六歲出家，既長，游關洛間，歷終南、衡岳。遇師授，解悟。嘉靖己未，人羅浮山永福寺寄食，僧爲之紉針裹衲，或時跌坐彌日，人莫知也。壁間偈語微露禪機。時歸善集尚書夢熊讀書寺中，叩其不繇文字，大加敬禮，而真空亦知夢熊非常人，間示神通，令自識念顯晦休咎，且曰：「數十年來當驗。」後至五年，止宿訶林，道力大著，遂廣爲衆僧說法，頂禮者千餘人。徙止觀音山，一日醮集，令弟子置木龕曰：「將歸矣。」衆驚異，爭執卷請偈。龕成，辭衆人坐，而夢熊適來，復出龕，辭畢，遂入閉龕，弟子環禪誦，夜半，三昧火自龕中出，遂化。

靈源紫雲室靜上人 通禪，與王慎中游。

· 如和尚 詹司寇仰庇爲作傳：「一如和尚者，晉江後洋楊氏子。法名正森，又自名定心。住本郡法石泰嘉寺、獅頭巖樂山寺、清源南臺室、承天寺、漳天柱巖。所至躬勤作務，藝圃自活，不畜徒屬。一鉢一衲，久輒徙去，曰：『身非吾有，又何爲之罣礙？』年八十餘，一日爲人畫梅，遽然坐化。」

建寧府

唐

慧海 慈濟、戒定 約

越州大珠慧海禪師 初參馬祖，於言下自識本心，不繇智覺，踊躍禮謝，晦跡藏用，外示癡訥。自撰

《頓悟入道門論》一卷。

慈濟、戒定二禪師 修道建陽縣之福先教寺，苦行三十餘年，坐化寺中。一俛一仰，骨蛻猶存。

建州白雲約禪師 僧問：「不坐偏空堂，不居無學位，此人合向甚麼處安置？」師曰：「青天無電

影。」

五代

令舟

建州白雲令舟禪師 學徒問：「三台有請，四衆臨筵。既處當仁，請師一唱。」舟曰：「夜靜水寒魚不

食，滿船空載月明歸。」

宋

可勳 餘旺 法昌 慧素 慧崇 元素 宗元 慧升 吳十三 慧光 圓悟 嗣公 顯智

覺庵尼。

宣州興福院可勳禪師 僧問：「如何是道？」曰：「勤而行之。」問：「何法空？」師曰：「不空。」有偈

示衆曰：「秋江煙島晴，鷗鷺行行立。不念觀世音，爭知普門入。」

建州崇梵餘禪師 上堂：「直須向黑豆未生芽時擣取。」良久，召大衆曰：「劍去遠矣。」

本府乾符大同院旺禪師 僧問：「如何是祖師西來意？」師曰：「入市烏龜。」口：「意旨如何？」師曰：「得縮頭時且縮頭。」

福仙寺釋法昌 建陽王氏子。服勤苦事，不拔生草，不剪生柴。着破衲以養蠟虱，常翻易使之均。

熙寧辛亥，忽告人曰：「吾來年五月十八日當去。」至期果然。

本府萬壽慧素禪師 紹興二十三年六月朔，沐浴趺坐，書偈曰：「昨夜風雷忽爾，露柱生出兩指。天明笑倒燈籠，拄杖依前扶起。拂子踣跳過流沙，奪轉胡僧一隻履。」儼然而逝。

建陽僧慧崇 工畫鵝，爲鷺鷥。尤工小景，善爲寒汀遠渚瀟灑虛空之象。

福州普賢元素禪師 上堂：「兵隨印轉，三千里外絕煙塵；將逐符行，二六時中淨裸裸。不用鐵旗鐵鼓，自然草偃風行。何須七縱七擒？直得無思不服。所謂大丈夫秉慧劍，般若鋒兮金剛焰，非但能摧外道心，早曾落却天魔膽。」

竹原宗元庵主 本郡連氏子。久依大慧，分座西禪。丞相張浚帥三山，以數院迎之，不就。歸舊里結茆，號衆妙園。宿衲、士夫交請開法，示衆曰：「若究此事，如失却鑰匙相似。祇管尋來尋去，忽然撞着，開個鑰了，便見自家庫藏。一切受用，無不具足，不假他求。」又曰：「諸方爲人抽釘拔楔，解黏去縛，我這裏爲人添釘着楔，加編加縛。了送向深潭裏，待他自去理會。」

泉州延福寒巖慧升禪師 上堂：「盡十方世界，會十世古今，都盧在裏許，偈偈塞塞了也。若乃放開

一針鋒許，則大海西流，巨嶽倒卓，鼉龜魚龍，蟬蝦蚯蚓盡向平地上湧出波瀾，游泳鼓舞。然雖如是，更須向百尺竿頭自進一步，則步步踏轉無盡藏輪，方知道鼻孔搭在上唇，眉毛不在眼下。」

本府仙州山吳十三道人 給侍開善。紹興庚申三月八日夜，適然啓悟，占偈呈善，曰：「元來無縫罅，觸着便光輝。既是千金寶，何須彈雀兒？」善答曰：「啐地折時真慶快，死生凡聖盡平沉。仙州山下呵呵笑，不負相期宿昔心。」

信州龜峰晦庵慧光禪師 卓拄杖曰：「一人腦後露腮，一人當門無齒，更有數人鼻孔沒半邊。不勞再勘爾。諸人休向這裏立地瞋睡，殊不知家中飯糲鍋子，一時失却了也。」

崇安開善院圓悟和尚 法性圓徹，學貫儒釋。嘗和晦庵梅詩，有「可憐萬本凋零後，屹立風霜慘淡中」之句。又贊晦庵像云：「巖巖泰山之聳，浩浩海波之平。凜乎秋霜澄肅，溫其春陽發生。立天地之本，極萬物之性情。傳先聖之心印，爲後人之典刑。」順寂之日，晦庵哭以詩曰：「一別人間萬事空，焚香瀟茗恨相逢。不須更話三生石，紫翠參天十二峰。」悟又善畫，喜作竹石，號「枯崖」。

嗣公和尚 嘗師事胡文定公。父淵與文定友善。後棄儒就釋，住雲居院，不復出山。文定寄以詩：「十年南北斷鴻鱗，夢想雲居頂上人。香飯可能長自飽，也應分濟百年身。」

顯智和尚 居永豐院。一日升座，演說不生不滅之旨，復作頌曰：「四大本空，六塵非有。一點靈光，天長地久。」擲筆而逝。

尼附

覺庵道人 建寧游察院侄女。志不出適，留心祖道，於圓悟示衆語下了然，悟曰：「更須覓却所見，

始得自繇。」祖答偈曰：「露柱抽橫骨，虛空弄爪牙。直饒玄會得，猶是眼中沙。」

元

道鎮

海珠禪師 名道鎮。住天心寺。口誦《金剛經》，告僧示寂。至期，香湯沐浴，袈裟龍座，自號「無盡意菩薩」，偈成而逝。

皇朝

東谷和尚 祖庭和尚〔六〕

東谷和尚 名大震。洪武間天心寺僧。骨相奇秀，清修苦行。年八十餘，趺坐化，人謂尸解。

祖庭和尚 初事儒，聞天界宗泐來復名，往師之。居東林庵，嘗賦詩調時上云：「除却淵明賦歸去，更無一箇肯休官。」有《語錄》行於叢林。

延平府

宋

照覺 安分 祖珠 妙道尼

江州東林興龍寺常總照覺禪師 尤溪施氏子。久依黃龍，密授大法決旨。出住泐潭，次遷東林，皆符讖記。楊龜山過廬山，與論性，謂：「本然之善，不與惡對。」胡安國亦喜其說。蘇東坡作《真譜》：雲堂蔣公，僧中之龍。

本州劍門安分庵主 與木庵同肄業安國，後依懶庵。未有深證，辭。謁徑山大慧，行次江干，仰瞻宮闕。聞街司喝「侍郎來」，釋然大悟，作偈曰：「幾年箇事掛胸懷，問盡諸方眼不開。肝膽此時俱裂破，一聲江上侍郎來。」遂徑回西禪。懶庵迎之，付以伽梨。後庵居劍門，化被嶺表。所作偈頌，走手而成，凡千餘首，盛行於世。

荆南府公安遜庵祖珠禪師 南平人。上堂：「不是心，不是佛，不是物，瀝盡野狐涎，趯翻山鬼窟。平田淺草裏，露出焦尾大蟲；太虛寥廓中，放出遼天俊鶻。呵呵露風骨，等閑拈出衆人前，畢竟分明是何物？」

尼附

温州淨居尼妙道禪師 尚書黃公裳之女。開堂，拈起拂子曰：「還見麼？若見，被見刺所障。」擊禪牀曰：「還聞麼？若聞，被聲塵所惑。直饒離見絕聞，正是二乘小果。跳出一步，蓋色騎聲，全放全收，主賓互換。所以道欲知佛性義，當觀時節因緣。敢問諸人，卽今是甚麼時節？蕩蕩仁風，扶聖化熙熙，和氣助昇平。」

皇朝

無求

釋無求 允溪劉氏子。少業儒，博涉群書。尋棄爲僧，遍游名山，有詩名。

汀州府

唐

水塘和尚

水塘和尚 馬祖法嗣也。

宋

智孜 系南 無空上人

本州開元智孜禪師 長汀蕭氏子。上堂：「寒空落落，大地漫漫。雲生洞口，水出高原。把定則十方世界恍然，放行則東西南北坦然。茫茫宇宙人無數，箇箇鼻孔遼天。」孜又能詩，洪駒父見其所作，擊節賞之。

廬山羅漢院系南禪師 上堂：「禪不禪，道不道，三寸舌頭胡亂掃。昨夜日輪飄桂花，今朝月窟主芝草。」臨寂，陞座告衆曰：「羅漢今日倒騎鐵馬，逆上須彌，踏破虛空，不留朕迹。」

無空上人 與逸士謝韶、李植友。韶病，無空往視，誠韶子曰：「有二耗鬼索饌，與之即愈。」既三年，空至韶家曰：「可備喪具。」韶果得病，逝之日，沐浴，衣冠，刻候而去。

興化府

唐

耽章 令言 宣意 無際

撫州曹山耽章本寂禪師 莆田黃氏子，涅槃之兄也。年十九，往福州靈石出家，二十五登戒。尋謁洞山，遂往曹溪禮祖塔。回吉水，衆嚮師名，請開法。師志慕六祖，遂名山爲「曹」。值賊亂，乃之宜黃。法

席大興，學者雲萃。洞山之宗，至師爲盛。

泉州開元寺令言禪師 仙游人。苦行，習內典。出游燕趙，傳《法華》、《上生》二經，通昔不寐。久之，二經學者紛集其門。宣宗末年，荼毗葬昇北山，怪其龜輕，開視無有。

宣宣 令言兄子也。少游學，通經，能文章。去縫掖，從令言爲弟子。人嵩山會善寺受具，爲大僧。還求靈贖，教授四分、俱舍、涅槃，咸究通之。乃爲二衆依止，檢身以律，中食不渝，一室晏如，惟清水楊枝而已。

無際 居金仙院。精持《蓮花經》。石忽涌泉，因立瑞泉庵。

五代

慧球

福州安國院慧球寂照禪師 莆田人。上堂，僧問：「佛法大意，從何方便頓人？」師曰：「人是方便。」

宋

其辯 有瑞 戒香 以棲 道旻 伯新 務欽 海瑩 守惠 慶恩 德潛 有南 正洪 宜燦
興化軍西臺其辯禪師 上堂，舉臨濟無位真人語，召大衆：「臨濟一擔，西臺一堆。一擔一堆，分付阿誰？從教撒向諸方去，笑殺當年老古錐。」

東京褒親旌德院有瑞佛海禪師 興化軍陳氏子。上堂：「有佛世界，以一塵一毛而作佛事，令見一法者而具足一切法，故權爲架閣。有佛化內以忘言寂默爲大佛事，使其學者離一切相，卽名諸佛，故好與

三下火抄。有佛土中以黃花翠竹而爲佛事，令觀相者見色卽空，故且付與彌勒。有佛寶刹以法空爲座而示佛事，裨其行人不著佛求，故勘破了勾下。有佛道場以四事供養而成佛事，使知足者斷異念，故可與下載。有佛妙域以一切語言三昧作其佛事，令隨機人者不捨動靜，故爲渠裝載大衆，且道於中還有優劣也無？」良久曰：「到者須知是作家。」

台州真如戒香禪師 上堂：「孟冬改旦曉天寒，葉落歸根露遠山。不是見聞生滅法，當頭莫作見聞看。」

隆興府百丈以棲禪師 上堂：「摩騰人漢，達磨來梁。途轍旣成，後代兒孫，開眼迷路。若是箇惺惺底，終不向空裏採華。波中捉月，謾勞心力。畢竟何爲山僧？今日已是平地起骨堆，諸人行時，各自著精彩。」

江州圓通道旻圓機禪師 世稱「古佛」。生五歲，足不履，口不言，母抱游西明寺，見佛像，遽履地合爪，稱南無佛，仍作禮，人大異之。去大梁，依景德寺德祥出家。試經得度，徧往參激，皆染指。親馮山禪師最久，晚慕泐潭，往謁。師陳歷參所得，不蒙印可，最後有所擬對，潭首肯之。後開法灌溪，次居圓通，以符道濟禪師之記。朝廷聞其道，會宰臣爲之請，錫以命服與圓機號。

伯新 梧溪初祖也。鄒道卿、黃山谷與結物外交。鄒題梧溪有云：「梧溪老人伯新，忘情人也。而特愛予草書。取紙篋中一無有，乃折寢禮六幅書之。」黃題梧溪詩云：「同行野僧六七輩，亦有文士相追隨。」伯新與焉。

務欽師需禪師 福帥以雪峰招致。張丞相延之幽巖。退居龍紀，榜室曰「大懶」。將歸寂，其徒請頌，

師曰：「釣客不持竿，玉女不畫眉。」何大圭贊之曰：「佛海英傑，叢林耆舊。」晚得嗣曰仁秀，獲知梁丞相，請住雪峰。

海瑩 字湛然。永豐丞謝洪叔也。與人懶同參需禪師，俱爲上徒。游江淮間，禪流號爲瑩徹底。

守惠 陳姓。三人內說法，賜號冲真密應通慧禪師。住江州圓通院。中秋夜示衆曰：「山僧生來百拙，開口都無一說。今夜指空畫空，笑倒清風明月。」行門謹密。歸寂數日，神色如生。

慶恩 初爲縣小吏。令詹卓然知其非凡相，因度爲僧。受業水陸名僧圓覺禪師。遣之，雲游江西，參老衲禪師，道價藉甚。京西路監司保奏，延住大洪山。繼而丞相趙雄、周必大又招住荆門軍玉泉景德院。逝之日，沐浴升堂，遣人辭丞相及諸檀施，遂作頌云：「來不入門，去不出戶。打破虛空，日輪坐牛。」

德潛 龔姓。參政茂良之兄。通儒釋學，住經山，自號「寓庵」。時召人內說法，賜偈云：「信手拈來說，宗乘數百句。僧歸寺寂寥，一字無着處。」又有宣一者，寓泉州西羅漢禪林，謂之僧中龍象。

有南 秉性慧達，以詩自娛。游泉之開元、承天，每所過闐闐市易之家，則獲息倍蓰，市者爭徑其至，人遺之錢，卽納懷袖，至數百，則拋與兒童，大笑爲樂。江給事每敬重之。一日，忽語其徒曰：「翼日當與衆別矣。」至期，趺坐而化。或以告給事，給事詣見之，乃於座上微開目睫，口授以偈云：「東省書問，頻續佛日。衣鉢相傳，試問來去。因緣亭亭，江月橫天。」

白鹿禪師正洪 性地圓明，戒行堅固。誘掖學徒，穆如春風。偈頌高古，禪林推服。

宜燦 葉氏子。棄儒從釋，頓悟上乘。詩律尤高，湖北諸司延請，住公安三聖寺，其詩集流行荆楚間。

皇朝

心明 了住

心明 成化初，雲游至天王寺。興廢墾田，爲久駐計。敬禮七大夫，士大夫亦重之。年九十餘，跏坐而化。

梅山了住法純禪師 平海衛人。依漳州閒寂首座剃髮受具。往平和開創棲雲巖，徒侶叢集。又棄去，孤隱芹山，六年不出。後從首座清源坐夏四。經同安，同安四衆歸依，遂築室於梅山殿傍，懇師居焉。將示滅，七日前叮寧告衆，閉目而化。十日後弟子啓龕視之，面色如生，頭髮更長。塔於漳之南山寺側。

邵武府

唐

隱峰

五臺山隱峰禪師 初游馬祖之門，未能覩奧。復來往石頭，後於言下相契。冬居衡嶽，夏止清涼。元和中，薦登五臺，路出淮西，屬吳元濟阻兵，違拒王命。官軍與賊軍交鋒，未決勝負，師曰：「吾當去解其患。」乃擲錫空中，飛身而過。兩軍將上仰觀，事符預夢，鬬心頓息。師既顯神異，慮成惑衆，遂入五臺。於金剛窟前，將示滅，先問衆曰：「諸方遷化，坐去、卧去，吾嘗見之，還有立化也無？」曰：「有。」師曰：「還有倒立者否？」曰：「未嘗見有。」師乃倒立而化，亭亭然其衣順體。時衆議昇就茶毗，屹然不

動。遠近瞻覩，驚歎無已。師有妹爲尼，時亦在彼，乃拊而咄曰：「老兄疇昔不循法律，死更焚惑於人！」於是手推之，憤然而路，遂就闍維，收舍利建塔。

宋

洪英

隆興府泐潭洪英禪師 示僧徒曰：「問也無窮，答也無盡。問答去來，於道轉遠。何故？況爲此事，直饒捧頭薦得，不是丈夫。喝下承當，未爲達士，那堪更向言中取則，句裏馳求。語路尖新，機鋒捷疾，如斯見解，盡是埋沒宗旨，玷污先賢。於吾祖道，何曾夢見？祇如我佛如來，臨般涅槃，乃云：吾有正法眼，藏涅槃妙心，付囑摩訶大迦葉。迦葉遂付阿難，暨商那和修優波鞠多。諸祖相繼，至於達磨西來，直指人心，見性成佛，不立文字語言，豈不是先聖方便之道？自是當人不信，却自迷頭認影，奔逐狂途，致使鈴鐺流浪生死。諸禪德，若能一念，回光返照到自己脚跟下，褫剥究竟將來，可謂洞門豁開，樓閣重重，十方普現，海會齊彰。便乃凡聖賢愚，山河大地，以海印三昧。一印印定，更無纖毫透漏。山僧如是舉唱，若是衆中有本色衲僧聞之，實謂掩耳而回，笑破他口。大眾且道，本色衲僧門中，一句作麼生道？」良久曰：「天際雪埋千尺石，洞門凍折數株松。」

皇朝

徹空

徹空 光澤人。年二十餘，善持戒行，凡六根之賊，一切屏棄。與其徒二人，枯坐武夷山大王峰巖。阿中，草團蒲簟，了無長物。其峰下飲上哆，疊石數十尺，石上架梯十數級，皆帖壁陡樹，乃可以登。方伯

趙維垣、萬虞愷檄建安、崇安二縣，營屋而居之。

漳州府

唐

浮石和尚 羅漢和尚

浮石和尚 上堂：「山僧開箇卜鋪，能斷人貧富，定人生死。」僧問：「離却貧富生死，不落五行，請師直道。」師曰：「金、木、水、火、土。」

本州羅漢和尚 初參關南，問：「如何是大道之源？」南打師一拳，師遂有省。乃爲歌曰：「咸通七載初參道，到處逢言不識言。心裏疑團若桡桡，三春不樂止林泉。忽遇法王瓊上坐，便陳疑懇向師前。師從瓊上那伽起，袒膊當胸打一拳。駭散疑團獨狃落，舉頭看見日初圓。從茲蹬蹬以碣碣，直至如今常快活。只聞肚裏飽膨脝，更不東西去持鉢。」

五代

超悟 可儔 道熙 行崇 無逸

本州保福院超悟禪師 僧問：「魚未透龍門時如何？」曰：「養性深潭。」曰：「透出時如何？」曰：「纔昇霄漢，衆類難追。」曰：「昇後如何？」曰：「垂雲普覆，潤及大千。」曰：「還有不受潤者也無？」曰：「有。」曰：「如何是不受潤者？」曰：「直機撐太陽。」

本州保福可儔禪師 僧問：「如何是和尚家風？」曰：「雲在青天水在瓶。」

本州報恩院道熙禪師 僧問：「明言妙句即不問，請師真實道將來。」師曰：「不阻來意。」

本州報恩院行崇禪師 僧問：「如何是佛法大意？」曰：「確擣磨磨。」

本州隆壽無逸禪師 開堂陞座，良久曰：「諸上座，若是上根之士，早已掩耳；中下之流，競頭側聽。雖然如此，猶是不得已而言。諸上座，他時後日到處，有人問著今日事，且作麼生舉似？他若也舉得，舌頭鼓論。若也舉不得，如無三寸，且作麼生舉？」

宋

智依 懷璉 端式 倚遇 本權

本州羅漢智依宣法禪師 將示滅，謂衆曰：「今晚四大不和暢，雲騰鳥飛，風動塵起，浩浩地還有人治得否？若治得，水劫不相識。若治不得，時時常見我。」言訖告寂。

明州育王山懷璉大覺禪師 龍溪陳氏子。蘇長公爲作宸奎閣碑，其略曰：「皇祐中，有詔廬山僧懷璉，住京師十方淨因禪院。召對化成殿，問佛法大意，奏對稱旨，賜號大覺禪師。是時北方之爲佛者，皆留於名相，囿於因果，以故士之聰明超軼者，皆鄙其言，詆爲蠻夷下俚之說。璉獨指其妙與孔老合者，其言文而真，其行峻而通，故一時士大夫喜從之。仁宗皇帝與璉問答，親書頌詩賜之，凡十有七篇。一日，賜以龍腦鉢盂，對使焚之，曰：『法，以壞色衣，以瓦鐵食。此鉢非法。』使者歸奏，仁宗嘉歎久之。至和中，上書乞歸老山中，不許。治平中，再乞堅甚。英宗皇帝留之，不可。賜詔許自便。璉既渡江，少留於金山、西湖，遂歸老於四明之阿育王山廣利寺。四明之人，相與出力建大閣，藏所賜頌詩，榜曰宸奎。」

端式 仁宗朝召至京師。與梅聖俞唱和，有十詠詩：日出谷泉，曰占木陰，曰寒溪石，曰孤汀蘋，曰

雲際鐘，曰垂鞭巖，曰天外峰，曰秋原菊，曰漁舟火，曰春溪水。其歸也，聖俞贈之詩：「來居天王都，嘗夢苦竹溪。乃識高僧趣，不爲私物迷。海燕乘華屋，區區竟冲泥。安知矯翼鷗，豈類斷瓦鷄？性同而貧殊，何必莊指齊。」

洪州法昌倚遇禪師 幼棄家，依郡之崇福得度，有大志，自受具游方，名著叢席。參北禪，止留最久。晚至西山，瞻雙嶺深邃，棲息三年，始應法昌之請。上堂：「汝若退身千尺，我便當處生芽。汝若覷面相呈，我便藏身露影。汝若春池拾礫，我便撒下明珠。直得水灑不著，風吹不入，如箇無孔鐵鎚相似。且道法昌還有爲人處也無？」良久曰：「利刀割肉瘡，猶合惡語傷人恨不銷。」

本州保福本權禪師 於晦堂舉拳處徹証根源，機辯捷出。黃山谷初有所入，問晦堂：「此中誰可與語？」堂曰：「漳州權。」師方督役開田，山谷同晦堂往，致問曰：「貞歲還知露柱生兒麼？」師曰：「是男是女？」黃擬議，師揮之。堂謂曰：「不得無禮！」師曰：「這木頭不打，更待何時？」黃大笑。上堂，舉「寒山偈」曰：「吾心似秋月，碧潭清皎潔。無物堪比倫，教我如何說？」老僧卽不然。吾心似燈籠，點火內外紅。有物堪比倫。明朝日出東。」死和尚見之，嘆曰：「權兄提倡若此，誠不負先師付囑也。」

元

智順

天寶山智順禪師 樞院三鐵開樞公，名僧也，授順心要。順運而行之，似有階漸，欲依樞住，樞曰：「奈何不於大叢林，頡頏局此蠶殼中耶？」拂袖入。順潸然出泣。樞聞歎曰：「吾知順爲法器，姑試之耳。」延入僧堂，順壁立萬仞，無所回撓。踰月，便於中園瓠瓜，觸發妙機。四體輕清如新，浴出室，一毛

孔皆出光明。去之尋師，一無所遇，後來歸樞，樞問所證，曰：「最上一乘尚在萬里。」一日忽有省，厲聲告樞曰：「南泉敗開，今已見矣。」樞曰：「不是心，不是物，不是物是何物？」順曰：「地上磚鋪，屋上瓦覆。」樞曰：「即今南泉在何處？」順曰：「鷄子過新羅。」樞曰：「錯。」順亦曰：「錯。」樞曰：「錯錯。」樞囑順善自護。樞捐館，順主院事。

皇朝

智海

本州開元寺智海禪師。號閒寂。該誦精講，法力高勝。來開堂泉州半嶺，王慎中贈詩二章：「峻絕高峰透步難，黃龍三問是巖關。繡鴛呈出針紋隱，駿馬自惊鞭影間。」其二：「生如靈樹契宜符，貶剝諸方沒破除。自笑欲談詞忽喪，江州鈍置老尚書。」

福寧州

唐

靈祐 妙覺

潭州鴻山靈祐禪師。長溪趙氏子。年十五出家，依本郡建善寺法常律師剃髮，於杭州龍興寺究大小乘教。二十三，游江西，參百丈。丈一見，許之入室，遂居參學之首。司馬頭陀自湖南來，謂丈曰：「頃湖南尋得一山，名大鴻，是一千五百人善知識所居之處。」丈曰：「老僧住得否？」陀曰：「非和尚所居。」丈曰：「何也？」陀曰：「和尚是骨人，彼是肉山設，居徒不盈千。」丈曰：「吾衆中莫有人住得否？」陀曰：

「待歷觀之。」時華林覺爲第一座，丈令侍者請至，問曰：「此人如何？」陀請罄歎一聲，行數步。陀曰：「不可。」丈又令喚師，師時爲典座。陀一見，乃曰：「此正是瀉山主人也。」丈是夜召師入室，囑曰：「吾化緣在此，瀉山勝境，汝當居之。嗣續吾宗，廣度後學。」而華林聞之，曰：「某甲忝居上首，典座何得住持？」丈曰：「若能對衆下得一語出格，當與住持。」卽指淨瓶問曰：「不得喚作淨瓶，汝喚作甚麼？」林曰：「不可喚作木楔也。」丈乃問師，師踢倒淨瓶便出去。丈笑曰：「第一座輪却山子也。」師遂住焉。是山峭絕，曼無人煙，猿獠爲伍，橡栗充食。經於五七載，無來者。師自念言：「我本住持，爲利益於人，旣絕往還，自善何濟？」卽捨庵而欲他往。行至山口，見蛇虎狼豹交橫在路，師曰：「汝等諸獸，不用攔吾行路。吾若於此山有緣，汝等各自散去。吾若無緣，汝等不用動，吾從路過，一任汝喫。」言訖，蟲虎四散而去，師乃回庵。未及一載，懶安上座同數僧從百丈來，輔佐於師。安曰：「某與和尚作典座，待僧及五百人，不論時節卽不造粥，便放某甲下。」自後山下居民稍稍知之，率衆共營梵宇。連帥李景讓奏號同慶寺，相公裴休嘗咨玄奧，繇是天下禪學輻輳焉。大中七年正月九日，盥漱敷坐，怡然而寂。壽八十三，臘六十四。

妙覺大師 中和間居鳳山，開山建寺。鑿石爲柱，石不能開，封竹篋鞭之，石隨裂。昇之不動，又封篋鞭之，石隨起。天旱無水，卓錫出泉。

五代

志勤 道閑

福州靈雲志勤禪師 本州長溪人也。初在瀉山，因見桃華悟道，有偈曰：「三十年來尋劍客，幾回落葉又抽枝。自從一見桃華後，直至如今更不疑。」瀉覽偈，知其所悟，與之符契。往後山，堂僧問：「如何

得出離生老病死？」師曰：「青山元不動，浮雲任去來。」

福州羅山道閑禪師 長溪陳氏子。出家龜山寺，年滿受具。徧歷諸方，參石霜巖頭，服膺其教。閩帥飲其法味，請居羅山，號法寶禪師。臨遷化，上堂，良久乃曰：「欲報佛恩，無過流通大教。歸去也，歸去也。」莞爾而寂。

宋

木蛇 普華 道隆

木蛇禪師 寧德漳彎阮氏子。大觀中，受業杭州天竺寺，法名邦靜。詞偈高古，程尚書顯謨師之。紹興辛亥，程帥閩，請住持鼓山寺。僧堂有木蛇，或預戒，及樂施者登山，木蛇輒出門迎之，因號木蛇禪師。

普華 寧德黃氏子。年十六從釋，爲叢林重。初住持金陵報德寺，數年又住持吳門萬壽寺，領袖緇流。

道隆 普華侄也。割股刲肝以療母病。母死，廬墓數年。後落髮入空門，戒行清潔。葉儂寇境，道隆具牛酒，焚香頂臂入賊中，賊爲感動，一鄉全活。

皇朝

原勳 祖恭

原勳 字大用，寧德人，俗姓李。蚤從鳳山僧清溪，持戒甚嚴。元末住持本山。洪武初，造橋建寺，開渠置田，有功梵剎。

祖恭 寧德黃氏子。居金鄱寺。操律甚謹，緇流推服。

何子曰：閩中仙道之盛，則董奉其著。釋衲之盛，則百丈懷海、雪峰義存、黃蘗希運、湧山靈祐其著。董奉、義存，已別載於本州志中，而茲復得仙道三十四人，釋衲三百四十九人焉。其他載於本州山川者，尚未易枚舉也。要以釋衲之徒，《五燈會元》所載，閩中爲盛。而閩中之盛，又在王審知有閩之時。豈非以其崇尚佛教，弘飾寺宇，緇流雲集，起而應之耶？夫其矯誣邪惑，猶能驅一世之慧哲，聆寂表真，著玄言於後世，而況興聖人之教，明先王之道，以導之者也。

贊曰：仙道之教，堅固其軀。非人不遇，非法不符。至於釋門，相去凡夫。靡自靡他，並引覺途。颺流厥初，意慾雙無。道雖二門，心實共模。我擇言要，併載身樞。啓世愚昧，以翼泗洙。

〔校記〕

〔一〕「釋衲」二字，各本原脫，據本書體例補。

〔二〕「後昭慶和尚」，本傳作「後招慶和尚」。

〔三〕「普古」，各本原闕本傳。

〔四〕「開元千佛」，《泉州開元寺志·開上》作「開元千佛院」。

〔五〕「本原」，本傳作「本源」。

〔六〕「袒庭和尚」，各本原置《東谷和尚傳》下，據本書體例移。

閩書卷之一百三十八

方外志 仙道

福州府

蔡

游三蓬

游三蓬 閩清人。少而孤，有田僅足糠覈。久之，不竟耕，與弟乞奴漁釣溪上，日歌呼相和，寒暑以三莎蔽體，閩清人謂之「三蓬」。或憐之，與以短褐，數日，亦棄之。始皇二年辟穀，不飲食。至漢昭時，人有見之武夷山中。

漢

莊君平

莊君平，《夷堅志》云：「福有道人，嘗見老叟，同室歲餘，告之曰：『吾，莊君平也。』取一書授之。天明，叟出不歸。視其書，皆修身度世之說。今但記其語云：『事業與功名，不直一杯水。』」

唐

符契元

符契元 上都吳天觀道士也。德行法術，爲時所重。長慶初中夏晨，告門人曰：「吾習靜片時，慎無喧動。」乃扃戶晝寢。既而，道流四人邀延出門，心欲有詣，身即輒至。離鄉三十餘年，因思一到，俄造其居，室宇攤落，園圃荒蕪，舊識故人，子遺殆盡。舊曾煉藥條山，亦思一游，倏忽已至，恣意歷覽，窮遍巖谷。

宋

陳某 陳通 張與玉 張克真 歐陽器虛

陳某 侯官人。世以巫顯，往來興化縣。郡中郡人疫癘，經其咒治者皆全活。沒而興化人祀之。

陳通 長樂人。與弟靈皆有道術，能驅雷雨除祟。宣和中召至京，符咒輒驗。徽宗悅之，俱封以王爵。沒後，人多祀之。

張與玉 號霜崖。嘗遇異人，授以秘訣，煉伏火丹。從黃宗師授雷法，得飛神御氣之妙。歲旱，禱求立應。

張克真 號平心。初至崇安光化寺，得黃雷困清微雷法。寺中常有妖狐化婦幻人，師召雷擊狐。福寧州旱，師投符龍湫，金魚啣人，頃刻雷雨大作。州人送經飛鸞渡，舟覆，溺者數十人。翼日，他舟過者視覆舟下，師端坐無恙。迎拜歸家，雷電繞匝。

歐陽器虛 宋元之際莫月鼎高足也。善內煉，精愛結爲嬰兒，從頂上出人，冷然風御，倏忽千里，而本身偃然。在靜室中若酣睡也。器虛弟子馬月林，嘗侍於浦城之青華道院，適值仲夏上丁，縣大夫方祀

宣聖，月林問曰：「老、釋修煉，不與生死爲變，儒學不然。未知仲尼之神果長在否？」器虛曰：「善哉問，吾出神觀之。」於是入室靜坐。月林穴壁窺之，見其凝然不動。少頃忽見頂上出神浮空而往，良久返舍，若酣睡初醒，揚眸噓氣。啓戶而出，與月林云：「初至文廟時，見一人絳袍玉帶，周歷堂廡，自左門人，向右門出。進而問之，曰：『文昌君也。』天帝命我爲宣聖察祭誠否。」言訖，步虛而去。良久，主祭官陞殿祭酒，讀祝時，見一道太素之氣，自天而垂貫人殿庭。祭畢，冉冉復上。因歎古之真人飛神謁帝者，未嘗獲瞻其象，惟見金光焜耀，吾今乃知仲尼亦然。」

元

義高 王與敬 周頤真

義高 俗姓陳。早得仙術。元太祖召賜金幣，歸遇貧者，悉分與之。又精兵機，晉王北征，命從行。時方煩暑，王欲試其術，召令降雪。義高齋沐飛符，麾之皂旗，雪紛紛下。後賜歸，端坐而化。趙子昂挽詩云：「世祖龍飛正統天，先生聲價重常年。詩袍碎剪宮娥錦，酒債分還御賜錢。虎衛紅雲通玉笋，鳳池明月送金蓮。梁園一去無消息，荒草寒煙思惘然。」

王與敬 少游湖海，參訪高真，留雷州。遇亢旱，祈禱大應。城中妖興，夜聞人馬聲，與敬治之，頓滅。朝廷宣賜至道玄應通妙法師。至大二年，奉旨還山護冲祐觀。

周頤真 少遇西蜀異人，授以隱書及王遁返閉之秘，因自號山雷子。後從開元觀道士蔡術，嗣靈寶法，凡玄學運用，悉以《易》變通之。元統甲戌歲旱，郡請禱，頤真默運電出袖中，雷雨隨至。未幾，有許其左道，捕之急，頤真挺身立州橋石欄側，捕者不見也。一日，命筆書曰：「我從空來我卽空，我向空歸空自

在。」

皇朝

陳鏗韶 林靖樂 黃介通

陳鏗韶 二十餘喪妻，遂散家資，學長生術。時時至鼓山絕頂，默坐竟日，久能辟穀。其父以爲病狂，拘繫之，見其不食，復舍之。遂遠游大茅、武當諸名山，途遇鄉人，問有識之者，輒不與言。數年復歸，以藥囊遺母。鄉士大夫或慕之，迎致他館，亦不與言。後莫知所終。母啓視囊，悉乾桑葉也。

林靖樂 字紕素，閩縣人。儒道兼通，有禱輒應，任龍虎山宮事。永樂間，賜道錄司右演法，任武當、太岳、太和山大聖，南巖宮提點都督。

黃介通 閩縣人。龍虎山崇禧觀道士。儒雅兩全，有詩集行世。

泉州府

宋

蘇紹成 陳以文

蘇紹成 德化人。委業天慶觀，後隱北山。朱文公嘗造其廬，書「廉靜」二字贈之，且銘其琴曰：「養君中和之正性，去子忿慾之邪心。乾坤無言物有則，我獨與汝鉤其深。」

陳以文 字文仲，同安人。清修學道，居天慶觀三十餘年，守倪思雅敬之。慶元間，賜號守素冲虛大師。

建寧府

宋

徐知常 劉夢鼎 棲霞山人 衛太丞

徐知常 字子中，建陽人。能詩，善屬文，尤通道儒典教。悉神仙事，明其本末。宣和中，除藥珠殿侍宸。

劉夢鼎 崇安忠顯公曾孫也。母未孕時，夢一羽衣手捧三足香爐至其家，曰：「以此寄汝，當有嘉應。」後孕十二月乃生，因名夢鼎。少而聰敏博學。師事侍宸黃雷困，得清微道法，主行靈寶齋醮，多有異應。曾於邵武九龍觀建黃籙太齋，而枯井湧泉，天降甘露。四方從學翕然。一日，南浦真氏延之建醮，遇一道士相謁，問其姓名，云是武夷侍者，迓公回山。須臾不見。及歸家，家人亦夢其然，遂沐浴坐化。

棲霞山人 寄跡松溪縣之棲霞道院。以海門自號，甚有道行，且善書畫，非賢士大夫不交。人莫知所從來，亦莫詳其名氏，第稱之曰海門子。後不知其所從去。

衛太丞 素不能醫，元宵日郊行，遇一老子負薪至，與同坐，且謂：「今夕揚州上元好看燈。」衛曰：「三千里何可得？」老子出青布袱鋪地，俾衛閉目。少頃，令其開視，則揚州城矣。鷄鳴，復用青布袱坐其中，復還故處。一日，值華嶽真人誕日，老子人內慶賀，俾衛立門首，曰：「遇有瞽目人來此，吾師也，即拜之。」有頃，三人皆瞽，一曰扶一老人至，衛即拜。老人人，謂老子曰：「門外之人，有仙骨而無仙方。」乃付藥方一本，指教用藥治病之原。歸，則去家二十餘年矣，鄉人莫知其能醫。耘田人相與言曰：「衛太丞自

謂能醫，少試其術。」一人方午飯，自田中走入室，佯爲病者，衛診脉，(二)謂：「申時當死。」其人擲榆曰：「太丞誤矣，我本無病。」跳躍復田，未踰時，腹痛不可救。後不知所終。

元

金志陽

金志陽 居武夷山。與匡廬道士淵隱，一時號爲真仙。修丹之士，依之者成市。

延平府

宋

謝祐 廖藏 上官道人 董聖者 陳善 饒松

謝祐 沙白水村人。移居歷山，嘗從黃裳學。元豐五年，從裳守泉州。裳遣往建寧，遇異人於水晶宮，留憩三日，授以金符玉冊。歸，遂體骨不凡。復師事薩真人，遂精道術。元祐二年，化去，鄉人祀之，有禱輒應。紹興九年，勅封顯烈尊王。淳熙十六年，賜額正順。

廖藏 將樂人。周游四方，遇異人得養生訣，名聞於朝。宋真宗召見，賜茶，話逾時，藏進詩謝。尋歸祀先塋，辭姻舊去，莫知所往。

上官道人 辟穀煉氣。一日，偈云：「處世紅塵五十八，混世獨存今始沒。時人若問吾歸處，掃盡雲霞一輪月。」後戍兵於廣西見之。

董聖者 沙人。學佛得其宗旨，遂遯跡大部巖穴間，澗飲草茹，與世寰絕。後入尤溪沈水堂坐化，遂

廟食於凡。

陳善 沙人。世力農，有出業。生厭世網，長乃棄家從釋子游，堅持佛行，有得。嘗耕於里中，過芒種不插，或嗤之，答曰：「吾六月乃插，與爾同穫，不晚也。」衆異之。至五月，山水暴漲，秧苗蕩盡，乃再插之，其時六月也。又嘗傭興雲寺主，僧令之糞田，善昇糞上流，灌而下之，一里皆饒。或以告僧，僧責之，曰：「獨汝田欲肥乎？」遂別去。出寺門，以鋤自削其迹曰：「不復來此矣。」遂至洋溪隔頭庵坐化。鄉人迎軀事之。今此鄉之田，必至六月乃插，先插者亦自不長。

饒松 沙人。不樂婚娶。人山採薪，遇二人弈，視之忘返。弈者曰：「可歸矣。」送之出。自是爲人傭田，識者謂其有道術也。旱，主家謂曰：「聞君素有道術，能令水逆溢乎？」松穴地作坎，引水逆上，須臾溢漲。每耕耨處，輒有片雲覆之。坐化毗山，鄉民肖像祀之。文丞相募兵勤王，道經庵下，士卒乏泉渴甚，松幻一道者持壺漿犒之，隨過一軍。丞相異之，問所繇，言姓名居止，倏不見。人庵覩像，儼然持壺者也。

皇朝

俞震齋、黃天玄合傳。

魏雷鳴 林道人

俞震齋 沙人。秘傳符籙，精五雷祈禱術。同時有黃天玄者，住持宜福觀，亦能此術。洪武二十年，省城大旱，藩司召二人祈雨。既至，分東西立壇，私約曰：「吾二人，雨當有辨。」乃以書符硃、墨二硯，分投水缸中。須臾雨至，一壇水黑，一壇水紅。時有贈之詩曰：「三日登壇三日雨，一聲號令一聲雷。」俞晚居其里之三官堂。一日有老嫗求救曰：「吾某山母龍，坐行雨失律，當午時震死，過午無害矣。惟法官可

改此厄。」俞曰：「能幻形小之，藏我鉢盂中乎？」龍如令化小蜉蝣投盂中，俞以令牌覆之，端坐以俟。須臾，暴雨，擊至數遍，過午乃息。俞呼龍曰：「可以去矣。」龍出，仍化老嫗，拜謝約曰：「有祈雨，當如命効力。」每三年輒一來朝，至今六月初有暴風疾雨，山南而北，必曰：「龍姑朝俞」云。

魏雷鳴 沙人。亦精雷霆術。童子有欲爲戲，與之一錢。魏就童掌中作書符狀，令緊握之，至人傍放手，轟雷一聲而散。

林道人 莫知姓名。得仙家煉合之術，以救濟貧乏爲主。有貧人求其術不得，恨之，告之守。守怒，急捕之，林已在門矣。遽召入，秀眉美髯，姿出格外，守望見，已心異之，詞色稍和。試之術，命取水銀一大錠，計重二鎰，付之。林因請水一器，投水銀其中，用木揉之，少頃，澄水已成好銀。守命銀工就地爲爐，依法燒煉，果不變也，乃禮而遣之。而雲間董翰林玄宰來閩就詰焉，曰：「憑學士取一物爲驗。」董取盤中梧子授林，方茶次，林便投人茶盤，隨水所指，立變爲銀，舉座駭愕。董曰：「梧化銀矣，銀可返梧乎？」林接取，再納茶盤，食久出之，故是梧子也。如此者三。林曰：「此真銀矣，五百年後不復變也。」因從容謂董曰：「某之術通天地，役鬼神，非其人不授。觀學士有些道分，故不覺技癢，但某常以陰功救人及物，須藉學士高文，流傳人世。」董許之，中夜思：「惟爲道人文，吾能之。萬一事敗，則吾文誤人。」明日，遣家豎持輕吹二端、織履一輛送林，林已先覺之，迎謂曰：「乃公昨許我傳，夜半生疑。然遣幣致敬，終不失爲長者。敬拜乃公賜。」但曰：「少留，貧道亦欲附壽乃公。」忽拾斷瓦，重可十二鐶，取紫包裹，曰：「途中毋發也。」至館發之，則金色燁然，宛斷瓦狀。董從容叩其人要：「曾煉一神，不委何名，欲呼之，用右掌食指，書神姓名於左掌中指背止二字，神立至矣。」自言讀《黃庭內景》，別有指歸。每於靜夜，密呼

五臟神姓名，其神自出，宛若人形，並長寸許，行動如常，衣色精彩。其分明者，容髮皆具，是神無病。如或一臟受瘕，則此臟之神，颯萎不振。急召使人，忙用工夫，巡還呼出，便不復爾。銀梧子上有星曆類梧子。吳人就董取以救母，小餅金所救亦多，吳兒咸言神仙點金也。董嘗爲人道說於其戲鴻堂。

汀州府

宋

王中正 梁野 黃升 歐陽仙 曹道翁 張道成 劉氏女

王中正 舊名捷，長汀人。咸平中，遇羽士授以鉛汞黃金之術，且戒曰：「非遇萬乘勿輕出。」挾其術走上饒，佯狂呼叫，坐流嶺南。復遇羽士，謂之曰：「姑俟他日。」遂逃至京師，爲有司所捕。供奉官張德權異之，以聞，上命皇城司劉承主問狀，中正面奏，改今名，賜對龍圖閣下。具陳靈異，獻所爲白金，遂特授許州參軍。祥符間，每遇大典禮、大工役，率爲金以進。景靈宮成，進黃金四千九百兩、白金萬有二千七百四十兩；前後金累鉅萬。詔書褒諭，累官光祿大夫、檢校禮部尚書、右神武衛大將軍。後卒於京，命內侍周懷正護喪事，塑像景靈宮。

梁野 一名戴，長汀人，兵部郎中灝之弟。自號野人，居天慶觀左。嘗遇神授以致錢之術，每欲錢，縮手一振，錢輒盈袖。益放曠歌酒，施捨貧乏，人目爲狂。嘗久雨彌旬，薪粒告盡，母責之，戴曰：「所須幾何？」母曰：「多益善爾。」翼朝，戴引薪米數十擔從外來，母曰：「善哉！兒多固好，顧安所得錢乎？」戴曰：「母幸無慮。」振袖償值，一如數，無欠無餘。母方異之。天慶初，灝守廬州，野衣敝衣藍縷人謁，

灝命沐浴更衣，拂而起，忽不見，求之弗得。明午，旅邸有告曰：「昨夜有道人抵宿，晨起窺其室，但見錢垛半壁，不復見人。」灝遣官吏破戶，見錢上有書云：「弟野以煙蘿侶，久俟不果。進辭，冀珍重。有少錢，煩周貧乏。」仍遺所服敝衣，異香襲人，殆非人間所有。灝感歎久之。自是不知所往。

黃升 字正道，長汀人。能呼錢之沉沒江河溝壑間者，又能索口中運真氣鍊之，一晝夜成白金，名曰陳鍊。先是，蔡道人自蜀來，升與厚，道人死城外五里邸中，升爲棺殯。一日，忽有自贛携蔡書來者，具言在崆山相候。升疑之。如是者十餘書，升遂往相見，再拜祈請，示以向時所遇地，有文字筆硯在壁隙間，使歸誦之，忽不見。歸發其殯，則空棺而已。卽往所遇處，取其書讀之，自是能召役鬼神，前知禍福。年八十六，髭髮如漆，後亦尸解。

歐陽仙 清流人。結廬豐順道院，養真修煉。後坐化，鄉人祀之。水旱迎致，能動風雷，隨車而雨。

曹道翁 不知何許人。宣和間，始至清流縣。邂逅道菴初成，遂居焉。狀貌甚野，青巾短褐，終日兀坐。居數年，稍合藥濟病，得者輒愈。每人市必大醉歸。有尾而伺之者，但見其行趨酒家，據床而酌，取金於袖，無餘無欠。至茶食肆亦如之。不則經旬不爨，或詰之曰：「翁無生計，百需無窮，營作何狀？」對曰：「我能呼錢。」或求其術，曰：「吾所呼者，皆深溝巨壑久湮之物。汝若傳之，必睨人帑藏，禍及身矣。」登真觀道士丘居通慕而歸之，嘗獻金一千二百，爲製衣用，翁分取諸故笥，果得之如數。因令居通爲之碾藥，令自摩頂曰：「可使鬚髮不白。」後居通年八十四，髮無一莖白者，獨皤然其鬚。或扣之，曰：「碾藥時未鬚也。」邑有賴岫者，携女子來游。翁取藥小劑，令嚥之，撫其首曰：「爾終身無病，通夕無便。」旋矣，果如其言。一日，戒徒曰：「吾將有適，葬我菴後。」數日，菴鄰江鐸者，見翁幅巾肩傘過濟川橋。江還，知翁

已死，發上啓棺，無一物，乃悟其尸解。

張道成 號款菴，長汀人。少依梁教師學黃光術，得業去遍游，以後不知所終。

附

劉氏女 寧化縣人。父安上，攀龍鄉豪也。女生不茹葷，艷慧喜文。九齡，與羽人談道，自誓不嫁。及笄，父母以許石城何氏子，卜占強行，淡飾就車，劉氏聚族送之。甫越境，忽有白鵝從天下，乘之飛去，莫窮所往。衆異之，創祠乘鵝之地。郡以狀聞，朝命賜祠爲蓬萊觀。郡守陳軒過其下，題詩云：「白鵝乘去人何在，青鳥飛來信已遙。若使何郎有仙骨，也須同引鳳凰簫。」

興化府

皇朝

卓晚春

卓晚春 莆人。生嘉靖間，自號無山子，亦曰上陽子，人呼爲小仙。幼孤無資，行丐於市。八歲善算籌指掌上，雖千萬不爽，言休咎事皆奇中。初不識字，十四能詩，十六善草書。當道聞其名，召見之，輒與抗禮。每有得，以施人。時有善衣脫却下，旁人持去不問也，或邀請之，少拂其意，雖華筵不往矣。少時蓬跣履霜，着黑麻布裙，背加青紗帕子而已。及長，冬寒或贈之縕矣，顧雖霜夜，必露宿石上。或日走浴溪浹，飲水十數甌，曰：「漂我紫金丹也。」有問：「陽何不用七而用九，陰何不用八而用六者？」曰：「合九與六，十之有五也。」問：「天有時壞否？」曰：「天安能壞？故日者，陽也。日出而天地闢。」又曰：「天

亦能壞。子時一陽始生，自子至寅，陽氣始全。自寅至午，陽氣始盛。自午至酉，陽氣漸微。自酉至亥，陽氣復生。」又曰：「無極者如年之十月也，太極者如年之十一月也。」有問日之烏月之兔，曰：「此卯酉之說也。」或問海水，曰：「此天地之精也，而水之淡者，餘氣耳。」諸譚討皆此類，鮮知其解。解者惟林子兆恩，故小仙與林子結方外游。時莆中寇疫頻仍，有問郡中事者，小仙口占謂：「當大厄甲寅歲。」託言北征過江橋，謂人曰：「我去後橋石折，莆陽變矣。」內辰，橋石果折。壬戌，遂有陷城之變，其先知如此。後蛻化於杭州淨慈寺。小仙所爲詩曰：「天上逍遙卓晚春，桃源深處老乾坤。倒騎黃鶴歸滄海，腳帶青天幾片雲。」唐順之作《小仙草書歌》，有曰「瓊譚東海黃公符，蒼古太廟姬王璩。藤纏老樹千尺挂，鷹攫寒崖百鳥慄」之句。

邵武府

宋

馮觀國

馮觀國 游方外，遇異人，得內丹之法，自稱無町畦道人。寓宜春二年，言人吉凶盡驗。或有誚其醉狂者，觀國以詩謝曰：「踏遍紅塵四百州，幾多風月是良儔。朝來應笑酡顏叟，道不相侔風馬牛。」紹興中，端坐而逝。

皇朝

張子冲 方燧(二) 橋仙李存忠(三) 廖半仙(四)

張子冲 賣樵事母。常曰：「一心無罣礙，願見呂先生。」一日，上山判木，忽有道士，衣衫藍縷，至其家，以饑告其妻。妻答云：「未炊，惟蒸糯一斗，待夫歸釀酒可食。」少許，道罄食之。妻大恨曰：「吾夫嗜酒，吾被責矣。」道曰：「不爾累也。可汲水一缸，以餘粒浸蓋。」尋拂袖歸。頃之，冲歸，其妻告之。開缸，酒也。冲驚曰：「呂先生至矣。」追及澗橋，懇其見度，道答：「今日無緣。來年中秋，可於建陽龍游橋中相遇，三人共一日爲記。」冲如期往，見二瞽者搭眇一目人肩，已過橋矣。道責遲，復期來年。冲復往，偶橋中相遇，乃曰：「汝母今日死矣。」無棺可斂，遂卽掌中畫一屋，語冲曰：「請視之，似何所也？」冲答曰：「似北勝寺。」道曰：「我有棺寄西廊下，往取之。」冲遂昇到家。僧俗□，（五）不知其中有棺也。後冲棄妻子，寄跡寺中，創建翠雲菴，居止無定處。凡有錢施者，第取一文云：「但得一錢足，何憂身外身。」國初，縣以爲妖，械積車中，送至京師，開車無見，惟破笠敝衣，竹節冠滿櫝而是。

方燧 郡庠生。早孤，事母至孝。嘉靖三十三年元旦，遇異人於庠之泮橋，授以秘書，燧歸閱之，遂棄儒業。一日，欲爲子娶而無資，其友王止庵知之，拾碎金往市鎔之，成錠出，心一大孔相透。匠賀曰：「某一生不能鎔兩錠，公必爲喜也。」王躬往遺之，至則晚，燧曰：「予欲留日，恐妨君燕，晚行無伴奈何，然予已遣人相送矣。」王出，心疑之，行數步，見前隱隱有燈光，遇友吳姓者邀之道曰：「候公已久，公何來晏也？」王唯唯就席，第見呼盧擲骰，靡不如意，若有助者。至半夜辭去而王家忽有呼門聲，啓視寂然，頃之，王至，訝其門闢。僕曰：「適有扣門者，闢之又不見。」王入室，異香襲人，乃始悟燧之遣人不虛耳。建昌有游生者，慕仙若渴，偶夢仙導，見一人儒冠道服，年可七十，童姿鶴髮，丰神飄然，囑之曰：「汝師也。」覺甚異之。萬曆六年，燧偶游益藩，游遇於塗，卽夢中所見者，遂拜而師事焉。時益王蹶折臂，痛甚，世子

求燧治，至則已知之矣。授之秘術，痛即止，不數日愈。王喜甚，召之燕，賜金帛，不受。王築壇別院待之，世子朝夕執弟子禮。居九年，世子從壇中見紫光結聚，異香滿座，謁壇視得紫珠數十夥，鮮明五彩。進之，王曰：「此寶也。」以遺燧。燧館王所，十四年，一日，遺書游生，三日後召諸友賞雪。如期至，果大雪。酒半酣起，囑衆曰：「予叨王祿養，久無以報，今辭王歸矣。」遂端坐逝。逝之時，人有見燧儒冠道服，曳杖逍遙，從府中出北門去。

橋仙李存忠 性冲和，善笑寡言。縫衣糊口，每得食必懷以貽母。母死，寄食於兄，而以母事嫂。嫂狠妬不相容，譖兄逐之。忠罄身出居昇仙橋之鵲梁下，單衣敝席，外無長物，饑惟就飲者而止之。戴長冠，袖手不言即與否，但嘻笑而已。市中三尺童子皆呼橋仙。歷寒暑數十年，其口嘿然，其容莞然，其體充然，如一日也。或日一往市，或三日一往市，餘惟濃睡而已。時隆冬，有好事者往觀其狀，裸體縮足，兩手互攀足心熟卧，其煖氣猶蒸人，人大異之。自是往市中無不予者，忠亦不受，惟酒則飲之。一日大雪，忠出，有飲者見而招之，飲畢，去，衆問曰：「如此盛寒，君第單衣，何以堪之？」忠笑不言，衆強之，曰：「內不足故，寒即逸去。」衆愕然。未幾而逝。逝之日，有人自武夷來者，見於其處，或又見在白渚橋云，時萬曆之二十五年。

廖半仙 失其姓名。泰寧人。家赤貧，傭耕養母。一日出樵採，遇二老人山中，食之二桃，半仙不食，置懷中欲以遺母。老人曰：「速食之。」語未畢，桃自懷中墜，遂滾入石。半仙逐而啖之，啖僅半，起視二老人，忽不見。自是有力善負。常爲人築田埂，取巨石數十，人不能扛者，手掇之裕如也。平疇無水，插秧須雨，族人謂之曰：「胡不取水灌田，乃袖手望天乎？」荷鋤往，將鋤柄撞入石壁中，大呼曰：「水來

矣，水來矣！」拔柄，泉湧汨汨不絕，灌田數十頃，一鄉賴之。人呼爲半仙。

漳州府

宋

劉希岳 丘元迪 三公

劉希岳 端拱中爲道士，居西都老子觀中。遇異人，得道，號朗然子。嘗自言：「辛勤未逾十年，人驚不老歲月。」俄經一紀，自覺如新。一日，沐浴更衣，陳席而卧。須臾，飛出一金蟬，遂失所在。

丘元迪 咸平庚子爲道士，居本州天慶觀。常遍游名山。祥符間，於龍虎山授籙得道，能驅役鬼神。慶曆丙戌，賜蘭袍。至和甲午，賜號冲元大師。治平甲辰，自知卒日，沐浴衣冠，不疾而化。

三公 不知何許人，亦未詳其姓。兄弟三人，得導引修煉之方，又善八門遁法。嘗將鄉人禦賊，草木皆兵，賊遂敗。後結茅節惠里山中，人覓之，輒黃霧四塞，不知其處。里人名其山曰相山。

福寧州

宋

鄭提刑庖人

鄭提刑庖人者，鄭南之庖人也。南登第後赴京師，携庖人往，至鎮江遇故舊數人，設饌飲之，數客皆稱善，願與同飲食。南許之，庖人不可，曰：「僕能事主，他不願也。」強之，不可，啗之利，不從。南怒遣之。

歸，請曰：「遣歸甚善，但恐鄉人不解得遣之故，願乞一家書以行。」許之。抵家，啓所寄書，乃卽當日發也。家人驚訝，庖人亦失所在。南聞歎詫，且自負平生遇仙，嘗食天庖珍品，必享上壽，後果年九十七而終。

飛〔六〕

周興能

周興能 學道福寧水西觀，後返怡雲堂學煉丹。久之，道成。元統中，別諸徒侶，躡香爐上升。

〔校記〕

〔一〕「診脉」，各本原作「疹脉」，據文義改。

〔二〕「方燧」，各本原脫，據本傳補。

〔三〕「橋仙李存忠」，各本原脫，據本傳補。

〔四〕「廖半仙」，各本原脫，據本傳補。

〔五〕此字各本字迹不清。

〔六〕「飛」，疑誤。

閩書卷之一百三十九

宦寺志

福州府 閩縣

五代

林延遇

林延遇 閩主鱗之宦者也。鱗初娶漢女，使延遇置邸番禺，掌國信。漢主問以闕事，延遇不對，退謂人曰：「去閩語閩，去越語越，處人官禁可如是乎？」及鱗爲李傲所殺，延遇聞變求歸，不許，素服向國哭三日。

泉州府 同安縣

皇朝

張敏

張敏 字輔德，邑浯州人。正統己巳，沙寇起，敏季父益彬集里人保障鄉里。有與張世仇者誣益彬，

入奏之，朝命逮其長者戍軍，其幼丁率閹割之。敏與其兄慶俱在閹割中，送詣京師。稍長，得選人內庭。敏雖幼，言動舉止迥異常兒，凡有謀爲，出人意表。憲宗在春宮，英宗擇內臣爲近侍，敏與焉。敏於衆中，恭慎無過，遇事婉諫微言。憲宗嗣位，敏旦夕在左右，夜具衣冠寢，至子夜輒起以待，有所見聞，未嘗外洩，凡外廷事，一切不干預。用是，忠謹之名溢於官禁。嘗奉命操練騰驤四衛官軍，兼理十九房馬政，監督五軍大營。未幾，賜璽書總督十二團營。敏持嚴而能推心體下，偏裨士卒莫不懷畏。憲宗前後賞賜，若書籍、圖畫、蟒衣、玉器、金鞍之類，不可勝數。又於常廩外，歲給米三十石，特除其家戍軍籍五處，召工爲狼喜神，用玉璽識歲月。敏兄弟三人同人禁掖，俱見寵任。兄本，以御馬太監守備南京，慶，以司設太監鎮守浙江。而諸子暉，鴻臚寺卿；苗，太常寺卿。一門緋綠，輝映八閭，以來未有也。先是，憲宗蓋春秋高未子，其時萬貴妃寵專後宮，莫繇子也。上一日行遇紀淑妃，淑妃有身矣，慮萬貴妃妬，不敢以聞，第託曰病痞，遂得發居安樂堂。既子，且溺之，敏聞之曰：「今萬歲未子，卽不遽上聞，何至棄爲？」密令養之，時時獻餅飴於紀淑妃哺餵皇子。而當是時，吳廢后在西宮，亦保持惟謹。是爲孝宗皇帝。至成化十一年，孝宗皇帝生安樂堂六歲矣，憲宗尚未知，敏時時密結萬貴妃太監段英，乘間言之，顧未有會。一日，敏在上傍爲上櫛，上照鑑嘆曰：「冉冉矣，而未子！」敏伏地曰：「死罪。萬歲有子也。」上叱曰：「安得有？」敏伏地叩頭言狀，上喜曰：「出示我。」孝宗胎髮未剪也，召至前，髮披地走入上懷，牽上衣游戲，搏上髻。憲宗顧示曰：「我子也。」遂出示群臣，群臣大喜。於是上徙居紀淑妃永壽宮，而孝宗得立皇太子。成化乙巳歲，敏被疾，上累遣太醫院官診視，竟不起。訃聞，悼惜，賜銀幣爲殯殮具，遣司設、御馬二監治喪事。復賜寶鈔二萬貫祭二壇，戶部給齋糧麻布，工部造墳，特賜冠帽、牙牌、玉帶殉葬。孝宗卽位，

追賜敏璽書，官其家人。而苗累官南京通政使，列於大九卿矣。其諸子亦至錦衣衛指揮同知，管衛事。而暉亦以慶蔭官光祿寺少卿，食三品俸。賜敏塋地通州三百畝，守卒二十人。其後有錦衣千戶張鵬、張臻，百戶張宏。恩澤之盛，人喘所少。而苗子定，登進士。或敏之死也，萬貴妃恨之，吞金而亡。

延平府 南平縣

皇朝

蕭敬

蕭敬 南平人。正統初，以長隨侍殿。時英宗勞賚近臣，金鑑填集，敬執簿算無差。英宗察敬心計，潛倚任之。一日閱射，命敬，敬三發三中，陞太監僉書監事。奉使荆襄，所過以清約聞。憲宗朝，用內官監督倉，會計明允，宿蠹搜剔殆盡。孝宗朝，入掌司禮，公慎，未嘗涉私，燕間賜問，時有規諫。孝宗大漸，與閣臣劉健等同承顧命。武宗即位，嬖劉瑾等八人，時時內廷娛戲，敬諫曰：「梓宮在殯，鐘鼓之聲日外聞，外謂天子何？」武宗不然也。時外廷知上有所嬖狎，顧不知八人姓名。他日，劉健特進講，敬書八人名，使小豎持投之，曰：「公胡不諫？」健講畢，上內豎所投書。上怒，問主名，健無以對。八人者曰：「必蕭敬也。」因共譖之，然卒不行。楊一清為相，敬時以上命至閣中，政事有失，清求敬附奏，故時抗語侵敬，敬不為動。世宗即位，年八十餘尚侍左右，進止無所踰越。年九十一卒。敬遍觀典籍，能詩好草書。歷事六朝，謙勤儉約如一日。正德中，見諸近倖田園第宅半京師，輒歎曰：「豈吾輩福哉？」有侄孫二人：韶、欽，俱進士。

何子曰：《唐書》：宦官楊思勗，羅州石城人；田令孜，蜀人也。而宋陳石堂普皆以爲福州人。「七閩轉海卽洙泗，僅有令孜與思勗，令人不忍讀史書，不勝林壑溪山辱。」此石堂《詠閩中》詩也。按唐時，諸道進私白，閩中爲盛，坐是閩多闖。杜宣猷來爲福建觀察使，每寒食，遣吏分祭其先壘，時謂宣猷爲勅賜幕戶，然則思勗、令孜大抵然矣。「私白」者，闖兒也。

贊曰：閩在海濱，而有宦闖。林侍霸國，戒口如鉗。蕭事五朝，壽永嵒嵒。志除宵小，施石與鎌。謀用不遂，恪守勤謙。銀同有張，掖庭嗷嗷。劬勞保聖，爰啓龍潛。視彼北土，貂鎗炎炎。孰與斯人，善勞孔兼。

閩書卷之一百四十

閩閭志

福州府 閩縣 侯官縣 懷安故縣 古田縣 閩清縣 長樂縣 連江縣 羅源縣 永福縣 福

清縣(二)

閩縣(三)

元

馬速忽妻

馬速忽妻 速忽，色目人，歷官福建行中書省員外郎，奉使廣東，妻留福州。州悍卒爲變，逼脅之，輒給卒曰：「酒我。」卒大喜，酒之。卒醉，速忽妻持斧擊殺卒，遂爲同營卒所殺，時稱西河女。丈夫速忽感其義，終身不娶。

皇朝

鄭琚妻江日全(三) 葉應暉妻劉氏 工部尚書趙榮妻金氏 李烜妻陳氏 湯泉妻金善觀 羅惟

遠繼妻曾氏 林廷桂妻鄭氏(四) 倪隆妻薛德女倪善

鄭琚妻江日全(五) 早寡，有皎節。洪武中，詔徵節婦之有才學者入教宮人，江應選人見，賜名，欽授內府女官。久之，遣官取其家屬，馳驛賜第。上崩，送歸。成祖卽位，遣司禮太監李培賫幣帛宣人爲內尚寶卿，仍賜第京師以居。十五年，請老，詔遣內官護歸，卒於家。

葉應暉妻劉氏 姑陳患風，動履恃人，而又下也。應暉每與兄弟筭與昇游後園，令諸孫導前爲歡。劉承順惟謹。年九十一卒。孫繼美、繼熙、繼善，皆登科。

工部尚書趙榮妻金氏 聰穎，善柔，閑內訓，精女紅。歸榮，事姑謹。姑遘疾，籲天求代疾，尋愈。榮既貴顯，人覲中宮，所得賜物，必以分諸親舊。榮染疾在告十有四年，躬侍湯藥，未嘗少懈。榮卒，哀毀成疾，尋卒。

舉人李烜妻陳氏 天順七年，烜會試，場屋火，死焉。年二十九，舅姑老，子賓四歲，家貧甚，拮据經營，養老字孤。詔書旌門。

定海千戶所千戶湯泉妻金善觀 生一子銘，方七歲而泉卒，善觀時年二十有五，紡績養姑。姑病，晝夜扶持，湯藥必親，籲天求代。姑卒，鬻資裝，給殯葬，慟哭幾喪明。事聞，旌表。

學正羅惟遠繼妻曾氏 明哲知大義。年二十七寡，畜其前妻子一鸞，不啻己出。惟遠素慷慨樂施，曾咸將順。惟遠死，有姻家負其金二百，曾取券焚之，曰：「吾夫志也。」嘉靖中，以子一鸞貴，封恭人。

舉人林庭桂妻鄭氏 素閑家訓。夫病，割股和粥以療。年二十二守節，卒年八十餘。知府葉溥奏旌焉。庭桂，文安長子也。文安子九人，鄭處諸妯娌和而有禮，成敬而法之。

倪隆妻薛德 德初許於隆，年及矣，會翁媼俱歿，族人謀以歸於隆，德持不可。終翁媼喪，爲諸弟婚。

娶，乃合發，年二十七矣。勤儉惠和，大有造於倪氏。

倪善 隆女也。隆生三子四女，善，其季。未笄，父母云歿，諸兄子衆多，善閨居不嫁，紡績治生，以撫諸侄，以所羨增置祭田。子姓義而服之。卒年八十四。倪氏葬之祖墳之側，奉祀不絕。

右賢女。

宋

施氏 黃氏

施氏 曾氏母。夫亡守志，詔書旌門。

黃氏 李氏母。夫亡守志，詔書旌門。

元

劉氏

劉氏 前行省都事賈訥母，寓居本路錄事司。大德二年，旌表。

皇朝

王英妻張氏 黃□妻林氏(△) 方鸞妻王三小(七) 陳紹惠妻李瑤 楊和生妻王氏 陳啓妻潘氏

葉時彥妻郭氏 余尚春妻鄭氏 高明妻林氏(△) 張璿妻陳氏(九) 林克從妻李氏 鄧標妻吳氏 高

孔文妻鄧氏 龔廷達妻姜氏 李岳妻劉淑馨 林廷振妻鍾氏 庠生林廣妻何容 曾理瑤妻李盡 陳

暉妻唐氏 陳泰妻葉敬小 劉文斌妻葉氏 陳瑤妻胡氏 林璿妻黃氏(一〇) 劉聰妻王信 林世融妻

黃恩 葉惟節妻林紱 陳賢妻張錦 趙懋妻李氏 楊文正妻林秀卿 陳珍妻楊氏 楊珙妻羅氏 陳

洪妻石氏 官鼎妻陳氏 謝廷最側室陳氏 張璉妻孫氏 鄭坦妻鄧氏 林倬妻陳氏 陳正謨妻張氏
鄧煒妻陳氏 陳臺妻張氏 林絡妻許氏 莊弘紳妻鄧氏 沈聰妻陳氏 黃煥妻曾氏 葉英妻陳氏
蔣國華妻李氏 鄧魁妻張氏 陳鳳儀妻林氏 王公任妻林氏 林氏二烈女 趙天麟妻方氏 陳一修
妻施氏 陳文禕妻蔡氏 翁文煒妻葉七娘 鄭洛妻張氏 謝贊妾劉氏 林世顯妻余氏 周詔妻歐氏
陳源清妾邵氏 林庭奎妾王氏 劉尚敬妻黃氏 鄧應禎妻謝氏 林道行妻吳氏 鄭人彥妻董氏 鄭
鼎夫妻陳氏 鄭溪妻陳氏 張紹彝妻葉氏 張塋妻鄭氏 葉于炯妻楊氏 舒棉妻王氏 林公遷妻鄭
氏 鄭宗德妻倪氏 董汝元妻蔡氏 林朝賓妻鄭氏 董世連妻陳氏 林世芳妻陳氏 王用賓妻孫氏
唐桂妻鄭氏 李大林妻吳氏 李一鵬妻王氏 黃堅妻施氏 妾林氏 彭夢槐未婚妻廖璧 鄭鳴鶴未
婚妻林順 林啓愚未婚妻林坤姐 李科未婚妻彭氏 葉露澤妻李芸卿(一) 林璵芳 陳莊卿
王英妻張氏 英客死 張扶柩還葬。洪武初 有備倭武臣賄逼之 張置刃自防 號哭不絕聲 竟伸其
節。

林氏 嫁方山黃氏。年二十五 夫卒 子智在乳 誓不再醮。撫智成立 爲延平訓導。郡人高廷禮爲
作《方山節婦歌》。

永福方鸞妻黃氏 名三小。年十六適鸞 未四載 鸞卒 黃自刎死 時洪武九年。

陳紹惠妻李瑤 歸 紹惠卒 瑤年二十七 生子寬 甫週歲。晝夜勤生 養遺孤 供祭祀。後寬亦卒
李年七十餘 撫諸孫成立。

楊和生妻王氏 和生夭歿 王年廿八 子永尚幼 家貧 紡績自給。後永宣德中登進士 官御史。詔

書旌表。

陳啓妻潘氏 年二十九，勵志守節，教子傳，舉正統中進士，爲刑科給事中。事聞，旌表。

葉時彥妻郭氏 年廿八，夫亡，子理幼，苦節撫。及長，娶婦朱，朱方遺腹，理復歿。婦姑相依，育遺腹子底成立。

余尚春妻鄭氏 尚春卒於崇安客舍，鄭直至其處，扶柩歸。時其太姑及舅亦相繼卒，姑且老，子亮方齡，鄭矢心養姑。姑病，夜禱北辰，至愈乃已。家三喪，久不舉，或勸之火葬，鄭曰：「舅與夫故爲儒，吾忍燼諸薪，藐諸長，無遺恨乎？」亮後領景泰中鄉薦，授訓導。

高明妻陳氏。子圭，天順中舉人。

張濬妻陳氏。

林克從妻李氏。

鄧標妻吳氏。

高孔文妻鄧氏。

龔廷達妻姜氏。

李岳妻劉淑馨 年二十八寡，一女九歲，一男六歲，內外期功，無一足侍，艱難阨塞，百爾備嘗。其後二孫同領鄉薦，次孫廷美登甲第。丘文莊公濬爲銘其甘節之堂。

林廷振妻鍾氏 廷振歿，鍾年二十七，二子俱幼，姑心謂：「少婦安能自苦？」漸有疏心。母家亦勸更適，鍾泣曰：「非惟口不可道，抑亦耳不可聞。」孝養劬勞，竟伸其志。子深，成化舉人，韶州訓導。

庠生林廣妻何容 字淑姿，頗涉書史。年二十三，廣卒，男澤始生，誓死守節。後澤先母卒，妻朱亦堅忍奉姑訓。

曾理瑤妻李盡 字淑善。理瑤年二十三卒，二子皆幼，家赤貧，盡杜門勵操守。吳淵上其事，請旌之。命未下，卒。將卒，正襟端坐，召子婦諸孫，教戒之。兄子仲賢趨入，淑善張目曰：「外姓也，可至此？」命扶出，正寢而終。

陳暉妻唐氏 年二十二寡，無子，以夫侄定爲嗣。後定亦卒，撫其子良默，年七十餘。

陳泰妻葉敬小。

劉文斌妻葉氏 孫世揚，正德中進士。

陳珞妻胡氏 珞卒，亡子，誓不重行。其娣王氏，夫住亦蚤卒，亡子，或勸改適，王曰：「不媿夫嫂耶？」娣姒相依，遂各立後，以天年終。鄉人稱爲雙節。

林濬妻黃氏 年二十七寡，孀居三十年，事舅姑，撫男女，宗鄰稱賢。詔書旌表。子廷樞，弘治中歲貢。

劉聰妻王信 年二十五，聰卒，亡子，撫二女，婚嫁之。

林世融妻黃恩 布政黃澤女也。年二十六守節。

葉惟節妻林紱 年二十七，夫亡，養姑撫孤，不易其志。

陳賢妻張錦 賢溺死，錦年二十五，產遺腹子。家貧，舅姑老，錦日則教授女徒，夜則辛勤女工，鄉邦稱節焉。

趙懋妻李氏。

楊文正妻林秀卿。

陳珍妻楊氏。

楊拱妻羅氏 二十而寡，撫一子二女，力貧教之。既，子復卒，楊嗣遂絕。羅氏依女以居，志操彌勵。

長樂民陳洪妻石氏 方娠，洪卒，三閱月生子植，誓終奉陳祀。植長，娶林，其家有百花壺古畫，權貴欲攘之，因攜撫其罪，竟死非命。石詣京雪冤，歸，與林雙杼寒梭，一燈夜織。石年八十終。林年六十五終。

縣學生官鼎妻陳氏。

長樂諸生謝廷最側室陳 幼知內則，謹於笑嚔。歸廷最，生子克四歲而廷最卒，誓不易志，始終節。

張璉妻孫氏。 曾孫炳，萬曆中舉人。

鄭坦妻鄧氏 性聰慧，能口誦《烈女傳》、《孝經》。年十六歸坦，未幾，坦卒。父母憐其少，微諷之，鄧引刃斷兩耳。立坦弟子雲鎬爲後，日夜課誨。八十餘卒。詔書旌門。雲鎬，舉隆慶鄉薦。

林焯妻陳氏 焯爲吏客死，陳年二十九，携孤懋和歸，撫教之。後懋和官至方伯，陳得貤封，年八十餘卒。始陳守節時，貧苦甚，親故莫問者。及懋和貴，周恤甚厚。

陳正謨妻張氏。 子公陞，嘉靖中進士。

鄧煒妻陳氏。子原玉，嘉靖中舉人。

陳臺妻張氏。

林絡妻許氏。孫堪，嘉靖中舉人。曾孫材，萬曆中進士。

莊弘紳妻鄒氏。子嚴，嘉靖中舉人。

沈聰妻陳氏。

府學生黃渙妻曾氏。

葉英妻陳氏。子繼熙，嘉靖中舉人。

縣學生蔣國華妻李氏。

鄧魁妻張氏。

長樂陳鳳儀妻林氏。年二十四寡。撫侄聯芳爲嗣，躬紡績，佐誦讀，事姑楊，得歡心。嘉靖中，以聯芳貴，封孀人。

長樂王公任妻林氏。年二十七而寡，長子文謙甫三歲，次子文誠以遺腹舉。林養祖姑黃、姑趙，昕夕弗懈。撫二孤，從業師儒，取給組績而已。謙、誠先後以貢仕學官。林尚康強無恙，戚里稱慕之。壽九十有四。

林氏二烈女。長金小，次玉小，邑壺江村林熹女也。金小年二十，嫁連江鄭輝，有一子矣。玉小笄，未字也。嘉靖季，倭入其村，金小適歸寧，與妹扶母乘舟避之。賊突登舟，金小卽置其子，謂母還鄭，與玉小皆投於江。數日，二屍逆流而上，其父收葬之。

趙天麟妻方氏 居長灣。嘉靖中，倭人長灣，天麟出禦，舉家浮江。賊突至舟，驅天麟父母入水，方與天麟妹坤淑同時投水死。

陳一德妻施氏 與夫妹細娘遇賊，相持赴水死。

懷安陳文禕妻蔡氏 遇賊，抱幼子躍入南臺江，死之。

翁文煊妻葉七娘 隆慶二年，海寇劫其鄉，虜男女七十餘人。葉不肯行，刃迫之，呼曰：「吾死不從賊。」賊怒，斷其兩臂，死。

縣學生鄭洛妻張氏。子耀，萬曆中舉人。

贈太□寺少卿謝贊妾劉氏。(一一)

林世顯妻余氏。

周詔妻歐氏。

贈主事陳源清妾邵氏。

貢士林庭奎妾王氏。

縣學生劉尚敬妻黃氏。

縣學生鄧應禎妻謝氏。

林道行妻吳氏。

鄭人彥妻董氏。

縣學生鄭鼎夫妻陳氏。

鄭淡妻陳氏。

張紹彝妻葉氏。

張埤妻鄭氏。

葉于炯妻楊氏。

舒棉妻王氏。

林公遷妻鄭氏。

縣學生鄭宗德妻倪氏。

董汝元妻蔡氏。

林朝賓妻鄭氏。

董世連妻陳氏。

林世芳妻陳氏。

王用賓妻孫氏。

唐桂妻鄭氏。

縣學生李大林妻吳氏。

李一鵬妻王氏。

縣學生黃璧妻施氏、妾林氏。

彭夢槐未婚妻廖璧。夢槐父嶽，江右人也，客於閩，與璧父元熙相善，遂相許。居一年，嶽死，璧去容

飾若心喪。於歸有期，夢槐舟行溺死，璧聞訃，欲自經，璧母防視，弗獲也。乃往視殮，撫屍慟哭，哭聲酸裂，屍泫泫淚出，口鼻迸流，若爲更生者。廖氏挽璧還，璧踊而號：「既許人，復何歸乎？」遂家於彭。萬曆五年，旌門。

鄭鳴鶴未婚妻林順 以烈殉。

林啓愚未婚妻林坤姐 以烈殉。

李科未婚妻彭氏 以烈殉。

葉露澤未婚妻李芸卿 以烈殉。

林氏璵芳 文恪嫌孫女，戶部員外郎世吉女也。故許吳爾雅，未婚而爾雅卒，女年十有六，卽欲奔其喪，父母難之。女重違父母命，從此齋素自持，誓不嫁也。居十有二年，卒。臨卒，謂父母曰：「請歸葬。」

陳莊卿 萬曆間，許聘周大樂。未醮，奔喪，誓志孀守，貞孝兩全。

右貞女。

侯官縣（三）

宋

蔡旬妻劉氏 陳孔碩母黃氏

仙游蔡旬妻劉氏 員外昇之女也。旬，蔡襄子。襄故與員外善，員外以女許旬。旣，員外死，家日落，襄知福州，持就劉尋婚。劉以非偶辭，襄曰：「不可。」具奩送劉，命旬娶員外女以歸。歸而旬夭，子侍

方二歲，劉撫教之，六經子史，皆使穿貫。傳以養母早乞致，而傳子櫛出知泉州，爲襄舊治。時劉已封令
人，白首康強。傳綠髮尚茂。泉、仙相距四舍許，板輿往來，奉養珍厚，人咸榮之。

陳孔碩母黃氏 嫁陳衡，謹事舅姑，撫教諸子，孔碩遂以進士中第，補婺州戶掾。黃見其閱具獄，必
戒曰：「人命至重，毋使有冤聞。」當笞人，戒輕之。見其被檄考貢士，曰：「加詳焉，毋忘汝舉子時也。」初
好佛書，讀誦拜跪，終日忘倦。一日，忽屏不事，曰：「不在是，無媿心足矣。」

右賢女。

皇朝

何旻妻林氏 楊源繼室王氏 趙總妻吳賢 盧建妻許氏 楊浩妻袁妙華 林文明妻趙氏 王

鑾妻藍氏 李徽妻林氏 李寄娘 馬謙妾王氏 俞士淵妻張氏 楊文瀚妻張氏 張道南妻戴氏 巴

王應春妻陳氏 張鑑妻陳氏 楊英妻鄭氏 林栢妻薛氏 謝瑀妻黃氏 陳仕基妻林氏 鄭汝試妻林

氏 藍燭妻王氏 高充升妻葉氏 馮德光妻卞氏 陳道謙妻馮氏 陳璧妻劉氏 黃材未婚妻林

賓 張組未婚妻林綬 周文未婚妻廖以莊 邵文典未婚妻李珊 黃廷桂未婚妻林富姐

懷安人何旻妻林氏 旻卒，林年二十九，子瓊始生一月，撫之成立。既領鄉薦第一，第進士。

閩縣楊源繼室王氏 源卒，撫前室子澄如已出，勤女紅以養老姑。後澄領鄉薦，典教諸暨、盱眙，俱

迎養。翰林修撰王鈺扁其堂曰甘節。年八十二卒。

閩縣趙總妻吳賢 年二十七，生二子，總卒，賢惡笄垢服，茶苦奉姑。日爲鄉鄰女師，夜歸紡績，以給
了讀。後長子正領鄉薦，次子曾舉明經，同赴京師，吳諭之曰：「明秋吾從汝父地下矣。若得官江南，可

便道歸。」二子奉母言，各授官歸，抵家省視，吳數日卒，人異之。

盧建妻許氏 年二十五而寡，一子甫生三月，自誓守節，以養舅姑。子長，爲娶婦。越二年，子亦蚤世，其婦方十有九，許哭謂曰：「子不幸夭，汝復無出，吾將焉依？」婦仰天誓曰：「不奉姑者，有如日。」後許氏年六十二而卒，婦生事葬祭，一奉禮式。

楊浩妻袁妙華。

林文明妻趙氏。

縣學生王鑾妻藍氏。

李徽妻林氏 徽從軍，沒於戍。年二十八，子源甫一歲，家貧甚，親族勸之再醮，答曰：「亦聞餓死極小，失節極大。」源，後登第。

李寄娘 父鸞之黃氏，媵黃氏女以歸懷安林繼誠。年二十二而繼誠卒，寄娘生有男女矣，黃氏令其自爲衣食。寄娘日掃松葉爲爨，夜則紡績。後男女皆成人，寄娘以壽終。

府學生馬謙妾王氏。

俞士淵妻張氏。

楊文瀚妻張氏。

張道南妻戴氏。

縣學生王應春妻陳氏。

張鑑妻陳氏。

楊英妻鄭氏。

林栢妻薛氏。

謝瑀妻黃氏。

陳仕基妻林氏。

鄭汝試妻林氏。

縣學生藍燭妻王氏。

高允升妻葉氏。

縣學生馮德光妻卞氏。

縣學生陳道諫妻馮氏。

縣學生陳璧妻劉氏。

黃材未婚妻林賓 年十八，聞材訃，號慟奔殯，脫簪珥易棺葬之。紡績自給，以終其身。事聞，旌表。

張組未婚妻林綬，以烈殉。

周文未婚妻廖以莊，以烈殉。

邵文典未婚妻李珊，以烈殉。

黃廷桂未婚妻林富姐，以烈殉。

右貞女。

懷安故縣〔六〕

皇朝

任琛

任琛 恭敏公馬森妻也。幼慧，受女紅輒解，雖盛寒暑不廢。里中有穀抵奇戲，姊輩召之往觀，對曰：「琛聞之矣，越閨失度，輟業失職，矧而觀如禮何？」固辭。任翁重之。既歸森，森舉進士，家召賀客，有請歌舞爲歡者，任白姑曰：「兒，森素約，亦將有所樹耳。聞之，毋乃遽乎？」其姑乃止客，客莫不歎其賢。森仕宦所至，任課童蒔蔬，供紉絲帛，儉以佐廉。所生二子，曰熒，曰燮。有言尚書家願予女熒者，謝曰：「我家宦薄，敢逆女高門乎？」竟屬森之貧交，有道州大夫。迨爲子燮納世尚書林公女，曰：「匪以其盛，爲清白耳。儻天大吾後，儀刑在茲。」所生四女，爲治奩，皆不及中人家，每戒之曰：「吾昔嫁書生，今汝輩公子同歸，慎勿謂儉厚，汝輩多矣。」熒以蔭游太學，貴游多其文雅，或嘲其短於弈及不聽佳治曲，熒曰：「弈，少頗善之，而枰爲老母碎久矣。且不敢理絲竹，安知此音？」人稱婦德母訓云。

右賢女。

元

王氏

王氏同邑吳氏婦 大德五年，旌門。

皇朝

黃應妻余氏 馬珽保妻趙氏 陳、許二氏 王惟善妻吳英 徐氏三婦 林志學妻陳氏 楊英妻

陳妙玉（上） 謝璫妻潘氏 吳孟恭妻陳懿娘 金石妻俞氏 聶元霖妻潘氏 劉用譽妻葉氏 陳天與

妻吳氏 王德漢妻馬氏 參政林舜道女萊姐

黃應妻余氏 年廿三寡，子安方二歲，寧纔數月，舅姑俱老，余竭力孝養。後舅姑卒，喪葬盡禮。還挈安，寧依其父仲魯，俾從師受學。安，永樂中進士，官吏部主事。

馬珽保妻趙氏 通知書史。年二十四寡，二子閏、旺，家貧不能從師，自撫教之。閏長，游鄉校。閏之係俊，領鄉薦。六世孫森，仕尚書。

劉氏婦陳氏、許氏 陳年二十九，夫伯元卒於官。許年三十，夫伯亨卒於家。貌諸在襁，家日替，二婦相與竭力撫教諸子，稍有違，笞箠不少貸。人稱劉氏二貞母。

王惟善妻吳英 惟善疾篤，二子在襁，念無他兄弟可養母，以囑英。惟善卒，值歲凶無所仰，英乘月紡績，以資姑養。後年九十，預知盡期，無疾而卒。

徐氏三婦 曰陳本善，曰趙貞淑，曰丘淑呂。本善之夫曰明之，貞淑之夫曰誠之，俱蚤世。本善生四子，貞淑無子，各屏去膏飾，經營家業。而淑呂之夫曰景華者，明之元孫也。景華居父憂，以毀卒，淑呂年十九，一子欽，未周歲，亦矢志不二。鄉人稱孝友貞婦，推徐一門。

林志學妻陳氏。

楊英妻鄭妙玉 英夭歿，無子，惟一女，甫四月。家復貧窘，妙玉機杼自給，撫教其女，於歸稱淑。

謝璫妻潘氏 璫沒，舅姑老，家復貧，潘矢志堅守。未幾，舅卒。姑患盲，朝夕扶持，既沒，奉柩合葬。

蠶績給孤。其後子鏞爲露化訓導，詔書旌門。

吳孟恭妻陳懿娘 嫁二月，孟恭病革，謂曰：「吾大父與父皆蚤世，賴人母梁及吾母陳持吳門戶，汝亦能乎？」懿娘曰：「諾。」孟恭卒，產遺腹子，襁褓而殤。正統間，奉姑避寇。歸，室廬焚燬，家計蕩然，蠶織資養，積贏餘構屋以居，人稱吳氏三世一節。

金石妻俞氏。子文明，弘治中舉人。

聶元霖妻潘氏。

縣學生劉用譽妻葉氏。

長樂陳天與妻吳氏 教諭吳琮女。年二十七而寡，子詢僅三歲。姑以痛子，卧疴牽糾，吳侍湯藥，久而彌謹。姑亡，辛勤營葬，撫督遺孤，款資師友。

王德漢妻馬氏 婚逾月，德漢亡，欲死者屢，念夫無子持喪。迨喪畢，私治棺衾，請於父曰：「女今可以死矣。」遂絕食而卒。馬氏，父恭敏森。而德漢，參知王應鍾子也。

林萊姐 參政舜道女。生而婉戀孝敬。舜道嘗夜讀書至《孟子·死徙無出鄉章》，萊旁聽之，請曰：「此何書也？」舜道爲訓所以，則曰：「彼猶疏也而戚。今夫家室之內，若姑婦娣弟妯娌，戚而疏者何也。」舜道曰：「彼古人也。」女曰：「何必古人，而後能戚疏也。」舜道則謂萊母：「識之，賢女也。」舜道以許長樂御史中丞陳省子長源。六禮既畢，萊行去林爲陳，而長源卒，萊聞嘆曰：「吾死矣。」蓬首削脂澤，稱疾卧床間。其哭不聲而神傷，或謂之：「不陳不成婦，汝何自死？」萊曰：「誰謂不陳？而以余之名氏歲月飾而櫛之以歸陳者。既與聞之，忍自昧？」固請舜道得禮赴於陳，執喪而死之。舜道日使其女兄慰解百

方，不能得，乃爲貽書中丞，且歸陳。時中丞與舜道並有母喪，則相謀曰：「以凶歸，所不忍。以好歸，與主之，姑俟喪除乎。」俄及期，萊大悲咤曰：「得無緩而覲奪吾嚮？」遂不食，積七日嘔血死。萊未死時，其妹先之。妹至友姊，萊不葷，己亦不葷；萊不寢，己亦不寢也。既死，人曰：「非特萊烈也，其妹亦有至性焉。」

右貞女。

古田縣（二八）

宋

利氏女 唐璘母（一九）

利氏女 父卒，無他兄弟，獨與母居，家貲甚豐。女之從兄公謙，一夕乘間殺其母，盡挈其貲去，逃匿得免。女因削髮爲尼，行四方物色之，忽得之處州湖南。時公謙方擊毬，女走訴州，獲之。守感其孝，爲械送本州置法，事在建炎、紹興間。

唐璘母 璘以監六部門擢監察御史，皇駭趨避，不敢詣闕。母曰：「人言官好，汝何得憂乎？」璘曰：「此官須爲朝廷爭是非，一拂上意，或忤權貴，恐重爲大人累。」母曰：「而第盡言，吾有而兄在。」璘拜謝，入就職，後立臺百日，切劘上躬，盡言無隱。人謂唐介再見，則母教爲多。

元

賴道慈、婦陳道真

賴道慈，歸同縣張文孫，生清，十五歲而文孫歿，道慈年二十九。黃華亂，家毀於兵，祖且弗完，道慈確然守其志。及清長，爲娶婦廖，生三子：頤、興、棧，而廖亡。繼者陳道真，事道慈孝謹，承清養母之意，唯恐不逮，而遇廖子不翅已出。道慈體服重，晚病痺，道真與媵人余乙恒挾持以就床几，不辭瘁憊者逾十春秋。既生子以寧，年十餘，日授之書，夜則宿火，至四鼓起，燕燈呼讀，坐旁觀之，頃刻皆能暗記。黎明送之至齋門，乃還。後以寧舉進士，爲翰林侍講學士，贈道慈、道真皆清河郡夫人。而以寧人明復仕爲學士。

右賢女。

宋

林娥

林娥，儒家女也。邑有建寇之警，娥從衆避賊，賊刃逼之，強立不屈，遂遇害。

元

蔣國秀妻陳道回

蔣國秀妻陳道回，至正十一年，紅巾賊攻破縣治，國秀被殺，道回太姑蘇妙仁見擒，道回號泣請代，賊放太姑，執道回。道回自刎死。事聞，旌表。

皇朝

曾縉紳妻趙妙疏 鄧揚宗妻李妙貴 李拳妻沈妙孟 湯琳妻羅妙應 林濡妻蘇秀姑(二〇) 陳時
中妻羅氏 李修妻朱仁厚 陳祚妻張氏 丁子文妻陳扁姑 秦瑞姑姑婦三人 余元機妻高蓮姑 陳

九思妻周氏 胡廷佑妻黃瑚姑 余元佳妻李金姑 卓中行妻曾頤姑 陳復陽妻魏德姑 陳應時妻曾玉英 林田妻游德姑

曾縉紳妻趙妙琉 縉紳卒，妙琉年廿五，男肅甫週，而舅姑老矣。正統間，寇亂，舅姑被擄，妙琉冒白刃求代，賊釋之。既，所居火，室罄然，妙琉結草廬紡績資養。姑疾殆，刲股療之。及舅姑卒，喪葬無違禮。詔書旌門。

庠生鄧揚宗妻李妙貴 揚宗與父俱卒，妙貴年一十四，男燭甫三歲。族人利其產，諷再嫁，至奪其奴婢以逼之。妙貴守死堅持。燭長，子係世其家，妙貴以壽終。

李拳妻沈妙孟 年二十四，拳沒，子基甫週，姑憐其少寡，欲嫁之。妙孟不從，事姑益謹。縣令杜永濟每斷失節婦，必令拜妙孟之家，以媿厲之。

邑庠生湯琳湯一作楊妻羅妙應 琳以事將之京師，時妙應年二十一，未出也，而有一子理，琳妾所生。琳語妙應曰：「湯氏止吾一身，天涯萬里，寧可知乎？即不諱將奈何？」妙應曰：「君何出此言，理非子耶？」後琳果死，妙應撫理，不啻己出，卒於成立。年七十八。

林濡妻蘇琇姑 年一十四寡，子洪甫三歲，母憐其少，欲嫁之，琇姑曰：「尺組在此。」母不敢強。

生員陳時中妻羅氏 方伯榮之女。蚤喪夫，羅生一女，夫家無所倚，歸羅守節。猶子羅一德蚤喪，孤大綸甫七歲，羅爲之主持成立，守節撫孤，九十而亡。

庠生李修妻朱仁厚 修，宋李延平十四世孫也。生子元氣，兩月而逝。比元氣壯，與妻俱夭，朱復撫係長芳，以延李氏。當道檄旌之。

縣學生陳祚妻張氏 歸三歲而寡，貧且無子，織紉鹽齋，歷歲八旬。當道檄旌。

丁子文妻陳扁姑 嫁二年，子文卒，誓不他適。舅姑相繼亡，喪葬如禮。撫夫弟子章，嫂而母之。

秦瑞姑 王松繼室也。嫁三年而松卒。松子一人，長燁，先松死，其妻陳長姑亡子也。次燁，亦早夭，妻爲陳蓮姑。燁死，蓮姑哀傷亦逝，獨瑞姑、長姑在，分雖姑婦，年則相若，互依爲命，以撫蓮姑之出，撻外戶，屏壯僕，莫得聞聲窺貌焉。

康生余元機妻高蓮姑 年二十四寡，遺孤兩歲，翁官廣文，家無擔石，而姑繼也，蓮姑并臼奉之。

陳九思妻周氏 年二十喪夫，遺腹一子，矢志撫之。子復先逝，則復撫孫。孫又夭亡，不衰其節。年九十餘。

胡廷佑妻黃瑚姑。

余元佳妻李金姑。

卓中行妻曾頤姑 年二十五喪夫，矢志育孤。未幾，子歿，立嗣堅節。

陳復陽妻魏德姑 年二十，夫與翁連喪，遺腹一子，孝事寡姑，相依守貧。

陳應時妻曾玉英。

林田妻游德姑。

右貞女。

閩清縣〔二〕

皇朝

羅步洲妻陳氏 孫汝濂妻詹氏 謝邦燦妻朱氏 何玉孝妻許氏 黃玄宗妻何氏 許文滄妻林氏

邑庠生羅步洲妻陳氏。

邑庠生孫汝濂妻詹氏。

謝邦燦妻朱氏。

何玉孝妻許氏。

黃玄宗妻何氏。

許文滄妻林氏。

右貞女。

長樂縣〔三〕

皇朝

潘元小 陳義姑 陳八娘

潘元小 年及笄，父卒，母以許林祐。祐父坐罪流徙，祐偕行，度不能歸，請絕婚，元小不可。既母卒，依伯父以居。里有許姓者慕其色，出其妻強委禽焉。元小不從，許訴之官，元小具道其故於縣令，令王遵道嘉之，坐許罪，適祐亦還家，竟歸焉。士大夫多歌詠其事。

陳義姑 名中。年十二，父碩翁，兄壽文相繼亡。兄遺孤坦生三月耳，母又病失明，坦母欲改嫁，義姑留之，不從，遂誓不字，養母撫孤。族人有利於坦者，所以防護之萬方。陳之喪葬婚娶，皆姑綜理。

之。年三十八卒，坦服斬哀三年。

陳八娘 義姑之族裔也。兄璽、塾及嫂俱淪沒，璽子昌文、昌顯，塾子昌隆、昌朝、昌齡皆幼，八娘年十六，矢志不醮，躬紡績營葬四喪，婚娶諸孤。年六十餘卒。

右賢女。

宋

林子埜妻陳氏

林子埜妻陳氏 年十八歸子埜，十有七日而寡，堅貞自守，百挫不回。年九十卒。詔書旌門。

元

陳三娘姊妹

陳三娘 嫁石梁柯宗實，其父希亮有末疾，而嗣子微弱，陳雖適柯，猶經紀外家事。至正二十年，海賊劫石梁，宗實適在縣郭，陳治任將逃，念其父疾，奔往省之，遇賊執焉，且行且罵。賊怒，亂捶驅，至舟置之蓬上。時柯族有童孫樞亦被執，陳指語賊曰：「是兒吾伯氏子，伯氏早死，惟此兒也。兒懷有金，幸許贖命。」賊因取兒金，置兒大桶中浮之。陳尋赴水死。賊返之明日，屍逆流而上，止石梁峰旁，宗實輿歸，斂之，年甫三十。其女弟適杜，時賊至而杜外出，姑曰：「盍逃？」曰：「夫不在，逃將孰從？」賊突至，擊姑仆地，女弟抱姑號泣，賊掠之去，女弟戟手罵賊，被斷臂死。

皇朝

鄔孟妻王氏 林以德妻王氏 陳伯惠妻戴四娘 陳叔謨妻鄭氏 董氏子妻周氏 高伯明妻陳節

小 陳氏婦姑 劉宗善妻陳氏 陳則淵妻高氏 黃伯頃妻林氏 陳九叙妻吳玉蓮 林師學妻廉氏
許鑑妻吳氏 石采蒿 黃一卿妻陳宙姐 陳史姐 陳洪妻石氏 陳植妻林氏 謝廷最妾陳氏 陳天
與妻吳氏 王公任妻林氏 陳宗妻鄭氏 蔣后武妻周氏 陳用和妻謝氏

郎孟妻王氏 孟，福清人，仕御史，見縉紳。嘗坐罪論罪，王氏乞人官爲奴，贖孟罪。一日，孟所鞠囚
竊入孟家，出白金一錠置几上，王氏方櫛，聞几聲，亟持髮出，追還之。未幾，孟竟以諫死，其友戶部郎，同
郡張珪斂孟遺骸將歸，王氏曰：「幸少留。」悉償孟貴負，沐浴更衣，自經而死。

林以德妻王氏 年二十三而孀。時舅姑老，子孔居幼，王以死自誓。孔居長，爲娶婦戴，亦夭卒。生
二孫，長三歲，次方晬，又躬撫之。享年九十有九，見玄曾焉。洪武二十八年，旌表。

陳伯惠妻戴四娘 伯惠蚤卒，遺腹子全，戴撫教之。後全舉永樂進士，歷翰林侍講。

陳叔謨妻鄭氏 年二十八，夫亡，三子俱幼。有巨室謀奪其志，舅宗玉、繼姑林亦意其難守，微諷
之。鄭截髮斷指，誓死靡他。

董氏子妻周氏 歸甫三歲，夫亡，無子。舅姑俱存，父母欲嫁之，周曰：「少讀《烈女傳》，得聞教矣。」
年六十餘。詔書旌表。

高伯明妻陳節小 弘治十五年，旌表。

謝傑妻陳氏 夫、舅同日死，陳時年二十四，哀不廢禮。男大爵迨婚復夭，與婦陳氏共撫一孫，贅居
五十年，蚤夜機杼，以資生業。弘治間，旌表。

劉宗善妻陳氏。

陳則淵妻高氏 年二十四寡，遺腹子守誌，忍貧撫孤。後守誌卒，未幾，一孫又卒。高年逾七十，艱苦萬狀，人共哀之。

黃伯頃妻林氏。

陳九叙妻吳玉蓮 嘉靖己未，爲倭寇所獲，驅之不行，罵不絕口，延頸受刃，賊遍斫其膚去。扶歸，逾數月卒，時年二十五。

林師學妻廉氏 與吳玉蓮並時，不汙賊死。

許鑑妻吳氏（二） 倭寇長樂，夫婦俱見執，賊挾刃睨鑑，吳抱鑑哭，請代。賊遂殺吳。

石采蒿 參政壁孫女也。嘉靖季，隨母避寇，自繫小刀衣帶間。母怪，問之，曰：「急即死耳。」既而遇賊，赴水陷淖，賊欲援之，出刀自殺。數日，家人收其屍，色如生。

陳宙姐 布政使崇德孫女。年十八，適諸生黃一卿。逾八載，一卿有劇，囑之曰：「我死無子，汝當歸汝家。」陳號泣曰：「吾無歸理。六日爲期，從君地下。」一卿卒，伏地哭擗屢絕，竊衣帶自經。家人覺，救之。自是絕粒而逝，正六日矣。

陳臾姐 行太僕寺卿文沛女，適閩縣林鏡。鏡早夭，臾姐年十九，哀慟不欲生，時方有孕，姑解之曰：「幸可望男。」既舉一男，遇而殤，臾姐慟如前。姑復再四解之曰：「吾老矣，無相棄也。」臾姐遂不敢言。屏葷茹素，奉姑老耄，未嘗少懈。四十餘年，家人不聞其聲。

陳洪妻石氏。

陳植妻林氏。

邑庠生謝廷最妾陳氏。

陳天與妻吳氏。

王公任妻林氏。子文謙、文誠，俱貢士。

陳宗妻鄭氏。

蔣后武妻周氏。孫行義，萬曆中進士。

陳用和妻謝氏。

右貞女。

連江縣〔二四〕

皇朝

陳寶妻趙耆，黃□妻彭氏〔二五〕 孫夢弼妻林順德〔二六〕 劉、陳姑婦 王復源妻滕氏 孫坦妻丘

氏 陳博善妻許氏

邑庠生陳寶妻趙耆，父彥昌，家法整嚴，耆薰染有素。及笄，歸寶，事姑孝謹。年二十一，寶卒，有勸其重行者，曰：「從夫爲烈，養姑爲孝。夫死無子，所苟生者，圖孝姑耳。」

彭氏 許婚黃，黃卒，彭自誓守節，力貧養姑。萬曆中，旌門。

孫夢弼未婚妻林順德 以烈殉。

黃縉妻劉淑貞 縉死，淑貞撫孤應龍，聘陳聰小爲室。無何，應龍卒，尚未婚，陳奔其喪，與姑同寢。

處。兩婆娑影相吊。逮姑亡，婦亦隨沒。萬曆十六年，旌表。

王復源妻滕氏。

孫坦妻丘氏。

陳博善妻許氏。

右貞女。

羅源縣〔三七〕

五代

石氏二女

石氏二女 長月華，次雪英。幼涉書史，父母蚤喪。處州青巾賊起，俱被俘擄，臨淵投死，後皆爲神，人尊祀之。

皇朝

饒建妻林壽娘 王德元妻歐氏 吳著妻黃氏 全大倫妻沈氏 陳鏡妻阮氏 陳敬妻林氏 郎中

尤光被妾鄭氏

饒建妻林壽娘 嫁甫半載，建遭疾瀕殆，顧壽娘曰：「吾不忍汝寡，卽不諱，不嫌重行。」壽娘曰：「忍耶？」建卒，殯殮甫畢，卽自經。

邑庠生王德元妻歐氏。

吳著妻黃氏。

邑庠生全大倫妻沈氏。

陳鏡妻阮氏。

陳敬妻林氏。

郎中允光被妾鄭氏。

右貞女。

永福縣〔三八〕

宋

鄭元樞僑女 蕭國梁母

鄭氏元樞僑女 適金華王介。介爲中書舍人，以忤時相，徙右史，知臨安。子埜，官浙漕時，嘗被論，以鄭年老托言改除，以慰其意。鄭曰：「我已知之。昔汝父以忤時相去國，汝又如此，我方爲喜，政復何憂？」

蕭國梁母 國梁登乾道第一，爲禮部郎官。時鄉人黃定來謁，母自簾內窺之，語國梁曰：「此子亦能到爾地位。」後定果登進士第一，時名母爲知人。

右賢女。

皇朝

林愈妻方惠女 王珙妻林玳小 方時興妻黃淑真（九）

福清林愈妻方惠女 年十八適愈，一年愈卒，門無期功，有慕其色，欲脅娶之，惠女遂還，依父母以居。又數歲，父母卒，弟鏌甫四歲，惠女撫之，至於成人。後鏌出爲浮梁主簿，復撫其侄洵。年六十三卒。

王珙妻林玳小 適珙，生子樞方八月而珙卒，玳小年甫二十一，刻苦勵操，教樞底成立。珙，翰林檢討王偶次子也。

方時興未婚妻黃淑真 以烈殉。

右貞女。

樞清縣（三〇）

宋

天長縣君黃氏 劉克莊妻林氏 文紹祖妻某氏（三一）

天長縣君黃氏 屯田員外郎林高妻也。佐高事父母，盡力治飲食、衣服。生子概，就學，黃常治麻糸，居其旁以勉之。後概仕集賢校理，不壽，諸孫皆幼，不能歸喪，乃栖吳郡，斥賣簪珥，經理其家，絲蓄粒聚，以有田宅居食。日夜課諸孫，學有不中，輒程朴之。及長，遂多知名，連以進士中者四人，曰希，曰旦，曰邵，曰顏。曾南豐鞏銘其墓曰：「任重於己，振廢爲興。我積我儲，乃續膏蒸。」

劉克莊妻林氏 林璩女也。嫁年母喪，哀慕終身。從克莊行，覆舟，夷然如平時。虜騎大人，克莊當

從帥督戰，以其患癰，未發，請曰：「虜人大耻，奈何以婢女子後君事乎？」克莊媿其言，卽發。重其賢，早卒而不再室焉。

文紹祖妻某氏者，賢智婦也。紹祖有子，與柴公行議婚，既，聞柴女忽感風疾，紹祖欲爲子更聘，妻切諫不從，乃大恚：「我有兒，當使順天理，獲久長，悖禮傷義，徒速禍耳。」紹祖乃爲子娶柴女以歸。次年，紹祖子登第，柴女風亦痊，後生三子，皆登第。

皇朝

林鴻妻朱氏

林鴻妻朱氏，能詩，嘗作詩以勉鴻學。年十九卒，鴻終身不娶。

右賢女。

宋

李素娥 劉全子妻林氏

李素娥，以節稱。

劉全子妻林氏，全子仕宋爲監丞。宋南奔，全子與林氏兄同開局，募士謀復宋。元人來攻，全子與同拒元，不克，同嚙指血書壁，大罵賊死，而全子出走自經。元人執林詣反狀，林叱曰：「林、劉二族，世爲宋臣，欲以忠義報國，事不成，天也，何謂反者？汝知嚙指血書壁死者吾兄耶？可玷吾兄而污吾夫？吾死且治汝地下。」遂遇害，次年而宋亡。

元

林氏女 林佛奴

林氏女 年十九，貧不能嫁，鄰有少年慕其色，求之不得。至正末，烏尾寇剽掠，女避地東郭外。時元帥達吉擁兵鎮福清，軍士橫甚。少年既求女不得，因軍士以通達吉。達吉令其伍長強女父以聘，父怖，欲許之，女誓不從。俄軍士叢至，女據地哭曰：「嫁娶有禮，劫以兵，有死而已。」達吉自往諭之，女曰：「奴故詩禮家，寧能爲軍人婦乎？人各有志，毋相奪也。」達吉高其節，使微諷之：「可歸我乎？」女執益堅。士君子賦詩頌美之。

林佛奴 字從一。父全，遷龍溪。龍溪人有郭德明者，事寡母以孝聞，全以佛奴歸之。年二十七而德明卒，二子一女，長方七歲，姑年老且貧，父母爲他圖，不肯。至元丁丑，黃勝寇入境，姑適卧病，或勸避之，曰：「敢舍姑？」至正丙午，陳有定取漳州，亂兵殺其孫惠，佛奴冒白刃，持孫不舍。兵欲斷其手，執益堅，兵怒斷之而捨去。孀節四十六年。

皇朝

漁溪林氏 陳和妻王氏 李廣妻盧佳娘 游政妻倪文 魏佑保妻陳氏 陳敏妻劉氏 林、陳姑婦 李彥祥妻林珠小 鄭玄妻林懋娘 陳、林姑婦(三三) 林招德妻陳氏 施元衡妻陳氏 陳商妻王瓊妹(三三) 林挺妻何玉真 張季臨妻林氏 林以聰妻薛氏 林守定妻葉默 鄭汝舟妻林懋細 林、鄭姑婦 林一蓮妻魏聚金 嚴士擢妻鄭勤娘 鄭從岳妻陳細舉 王應邦妻林細娘 龔孟暘妻王氏 郭世治妻何氏 林日休妻王氏 林晚翠妻謝氏 林岫妻王氏 郭應璧妻林氏 楊叔英妻王氏 何鳳儀妻吳氏 林世葵妻吳氏 何尚友妻林氏 張孟堅妻莊翠娘 嚴有章妻莊氏 林實妻王氏 方廷揚

妻陳氏 陳瑤玖妻林氏 余文宦妻林柏女 何天福妻鄭氏 卓應嶽妻張蘭娘 陳崇華妻朱氏 薛廷寵妻衛氏 鄭時化妻蔡氏 陳孔詩妻李氏 林應科妻金氏 林文鵬妻毛氏 林秉仁妻楊氏

漁溪林氏 宋林希逸孫女。嫁莆田林安，生子迪，二歲而安卒，林年二十二，撫迪成人，見其四孫之冠婚。洪武初，旌表。

陳和妻王氏 和早卒，王奉舅姑以孝聞。舅姑卒，家貧不能葬，王日夜號慟，鄉人義之，助舉三喪。

李廣妻盧佳娘 歸廣十月，廣暴卒。盧號慟絕，復甦，見廣口鼻出惡血，吸食之。既殮，每哭輒僵仆，家人相與抱持寬譬，若不知者，但曰：「從吾夫地下矣。」積五六日，家人防懈，潛入寢室自經死。時洪武十八年也。

游政妻倪文 政多病，倪事之甚謹。及病革，顧謂曰：「病必不起，吾不得爲孝子矣。汝能烈乎？」倪泣不能答。政卒，口鼻出血，倪悉舐之。哭踊頓絕，方蘇，至夕更衣哭別室。及明，家人怪無聲也，啓戶視之，死矣。年二十有二。

魏佑保妻陳氏 佑保病，時鄰婦有改適者，過佑保之門，佑保因謂陳曰：「我死，汝亦似此人乎？」陳曰：「行禽也。」佑保卒，抱幼女哭訣，翼日，人寢自經。年二十六。

陳敏妻劉氏 二十四，敏卒，子緒猶在腹，劉誓不二庭。緒長，教之讀書，娶婦，生孫選，甫三歲，緒夫婦又相繼夭，劉撫選成立。

邵舜民妻林氏 年二十五而寡，子德洪甫二歲。林氏教子，志行堅白。後德洪亦早卒，婦陳年二十七，孫二人，嫡曰繩，庶曰矩。陳氏守志，事姑三十餘年不衰。繩、矩子孫皆循世其家。

李彥祥妻林珠小 年二十適彥祥，甫三載，彥祥卒，子該方二歲，珠小養太姑林及姑陳無違禮教。該能不墜其世。後彥祥之兄亦早卒，二子曰語、曰訥，皆幼，珠小視猶己子焉。

鄭玄妻林懋娘 年二十而嫁，踰年夫卒，亡子，力貧養舅姑以終。

翁務妻陳氏 年二十九寡，撫幼子坦，不再醮。卒年七十四。坦妻林氏，年二十七亦寡，事姑，養生喪死盡道。撫三子，曰銳，曰銑，曰鑑，俱底成立。士大夫扁其堂曰重貞。

林招德妻陳蘭女 未歸而招德溺死，陳即適林，獨處一樓，織布奉尊嫜，機杼聲不絕也。布成，人爭市之，曰節女布。

施元衡妻陳鏡女 將婚，夫卒，聞而自縊。母救復甦，遂適施，奉舅姑以孝節聞。嘉靖間，旌表。

莆邑陳商未婚妻王瓊妹 商卒，瓊妹告母奔陳喪，即居之。後倭寇其鄉，瓊妹被執，佯好寇，請釋其舅姑，一幼侄。至賊營，即出所藏剃刀刎喉而死。賊衆驚異，以錦衣衣其屍，扶上坐，相率羅拜，隨令群婦昇以緞被置江邊，遂盡放向日被虜者。

林挺妻何玉真 倭夷人寇，挺父子被執。賊質挺求賂，不得，遇害。玉真遂自殺。

庠生張季臨妻林氏 嘉靖間，與姑同被賊執，賊欲殺其姑，林求身代，姑免。林謂賊曰：「我宅前池中大有金寶，請導行。」許之。既到，自投池中，賊刺殺之。

林以聰妻薛氏 既受聘矣，以聰尋染惡疾，當婚期，中外嫗嫗勸毋行，薛曰：「彼孤貧病困，俯仰何依？」竟歸林，朝夕具湯沐。人謂惡疾善傳染，薛伉儷相諧無害，竟舉一子。年二十六，以聰卒，撫孤成立，以壽終。萬曆中，旌表。

林守定妻葉默。知州葉朝榮女也。歸守定，踰年而寡，求死不得間。父憐其志，欲歸而贍之，不聽。亡何，其舅林質卿納富人聘，將擁迫以行，默遂自刎。萬曆中，旌門。

鄭汝舟妻林懋細。與汝舟從舅氏天佐惠州丞邸。汝舟死，林必從之死，服毒不死，服金不死，引刀自裁，家人覺，不殊，又不死。後數日，手決咽絕，乃死。惠人葉春及曰：「父母於子，安有環視其死而聽之者？」林氏百死之，其姑若家人百生之，未之何也，已矣。」萬曆中，旌門。

長樂何夢卜妻林氏。夢卜舉嘉靖丁酉鄉薦，踰年而卒。家故貧，遺一子起渤，林年二十四，矢志茹荼，撫摩督誨。起渤長，補郡弟子員，爲娶鄭氏，亡何，又卒，亡子。鄭年二十有六，婦姑相依，紡績爲命，忍饑俟死，絕無怨色。林七十七卒。鄭拮据營葬，並葬其夫。

林一蓮妻魏聚金。未婚也。以烈殉。

嚴士擢妻鄭勤娘。未婚也。以烈殉。

鄭從岳妻陳細舉。未婚也。以烈殉。

王應邦妻林細娘。未婚也。以烈殉。

龔孟暘妻王氏。

邑庠生郭世治妻何氏。子萬程，兒縉紳。

邑庠生林日休妻王氏。子僧春，隆慶中舉人。

林晚翠妻謝氏。子廷植，隆慶中進士。

邑庠生林岫妻王氏。

郭應璧妻林氏。

楊叔英妻王氏。

何鳳儀妻吳氏。

林世葵妻吳氏。子尚義，萬曆中舉人。

何尚友妻林氏。

張孟堅妻莊翠娘。

嚴有章妻莊氏。

林實妻王氏。

邑庠生方廷揚妻陳氏。

陳瑤玖妻林氏。

余文宦妻林柏女。

何天福妻鄭氏。

卓應嶽妻張蘭娘。

陳崇華妻朱氏。

給事中薛廷寵妾衛氏。

知縣鄭時化妾蔡氏。

陳孔詩妻李氏。

林應科妾金氏。

林文鵬妻毛氏。

林秉仁妻楊氏。

右貞女。

〔校記〕

〔一〕「侯官縣 懷安故縣 古田縣 閩清縣 長樂縣 連江縣 羅源縣 永福縣 福清縣」二十八字，各本原脫，據本書體例補。

〔二〕「閩縣」二字，各本原脫，據本書體例補。

〔三〕〔五〕「鄭琚妻江日全」，各本原作「江日全鄭琚妻」，據本傳「江應選人見」句改。

〔四〕「林廷桂」，本傳作「林庭桂」。

〔六〕〔二五〕「黃」下，各本原闕一字。

〔七〕「王三小」，本傳作「黃三小」。

〔八〕「林氏」，本傳作「陳氏」。

〔九〕「張璜」，本傳作「張濬」。

〔一〇〕「林璜」，本傳作「林潛」。

〔一一〕「葉露澤妻」，本傳作「葉露澤未婚妻」。

- 〔一二〕「贈太」下，各本原闕一字。
- 〔一三〕「侯官縣」上，各本原衍「福州府」三字，據本書體例刪。
- 〔一四〕「張道南妻戴氏」，各本原脫，據本傳補。
- 〔一五〕「陳道謙」，本傳作「陳道諫」。
- 〔一六〕「懷安故縣」上，各本原衍「福州府」三字，據本書體例刪。
- 〔一七〕「陳妙玉」，本傳作「鄭妙玉」。
- 〔一八〕「古田縣」上，各本原衍「福州府」三字，據本書體例刪。
- 〔一九〕「唐璘母」，各本原作「唐璘女」，據本傳改。
- 〔二〇〕「蘇秀姑」，本傳作「蘇琇姑」。
- 〔二一〕「閩清縣」上，各本原衍「福州府」三字，據本書體例刪。
- 〔二二〕「長樂縣」上，各本原衍「福州府」三字，據本書體例刪。
- 〔二三〕「許鑑」，各本原作「許鐸」，據傳記目錄及下文改。
- 〔二四〕「連江縣」上，各本原衍「福州府」三字，據本書體例刪。
- 〔二六〕「孫夢弼妻」，本傳作「孫夢弼未婚妻」。
- 〔二七〕「羅源縣」上，各本原衍「福州府」三字，據本書體例刪。
- 〔二八〕「永福縣」上，各本原衍「福州府」三字，據本書體例刪。
- 〔二九〕「方時興妻」，本傳作「方時興未婚妻」。

【三〇】「福清縣」上，各本原衍「福州府」三字，據本書體例刪。

【三一】「某」字，各本原脫，據本傳補。

【三二】「陳、林姑婦」，各本原作「林、陳姑婦」，據本傳改。

【三三】「陳商妻」，本傳作「陳商未婚妻」。

閩書卷之一百四十一

閩閭志

泉州府 晉江縣 南安縣 惠安縣 德化縣 安溪縣 同安縣 永春縣 泉州衛 永寧衛(一)

晉江縣(二)

宋

魏國太夫人陳氏 謝希孟 曾氏 傅察妻趙氏 劉媪 呂良子姊妹

魏國太夫人陳氏 龍圖閣直學士從易之女、內翰蘇紳之妻，而丞相頌母也。從易守廣州有清德，爲衆所知。元豐中，神宗問頌母誰氏，頌以從易女對。神宗曰：「天聖間學士耶。」從易、紳、頌，皆嘗守杭。夫人三至杭邸，題邸柱云：「吾少從父至此，中與吾夫偕來，今同吾兒，凡三閱江山之勝。」蘇文忠挽詞：「鸚鵡爲善日日新，八十三年如一晨。豈惟家室宜壽母，實爲朝廷生異人。」

陳安國妻謝希孟 伯景妹也。伯景母通經，子女皆自教。希孟與兄並工詩賦，所著詩餘篇。歐陽文忠稱其隱約深厚，守禮不放，有古幽閑淑女之風。

金華縣君曾氏 曾會女，而魯公公亮妹也。嫁侯官御史王平，生子五人：回、向、固、同、閏，皆有學

行。回爲有道儒宗，向、罔尤有文，三人皆身在隱約而聲震天下。縣君受其子祿於京師，而魯公方當國，然處里舍彌約。及其後，回、向、固、同皆早世，人謂不堪，縣君能自廣以理，未嘗亂其志，其子孫至男有立，女有歸。

贈徽猷閣待制傅察妻趙氏 趙清獻女也。宣和七年，察以吏部員外郎遣接伴金使，（三）所殺。及察還，携子自得、自修避地於泉，葬察郡西南之太平嶺，卽家焉。守王十朋挽辭：「哀能變國俗，貴不御鉛_{（四）}，不學佛窮三昧，然松教五車。」

劉媪 壽百三歲。守真文忠爲建壽母坊。

呂良子 其父仲洙，貧儒也，得疾頻殆。良子年十八，祝天請代，拜且泣，入夜，焚薌以祀，其詞甚苦，遂刃股肉進。時譙門鼓再通，忽群鵲繞屋飛噪，仰視空中，大星燁煜如月者三，正照欄檻。翌日，父瘳平復。方良子祝時，其妹細娘年十六，（三）亦從拜禱，良子卻之，細良曰：「姊能之，兒不能耶？」守真文忠表其居曰懿孝，爲之記。

皇朝

翁氏 杜義姑 林媽恩 黃光瑀妻郭氏 朱安期妻李氏 潘公宜人郭氏 金太安人陳氏（四）

翁氏 御史慶長女也。慶奉勅巡鈔四川，不避權貴。又奉勅武當山，獻玄帝眼珠，賜一品服以行。亡何，坐累下獄。慶無子，女詣闕上書請代。仁孝皇后召入宮，留之三月，爲宮中女師，人以比緹縈。

杜義姑 蚤失父，其弟華幼，姑從母撫弟。弟稍長，姑許人矣。杜之宗人利杜母寡子幼，且有所覬，而姑爲其母堅持家內外，嶄然不假借。杜宗人覲無所得，誣謗之，所許家爲絕婚，姑憤而不嫁。久之，弟

華長，娶於王，生子昆。華復天沒，姑與王用貞相堅，益爲杜治田疇濬陂塘，貽子孫世世利。年七十餘卒。杜之子孫舉葬之先墳傍，與其先人並祀。

南安鄭陽時妻林姆恩，戶部郎中林性之女也。少隨父宦邸，通小學諸書及古嘉言善行。既歸陽時，生子維嶽耳，則數進妾媵於陽時。維嶽既就學，時時佐之讀，曰：「讀書非但欲曉其字句而已，當觀古是何人能如此也。」當陽時兄弟析箸時，不無相齟齬，姆恩慫恿爲辭讓曰：「兒之佳惡，豈在財哉？」至其平生，不肯通官府一稅錢也，曰：「食土之毛而闕其稅，是皆有神明勾籍焉。」老而紡績不衰，時舉敬姜之言爲諸孫誦之。維嶽仕曲靖府同知。

黃光瑀妻郭氏，年百有三歲。其夫教授生徒，太守趙恒受業焉。郭知書通道理。恒治家嚴，母訓督子孫過當，趙之子孫必迎氏爲解，恒長跪受辭焉。

參議朱安期妻李氏，年百歲。

潘太宜人郭氏，諸生維城妻，方伯洙母也。父立彥爲尚寶卿。既歸城，事舅孝謹，事庶姑如其姑，事夫之兄弟無所不和睦。佐城讀書，非城休不敢休。城病，太宜人已老，尚侍榻寢累月。少受文史，無所不徹通，最好《太上感應篇》、《古今格言》，下至本草、通書，亦經覽閱。作詩示洙：「願子爲官廉以德，殊勝斑衣舞老萊。」詠牡丹詩：「人生名利等秋葉，惟取丹心天地裁。」雖漆室憂國、彤管箴家，未之讓也。少從父京邸，一一能記當日朝政，若嚴分宜、張司馬、王中丞、陸錦衣始終成敗，老而爲諸郎述之如歷焉。

封太安人陳氏，廣東副使金時舒母也。歸處士金重寶，事繼姑盡孝，或朴或譴，罔不承順。泉俗：婦人既老，多斷遣家事，拜佛持齋，惟太安人，巫兒齋媼絕不得通。夫之仲弟絕嗣，臨沒，托太安人孤女。

太安人居常不使離左右。於歸之時，太安人疾革矣，正襟危坐，教之婦道，而後遣之。壽九十一歲。右賢女。

宋

蔡若訥妻楊氏 黃公憲妻楊氏

蔡若訥妻楊氏 廉州守友之女。喜讀書，通大義。年二十三寡，砥節自厲，晝乞爲寒冰玉，願作冷秋菰，二句於壁，士大夫多咏歌之。

黃公憲妻楊氏 吏部尚書炳之女。公憲苦學早亡，母老末疾，楊侍奉不離側，持喪盡哀。以《孝經》、《論語》口授二子，後皆知名。

元

尤惠妻李妙嚴 龔氏三女

尤惠妻李妙嚴 事繼姑曲盡孝養，姑改虐爲慈。惠蚤沒，營家撫孤。有司奏，旌其居曰孝節。年九十卒。

龔氏三女 上猶尉安之女也。長曰益，適柯允中。次曰嫻，適福建行省理問張仁。季曰婉，適劉允正。皆盛年而寡，挈孤依父，甘貧自力。陳方山稱其姊妹三人同心、同氣、同節，前世所稀。

皇朝

陳思恭妻莊氏 林琇妻何氏 莊盡娘 李邦幹妻陳氏 郭允朝妻翁順正 蔡茂思妻吳潔姿 林光妻蔡瑞金 黃玉貞 阮天從妻林玄娘 王國助妻陳媚姿 蔡寬妻梁淑瑞 柯瓚妻黃荷玉 莊

舉妻劉淑貞 南安黃逸妻蔡氏 王爵妻陳妙姬 鄭聯桂妻汪氏 蔡文馨妻莊四娘 曾氏婦姑 伍端妻柯梅 吳煒妻莊顯貞 蘇忠妻蕭氏 莊允祥妻曾選玉 楊希閔妻汪貌莊 蕭山徐黼妻李氏 謝文璜妻陳氏 蔡任妻孫氏 朱焯妻陳氏 洪庭振妻林氏 世華妻童氏 韋元妻蔡氏 林大娘 劉萬妻童氏 王徽謨妻蔡氏 陳遜妻吳氏 林知言妻陳氏 蘇希益妻陳氏 李喬新妻蔡氏 陳振翰妻李氏 徐晉妻黃氏 吳從憲妻沈槐英 阮敦禮妻陳氏 梁黼妻莊氏 謝暉繼妻蔡氏 蓋昊妻楊氏 江中標妻唐氏 王順妻李氏 黃氏三節 蔡遵課未婚妻陳氏 林有杖妻許氏 陳文鏐妻姚氏 吳廷桂未婚妻孫氏 姚惜未婚妻陳氏 許諸妻彭氏 蔡國襄妻呂氏 黃宗櫛未婚妻陳氏 南安傅廷雅妻葉氏 林梅妻李婉娘 莊信妻謝瑞姿 江甲耀妻黃氏(六) 陳章憲妻黃氏 蘇豪齋妻李氏 柯日蕃妻顏氏 黃華南妻謝氏 吳巖妻黃氏 林應元妻許端娘 謝應祚妻蔡氏(七) 陳廷策妻林端娘 蔡之升妻劉氏 吳鳳來妻蔡貞娘 王廷望妻周氏 南安傅禧光妻蘇氏 南安陳民安妻黃淑坤 紀廷憲妻黃氏 南安黃萬增妻陳愛娘 安溪楊啓炤妻粘氏 徐渡妻張氏 陳宗球妻史氏 李夢璧妻陳氏 楊□□未婚妻□氏(八) 王命廣妻周氏 楊某未婚妻李氏 吳天錦妻李氏 黃熙耀妻李子娘

陳思恭，海賈也，妻莊生子寶四月，去入海，五年不還。人曰：「思恭死矣。」誘莊嫁，不許。亡何，思恭歸，悲喜交集。久之，竟入海死。誘者曰：「夫君真死矣，可奈何？」莊曰：「寶在。」寶長，請學士宋濂記。思恭蓋嘗娶妻於浙中，生一子，貧寓外氏。莊遺錢使營生，且償思恭之夙逋。

林琇妻何氏 琇年十七夭歿，何年十六，遺腹四月。孝事舅姑，百凡艱苦，竟立孤墜。何永樂間人。嘉靖間，琇玄孫士奇妻何氏亦貞節。

莊盡娘 李氏子妻。洪武元年，李以事詣京，携偕行至崑山，李病亡，盡娘斂葬畢，寓書歸遺親，自溺死。會稽胡溫爲賦以哀之。

李邦幹妻陳氏 年少孀居，子松嵩方二歲，百苦不改節。羅文毅來泉，賦詩美之。邦幹能詩。孫汝嘉，兄緒紳。

郭允朝妻翁順正 年二十四寡，斷髮撫孤。

蔡茂思妻吳潔姿 嫁六月而寡，孀居畢世，完節凜然。

郡庠生林光妻蔡瑞金 成化壬寅，光父死疫，俗皆畏避，不敢舉喪。瑞金相光，治斂盡禮。泊卒哭，光亦卒，無子，瑞金悉出所藏斂光，既殯，自縊死，年二十一。

黃玉真 南安吳聰妻，未三載，聰沒，無子，斷髮明志。

阮天從妻林亥娘 天從沒，子智宗甫三歲，家貧甚，無他近親。抱兒養姑，姑卒，以禮終葬。年八十八卒。

王國助妻陳媚姜 生孩甫四月，夫死。一日，從母往吊外祖家，回舟江中，猝遇賊，度不免，赴水死。越四月，屍浮水上，面色如生。年十七也。

蔡寬妻梁淑端 嫁十載，生子祐，三歲耳，寬亡。姑諷之重行，欲就縊以自明。孝養撫孤。祐，見緒紳。

柯瓚妻黃荷玉 嫁亡何，舅姑與夫相繼沒，荷玉年二十三，棄簪珥治葬具。父憐貧，無子累，欲奪之，荷玉曰：「兒郎餓死，終不衣食累父。」不跡父家者廿年也。

莊舉妻劉淑真 蚤寡，撫二歲孤及遺腹子，以節終。

南安黃逸妻蔡端謹 文莊公妹。逸歿，蔡寡守三十餘年，非正禮未嘗登堂，接兄弟限內而已。詔書旌門。

王爵妻陳妙姬 年十七適爵，踰年歿，不忍棄姑死也。居一載，姑爲爵營墳，陳請曰：「兩之。」姑曰：「豈易言哉？」妙姬遂閉口不藥，翌日卒。

鄭聯桂妻汪氏 弘治中，聯桂客維揚，溺於水。訃至，汪撫胸大慟，投井死。時年二十三。

蔡文馨妻莊四娘 蚤寡，撫二孤，長者四歲，幼者踰月。舅姑俱老，莊服勤爲養，二孤竟成立。年九十終。

曾氏婦姑 生員澤妻李，舉人一誠妻吳，皆早寡守孤。

伍端妻柯梅 端歿，再閱月，其襁中兒復殤。柯夜歸寧，與父母盡語。返舍，從容起居舅姑，沐浴櫛髮，易服自縊，家人驚救弗及。時年二十三。

吳煒妻莊願貞^(九) 歸未幾，煒卒。煒臨盡，而願貞許之死矣。既卒，父母知之，以其祖母與卧起，莊辭祖母曰：「吾夫無與爲三年服者，吾何忍死？」祖母還報其家，其母尋諷以他適，願貞憤而自縊。

舉人蘇忠妻蕭氏 忠游清溪，驟卒於舟次。報至，蕭慟哭殯地。出殯，殯於溪澗。還家不餐者九日，翌日奠几，筵畢，至柩所哭盡哀。歸，沐浴盥櫛，閉戶留一婢侍而懸帛自縊。帛忽斷，婢悸顛伏號，蕭麾婢出而遂死。

莊允祥妻曾選玉 家貧早寡，罄資葬夫，服闋，舅姑欲奪之，選玉以死自誓，所以孝養備至。既老，諸

子遵教，閨門嚴肅，邦人稱焉。事聞，旌表。

庠士楊希閔妻汪貌莊 年二十二，希閔死，無子，欲自經，家人防之，輒自嚙舌出血，家人防益謹。貌莊度終不得，聞茉莉有毒，能殺人，取之煮爲湯，貯卧內，家人不知也。希閔死彌月，其家延僧誦經，貌莊爲祭文，詞甚悲也。夜五鼓，家人倦休矣，貌莊人卧內更衣，取湯飲之，天明死。正德中，旌表。

蕭山徐輔妻李氏 輔爲晉江訓導，娶李爲繼室。未幾輔卒官，父母誘歸，欲嫁之，遂圖自盡，於是聽其還蕭。葬畢，毀容自守，撫前妻子若已出。前妻子死，撫其孫。孫死，撫其曾。勤勞白首不息。嘉靖中，旌門。

謝文瓚妻陳氏 早寡撫孤，孤復夭。居宅被兵燹，立嗣存祀，啣恤終生。嘉靖中，旌表。

蔡任妻孫氏 年二十二而任沒，撫孤事姑不懈也。居五年，孤夭姑亡，孫曰：「已矣。」遂自縊。嘉靖中，旌表。

朱焯妻陳氏 早寡撫孤。孤死，服毒自盡。嘉靖中，旌表。

洪庭振妻林氏 嘉靖中，旌門。

世華妻童氏 嘉靖中，旌門。

韋元妻蔡氏 夫亡時年二十六，以死自誓。事舅姑孝謹，病侍湯藥，易燥濕。舅姑繼歿，殯葬如禮。嘉靖中，旌表。子起宗，兄閭巷。

林大娘 余汝麗未婚妻也。汝麗商於外，舅姑預迎以俟婚。汝麗死，林聞訃而自盡。嘉靖中，旌表。

劉萬妻童氏 家赤貧，竭力奉姑。遺腹生子，因命之大遺，撫教之。後大遺舉進士。嘉靖中，旌門。
王徽謨妻蔡氏 徽謨居安平鎮，娶七日出行賈，歲餘卒。蔡守節奉舅姑。賊人里門，王挈家避賊，蔡扃戶號慟曰：「幽嫠不踰閭，寧死。」姑楊曰：「奈何以抱梁之行累吾一門。」強昇行。賊退，室火，蔡還，憑故寢不去。舅姑憐而爲再構之。孀居者五十餘年。

陳遜妻吳氏 年十八，生子春。五月，遜卒。吳甘荼撫教之。春婦許，事吳盡孝。後春子用賓仕至大官。吳年八十三，許年九十一，並得封贈。人謂天報節孝姑婦也。

林知言妻陳氏。

南安庠士蘇希益妻陳氏 嘉靖季，爲倭所擄，乘間投水，倭剽之矛，罵愈亟，遂與幼男俱死。

李喬新妻蔡氏 夫卒，蓬垢紡績，育其二孤子。嘉靖季賊至，焚夫柩，僇次孤，蔡痛憤大慟，自刎於前，和賊駭愕，舍長孤去。萬曆中，旌表。

南安陳振翰妻李氏 長史聰孫女。年十九，夫歿，遺孕四月，生男，撫之，以苦節終。萬曆中，旌表。

徐晉妻黃氏 嫁六月，夫卒，以烈殉。萬曆中，旌門。

參政吳從憲妾沈槐英 淮安人也。參政病，槐英預自矢。及卒，死焉。

阮敦禮妻陳氏。

庠士梁輔妻莊氏 二十五而寡，撫遺孤懷仁，慈而能教。懷仁少年科第，爲名士。莊壽八十餘。嘉靖中，旌表。

庠士謝璋繼妻蔡氏 嫁未幾寡，撫前子繼宗，亦爲庠士。繼宗無年，遺孤九思五歲，復撫養之。旌

表。

蓋吳妻楊氏 早寡，撫育二孤世英、世雄，備極貧苦。忽患足瘡，出野拾，偶有蛇走從瘡處，涼氣達心，膿血迸流，移時足愈。人謂節感。世英兄弟念母，事之甚孝。而世雄事世英亦盡庶人之悌。

江中標妻唐氏 蜀相唐時興妹也。標卒，兒殤，自矢必死，姑勉以立孤長孀。艱難拮据四十餘年。旌表。

王顯妻李氏 顯歿，李矢節自堅，置織寢室，不戶外四十餘年。

黃氏三節 其一曰秦氏，黃喬焜之妻也，無子，生子燿則側室柯出。而又有側室口施者，亦無子。喬焜沒，二婦共守一子。人曰：「秦爲妻也，柯爲母也，施何居焉？」燿後領鄉薦，並稱施爲母矣。

陳氏 蔡遵課未婚妻也。遵課從父賈，客死，訃聞，陳語父母曰：「必死。」遵課喪將至，陳氏輜而奔之。輜外向示不返也。既入門，謝舅姑曰：「不能養。」蔡氏之人或勸止之，曰：「吾若不死，不入此門。」自是絕粒斃。萬曆中，旌門。

庠士林有棖妻許氏 有棖館於陳，陳兄弟不睦，弟將毒兄，有棖誤食之，立死。有棖子亦過死。氏山鄉居奔赴郡館持喪。百日，自縊於柩側，曰：「所以報夫之仇在此命矣。」仇竟不得他解脫。事聞，旌表。

惠安庠生陳文鏐妻姚氏 少通《孝經》、《烈女傳》。文鏐卒，姚賦詩剪髮納柩中也。屈五旬，爲文辭家廟，已，奠文鏐，已，拜姑，已，遍拜諸親黨，而遂自盡。萬曆中，旌表。

吳廷桂未婚妻孫氏 幼解經史。萬曆中，廷桂死，孫欲奔喪，母兄與其諸父共尼之，不能也。遂以奔喪之禮往，命之輿，曰：「奔喪也，輿哉？」人夜徒步往，挾吳所納采雙金爵以見舅姑。拜畢，奠柩側無

離次，而言其死期。吳家故貧，治櫬傍取具而已。好事者助其舅資，使治美木，係開之口：「死而資夫人木耶？」家人口：「舅所治也。」走視之，曰：「木以美逾吾夫，非禮矣。」卻之，以櫬櫬來，乃許之。屆期縊死，書衣帶中云：「男毋附尸，女無啓衣。」

姚楷未婚妻陳氏 楷病故，陳踴躍奔喪，堅餓而死。萬曆中，旌表。

許諸妻彭氏者 家至貧，夫死，朝夕哭奠不廢禮。聞孫氏之尅期死也，同日而自縊。

庠士蔡國襄妻呂氏 國襄歿，呂斂其簪簪筆研，納之懷袖，日三七，縣帛自縊。萬曆中，旌表。

黃崇櫬未婚妻陳英娘 烈殉。萬曆中，旌表。

南安庠士傅廷雅妻葉氏 萬曆中，旌表。

林梅妻李婉娘 二十而寡，一子在抱，每祝天曰：「願孤兒成立，使妾終爲林氏母。」

莊信妻謝瑞姿 年十九，生子甫三月而信卒。伯氏賂媼用針刺其孤，幸救得活。嗟泣曰：「伯氏刺

孤利弟產耳，何有是？」出舍於外，盡以讓之。

江甲耀妻黃氏 甲耀久病貧穢，氏敬奉無厭情，侍寢而啗其餘。甲耀卒，屋小無可以厝柩，既斂，卽

欲出瘞之，黃曰：「請待旦。」入房沐浴，自經死。

陳章憲妻黃氏 章憲人海賈呂宋，爲宋夷所殺。訃至，矢死，姑勸止之。強居三旬，闔戶而自經。

蘇豪齋妻李氏 年廿六寡，撫孤不胤，苦節竟生。

柯日蕃妻顏氏 日蕃亦人海賈而死於宋夷者，顏號哭欲死，其父謹護之，擁歸，顏若爲不死也。及小

祥，告父曰：「女雖不死，可無歸莫？」許之。莫畢，乘間而自縊。

黃華南妻謝氏 以烈殉。

吳燾妻黃氏 嫁年夫卒，密取斂餘布自縊死。

林應元妻許端娘 夫歿，密藏斂餘帛，小祥自縊。

謝應祥妻蔡氏 夫卒，引帛自縊，帛斷，泣曰：「孕乎？」祝以筊，弗孕也，越七日遂死。

陳廷策妻林端娘 未婚也。聞廷策訃，寄聲曰：「無殮也，往死之。」父曰：「而何往？雖許矣，未幣也。」端娘曰：「幣與許，奚擇哉？」父謹防之，曰：「女何往不得死？顧死陳躋耳。」父曰：「婿家貧，孰周身？」曰：「身也乎哉！」曰：「婿家貧，死孰標名？」曰：「名也乎哉！」遂往言死期。及期，埋帛自經，三拱而絕。陳故家青陽山下，山下人言，婦將赴烈，山鳴三晝夜。

蔡之升妻劉氏 之升夭歿，劉年二十，以烈殉。

吳鳳來妻蔡貞娘 年二十，歸甫二月，鳳來旅沒。貞娘晝夜悲號，俟輓歸，遂自盡也。

庠士王廷望妻周氏 廷望夭沒，求死，姑偕其嫂娣環守之。乃寬以小祥，不令知也。屆期，奠廷望而自縊。

南安庠士傅禧光妻蘇氏 尚書蘇茂相妹也。歸逾年，禧光沒。蘇請姑立後，拜父兄訣別。時尚書以學使家居，語尚書曰：「兄官學使，弟敢負昧？」闔戶自縊，去禧光死之日九也。

南安庠士陳民安妻黃淑坤 夫沒，子復孺。淑坤哭拜夫位，遂就縊。

紀廷憲妻黃氏。

黃萬堦妻陳愛娘 萬堦早孤，育於其叔父。叔父行賈於長泰，萬堦娶兩日往訪之，歸，渡海溺死，愛

娘繼而殉之。其祖姑請父，若婦之父母，強之生，不得也。

安溪楊啓炤妻粘氏 以烈殉。

徐渡妻張氏 嫁而渡病，雖成婦，猶處女也。渡卒，大祥，張不食數日死。

陳宗球妻史氏 宗球死，史必殉之，有期矣，尚懷袂爲姑釀酒。姑曰：「婦幾何日在人世，尚爲我釀耶？」曰：「政爲日短，故釀而奉姑。」將死，告舅曰：「毋糝婦水。」事聞，旌表。

庠生李夢璧妻陳氏 以不食死。

楊□□未婚妻□氏 〔一〕

王命賡妻周氏 禪除之日，截髮就縊。

李氏 許適慶遠同知楊維清孫某，未字而以烈殉。

吳天錦妻李氏 天錦出行賈，家故海濱，寇作，宗人要李偕姑出避，李以姑老謝不從，獨閤戶相依。聞天錦死，絕粒且殉，俟其父母防稍懈，入室雉經，端拱如生。

黃熙耀妻李子娘 歸熙耀，事舅姑，族稱孝婦。熙耀客死，矢必殉，曰：「苟歸耀骸，得同穴，大願。不則，附先姑焉。」臨盡，戚屬哽咽，李獨宴如，對天頂禮者四，投縊而逝。

右貞女。

南安縣〔一〕

宋

張徹妻呂氏 徐伯嵩妻傅氏

張徹妻呂氏 光祿卿璫之女。徹蚤卒，誓志不二。賑饑棄責，爲德於鄉。教子過，登進士。及卒，端坐而逝。柯述許公穀爲作《賢母傳》，發運使胡師文狀於朝。

徐伯嵩妻傅氏 朝散郎烈女。兄伯嵩登進士，仕終邑令。家貧，親老，三子皆幼。傅奉舅姑，治喪祭中禮，訓子成學。國錄黃以寧銘其墓曰：「婦也丈夫，母也嚴父。」

元

楊真祐妻方義

楊真祐妻方義 生子光澤，而次子光俊，妾陳所生。義二十二而寡，與陳守志持家，均桑鳩之愛，邑稱賢母。

皇朝

李義姑 蘇氏兩世姑孫

李義姑 年十四，父陷大辟，姑攀訴，竟不可脫。時母、兄先歿，二弟一侄尚孩，姑所以撫之萬方。既成立，里媼來言可覓伉儷，姑笑曰：「吾已坐丘壠。」年八十卒海上，稱爲貞孝義姑。

蘇貞寧妻陳氏 以節著。孫以睿妻陳氏，以孝著。嘉靖中人。崇禎初，旌表。

右賢女。

吳欽遜妻周婉姿 黃欽祥妻莊氏 合州訓導洪慶妻余氏 趙文妻陳珠 李溥麟妻傅氏 訓導黃

思詔妾陳氏 洪有臨妻史氏 庠生黃守惠妻傅氏 □□□未婚妻傅氏 王酉忠未婚妻許氏

吳欽遜妻周婉姿 夫亡，僅遺孤方在携。父母欲奪其志，周曰：「吾不知書，而知從一。」

黃欽祥妻莊氏 夫歿，蓬垢治女工撫二子。長厥初，夭。次厥仲，長娶陳，生孫密，未踰月復夭，陳年二十三。姑、婦抱一月兒相嚮哭，復相慰相依。迨密長，且有孫，莊願陳復相喜也，而相泣也者。

合州訓導洪慶妻余氏 浙西安人。慶卒，余年二十四，邑值寇亂，人皆逃匿，余獨抱一孤守柩，勤女工，積其所業，賣以營葬。後二子皆成立。以壽終。

趙文妻陳珠 二十三而寡。壽八十二。嘉靖中，旌表。

李溥麟妻傅氏 夫亡，無出，撫其妾之三稚子，以底成立。生平無疾言遽色，事事有條，勤儉而家道興。

訓導黃思詔妾陳氏 思詔沒，氏誓必殉，時其嫡子良成進士在京師，陳俟一良歸，乃自縊。

諸生洪有臨妻史氏 二十五歲而寡，獨守，子啓聰。後啓聰舉進士爲郎。詔書旌表。

庠生黃守惠妻傅氏 年二十二守節，事姑以孝聞。

□□未婚妻傅氏（四） 田家女也。夫死自縊。令趙時用爲合葬。

王酉忠未婚妻許氏 年十八，酉忠客死，聞訃自經。

右貞女。

惠安縣（一五）

宋

盧氏

盧氏 蔡忠惠母。忠惠慶曆初爲諫官，有除授非常者屢封還，仁宗遇忠惠益厚，曰：「有子如此，母賢可知。」特賜冠帔以寵之。

元

恭人陳懿

恭人陳懿 字孤徽，盧琦妻也。幼涉書史，事琦三十年，賓敬如一。遇事規箴，琦所至以循廉稱。琦歿，吏民咸致奠賻，恭人曰：「君生不貨，死而貨之，非其志也。」無所受。

皇朝

布政莊應禎妻洪氏

布政莊應禎妻洪氏 年百有五歲，對子孫言嘉靖時朝事甚晰也。

右賢女。

陳仲憲妻王氏 方吉妻蔡氏 黃濟妙妻江氏 何伯璣妻林氏 陳文妻郭氏 通判莊政繼室王氏

生員莊珊妻吳氏 洪昶妻張氏 丘懋敬妻林氏 林氏

陳仲憲妻王氏 歸仲憲八年而寡，子禧甫六歲，姑柳在堂，撫姑養子。禧亦夭，又撫孤孫疇至成立。以壽終。

方吉妻蔡氏。

黃濟妙妻江氏。

何伯瑾妻林氏 成化間，旌門。

陳文妻郭氏。

湖州府判莊政繼室王氏 生一女，政沒，年十二。撫前妻子有恩，資送己女不與前妻女等，人難之。

生員莊珊妻吳氏 以烈殉。

洪昶妻張氏 萍鄉知縣綸之女。年二十餘，昶夭沒，無子。氏誓守獨居，撫二庶弟成立，梱以內巔如也。

丘懋敬妻林氏 年二十於歸，孝養舅姑。倭虜入村，氏負姑脫難。亡何，夫故，撫遺腹子民俊，具有終始。

林氏 許婚李氏子，將及娶，李氏子溺死。報至，大哭，廢餐寢，父母議媒妁，遂自縊。後十餘年，邑令羅繼宗聞其事，爲改葬，歸骨於李氏子之丘。

右貞女。

德化縣(二六)

皇朝

林長娘

林長娘 邑民德茂女也。蚤失母，父死時，有弟宗源八歲，而長娘年十七矣，臨盡謂之曰：「汝可字

人，然爲我撫幼子成立，而後出門，則大善也。」父沒，長娘撫宗源，竟不字。壽八十一。右賢女。

宋

陳得環妻黃桃娘

陳得環妻黃桃娘 得環外死，訃至痛絕，啞尋屍歸葬。母逼令再適，桃娘澣衣於門外池，遂投池死。

皇朝

劉惟義妻蔣九娘

曾阿原妻張珠娘

陳濬九妻

仙游曾光圭繼妻黃氏（一七）

劉惟義妻蔣九娘

曾阿原妻張珠娘 年十九適，二年生一子儀甫數月，阿原沒，撫儀教之。既長，爲邑庠生，年甫二十四而沒。復爲儀立後，以壽終。

陳濬九妻□□（一八）

嘉靖季，流賊突至，與濬九倉卒抱週歲兒同匿山中。賊獲夫，免之，而欲辱其

妻，強不可，刃其兒。撫兒慟哭，罵賊甚厲，遂被害，年二十有五。

仙游曾光繼妻黃氏。

右貞女。

安溪縣（一九）

皇朝

庠生詹璉妻林玉修 陸大妻何觀奴 楊魁杰妻詹鳳女 晉江林泗妻李純香 王桓門三婦 詹鳳翹妻黃大娘 黃門四節 丘應賓妻李氏 林鴻賓妻黃氏 林應得妻王氏 詹仰賢妻黃氏 許志超妻葉坤隨 庠生張問行妻李氏

庠生詹璉妻林玉修 璉卒時，子清在襁，源方娠五月。璉父母憫其貧，若諭使再醮，哀慟不已，曰：「人有二次作媳婦耶？」源後登第。事聞，旌表。

陸大妻何觀奴。

楊魁杰妻詹鳳女 夫溺水死，詹年二十三。哭三日，得屍歸葬如禮。孀居五十年卒。

晉江林泗妻李純香 年十九，泗贅其家，甫五旬，歸省，病劇報至，純香徬徨終夜。明日，馳至夫家，泗死矣。伏屍哭不絕聲，水漿不納者七日。姑強之，進少許，卒哭昏，梳沐縊死。今子孫世祀，忌前一日，滿室異香。嘉靖十八年，旌表。

李玉真者 晉江庠生王桓妻。而洪氏者，玉真之媵也。而黃氏者，則桓曾孫庠生輔婦。桓卒，玉真所生二子，嫌、嬉皆幼，未幾，嫌復殤。母家諷玉真改志，玉真引刀自刎，洪氏趨前抱持之，遂從玉真守節撫孤。而黃氏年二十，則輔卒，事姑教子，一守李氏遺法。一門三節婦，俱萬曆二十二年旌表。李、洪本邑人，黃則南安人也。

詹鳳翹妻黃大娘 年二十三而寡，遺孕七月，對夫靈自矢曰：「所不死者冀一脉耳已。」生男，獨居一室，松貞水止，莫可方譬也。

黃代妻林氏 適代，未子，爲冒妾龔，生子琮。而代卒，林時年方二十有七。及琮娶婦謝，生二子，琮

又卒。謝氏遇劫賊，被執，死之。林撫其二孫，敦睦宗族，捍衛外侮，有丈夫風。後其曾孫願孝者爲邑庠生，亦蚤卒，婦謝氏育其四歲男，又值嘉靖兵荒之季，拮据撫孤。年八十餘。玄孫龍標娶許，許見龍標瘠弱，亦爲置妾林，生子師曾。標、林繼沒，許又撫師曾有成。人稱黃門四節婦。

晉江舉人丘應賓妻李氏 守節旌表。應賓事父母孝，亦得旌。

郡學生林鴻賓妻黃氏 生子應朝，不數載，鴻賓、應朝相繼卒，遺一女。每哭夫慟子，時時絕也。舅姑憫之，曰：「吾家不可居，婦毋他圖耶？」輒慟哭指天曰：「吾林門故以詩書孝德傳家，作此重行，不殞墜耶？」自是孝敬有加。

舉人林應漢妻王氏 應漢卒，孤孀等幼，其季尚孕，王自廿八操貞以至八十，勞瘁如一日。孀以孝稱。

詹仰賢妻黃氏。

葉坤隨 邑窮山女也。嫁許志超，年十九，爲夫婦七月耳，志超病死，坐臥柩側不離次。越三日，焚香請告，剪髮誓死，絕飲食者五日，姑強之，歎米湯而已。或勸之曰：「婦誠自苦。顧我等居深山中，幽遐僻昧，誰知而旌揚之者？」婦曰：「盡吾心耳矣。」永訣之晨，諸娣姒悲泣不自勝，婦顏色如常，拜謝舅姑及夫之弟，自縊死。萬曆二十一年也。事聞，旌表。

邑庠生張問行妻李氏 嫁一載，問行卒，去之五旬，自經而從之。有貞女。

同安縣〔一〕

宋

楊氏女

楊氏女 父安國患血疾，經年不愈。女取肝爲粥以進，父疾隨瘳。里人林上元有記。

皇朝

洪溱妻葉氏 侍郎洪朝選妻蔡宜人 鄭星女

洪溱妻葉氏 洪侍郎朝選母也。其始入門，舅氏已卽世，獨其姑在。姑有二女，皆未行。宜人出其簪珥衣服，上姑曰：「以此行長姑。」曰：「以此行次姑。」姑大喜。朝選舉進上，受封。時諸貴人母相與酒席歡宴，車服華煥，婢女靚麗，宜人獨居鄉，課諸婢僕耕織而已。家事外語絕口，娣姒間。朝選權稅浙關三年滿，借貸歸，宜人曰：「善。」勸溱資給之。至其參政廣右，頗用刑威，宜人聞，不善也，謂：「杖人至十足矣，何用重之？」每遣人至邸舍，必語以「汝告汝主，我語如此」。

侍郎洪朝選妻蔡宜人 其父大賈也，而適朝選爲諸生，人其舍始識世間有所謂樹者。朝選家庠狹，淖泥滿庭，蛛絲蟲繭，網戶粘壁，宜人安之。遇客至，或餉田夫，親與竈嫗廚婢均勞苦。見洪家紡織，心悅之，晝夜從妯娌侄女輩學紡。久之，其紡縷可櫟苧紗蠶絲，織爲衣布，乃與坊郭中上家婦女衣布不二。從官邸舍，紡績，啖菜食蠶而已。嘉靖中，避寇周氏妹之堡，賊忽至堡下，宜人指井，與朝選訣曰：「堡若陷，索婦於此矣。」

鄭星女 幼約婚曾氏，曾爲不善，義當絕。女終身不嫁，遂能化其一家。兄弟三人不析居，而星女爲主內政。其兄宗貴者，年三十餘喪偶，感女弟之義，亦不再娶。

右賢女。

皇朝

許梅 林氏 諸生洪伯大妻許氏 林三娘 郭貴貞妻葉氏 劉琛妻林氏 吳二娘 生員呂潤妻
陳氏 進士李一陽妻莊氏 諸生王式妻吳氏 蔡士訓妻洪四娘 海澄庠生林鳳翔妻葉氏 黃士觀妻
趙氏 康璿璣 林伯謙妻許氏 儒士張鳳岐妻陳氏 通判蔡宗德妾楊氏 黃日望妻陳氏 池宗寶妻
鄭氏 生員蔡貴成妻許氏 舉人陳思誠妻黃氏 廩生吳泰妻康氏 劉懋昭妻李氏 張仲樹妻陳淑
蘭(二三) 劉、陳姑婦 李億妻張秋香 庠生張安垣妻黃氏 盧真賜妻陳氏 王廷岳妻許九娘 黃應
考妻盧閨貞 陸鰲軍餘林華妻莊氏 葉啓翼妻陳氏 張廷諧妻許氏 趙三娘 陳大娘 陳思程妻林
細娘 黃養沛妻□氏(二三)

許梅 適宋隱山子。夫得痼疾，梅奉之恬然。夫死不二，父母憐其少，逼使再適，臨遣，投海死。潮漲而屍不流。

林氏 婦於王蕩子也。婉事無忤，養姑盡孝。一日，王淫某氏女，女父猾胥，獲之，將殺焉，王百方求免，不許，曰：「吾女污矣，誰歸者？必棄若婦而納吾女乃可。」王曰：「幸甚。」胥甚王誣婦奸，詣官判離。女猝被逐歸父家，不嫁，私遺姑餉。其後胥女生二子矣，夫商於外，爲盜所殺，胥女旋棄去。婦聞，涕泣迎屍，朝夕饋奠，而養其二子。

諸生洪伯大妻許氏 歸伯大，初乳不育，卽爲置妾陳氏，生二子，育如己出。伯大遭疾革，度不可起，水漿不入口。數日，伯大卒，殯殮畢，收其遺書付陳曰：「慎貯之，後日可示兒也。」潛入卧內，自縊而死。

林三娘 年十六適邑士王湍，六月湍沒，三娘以死自誓。翁姑與母皆憐而欲嫁之，則不可。翁姑逼之歸林，欲俟其母徐奪之。三娘蓬垢，三年足不出戶。母密以許富室劉氏子，三娘聞故，乃於忌日往王，飲毒發，嘔，鷄啄其沫盡斃，姑始覺之，令歸母家。三娘曰：「是日爲王氏鬼矣，復焉歸耶？」撫膺大慟。姑令婢嫗十餘人拽之歸，而其母自是亦欲強奪之。三娘謂母曰：「女今嫁矣。」膏沐笑語，異於平日。其母信之，令媒告期於劉。至日，方設席待倩，竊人卧內死。事聞，旌表。

郭貴貞妻葉氏 旌表。

劉琛妻林氏 年二十一而寡，治夫塋穿二墳焉。夫兄弟欲林改節，盡奪其產以搖之。林携女慟哭，剪髮自誓，鄉人義焉，謫其夫兄弟而勸復其產。事聞，旌表。

吳二娘 字劉仲芝。仲芝病故，訃至，父往吊，吳泣謂母曰：「兒從幼締婚仲芝，今其親老矣，一朝不淑，往臨其殯，無乃義乎？」母遂與偕至殯所，觸地求死，衆抱持，乃勉服喪卒哭。後有顏某者，令媒求婚，吳誑其母，沐浴而自縊。事聞，旌表。

生員呂潤妻陳氏 年二十喪偶，哀毀絕粒，姑讓之曰：「汝欲以二喪累我乎？」乃就食。三年，餐不過再，面無開顏。適母家有伺其意者，曰：「室罄年艾而又無子，何所底耶？」陳拂衣起，告姑曰：「生啓人伺，不如死也。」計夫死於嘉靖壬辰年十月廿四，亦以十月之日更衣飲毒，告夫靈曰：「生同君年，死同君日。」家人驚，灌解之，越三日乃死。

進士李一陽妻莊氏 陽登第待次銓部，以疾乞歸，訃於途。莊爲位而哭，哀毀逾禮，極至，自縊死。

諸生王式妻吳氏 嘉靖己未，避倭大嶧寨中。寨陷被擄，罵不絕口。賊怒將殺之，有告賊曰：「此大家妻，可挾以索贖。」乃令嫗扶之行，適道旁有泉，深數丈，遂投而死。人名泉曰義泉。

蔡士訓妻洪四娘 年二十二。嘉靖己未，避賊大嶧寨中，反遇賊。賊迫之行，頓坐於地，拾瓦石擊之，厲聲哭罵。賊怒，殺一婢恐之，不爲動。已，又殺其女及二稚子。愈益哭罵，賊度不可脅，乃刺之中心，洞膈無血，賊怪駭而去。時同避賊者伏翳莽中，共憐其死，爲埋屍淺沙中。比賊退已四十九日，士訓發殮，顏色如生。

海澄庠生林鳳翔妻葉氏 年二十，夫亡，事姑孝謹。嘉靖季，倭入寇，葉歸襄父喪，與衆歸避賊，涉淺溪，猝遇賊。衆歸被執，葉獨抗不就。賊刃其胸，大罵曰：「死賊何不速殺！」賊剝脣吻，猶罵不絕，死之。

黃士觀妻趙氏 年二十，夫死，卽其夫之生日亦死。

康璫璣 聘儒士葉秀春。秀春卒，康告其父母，願一臨殯所。既至，哀慟不自勝，遂竊自縊。旌表。

林伯謙妻許氏 隆慶二年伯謙死，許自投於井中。

儒士張鳳岐妻陳氏 姑寢疾，與夫奉侍湯藥惟謹。姑歿，夫亦病，陳日減晨餐，籲天願代，泣謂夫曰：「倘不諱，當從逝，不多餐君一飯也。」既，夫死，遂死。

梧州府通判蔡宗德妾楊氏 通小學，勸世諸文。宗德卒京師，楊投繯者再，爲嫡泣留，因與嫡共撫其子成，以貞潔終。萬曆三十四年，旌表。

黃日望妻陳氏。

池宗寶妻鄭氏 宗寶死，有豪行賂求婚，日三四至。鄭斷髮減餐，窮年坐一小軒紡績，卽母家去咫尺，不跡也。晚歲長子構宅，請同居，鄭曰：「此汝父舊廬，吾將死此。」竟不往。卒年八十六。

生員蔡貴成妻許氏。

舉人陳思誠妻黃氏。

廩生吳泰妻康氏 嫁四月，泰死，康縊而殉之。萬曆中，旌表。

劉懋昭妻李氏 夫死，懸梯而自縊。

張仲戀妻陳淑蘭。

張英時妻劉氏 夫歿，子思睿方週，貞守十九年而睿又夭，取夫兄子思頊爲嗣。思頊長，博通載籍，剛直好義，壯年客死於外，妻陳復辛勤萬狀，教育五子，悉至成立。人謂婦姑雙節。

李億妻張秋香 年十四於歸，未及三載，夫亡，男女無出。或勸再醮，哭曰：「吾夫庶出今已矣，嫡姑無依，將置何地？」茹荼孝養凡十九年，姑終，葬祭以禮。正圖立嗣，其人遽亡，慟哭失望。年八十一以完節終。

庠生張安垣妻黃氏 年二十而寡。

盧真賜妻陳氏 真賜死，陳有遺腹矣。越二月舉一子，踰年子不育，遂自經。

王廷岳妻許九娘 廷岳死，及小祥，其四歲之孤孀，九娘自念死。及大祥，其母來王氏，九娘給母曰：「女病甚，去此里許有神祠，爲女一禱。」母疑之，方躊躇，九娘曰：「必亟歸。」母去未半途，雉經死。

黃應考妻盧閨貞 年十六，夫死，總帷將徹矣，歸辭父母，不宿而旋。見舅姑，容詞宛，下人莫覺也。

至夜分，沐浴更衣死。

陸鰲軍餘林華妻莊氏 夫久目病，罄衣資求醫。及歿，叩地出血，死復甦，棺殮畢，自縊死。

葉啓翼妻陳氏 嫁三月，啓翼死，暨五旬，取所藏小刀自刎於靈前。歲萬曆辛亥也。

張廷諧妻許氏 合卺三月而諧歿，雉經殉之，足不離地，顏色如笑。

趙三娘 幼許何公保，未婚也，公保死，三娘年十六，則約何氏姑來，與奔訃。變服執喪，月餘骨立。

母訪而憐之，欲携之歸，三娘遽扃戶爲必死計。母若姑倉黃排門擁去。既至家，雉經者再，父母不得已，復歸之於何。出門曰：「吾不反矣。」卒哭之辰，沐浴更衣，拜訣翁姑父母，時鄉鄰驚異咸集，而母猶持之泣。三娘謂其母曰：「爲臺，吾將登臺而後死。」母出，遂經於卧內。

陳大娘 諸生陳開春女也，許聘呂重熙。重熙卽世，大娘聞訃，素服而白烏。適呂家婢來，歸奠餘，遂請其母奔訃，母猶豫未忍，氏卽諭呂婢約其姑來，夕與俱往，入門拜舅姑畢，服衰麻，旦暮哭，已，賣簪珥舉奠。以臘月之朔日，梳沐結束，取婚帖納袖中，手白練授二婢，二婢泣，大娘顧笑，遂投環死。

龍溪陳思程妻林細娘 通書史。思程死，細娘及大祥死殉之。致書其父曰：「父全而生，女全節而歸之，死亦生也。」

黃養沛妻□氏（四） 以烈殉。

右貞女。

永春縣(五)

宋

留恭妻徐氏

留恭妻徐氏 忠宣婦也。爲女時，端簡有儀。歸留氏，奉忠宣無違禮。邵陽之貶，徐服勞中饋供子婦職，忠宣忘譴焉。好觀經史，見子勤勵則悅。故子元剛亦登甲科而篤於孝。

右賢女。

宋

林老女 洪晚成妻留氏

林老女 及笄未字。紹定庚寅，寇犯邑，女入山避之，猝與遇，欲污之，不從。度不得脫，給之曰：「家埋金帛，同歸取之。」入門大呼曰：「吾死家，豈外辱！」寇怒殺之。越三日面如生。本宋史，邑志作張氏。

洪晚成妻留氏 忠宣六世孫也。歸數歲，晚成當遠戍，囑留曰：「我歸未期，母老無他兄弟奉養，仰汝矣！」逾年晚成卒，留年二十四，誓死不嫁。撫育幼子，備甘旨養姑，姑寢疾累歲，奉湯藥無懈。及卒，哀毀逾時，嚮室廬供喪葬。

皇朝

顏晁榮妻婢 林養妻鄭仙娘 尤瑚妻顏長娘(二六) 庠生顏濬妻潘蕙蘭 庠生鄭慶妻黃荆梅 尤

文炷妻林栢娘(二七)

顏晁榮妻盛氏 嘉靖元年，汀漳寇至，晁榮應募從征。寇分他道掠其境，盛携乳子希進、幼女蘭英與養女陳珠避於安林，卒遇賊，欲污之，不屈。賊怒，屍解躡轢之。既欲刃希進，珠翼之獲免，獨携蘭英，驅迫行數里。珠給賊曰：「妹纔九齡，若釋之則吾與汝俱。」賊如其言，顧防之不懈。及邑，令柴鑣來攻賊，賊出戰於茄湖，珠遂死。人言是主母是婢子。

林養妻鄭仙娘 年二十一而寡，無出，僅一女。立後，復夭歿。已，夫兄弟亦歿。仙娘忍貧養女，以完節終。

庠生顏濬妻潘蕙蘭。

庠生鄭慶妻黃荆梅 慶卒，荆梅年二十一寡，抱二歲女與遺腹子，誓志鞠育。有賂其父欲娶之者，一跡不歸寧。舅姑憐之，使其二孤與諸子均產。舅姑歿，荆梅盡舉以還其諸子，忍貧孀居者五十二年。

尤文炷未婚妻林栢娘 炷死，氏奔喪，絕粒七日，自縊。

右貞女。

泉州衛

皇朝

指揮張盛妻朱貞玉 張淮妻王氏 郭門三節 郭椿妻洪氏 郭民守妻楊氏 鄧氏三世節烈
泉州衛指揮僉事張盛妻朱貞玉 十七而寡，嫁未逾年也，而有遺腹子昱。時盛母李、祖母火泊祖姑

張俱無恙，貞玉敬養二母，治三喪，撫夫三弟，家事盡落，乃抱昱依外祖蔣以居。外祖母欲奪其志，貞玉竊入寢室自經。家人覺解之，自是無敢復言者。老而鄰里親戚罕識其面。事聞，旌表。

泉州衛千戶舍人張淮妻王氏 嘉靖中，旌表。

泉州衛中所百戶郭懋妻施氏 懋蚤世，施氏奉姑豎孤。懋弟瑄借職翌而撫之。正統乙丑，瑄捕賊德化，戰歿，四子復幼，妻張、婦陳皆相與矢志明節，兒無常母，產不自私。時稱郭門三節。

庠士郭椿者，郭瑄三世孫。椿早卒，妻洪日閉一室，非忌晨不登堂也。孫子長成，恒揭《孝經》三言示之曰：「天之經也，地之義也，民之行也，此吾所聞於爲女者也。」壽九十餘卒。

郭民守者，椿侄孫。民守以軍舍人死倭，訃至，妻楊欲死矣，以有身強粥。旣得雌，所親諷之更嫁，唾不顧也。姑陳氏或微贊之，楊久閉視不言，轉面瞠目曰：「媼亦出此言耶？」陳曰：「身故孀婦，何敢敗爾志，立繼可乎？」輒曰：「婦大與媼異，媼子婦否？」居三月竟死，年二十。

鄧氏三世節烈 泉州衛百戶鄧炳妻權氏，炳故，遺孤城甫三歲，家徒壁立，權茹荼撫教。城奮跡武科，歷官副總兵，有名於時矣。後炳孫銓、曾孫中溥、華清皆蚤夭，其三婦皆節烈自著，銓婦俞、中溥婦林、華清婦蔡，俞以節、林、蔡以烈，詔旌爲鄧氏一門三世四氏節烈之門。

右貞女。

永寧衛(二九)

皇朝

惠安錢寶妻何氏

錢寶妻何氏，寶，廬江人，國初以軍功授鳳翔衛百戶，陣亡。何年二十四，長子禮尚幼，次子忠遺腹，携歸撫育。洪武初，追論寶功，以禮襲職，未幾，復夭。何泣，謂忠曰：「父兄一縷可不勉與？」忠後以父蔭陞授崇武正千戶，何就養，封太宜人。壽八十餘終。

右賢女。

趙妙緣姑婦 歐陽寨妻□氏(三〇) 朱冕妻陳三娘 高浦所千戶孫榮妻張氏(三一) 祖氏

趙妙緣，字景福，年二十，歸永寧衛指揮僉事丘遇長子琳。居二年，琳卒，撫孤榮至襲官，又復卒。榮妻王貞潔奉姑，人稱雙節。後皆以壽終。

歐陽寨，本衛人。嘉靖季，倭陷城，寨妻與其姑及其夫弟被掠。而有諸生楊敬中者，其家西賓也，亦在掠中。賊俱閉諸人房室中，寨妻欲死，恐無計出其姑與其夫弟，語敬中曰：「願君以婦私我，告賊質婦，君自求與吾姑及吾夫之弟出，曰：『且圖金爲贖。』」賊悅，婦艷，信而許之。度行既遠，持刀黥面，罵賊不已。賊怒，焚之於火中。

永寧衛前所百戶朱冕妻陳三娘，嘉靖間，值倭亂，冕血戰陣亡，三娘年二十七，欲死殉之，念姑在。四十年，倭陷永寧城，扶姑逃難，被賊面斫一刀。姑病，孝養湯藥。姑歿，稱貸資葬。

高浦所千戶孫榮妻張氏，榮早卒，張年二十四，無子。及葬，營二窰焉。姑與其兄強之再適，曰：「二窰在彼。」至夕，自經死。

祖氏，崇武百戶宗源女，嫁同所黃舍人。舍人死，祖守節不二。其姑亦寡婦也，謀重行，惡祖節，欲

壞之，氏悲憤自縊死。

右貞女。

〔校記〕

- 〔一〕「南安縣 惠安縣 德化縣 安溪縣 同安縣 永春縣 泉州衛 永寧衛」十四字，各本原脫，據本書體例補。
- 〔二〕「晉江縣」三字，各本原脫，據本書體例補。
- 〔三〕「細娘」，下文作「細良」。
- 〔四〕「金太安人」，本傳作「封太安人」。
- 〔五〕「梁淑瑞」，本傳作「梁淑端」。
- 〔六〕「江甲耀」，本傳作「江甲燿」。
- 〔七〕「謝應祚」，本傳作「謝應祥」。
- 〔八〕「一一」，「楊」下及「未婚妻」下，各本原闕二字、一字。
- 〔九〕「莊顯貞」，各本原作「莊原貞」，據傳記目錄及下文改。
- 〔一〇〕「徐渡妻張氏傳」，各本原置「庠生李夢璧妻陳氏傳」下，據傳記目錄移。
- 〔一一〕「南安縣」上，各本原衍「泉州府」三字，據本書體例刪。
- 〔一二〕「一四」，「未婚妻傳氏」上，各本原闕三字。
- 〔一五〕「惠安縣」上，各本原衍「泉州府」三字，據本書體例刪。

〔一六〕「德化縣」上，各本原衍「泉州府」三字，據本書體例刪。

〔一七〕「曾光圭」，本傳作「曾光」。

〔一八〕「陳澧九妻」下，各本原闕二字。

〔一九〕「安溪縣」上，各本原衍「泉州府」三字，據本書體例刪。

〔二〇〕「林應得」，本傳作「林應漢」。

〔二一〕「同安縣」上，各本原衍「泉州府」三字，據本書體例刪。

〔二二〕「張仲戀」，本傳作「張仲戀」。

〔二三〕「黃養沛妻」下，各本原闕一字。

〔二五〕「永春縣」上，各本原衍「泉州府」三字，據本書體例刪。

〔二六〕「尤瑚妻顏長娘」，各本原闕本傳。

〔二七〕「尤文柱妻」，本傳作「尤文柱未婚妻」。

〔二八〕「仙娘」，各本原作「長娘」，據傳記目錄及上文改。

〔二九〕「永寧衛」上，各本原衍「泉州府」三字，據本書體例刪。

〔三〇〕「歐陽寨妻」下，各本原闕一字。

〔三一〕「張氏」二字，各本原脫，據本傳補。

閩書卷之一百四十二

閩閭志

建寧府 建安縣 甌寧縣 建陽縣 崇安縣 浦城縣 政和縣 松溪縣 壽寧縣(二)

建安縣(三)

五代

余敬洪妻鄭氏

余敬洪妻鄭氏 南唐將查文徽平建州，鄭爲亂兵所獲，以獻於裨將王建封。建封欲犯之，鄭不從。脇之刃，亦不屈。建封轉歸文徽，文徽亦欲犯焉，曰：「王師吊伐，宜旌賞節義以勵風化，王司徒出行伍，亡怪也；君侯爲國上將，亦若是耶？速殺我。」文徽媿而歸之。

宋

曹修古女

曹修古女 修古明道中知興化軍，卒，貧不能葬，吏民贖錢五十萬，拜酹堂下，前白所以。家人未及至，女哭曰：「我先君居朝，以清節自立，不幸終於貶所。今臨財苟得，尚何面目旦夕哭泣帷中，幸趣持

歸。」吏民慚罷。

元

雷德潤妻游氏

雷德潤妻游氏 善書有文。無子，默禱於神，夢黑熊行天，遂生機。機貴，贈建安郡君。機妻危氏，亦贈建安郡君，通書記，作字有楷法，善治家事。人謂婦道母儀，皆可無媿。

皇朝

陳宜人妙善

陳宜人妙善 宗人府經歷張珂母也。珂守贛州，迎宜人官舍。每聞公堂有鞭朴聲，輒令覘之，潛加戒止。珂公退，卽訓飭之曰：「爲民父母，宜以寬恕存心。」珂嘗以俸祿之人製輕煖，市肥鮮以奉，宜人卽鬱鬱不樂曰：「吾意豈在口體哉！」

右賢女。

宋

曹覲妻劉氏 曹覲妹

曹覲妻劉氏 皇祐五年，覲守封州，儂智高陷郡，劉逃之林垌。旣聞覲死，曰：「不可污賊。」遂自經。追封彭城縣君。

曹氏 覲妹也。從覲官次，覲遇害，亦自刎。

元

毛清 雷景炤妻鄭氏 雷烜妻魏璣

毛清 蚤適人。至正己丑寇亂，清不從其家人避賊，而大書壁間云：「寧死，義不生污。」賊至，清持刃刺賊首，賊殺之。事聞，旌門復家。

建寧路雷景炤妻鄭氏 紅巾寇作亂，景炤及父被殺，以鄭有容色獨生之。鄭知賊意，遂自殺。次日不歿而蘇，撫其二歲兒底成立。以壽終。

雷烜妻魏璣 烜父珙爲興化尉。羅天麟作寇，珙奉檄守海口，假館福州以居，其妻趙與烜。亡何，烜卒。璣時年二十有六，出首飾易具以斂。明年，舅珙亦卒，與趙奔海口，扶舅櫬還福州。念二櫬不能一時並歸建，白姑權窆夫柩福州而奉舅還建。冒阻嘗艱，撫未晬孤境底於成立。至皇朝，境子鏊、孫士枏，俱登進士。

皇朝

魏宗欽妻丘鳳娘 雷溫妻江氏 魏壽係妻章聰娘 雷棟妻張氏 張伯輝妻陳仁娘 滕奎妻趙富娘 楊仕倫妻張閏 楊仕儀妻周氏 陳琦妻蘇貴娘 張澤妻詹善 雷格妻江淑貞 朱鉞妻雷氏 吳炫妻謝氏 楊公載妻龔氏^(三) 葉文梓妻張氏 周鶴齡妻徐氏 陳機妻倪氏 李文超妻陳氏 楊詹妻吳氏 陳照妻楊氏 陳岐鳳妻曹氏 李鑿妻黃氏^(四) 裴國宏妻馮氏 陳沅妻黃蘭英

魏宗欽妻丘鳳娘 欽父康爲倉胥，洪武初坐法當刑，宗欽詣官請代，丘曰：「勉乎行矣。君能爲子，妾不能婦耶？」宗欽就獄歲餘，度當刑，奉書訣父，父取書火之，曰：「兒其死矣，吾不忍觀也。」丘遂痛哭自縊。其後宗欽乃得赦歸，悲不自勝也，曰：「吾不意生，而婦不意死哉。」

貢士雷溫妻江氏。

魏壽孫妻章聰娘，年十八，夫亡子幼，舅姑老而貧，守志孝養，壽八十八。宣德中，旌門。

雷棟妻張氏，年二十寡，無子，甘貧守節四十餘年。

張伯輝妻陳仁娘，伯輝沒，二子尚幼，陳年三十，撫教之。其一子琮長，娶於葉，生子慶，二歲，琮亦夭，葉守志如姑。士大夫作詩美之，扁其堂曰繼節。後慶應貢士舉，葉亦以壽終。

府庠生滕奎妻趙富娘，弘治中，旌門。

楊仕倫妻張閏，仕倫遭疾，張所以求禱萬方，已刲股進，愈。復作，竟不起。事姑撫子，以賢孝聞。弘治中得旌。

楊仕儀妻周氏，年十九歸仕儀，踰年，仕儀卒，子旦方遺腹也。後旦官至吏部尚書。弘治間，旌表。貢士陳琦妻蘇貴娘，弘治間，旌門。

張澤妻詹善，生子鈞九閱月而澤卒，時年二十三。後壽八十四。

雷格妻江淑貞，年少寡，歲撫二孤苗，苗迄成立，而苗貴矣。

雷氏，適朱文公十二世嫡孫鉞，早卒無子，其時舅氏亦未有他子也。雷哀毀幾盡，強起事舅姑，涕泣至失明。既舅生子鑾，鑾生子法，乃求法後其夫。法長，襲五經博士也。

生員吳炫妻謝氏，炫死，謝年二十四，室赤貧，課子奉姑。及病，姑爲延醫，引斧自誓曰：「寧斷臂不近男子也。」萬曆中，旌門。

貢士楊公載繼室龔氏，公載偕長子承祚赴試京師，并卒於京。龔年二十一，遺子承禎四歲，嫡姑及

其所生姑俱老貧，皆龔支持之。孫百朋登第，旌表。

生員葉文梓妻張氏 年二十四而寡，一子延宗甫週，姑且老，斷髮自誓，撫孤長之。年八十餘以壽終。

周鶴齡妻徐氏 鶴齡早故，徐年二十三，養姑訓子，七十九而沒。孫武烈，萬曆鄉薦。

陳機妻倪氏。

李文超妻陳氏 文超之母亦寡，守文超。文超蚤卒，遺子一週耳。陳感激孀姑，矢志厲節。

楊詹妻吳氏。

諸生陳照妻楊氏 年二十七，照死，子三歲，獨其繼姑在，老而貧矣。楊之父舉仕爲通判，曰：「女貧也，從吾宦。」不可。鄰舍火，不出避也，曰：「吾子未歸。」然竟無恙。人以方之宋共姬。

陳岐鳳妻曹氏。

李壁繼妻黃氏。

庠生裴國宏妻馮氏。

庠生陳沅妻黃蘭英。

右貞女。

甌寧縣〔五〕

皇朝

劉寬妻童順^(六) 滕澍妻葉氏 楊應詔妻邵金

都指揮劉寬繼室童順 年未三十而寬卒，子銀尚幼，前人子盡有其產。或謂宜直於官，順曰：「彰子之失以傷至情，不可。」乃携銀依弟訓以居。銀既成立，時遣歸掃先塋，且修兄弟之好焉。

同知滕澍妻葉氏 事舅姑至孝。澍死，言不出閭，以禮讓勤儉訓諸子婦若孫。壽至百歲。有司旌門。

楊應詔妻邵金 應詔應貢舉不第，久之，講學華陽山中，邵深所敬服。子德興方七歲，人塾，少不循禮，朴責動至數十。既長，居常謂曰：「吾願汝効父也。」山陰王繼來游閩中，邵時政病，遣德興往見，德興請侍湯藥。邵曰：「名士寓此，可不望顏色。吾自往耳。」尋卒。繼爲銘其墓。

右賢女。

唐鉞妻鄒聰 李珏妻 李琛妻 楊公範妻黃氏 雷燦章妻魏氏 席成妻林森 席鵬妻蔡氏 吳元陽妻謝氏 郭臣妻王氏 魏維熊妻楊氏 葉模妻彭氏 任巨妻林氏 朱廷採妻滕順 雷用龍妻全氏^(七) 朱較避御諱 妻滕氏 滕桂妻楊氏 陳曜妻金氏 黃崇妻鄭氏 林朝卿妻謝氏 謝應京妻陳氏

唐鉞妻鄒聰。

李珏以掾給事京師，妾氏某，千戶女，年色並盛。珏死，妾焚珏骸，與其遺金裹歸，誓爲李氏死。珏子不爲養，取其金迫嫁之。妾北人也，徬徨無依，號慟去，饑餓死他家。路人嘆曰：「甚哉！棄父妾者獨何顏下地見父乎？」從侄琛。琛妻王氏，其喪夫年二十五，子習尚幼，家窶甚，族里長者憐而語之嫁，不可。

既習死，又語之，又不可，蓋稱未亡人者五十年。

庠生楊公範妻黃氏 公範病亟，黃時年方二十五，即許以殉。卒越日，嚙裂所服衰，自縊死。

庠生雷燦章妻魏氏 章沒，魏年二十，不食七日卒。

席成妻林森 旌表。

席鵬妻蔡氏 鵬死，誓不改志。里火延及鄰舍，反風旋滅，人謂天祐鵬祖。母亦以節聞。

庠生吳元陽妻謝氏 十九於歸，閱歲而寡。姑病在堂，子方三日，煢然無依，用節自誓。萬曆旌表。

舉人郭臣妻王氏。

魏維熊妻楊氏。

生員葉模妻彭氏 模病，彭剗左臂燕香以禱。模沒，彭年十九，一貧如洗，倚母度日。年八十，有司

賜帛給扁。

任巨妻林氏 與巨處相見如賓，其翁喜曰：「不意吾門有梁鴻、孟光也。」巨歿，林年二十五，絕膏沐，

不出戶者五十七年。孫本信，子可愛，相繼鄉薦。

朱廷採妻滕順。

知縣雷用龍繼室全氏。

庠生朱較避御諱。妻滕氏。

生員滕桂妻楊氏。

陳曜妻金氏 子思尹。萬曆鄉薦。

黃崇妻鄭氏 十七而寡，踰六十以節終。

庠生林朝卿妻謝氏 朝卿死，謝年十九，子叔文歲週，截髮自殘，不復出戶，孝事翁姑。翁釗至百歲卒，殯葬盡禮。萬曆二十四年，旌表。

諸生謝應京妻陳氏 應京家故貧，陳人門即毀簪珥，脫舅氏徭役之困。應京死，陳二十四，生子纔三日。迨十日，姑繼亡，逾月舅又亡。三喪併至，忍死力殯。卜舍學傍，辟繡課子。

右貞女。

建陽縣(八)

宋

呂宜人 邵武黃崇妻游氏 余楚繼妻陳氏 饒幹母呂氏 朱松妻祝氏 江錡妻虞道永 周瑄妻

陳氏

呂宜人 游酢妻也。有賢行。事舅姑以孝聞，友娣姒，睦姻族，人無間言。酢素貧不治生產，夫人攻苦食淡，能宜其家。

邵武黃崇妻游氏 幼受班昭《女訓》，通其大義，至治組紉筆札之藝，皆不待刻意輒能過人。歸崇，事舅姑，承祭祀，勤肅不懈。舅姑喜賓客，佳辰令節，親舊滿門，游供饋惟謹，未嘗委勞娣姒。姑性嚴，諸婦侍傍，有二十年不命者。游獨能順適其意，盥櫛溫清，無有違禮。姑每因事指言，以爲諸婦模楷。娠子，則必端居靜室，焚香讀儒、佛書，不疾呼，不怒視，曰：「此古人胎教法也。」稍能言，置膝上授以詩書。及

長，爲迎師擇友，教誨諄悉。子中、章，皆第進士。中，端明殿學士。章，台州史。贈建安郡夫人。

余楚繼妻陳氏 歸楚，生子翼三歲，楚卒。有前妻子二，陳盡產仁之，^(九)而使翼之四方游學，戒曰：「往成汝志，無恤吾貧。」於是翼蓋年十五，在外十二年，而後以進士起家爲吏。歸見陳於鄉里，陳此時閉門窮窶，方無以自存，母子相泣，閭巷聚觀，歎息其賢。翼，見縉紳。

饒幹母呂氏 父希說進士中第，剛介不苟合，晚令劍浦以卒。呂生而慙慙，不妄戲笑。未笄，失母劍浦，俾治家事，無弟妹如成人。尋以歸邵武饒偉，事舅姑甚得其懽。年餘生幹，甫晬而寡，誓志秉節。無何，劍浦及舅漳州府君皆卒，而姑氏固前沒，諸叔妹皆幼稚，呂持守門戶，奉承賓祭，和輯上下，內外斬斬，其出內用度具有籍記，雖龠合分寸無遺漏。幹稍長，遣就學，程其術業，謹其出入交游，未嘗借顏色。幹亦孝謹敦實，能自力學問。中淳熙進士。

朱松妻祝氏 逮事舅姑，孝謹篤至。松卒，子熹年十有四，祝辛勤撫教，俾知所向。熹貧病困蹙，人所不堪，而祝處之怡然。

江錡妻虞道永 字無盡，本劉氏女，其父處士棐，同產有適虞恫者，自其幼而愛之，携以歸鞠於虞，因冒其姓。少長，聰明識義理，往來兩家，愛敬曲盡。長歸錡，入門時，舅姑年皆甚高，禮法峻整，道永左右無違。凡調餽烹飪之事，既躬服其勞，而薪火之節亦必謹候視，務爲敏給稱微指。既進饋，退屏側立，蹑蹠以聽，唯恐少不中度。至或陰儲治饌備更索，雖在亂離乏絕中，亦必多方營致。錡仕宣教郎，沒時諸子皆幼，道永以禮法持門戶。錡從官時，先疇之人，恣兄弟衣食無所問。既沒，命諸子悉推與之。虞恫老且失子，道永歸養益謹，送其終，哀戚甚，不沐浴鹽酪者三年。性喜觀書，讀《易》、《論語》，得其大意，下至練

養、醫藥、卜筮、數術，無不通曉。平居處事，詳練縝密，與人言必依孝弟忠信。晚學浮圖法，屏簪珥，卻酒肉，布衣蔬食以終其身。淳熙慶壽恩當得封，諸子言於有司，將上狀，道永聞曰：「吾已棄人間事，何此爲？」且命而不謝是爲欺君，吾敢安乎？」竟留不上。

周瑄妻陳氏 父安世，強學博聞，嘗立義齋縣南，從學甚衆。陳少喪其親，哀慕不懈。及嫁，亦不逮舅姑，而歲時蒸享，執事必親。訖事，當嗚咽流涕。晚好浮圖法，得其大指，遂不復問家事。惡衣菲食，逾二十年，而憂人之憂，賑其厄窮病苦，雖極力不倦。子明仲，舉進士，知光澤縣。

皇朝

王氏

王氏 事姑至孝。一夕大雨，屋前池沼皆滿，視之，錢也。今其池名錢塘。
右賢女。

宋

兵部尚書呂祉妻吳淑人

兵部尚書呂祉妻吳淑人 祉爲鄜瓊所害，有得祉括髮之帛以歸，淑人持帛自縊死。

元

廖妙祿

廖妙祿 年十七，歸爲吳氏婦。其姑繼姑也，而事之順。二十，夫亡，敬事舅姑，撫教二子以三十餘年。有司上聞，未報。翰林學士姚公因侍宴仁宗，爲奏其實。仁宗曰：「閩處偏方，有此守節知義之母。」

乎！」特封貞節宜人，樹棹楔於門，永復其家。

皇朝

熊剛中妻劉氏 黃溥妻詹氏 蔡郎妻陳氏 劉潭妻朱氏 朱烜妻何氏 朱鎧妻詹氏 朱振妻余氏 朱錦妻應媽娘 李汝樞妻朱無瑕 潘榮妻劉氏 馬澄妻劉氏 徐輝妻黃佛姐 宋垓妻范理 黃庚妻倪氏 熊燦妻蔡氏 黃寬妻李淑亨 張煦妻徐田娘 陳郎妻翁氏 蘇崇妻張愛娘 劉祐妻葛氏 袁緯母王氏 詹郎妻張氏 詹燭妻范氏 翁敏妻周氏 熊堯德妻翁氏 袁仕重妻黃氏 李廷恭妻趙氏

熊剛中妻劉氏 年十八適剛中。事姑至孝，言動準禮。期年剛中亡，昕夕哀慟，以死自誓，求夫猶子燦爲後。年七十八卒。洪武間，旌門。

黃溥妻詹氏 生有淑德，好讀書。年二十五生子曙，甫週而溥亡。勤苦力貧以奉舅姑，舅姑繼沒，營葬如禮，鄉邦稱其節孝。曙，宣德九年以貢人太學。

蔡郎妻陳氏 郎赤貧，負債窮迫，欲嫁陳以償，陳自刎死。

朱氏 朱文公七世孫女也。(一〇)適劉文簡公八世孫潭，生子穩甫三歲而潭卒。朱時年二十四，瑩子自誓，撫子教以義方，鄉黨稱。

朱文公十世孫烜妻何氏 通《孝經》、《烈女傳》及曹大家《女戒》。夫喪時年二十五，守節以終。壽八十餘。

朱文公十二世孫鎧妻詹氏(一一) 年二十五守節。旌表。

朱文公十二世孫振妻余氏。早喪父，無兄弟，振贅焉。後其母不耐貧困，轉適他家，振挈氏獨居，蕭如也。母嫌振貧，謂：「如何不求去？」曰：「一與之齊，奈何貧棄之！」母言愈厲，遂自縊死。

朱錦 亦文公後。妻應媽娘，年二十五而寡，守志不二。先後被旌。

李汝楸妻朱無瑕。文公十二世孫女，於歸三載方有孕，而汝楸病療，謂朱曰：「我必不起，娠男則守，娠女若何？」朱嗚咽不能對。亡何，女矣。汝楸病轉劇，亟呼朱，至則已舌澀，第瞪視低回，朱大慟曰：「恐而室飯他家耶？」借事出房，遂自盡也。

潘榮妻劉氏。文簡八世孫顯之女。生二子，曰塤，曰箴，而舅姑及夫俱卒。劉年十九，持家有法，教子有方。

馬澄妻劉氏。文簡公十世孫女也。適澄生二子：長櫟，次梁。而澄蚤卒，劉二十四，躬勤紡績，撫訓二孤。

徐輝妻黃佛姐。

宋垓妻范理。年二十三，夫卒，遺子堅甫三月。姑憐之，屢諷更適。泣曰：「姑老矣，婦無子且當侍，況子耶？」姑沒，棺殮葬祭，悉自營辦。孀居四十餘年。

黃庚妻倪氏。適庚，生子三，曰倫，曰儼，曰信。而庚卒，倪年二十五，孝姑教子。人或贊之，曰：「習慣如此，不自知也。」

熊燠妻蔡氏。年二十一，生男壘甫四月而燠卒，嚙指明志，以節終。燠，勿軒九世孫也。

黃寬妻李淑亨。寬病革，謂亨曰：「母老子幼，奈何？」亨泣曰：「不負君。」寬卒，年二十四，日携乳

兒侍姑側，每食擇甘羹進，姑曰：「我子不亡矣。」

張煦妻徐田娘 煦母陳蚤寡，使贅於田。八閏月煦死，田娘年十七，方娠五月，慟絕也。後生一男，家貧甚，女工給子，以至成立。

陳郎妻翁氏。

蘇崇妻張愛娘。

劉祐妻葛氏 祐，諸生也，有名子衿中，學使姚鎮賞識之。方其卒，年二十七，子寅甫六歲。鎮悲祐不遇，命寅自襁褓中寄名諸生。葛痛夫愛子，顧不以姑息畜。後寅舉明經，司訓松陽。

袁綽母王氏 年二十六而夫亡。時綽方三歲，因遺資孀守，課綽就學，曰：「亦可行善。」綽遂以術名。

詹郎妻張氏 適五載而寡，無子，姑憐其少且貧，欲嫁之。里有富室，遂以重賄謀娶，張誓必死。會族有產子者，乞而育之。比長，娶婦生三孫，不十載而子喪婦亡，窮苦萬狀，沒齒無怨。

詹燭妻范氏。

翁敏妻周氏 年二十三而寡，有二子，一四歲，一遺腹。家貧甚，有諷以遺孤難恃者，正言折之。日夜紡績，事孀姑以孝聞。姑沒，力營襄事，宗黨賻贈，皆却不受。二子長，課之樵耕，曰：「此生道也。」

熊堯德妻翁氏 堯德兄堯成卒，遺腹舉一子，婦有他志，欲棄之。翁曰：「兄弟二人僅此子也，撫養在我，有他者聽。」亡何，堯德亦死，翁撫侄無二。有病，勸之就醫，曰：「贅也，速死爲幸。」

袁仕重妻黃氏 勉齋裔孫夢樞女。幼授《烈女傳》，能成誦。十八適仕重，五載仕重逝，無子，家貧。

黃抱夫主去依母家，以五十餘年。鄉人欲表其節，輒止之曰：「常事耳，何煩官府！」

李廷恭妻趙氏。

右貞女。

崇安縣（二）

宋

翁孝女 吳夫人 胡夫人 翁福清妻劉氏 貢士范巖妻袁氏 聖姑

翁孝女 紀之女孫也。獵涉方冊，覽《曹娥碑》，心慕之。年十五母病，籲天泣禱，割股投羹。母飲之，忽有神護，疾隨痊。里中朝議彭侯聞其賢，力爲季子括求婚。既歸，以其孝父母者孝舅姑。舅沒，姑毫且多疾，女日夜侍湯藥，至忘寢食。姑曰：「願汝婦如汝。」姑沒，哀毀淒切，聞者隕涕。

吳夫人者，胡安國母，仙州居士羨門之女也。幼通詩書，皆能析其大義。既歸胡，克盡婦道。姑余大君老得末疾，寢食盥櫛皆待人，夫人侍膳問衣，委身同起卧者垂十載。及沒，足屈不伸，宗長欲以羗夷法舉葬，夫人泣曰：「姑不得以全體歸地下，吾當與俱。」默禱於神，以手徐摩，頃之，姑足遂伸。安國稍能言，即遣就外傳，且戒不得歸。歸及信宿，乃遣之學。宗人曰：「兒稚弱，少休之。」夫人曰：「休正在此。」安國自是感奮力學，未冠遂預計偕。迨罷歸，宗人爲惋惜，夫人獨喜，因語之曰：「兒學短淺，使亟竊名第，必情且驕，難遠大期也。」安國既登第，復好弈，夫人責之曰：「業止一第耶？」安國遂禁弈終身。己，典教荊州，以事數忤守，夫人曰：「人貴德義耳，不貴以氣凌人。」安國遵訓飭勵，母教居多焉。

胡夫人翁氏 密州司戶掾女也。生前一日，其祖殿撰夢有通謁者曰：「吾，婺女星也，當生君家。」翼日，夫人生，紅光滿堂殿。撰曰：「必貴而壽。」長歸寅，以婦德聞。見元孫者三，累封太原寧郡太夫人。

翁福清妻劉氏 福清爲人友愛，劉能宜其家，治內井有規度。福清垂沒，謂劉曰：「吾兄弟幸子姓日庶，汝約束之，毋令異心。」福清沒，劉益篤忠信，家人歲鬻筭，市竹之利必入於劉，不敢私蓄。一門八十口，四世同居。

貢士范巖妻袁氏 年二十，巖就試，卒京師。訃聞，號慟幾絕。服除，剪發爲尼，携其幼子行甫屬諸宗人，而自結庵縣之黃洋居之，指河誓曰：「不復渡此水矣。」紹興末，行甫舉於鄉，哀登高引睇，載笑載悲。人詰其故，哀曰：「吾悲吾夫之不及見，而喜吾子能有成也。」壽百有一歲。

聖姑 不知其姓，邑五夫里人。及笄，偃蹇擇夫。里中有道子者，亦矜詳擇婦，乃聘聖姑。甫歸，道子暴死，姑遣之還，聖姑曰：「兒所擇婦，謂婦賢也。不貞不孝，又何擇焉？」逾十年，姑沒，力爲殯葬，苦貧甘乏，遂毀形屏處，茹素誦經。一日，端坐而逝，顏貌如生。

皇朝

倪氏 楊自明妻游氏 黃嘉賓繼妻暨氏

倪氏 藍增之室。早寡無貳。以通書史能書，天順四年，被選人掖庭備姆訓。八年，賜女官，馳驛還家。

楊自明妻游氏 年十七嬪於楊。姑風疾，艱寢興游，旦夕扶持。姑死，竭誠終事。亡何，夫被仇家毆死，游念子少，隱忍在心。及子長，懷刃入仇家，會仇家暴死，游曰：「恨不死吾手！」監司聞之，遣祭表

宅。

黃嘉賓繼妻暨氏 年十六歸嘉賓，從嘉賓於戶部官舍。嘉賓卒，幾不欲生，特念有腹孕耳，行至山東得雄，一婦一姑，撫嬰扶柩也。至揚子江，風濤暴起，暨抱兒籲天，衆舟覆，暨舟獨存。歸家，鄰舍火，焰及於庭，暨曰：「將焉避之？」俄而風反火滅。

右賢女。

元

丘公注妻程氏

皇朝

鄧文燮妻黃氏 蔡氏 程啓隆妻江氏 陳際中妻翁葵 黃季滋妻吳氏 吳京煥妻彭氏 李存妻

彭氏(一三) 張釗妻毛氏 徐環妻毛氏

鄧文燮妻黃氏 年二十八生子什濂，方九月而文燮卒。黃抱兒日哭柩側，曰：「爲此喘息。」黃之弟請曰：「姊無依，請歸我。」黃曰：「家不離主，禮也。」瑩瑩撫孤，竟底成立。有司上事，旌表。

蔡氏 西山九世孫女也。適建陽熊勿軒八世孫普惠，生一子曰繼儒，甫週而普惠卒，蔡年二十一，砥節礪行。邑人熊斌奏請旌表。

程啓隆妻江氏 年十七而孤，以節終。事聞，旌表。

陳際中妻翁葵 年十八歸陳。長子三歲，次子生四月耳，際中疾，謂葵曰：「不起矣，無哭也。傷我二親，善撫二孤，吾目瞑矣。」際中卒，葵吞聲襄事，奉慰舅姑曰：「孫卽子也。」舅曰：「汝少家貧，可奈

何？」葵曰：「事舅姑、撫孤幼、不忘夫命三者，婦分也。」舅沒，力營襄事。家益困，夜績不休，姑止無怠，日坐失明，葵曰：「失明婦甘，紡績廢矣，是天盲吾姑與吾兒也。」踰年替復明，人謂節孝之感。嘉靖間，旌門。

黃季滋妻吳氏 早適季滋，生子楫甫六月，季滋沒，吳哀痛不絕口。姑曰：「夫可痛也，子亦可懷。」於是稍稍節順。執喪三年，家日伶仃，姑曰：「盍他往？」吳曰：「有子又何之！」正德初，有司給米絹，表其宅。

吳京煥妻彭氏 生子穀三歲，次象甫五月，夫臨終囑曰：「親老子幼，守否在汝。」彭號泣自誓。夫歿，舅氏又喪，彭與姑形影相吊也。歲饑多盜，彭家獨免，人曰：「節婦孝養之需，神爲護矣。」

李存妻彭氏 年十九歸李，三年夫故，遺腹僅五月。夫疾革，謂彭曰：「腹中子未知雄雌，命之不淑，汝自裁之。」彭痛而誓死。夫歿，晝夜泣也，日祝天：「男乎，男乎！」果誕男。及週，疹廢明，復號天撫男，泣也數月，明復。人曰：「孰謂天遠！」

張釗妻毛氏 年二十一，夫亡，子瀾僅數月。毛抱屍慟，姑慰之曰：「母存子存，夫去夫在，（一四）毋空自苦。」毛拊踊斷髮曰：「有如此髮矣。」姑年及九十，敬養不替，而子瀾死，獨孫在耳。時巡臺檄采節義，邑人舉毛，毛曰：「夫亡子亡，虛名何事？」力求已之。

徐環妻毛氏 環之母生環與璩，中歲寡。毛氏年十九，子宗成甫三月而環死。璩妻李氏生子宗茂甫一週而璩死。一門三孀，家事蕭索。姑謂毛、李曰：「二孤我撫，二媳自裁，無共苦也。」毛私語李：「吾爲冢婦而子我子，汝可從姑。」於是李嫁而毛守也。姑恒語人曰：「吾婦夕橫雙臂以枕二孤，食果必均，製衣

同布，真賢婦也。」姑沒，毛悲慟骨立。宗成長，生一女而又死，毛痛傷成疾。宗茂請醫視之，毛曰：「徐有後矣。此吾從之死之日。藥之是求生也。」不藥而卒。

右貞女。

浦城縣（二五）

五代

章仔鈞妻練齋

章仔鈞妻練齋，生而肉髮深沉端毅，終日或不一言笑。仔鈞仕閩，爲西北面行軍招討使。王審知使屯兵縣之西巖。南唐將盧將軍以兵來侵，仔鈞遣二校請師於州，失期，將斬之，齋勸曰：「時危未靖，公奈何斬壯士！」仔鈞悟，置不問。二校逸入南唐，皆爲大將，一則金陵邊鎬，一則上元王建封也。保大三年，南唐遣江南安撫使查文徽伐閩，取建州，鎬爲行營招討，建封爲先鋒橋道使，奪其險要。已而建封焚外郭，克之。時仔鈞歿已久，獨齋獨存，二校遣使者持金帛遺齋，以白旗授之曰：「吾且屠城，夫人宜植旗於門，已戒上率勿犯矣。」夫人返其金帛并旗，曰：「君幸思舊德，願全此城，必欲屠之，吾家與衆俱死耳，不能獨生也。」二校感其言，遂止，曰：「夫人之仁，使鬼爲人。」後齋子一十五人，孫六十八人，多躋顯仕，其後裔繩繩相繼，位宰執法，從歷卿監，佩守令章者殆百餘人，人以爲活人之報。至皇朝，齋二十世孫存道以遺像求學士濂贊之。贊曰：懿彼夫人，生於七閩，肉髮有倫，靜毅而莊。動循厥常，女士之良。笄而有歸，建州之妻。其德與齊，建州桓桓。旗旄繡繡，以振建關。將固我城，必集我兵。移書以旌，二校言旋。何期之愆，絕首以縣。夫人曰：「吁！乾坤創夷，壯士勿

誅。」逸之使奔，遂爲唐臣。建旄而軍，爭城以攻。火旗黃紅，陷其四封。二校有云：「使鬼爲人，夫人之仁。曷其報之？曷棄我私？曷授我旗，旗植於家。有突而譁，我劍之加。」夫人曰：「噫！是城卒屠，我生何爲？」有衆若林，昔而斧礮，今而謳吟，夫人之亡。其魄已藏，其澤愈滂。傳紫輿，霧瀚雲瀾。被於今茲，遺像儼然。萬日斯瞻，曷取則焉！

宋

章惇妻張氏（一六） 章甫妻沈氏

章惇妻張氏 惇之人相也，張病且死，囑之曰：「君作相，幸勿報怨。」既死，惇語陳瓘曰：「惇亡不堪。」瓘曰：「與其爲無益之悲，孰若念臨絕言。」惇無以對。

章甫妻沈氏 經理家事，無巨細皆有節法。甫襟度簡遠，未嘗問生事。然奮羈旅起家，闔門千指，有宅以居，有用以食，悉沈力也。自政和以來，四方無虞。仕進者以攀附爲榮，而沈每戒其子曰：「宜安素分，遠權門。盜賊且起，無遠官貽吾憂。」諸子仕者，謹奉其教，卒以無患。聞者服其遠識。

元

真氏女 徐嗣元女

真氏女 文忠裔孫也。當元時，其父仕爲管庫，負官錢數十萬，鬻女以償。久之，流落倡家。剛貞自持，日隨儕侶出，惟歌雅詞吹洞簫而已，客無得犯者。承旨姚牧庵會客翰林，女往供奉，牧庵聞其作閩語，詢知其故，告所司脫其籍以嫁院吏黃逮。逮後至顯官。

徐嗣元女 至正間，青田寇侵縣，女爲兵所掠，作詩寫懷，語意悲切。詩云：「萬水千山去路賒，青鞋踏破幾層沙。登山絕頂重逢嶺，渡水尤深又復涯。鴈字只傳夫與子，魚書難寄母和爺。回顧遙望鄉關

處，雲下峰前是我家。」

右賢女。

元

李智貞 徐彩鸞

李智貞 鄭全之妻，左丞收之母也。七歲能讀書，九歲母病，調護甚謹。及卒，哀慟欲絕，奉父極甘旨。初，父以智貞許全，後客邵武，邵武豪聞其慧，強納采焉。智貞斷髮拒之，且數求死，豪不能奪。秦定間，全病歿，智貞悲泣不食死。智貞能爲詩，有《靜方集》，陳旅爲序。

徐彩鸞 字叔和，適邑士李文景。每誦文天祥六歌爲感泣也。元末，青田賊寇浦城，彩鸞從父嗣源逃山谷間，賊欲害之，彩鸞前曰：「寧殺我。」遂得釋。彩鸞語嗣源曰：「兒死之，父必速去。」賊拘彩鸞至桂林橋，拾炭題壁間曰：「惟有橋下水，照見妾心清。」遂罵賊，投橋下，賊競出之。既，乘間復投水沒。

皇朝

林淑柔 林陳妻葉文娘 蘇公亮繼妻游淑端（七） 周景妻吳懿清 徐珊妻張雪娘 真大韶妻張

定娘 李 遇陽妻董線娘 吳瀾妻祖梅娘 徐以鑒妻黃聰娘 吳邦用妻梅賢娘 丘璫妻包淑貞 祖

黯妻徐鳳娘 李應相妻潘翠娘 范毛桃妻管氏

林淑柔，嫁張伯成。蚤逝。遭元季勦勦，舅姑繼沒，携子女往依兄弟，拮据教育。洪武間，年八十餘卒。

林陳妻葉文娘。

蘇公亮繼妻游淑端 年二十餘，方娠，公亮卒，臨終囑曰：「生男當守，生女嫁也。」既生女，竟不嫁。

周景妻吳懿清。景一作環。

徐珊妻張雪娘 珊卒，張年二十二，號哭飲血，誓以身殉。諸姒苦勸之，乃強起，撫育其孤紹。有富姓委禽焉，閉戶自縊，其姑毀繡入救，乃免。萬曆二十五年，旌門。紹有隱德，鄉人稱之。

真文忠公裔孫大韶妻張定娘 年十九而寡，遺孤梧方襁褓，引刀斷指，誓天鞠撫。以紡績奉舅姑。萬曆三十年，旌表。梧廬母墓，亦以孝聞。

李遇陽妻董線娘 遇陽，畫史也，以宕子游江湖間，去之二十載方歸，歸數月輒復去。此時舅姑咸年踰六旬，而夫兄不事生業，所以養舅姑皆自線娘十指出。而自後畫史之音信絕矣。舅沒，夫兄潛與姑詐爲夫書，囑之改適。線娘痛哭自縊，姑憐而止之。嗣是家日寔，夫兄出亡，線娘養姑不懈。姑沒，典衣襄事。歸家依其兄嫂居，或日不爨爨，亦不飽也。萬曆二十九年，乃知畫史贅馬瑚府富人家，挾貲至千金，前一歲物故。線娘號泣曰：「死，吾不媿矣。」遂不食死。年五十一。

吳瀾妻祖梅娘 歸一年而瀾死，有身矣。已，生男，曰：「有依已。」奉舅姑盡孝，應門一童，爨下一嫗。後其子娶婦，頗治飾，即命去之。寡居六十二年如一日也。

庠士徐以鑒妻黃聰娘 年十六歸徐，不五載鑒卒，囊篋罄懸，母兒子立。外戚李某橫欲奪嫁，叩天咬血，引繩自縊，會兒索乳啼號，舅姑覺而拯之。舅年耄矣，孝養彌殷。姑病痢病目，身侍其側，舌舐其翳。課子承夫以五十年。

吳邦用妻梅賢娘 年二十而寡，長子甫二周，次子董孕二月，家業零替，竟奉姑課子以底於終。

丘璫妻包淑貞 二十而寡，引刀斷指，撫孤廷梧、廷槐。其後諸孫十餘，翩然振世。壽八十餘。

祖黯妻徐鳳娘 嫁四載夫亡，董生二女，割髮明志，白姑擇嗣以繼宗桃。姑沒，痛哭仆地，遇其諱日，泣下沾襟也。

李應相妻潘翠娘 應相亡，潘年二十有一，剪髮自誓，養姑訓子。

范毛桃妻管氏 毛桃家貧，管敬事之不懈。未幾，毛桃歿，貧不市棺。鄰人舉其屍焚之，管慟哭，跳入烈焰中，抱夫屍同燼。里人以聞，立坊旌表。

右貞女。

政和縣（二八）

宋

黃朝佐妻許氏

黃朝佐妻許氏 嫁八年而卒，（九）生一男曰石，纔二歲。既屬疾，自度不起，指石囑其姑曰：「新婦卽死，以是兒爲托，然教之必嚴，勿以其無母也。幸而有立，新婦不亡矣。」石長，游太學有聲稱，擢進士甲科，爲上虞丞。

皇朝

周氏

周氏 魏穀實母也。既喪夫，穀實與其子彥祥、穀資相繼夭，三婦並少，周諷以從一之義，三婦皆

感泣齧指誓。閨門之內肅如也。諸孫總角者則遣就外傳，在襁褓者自撫哺之。旦輒坐於庭，諸孫環侍，聚僮僕訓諭，使治生業，晚則稽勤惰賞罰焉，如是二十年。壽七十五卒。

右賢女。

元

張子方妻管氏 丁賢妻盧氏

張子方妻管氏 至正間，木礫寇入邑，子女多驅迫以去，管年二十餘，自刎死。

丁賢妻盧氏。

皇朝

吳景文妻鄭氏 劉氏 張彥章繼妻陳氏 陳受榮妻倪氏 倪澄妻范氏 張子銘妻盧氏 王得閔

妻魏氏 林昭得妻李氏(三〇) 吳公寶妻黃氏 王明妻陳氏 姜英繼妻李氏 陳瑋妻范氏 游銓妻張

氏 范灼妻林氏 吳天秩妻池氏 宋廷春妻吳氏 張炳妻吳氏 趙旻妻陳氏 張鳳池妻陳氏

吳景文妻鄭氏 洪武元年，木溪寨寇至，舉邑驚走。鄭及女伴十餘人避難山谷，棄其週歲兒瑾土草

中。寇進逼之，自高崖投下，將半，衣絙於棘，良久復墜，不死而右足折。一女同投者衣無所絙，齧粉矣。

寇退，瑾亦無恙，人謂天相。而邑人稱同投者曰投崖女子。

劉氏 洪武中從其夫吳繼祖應南京軍役，生子浩成而繼祖卒，劉年二十又一。抱遺孤還里，撫教底

成，以天年終。

張彥章繼妻陳氏 彥章爲縣吏，以罪謫戍，臨別囑曰：「存亡未卜，善撫我子也。」陳時年十八爾。旣

彦章歿，陳撫育己子及前妻子，年八十九乃卒。

陳受榮妻倪氏 正統末，古田寇剽縣境，倪與夫避山中，見驅擄，投溪而斃。寇退，求得其屍，色如生也。

倪澄妻范氏。

張子銘妻盧氏 年二十四而寡，或諭之曰：「年少子幼，奈末路何？」盧曰：「豈不聞餓死事極小？」聞者歎服。

王得閔妻魏氏。

林昭得祖母李氏 年二十四，夫卒，一子兩月耳。有謀聘之者，持刀自絕，鄰嫗覺而止之，獲免也。

吳公寶妻黃氏 年十六歸公寶，越四載公寶卒，竟遺一女。女長，人曰：「可贅婿也，是卽子矣。」黃曰：「如宗祀何？」育夫從子坦爲後。

王明妻陳氏 二十餘生子恣，未週，明疾革，囑曰：「必不起，子幼也，去留在爾。」泣曰：「有留爾。」明死，遂依明從母以居。沙、尤寇作，挈子逃難，備嘗艱苦。知縣王鑑作詩美之，有「寸心昭白日，信誓契蒼天」之句。

姜英繼妻李氏 年二十六，生子禮甫三歲而英亡。攻苦食淡，育前妻子三人如己出。禮，領正德鄉薦。嘉靖十三年，旌門。

陳瑋妻范氏 瑋疾革，范默割股和劑服之。瑋卒無嗣，或勸之嫁，厲聲叱曰：「犬彘我耶！」年七十七餘卒。

貢士游銓妻張氏 適銓，奉世□盟，〔有實案儀〕。其出丈夫子二，長業儒，次在櫛。女子二，其長已嫁，季及方笄也。嘉靖辛酉，寇發建，屬邑多被攻圍。張氏慮且莫測，數提誨其季女曰：「凡我婦質順，適其娶以一所，天幸矣。彼變之窘，惟溺與刃。女謹識之。」銓聞，讓曰：「婦言不祥，無喪而慮者與？」張曰：「婦聞：士尚其節，必崇於夙，女愛其身，必明於素。君將節砥，胡是不解無惡不祥？使婦與女能明不祥，祥莫大焉。」居亡何，海航諸寇誘倭夷數千攻政和，陷之，張度不能脫，速呼女曰：「省前誨乎？」領之，既赴井死，張隨之。閱數日，賊窺井出骸，割帶囊中簪珥，得金可數十。時銓與其兒俱被執於郊外，銓幸先脫。後賊拘銓兒，從其家令取瘞貨，視其母妹則既死矣，泣莫禁。賊詰知故，亦相愕曰：「維母與子各挾其貲可以得生，何弗爲也？」烈哉烈哉！覆之以衣而去。萬曆二十二年，旌門。

范灼妻林氏 年十八喪夫，深居閨閣，雖弟侄不得見。嘉靖壬戌，倭陷城，捉迫入營，溫語露刃，誘逼相加，嚴厲之意見於色辭，遂見殺也。萬曆二十三年，旌門。

吏目吳天秩妻池氏 嘉靖壬戌，倭陷城，氏被執，抗不入營。賊按劍駭殺，顏色不變，厲聲罵賊，引頸就刃。

省祭宋廷春妻吳氏 夫病，焚香告天，願以身代。夫卒，抱棺誓志，閉門屏居。有司旌之。

張炳妻吳氏。

教諭趙旻妻陳氏 旻罵賊死，陳以節終。郡守襲道立稱其「君臣夫婦之間，嘉耦無媿」。旻，見縉紳。

張鳳池妻陳氏。

右貞女。

松溪縣(二)

元

李述父妻黃妙銖 范回

李述父妻黃妙銖 至正丙申，青田寇侵縣，妙銖方盛年，與群婦逃出郭門，被執，據地哭，拏不行，驅迫之，自投高崖下，寇舍去。至暮，述父跡得之，而猶生也。

范回 爲遂應場葉彥寬妻。至正間，彥寬得授政和簿，未任而歿，回年未三十，一子尚幼，誓不二庭。有价婦同居，亦新寡將改適，回力爭不聽，乃獨撫其子以居。子長從戎，范又撫孫。孀居五十餘年，壽九十。

皇朝

葉繼生妻黃妙瑩(三) 楊繼義妻嚴妙音 江克俊妻嚴完娘 葉濂妻馬妙琯 葉廷寶妻李翠娘
楊惠林妻范三畝 葉宗儀妻范勉 陳光妻范佛姑 葉姑娘、陳應娘 林壽妻范惠女 葉孜妻陳氏
楊國資妻陳賽 董用賢妻葉氏 葉培妻陳氏 陳本仁妻童氏 江鏗妻陳氏 葉文祥妻何氏 葉世湜妻魏氏

黃繼生妻黃妙瑩 洪武初，慶元山寇剽掠人其村，猝至繼生家，斬戶人，揮刃斫之。妙瑩奔呼出，以身翼蔽，受數十刃，至氣絕不動。群盜愕然棄去。繼生得不死。

楊繼義妻嚴妙音。

江克俊妻嚴完娘 年二十生子濬，未晬，克俊病篤，屬以母子。完娘許諾夫卒不二。姑年八十餘，生事死葬莫不如禮。後子濬又卒，撫育二孫至於成立。

葉濂妻馬妙瑄 年二十，濂病亟語曰：「吾死無後，汝將何歸？」妙瑄曰：「吾亦有死。」濂卒，以刀自刎，家人覺而救之，傷額寸餘，死而復生。五十餘年卒全其節。

葉廷寶妻李翠娘 嘉靖十七年，旌表。

楊惠林妻范三販。

葉宗儀妻范勉 年十七寡，舅姑欲奪其志，抱木主歸依母家。飲恨不起，臨終求與木主同葬。

陳光妻范佛姑 嘉靖季，廣賊臨境，佛姑從夫匿本里前洋山。賊搜山得之，執至東嶽營，衆婦皆入，佛姑堅抱門闌不進。賊悅其姿，初忍不殺。及往河東，至東平渡以石擊頭，血流被面，且泣且罵，中流奮跳渡下，賊怒殺之。年二十二。

葉氏姑娘者 江華之妻，而陳應娘，葉弟惠勝妻也。二婦貞潔和順，守貧苦節。嘉靖四十一年十二月，同里人避倭寇，匿長潭。值年夜，里男覓刀剃頭，弗得，姑娘乃出諸懷，衆婦問故，姑娘曰：「設有急可自裁也。」獻歲四日，倭圍長潭，執姑娘、應娘，共繫一繩。姑娘謂應娘曰：「我二人今日被虜，縱生還，潔亦名污，不如就斃。」應娘唯唯。姑娘探刀懷中，則已墮失，於是各抱幼女，連繩跳潭水中。

林壽妻范惠女 嘉靖四十一年臘月，與衆婦避倭，匿廖墩山塢。賊掠山，執惠女及衆婦至水南，獨惠女與抗，或謂：「今且順之，家中來贖矣。」惠女曰：「可贖身也，可贖辱哉？我則寧死。」賊見言，殺其幼女以懼之，惠女自如。曰：「併及汝矣。」曰：「固所求也。」賊殺之。

葉孜妻陳氏 年二十二，孜故，獨遺一子甫週，矢志鞠之。隆慶六年火，東鄰西舍俱燼，陳號泣曰：「天乎！未亡人及此孤兒，安能勝舅姑兩柩？兩柩燼者，未亡人命卒之日也。」火及前廊，天爲反風以免。

楊國資妻陳寶 十七歲，夫亡，無子，立夫兄弟各一子爲嗣。謹事孀姑，矢志靡二。家故饒貲，以子肄庠。萬曆四年，建文奎閣於學宮。有司獎之。

董用賢妻葉氏。

例貢葉培妻陳氏 少嫻女訓，善事舅姑。夫亡無子，立猶子繼嗣。後捐田二十二畝於學宮，以助邑士之學。

陳本仁妻童氏 年十八寡，以節終。

江鏗妻陳氏 年十八寡，以節終。

葉文祥妻何氏 文祥歿，何年二十八，事姑黃、祖姑謝，奉養備至。二姑皆年近百歲，而何亦八十餘。

葉世誤妻魏氏。

右貞女。

壽寧縣〔四〕

皇朝

吳自修妻張氏 葉秉則妻吳濂 周騫妻李八姑 李津妻黃氏 朱文斌妻許氏 葉從式妻吳細娘

周文妻李氏

吳自修妻張氏 嘉靖間，倭寇壽寧，張年十九，負幼兒匿巖洞間。賊搜出，以刀挑其兒，欲挾之行。張向前奪賊刀，賊怒殺兒，張唾賊，遂被殺。

葉秉則妻吳濂 以節旌。年八十餘。

周騫妻李八姑 二十適騫，甫三月歸寧，聞騫卒，徒步百里奔訃，殯畢自縊。

李津妻黃氏 年二十五，津喪，無舅姑，兄嫂逼嫁之，剪髮爲誓，嫂曰：「髮可短也，亦可長也。」黃聞，自縊死。

朱文斌妻許氏 年十九適斌，半載，斌亡，父母逼嫁，剪髮嚼指，自誓靡他。所生遺腹男夭折，撫課孫鳳，補弟子員。年九十終。

葉從式妻吳細娘 嫁九月，夫卒，誓死以殉，爲妯娌周防不得間。尋立伯氏次子懋猷，叔氏次子懋育爲嗣，曰：「二子並嗣，示不私也。」

周文妻李氏 夫死，自經以殉。
右貞女。

延平府 南平縣 將樂縣 大田縣 沙縣 尤溪縣 順昌縣 永安縣 延平衛〔二五〕

南平縣〔二六〕

宋

黃中美妻林夫人

邵武黃中美妻林夫人 贈少師積之女。渾厚靜專，歸中美，甚貧，處之自若。中美貴，不改其度，事夫女兄如其姑。中美沒於外，歸其喪，崎嶇川陸，兵火中五年乃至。教子務以忠言直節立其志。年九十餘，神明不耗，起居不衰，似有道者。

右賢女。

皇朝

劉通妻俞氏 劉雄妻何妙玉 黃勝寶妻葉氏 歐瀾妻林氏 王鼎妻林氏 楊文厚妻薛氏 吳節

妻游氏 張倪瑤妻魏氏 黃瓊妻徐冬使 陳瑞妻吳氏 林鳴鳳妻黃怡姐 蕭元春妻李氏 楊繼周妻

黃氏 謝學元妻李氏 何繼文妻李秋菊

贈淑人俞氏 贈右副都御史劉通妻，右副都御史璋母也。歸劉，以孝謹聞。年二十九，通卒，勤紡績以養其家，教育二孤，脫簪珥遺之人學。郡守雷誠欲上其行，亟辭曰：「守節婦恒，豈願有聞？」卒後八年而璋第進士。

延平衛應襲指揮劉雄妻何妙玉。

黃勝寶妻葉氏 早寡，完節。年七十一卒。兵部尚書孫原貞節鎮八閩，輓以詩，有「想見地下夫，無媿生前好」之句。

國子生歐瀾妻林氏 早寡，撫孤梁，仕宿州學正。

王鼎妻林氏 以節終。

楊文厚妻薛玉璫 十七而寡，父母欲易其志，斷右鬢自明，竟以節終。

吳節妻游氏。

張倪珪妻魏氏。

黃瓊妻徐冬使 少艾適瓊。瓊，宕子也，鬻之富商，徐涕泣欲死，富商驚異去。瓊又誘惡少娶之，徐度不能脫，奔與母訣。母曰：「夫誠宕子惡少，不足托也。無他匹乎？」徐歸自縊死。郡守裴椿爲斂葬。

吳庠生陳瑞妻吳氏（二七） 旌表。

林鳴鳳妻黃怡姐 嘉靖壬戌，流賊猝至，扶姑走，被獲，以頭搶地，鮮血迸流。執至臨溪高樓，奮身墮死。賊退七日，收屍溪傍，顏色如生。時年十七。

庠生蕭元春妻李氏。

庠生楊繼周妻黃氏。

謝元學妻李氏。

何繼文妻李秋菊。

右貞女。

將樂縣（一八）

皇朝

張貴娘 周孟昇妻蔡貞 蔡玘妻蕭榮 楊顯妻黃琳 溫敬妻余鼎娘 林人鳳妻廖氏 楊汝采妻

饒氏 徐以昭妻白氏 蕭賁妻徐氏

張貴娘 沙寇入境，貴娘時年十八。賊執之，將昇去，張曰：「請斂首飾以隨。」潛入屋後投江死。

周孟昇妻蔡貞 年十八，矢志甘貧，教子璉，儒業有聲。知縣陳大經聞而欲旌之，蔡呼璉止之曰：「常事也。」年八十三卒。

蔡玘妻蕭榮 商人婦也。方娠而玘商外，生子潮八年矣，玘尚未歸，卒於臨清逆旅。蕭曰：「妻不久夫，子不識父，悲哉！」守志教子，以終天年。

邑庠生楊顯妻黃琳 值家窘，竭力楮持，敬順舅姑。顯卒，年二十四，撫二孤。二孤死，各遺一孫，鞠育底於成。

溫敬妻余鼎娘 比笄適敬，越五年，敬溺死，余痛屍踰月弗獲，出所衣衣及夫遺服焚之，而上所有於姑。又踰月，敬屍竟弗獲，沐浴而縊於夫寢。

邑庠生林人鳳妻廖氏 人鳳沒，廖年二十二。家故窶甚，舅姑七旬，二孤松、梅俱在襁褓。廖勤紡績給衣食。女孫配吳，蚤寡，引與同守。以壽終。

楊汝采妻饒氏 旌門。

徐以昭妻白氏 旌門。

蕭賁妻徐氏 旌門。

右貞女。

大田縣（九）

皇朝

郭氏婦 黃永亮未婚妻郭善英 陳熙妻張秀使 田保三妻連氏 田稀八妻范氏（〇） 嚴惟中女

寶使 范永岱妻溫玉娘（三一） 張盛三妻鄭氏 田 貫妻蕭氏 嚴和濟未婚妻王氏

郭氏婦 失姓名。鄧茂七亂，鄉人結寨東巖拒之。賊破寨，婦襁褓呱呱兒而且有身矣。賊驅婦去，婦奮罵，投百尺巖下，與兒俱碎亂石間，胎兒及腸胃迸出狼藉。賊駭愕，據高垂瞰，皆酸鼻不忍視，曰：「此真節婦，儂輩迫死之，不祥。」瘞之而後去。

黃永亮未婚妻郭善英 永亮卒，善英白父母奔喪，至則留家，持服朝夕奠，執爨事舅姑。日就群處子治女工深閨中。永亮將葬，盛爲傭者治具，囑使大作墳，人莫覺也。發引前一日自縊死。

陳熙妻張秀使。

田保三妻連氏 年十八寡。撫遺腹子，以節終。

陳稀八妻范氏 早寡，赤貧。年饑採芹茹草，以養其姑。

嚴惟中女寶使 嘉靖季，寇亂，闔家被擄。寶使懼辱，輒自縊，惟中救活之。賊拷惟中索贖金，將殺焉，寶使給賊全父。抵銘溪渡橋上，乘賊午飯，投橋下死。賊驚嘆，放父收屍，而且爲詞弔之。

范永岱妻溫玉。

張盛三妻鄭氏 家赤貧，以節終。

出一貫妻蕭氏。

生員嚴和濟未婚妻王氏 和濟沒，王氏奔歸夫家，孝事舅姑，誓死不嫁。年三十終。右貞女。

沙縣(三)

宋

仙游縣太君羅氏 左司郎中張維妻羅令人

仙游縣太君羅氏 秘書少監陳世卿妻。有賢行，事祖姑蕭氏順焉。諸妣慕其所爲，皆稱孝婦。經紀內治，不懈至老，世卿行治勞烈稱天下，有施於後世，其子孫蕃衍，能中其家法，皆繇太君善相善教。王荆公爲銘墓。

左司郎中張維妻羅令人 世爲縣望姓，家法嚴整。令人生年二十有二而歸郎中，事姑羅恭人孝謹。郎中公故貧，初仕，將遣其女弟而無資，令人悉出囊中裝奉之。事郎中二兄，旦暮率諸幼稚，以次問起居，無一日闕禮。子侄就學歸沐，輒具湯餅會諸娣姒男女，語次從容問所學業，勞勉諸侄，以勵其子，油油如也。羅恭人嘗苦木疾，令人靜夜露香致禱，願捐已壽，以延姑年。如是者數月，恭人疾頓平。而後三年，令人一旦暴卒，恭人哭之慟，至老念之不能忘，與人言，稱其孝，至泣下。令人儉約，謙下好禮法，有識度。嫁時篋中有黼色絺衣，忌日輒被以奉祭，稱慰如儀，常所服禮衣橫帔如民間法。或告以張公旦通朝籍，盍改用命服，令人曰：「此非拜恩，何敢服也？」卒以禮終。

右賢女。

宋

廖氏

廖氏 本名一作民，一作士。妻，性慧，解歌舞。紹定三年，爲賊所掠，命之歌舞，廖罵曰：「我恨不磔汝，歌舞悅汝耶？」賊怒殺之。時賊方猖獗，欲窺州城。廖有娠，賊剗其腹，觀男女以卜進退。得女，遂引去。招捕使陳韓具聞於朝，詔贈懿節夫人。鄉人立廟祀之。「本名妻」三字，舊志也，若謂「名家女」者，然名家之妻，何以善歌舞？不可曉也。

元

劉國美妻林愈娘

劉國美妻林愈娘 至正末，江西寇鄧克明攻破縣治，愈娘失夫所在，奔匿草間，被掠。迫行至安濟橋，謂同行諸婦曰：「寧死不受辱。」復拊其懷中子曰：「我之不振，亦汝不振也。與其棄於道，夫誰憐而鞠之？不死猶死也。」痛哭而投於河中。通判劉總以聞，詔書旌表。

右貞女。

皇朝

陳義姑 陳氏婢

陳義姑 馬坑陳穗女也。年十八，穗夫婦相繼卒，遺二弟，長天生七歲，次天載五歲，親族莫不幸其死以利其有，遂矢志自立，不嫁撫弟，然族人窺伺未息也。每居常置苕簪數十把，酒食時具。忽一寒夜，

有族人謀乘黑叩姑戶，燃箒隱照，皆其族兄弟也，亟啓戶具酒食款之。叩者急告曰：「吾適夜行滅火，來汝求明。」自此知有備，遂絕害意。及二弟成立婚娶畢，年四十五乃嫁，終無子。二弟迎歸，母事之。及沒，廟祀之曰義姑。

陳氏婢 陳仕進家侍女也。仕進甫三歲，父母相繼卒，婢撫之。鄧茂七亂，入山谷竄，婢負仕進并携其家簿券以逃，竟存陳氏之門。

右賢女。

幼溪貞女 胡氏三世姑婦 羅明妻洪氏 陳雲鵬妻曾淑真 陸文諒妻林氏 陳氏女 謝鶚妻陳氏 曾一夔妻胡氏 張從傳未婚妻 謝應昇妻魏氏 馮經妻余玉娘 鄧琳祥妻林氏 王珣妾黃氏 夏永慶妻蕭氏 羅舉妻張氏 韓輔妻鄧氏 陳月娘 陳經妻何秀女 黃文炳妻曾氏 楊知新妻龔氏 黃文諭妻徐氏 張光堂妻游氏 黃應科妻張氏 黃琦五妻鄧氏 黃作賓妻陳氏 游天與妻張氏

三 胡天詔妻朱氏

幼溪貞女 失其姓名。鄧茂七殘破縣治，匿草莽間，爲二賊所獲。貞女許過橋從一人以終所事。二賊信之，扶携至橋心，貞女忽以兩手結賊，投於淵，與之俱溺。弘治四年，憲副楊澤、郡守蘇章立祠祀之。

胡貴妻陳氏 年十六始孀，越二載貴卒，生宗旺甫一歲，衆喙交撼。陳曰：「更夫棄子，不屬爲人。」宗旺長，娶於姜。正統間，避寇府城，卒，子斯祐三歲。姜時年二十五，亦勵志撫孤。寇平，携斯祐歸葺舊業。及長，娶吳，而斯祐又卒，遺二孤，長敏瓚七歲，次敏璋二歲。吳年二十五，日夜勤苦督瓚力學致顯榮。璋亦世其家。人謂：「胡氏姑婦，三世一心。」

邑庠生羅明妻洪氏。

陳雲鵬妻曾淑真。雲鵬父璵官田州，往省覲殺客舍，時曾年一十五，遺孤世芳甫一歲，誓不他。舅棄官歸，業益落，破奩產養之。督世芳世其家。嘉靖初，陸文裕深謫郡丞，檄縣表門。

諸生陸文諒妻林氏。家貧，井臼相文諒學。文諒癰疾，奉湯藥不怠。漬甚，以父母託弟，以幼子託母，以一女歸所許嫁家。林曰：「不託婦哉？」諒曰：「貧，勿留也。」林曰：「請面決。」入卧內投繯死。諒撫屍大慟，次日亦卒。

陳氏女。年及笄。嘉靖十二年，流賊入境掠其家，將污之，女堅持不從。賊脇以刃，厲聲罵之。賊怒，犯之。以爪傷賊面，罵益厲。賊大怒，肢解之。

諸生謝鶚妻陳氏。年十七適鶚，甫六月而鶚卒，陳時已娠，憑屍哭曰：「所不從君，以堂上之姑，腹中之孕。」及期，生子應元，喜曰：「不死矣。」屏脂澤，甘粗糲，孝奉其姑，教子成立。後應元領嘉靖鄉薦。

曾一夔妻胡氏。

張從傳未婚妻高足娘。從傳病故，足娘涕泣廢食，搥毀聘釵，以死自誓。母及嫂勸解之，氏峻拒，潛縊死。

諸生謝應昇妻魏氏。夫卒，年二十三，遺腹六月，哀毀欲死，姑曰：「如遺腹何？」旦暮泣，喪明，歲餘乃復。及生子以鍾，艱辛撫之。嘉靖季，流賊逼城，屢求自縊，誓不見辱，內外稱焉。

馮經妻余玉娘。

鄧琳祥妻林氏。嘉靖庚申廣兵之亂，林被擄焉。賊悅之，所以誘之百計，死拒不辱，大詬罵。賊怒，

刀挾之。罵不輟，賊益怒，將殺之，引頸受戮。賊截首剝舌，毀其尸而死。

王珣妾黃氏 嘉靖庚申，寇亂，流劫至其鄉。珣所居鄉人業操舟，賊至，衆婦乘舟以避賊。賊偵知之，從旁路出其下流。始，衆婦人舟避賊，各匿景艙中，獨黃兀坐於外。衆婦嘆曰：「何自露如此，賊不見乎？」黃曰：「見賊小耳，恐賊見而不得死。吾之外坐，急自溺矣。」已，賊至，聳身赴水死。

夏永慶妻蕭氏 永慶卒，生子風動甫二歲，蕭盡以產業付其伯氏泰，惟撫子成立而已。泰亦以義恤侄，而風動得隸於諸生。

羅舉妻張氏 嘉靖庚申，寇至，舉携妻妾竄巖穴間，而舉自逃散，惟張及妾與妻子爲賊獲。賊見張美，欲犯之，不從。捉至中途，張解髮自縊。賊覺斷之，張仍解腳帶。賊又覺，則驅之，徒跣至營，血流染地。渠魁大悅，欲留之，張厲聲曰：「速賜一死。」賊曰：「不畏死耶？殺汝妾。」遂引刀向妾，張引頸曰：「請代妾。留妾撫孩嬰。」賊曰：「吾殺孩嬰。」張引頸曰：「請代孩嬰以存夫胤。」賊牽出殺之，張既先行，了無懼色。賊猶豫不忍舍，張罵不絕口，賊遂割乳剖心，棄首河中。賊衆愕，相顧曰：「世亦有此女耶！」數日尸浮，其色如生。

庠生韓輔妻鄧氏 孤篋守節。家貧不能葬夫者久之。庚申，寇至，謂偽棺也，其中有物，剖之已，乃真屍，棄之河中。寇退，鄧覓而瘞焉。而尋卒。

陳月娘 嘉靖中，流賊入境，不受污以死。

陳經妻何秀女。

黃文炳妻曾氏。

楊知新妻龔氏。

黃文諭妻徐氏。

張光堂妻游氏。

黃應科妻張氏。

黃琦五妻鄧氏。

庠生黃作賓妻陳氏。

陳天與妻陳氏。

胡天詔妻朱氏。

右貞女。

尤溪縣(三四)

元

施九泰妻卓氏

施九泰妻卓氏 撫遺腹，以節終。至正中，旌表。

皇朝

彭阿積妻張陂娘 吳大興妻詹氏 王溥妻施氏 蔡氏姑婦 施士和側室葉氏 張廣側室章氏(三五)

彭阿積妻張陂娘 洪武中，夫溺死，張年十九，誓不二適，以育遺孤。後舅姑欲奪其志，投水死。

吳大興妻詹氏 旌門。

廩生王溥妻施氏。

舉人蔡文盛妻陳氏 文盛早卒，陳年二十四，撫教遺孤。綸應歲貢，卒於外，綸妻楊復撫遺孤夢暘。

萬曆庚子，夢暘舉於鄉矣，當楊撫夢暘時，方週月而已。人稱雙節。

施士和側室葉氏 年少孀居，嫡余氏憐其無子，諷之更嫁。氏慟哭自誓。後孫媳林氏者，庠生大霆妻，年二十五大霆卒，撫遺腹。一子，出遺腹者。二嫠窮餓相依，終始如一，稱雙節焉。

國子生趙廣側室章氏 年二十五而寡，事正室如母，撫孤子成立。年八十二終。右貞女。

順昌縣(三六)

宋

范汪妻馬氏

范汪妻馬氏 紹興初，土軍陳望等作亂，殺其夫，又誘殺其子。馬聞奔視，又欲脅污之，不從，被節解。

元

余正

余正 年十六，父從周許妻甌寧黃壽。明年，將樂上豪伍馬榮者，欲強委禽焉，余據禮告父，父以女辭之，遂歸於黃。於歸之日，豪遣百餘人要於道，殺黃奪余。余給曰：「返致吾言：吾未黃婦，勢且適人，孰與上公？汝以脅往，吾以脅歸，雖在主公，實應且憎，毋寧歸而待聘，主公與我俱免人口。」百餘人者皆去。余扶黃屍歸白於官，土豪坐誅，遂卜地葬夫，自殺以從。時至和己巳歲也。

皇朝

蕭貢才妻顏鏗 張文宗妻陳月 楊紹英妻趙氏 馮綽妻孟氏 張氏女 官岳妻廖氏 葉氏姑婦
郭茂賢妻林氏 廖詩妻任氏 邢榮越妻彭氏 朱廷堦未婚妻熊毓貞

蕭貢才妻顏鏗 洪武間，旌門。

張文宗妻陳月 正統間，草寇亂，執陳欲獻賊首，舟過西渡，給賊曰：「若欲獻我於帥而尚繫我，我告汝帥，且獲譴。」賊曰：「是也。」釋之，中流投水死。

楊紹英妻趙氏 年二十七，夫亡，子甫二歲，舅姑俱老，夫弟尚幼，惟植遺孤不再適。後五年孤卒，苦志不衰，及夫弟長生子，取鞠之。以節終。

馮綽妻孟氏 嘉靖元年，旌表。

張氏女 嘉靖季，流寇突至，被掠，大罵死。

官岳妻廖氏。

葉周安妻吳氏、子天榮妻高氏 嘉靖季，姑媳俱被賊執，脅污不從，到婁杉灘跳水死。

郭茂賢妻林氏 嘉靖季，爲流寇所擄，欲污之，唾罵不從。賊斷其舌，猶不絕口，被肢解死。

廖詩妻任氏。

邢榮越妻彭氏。

朱廷增未婚妻熊毓貞 廷增死，毓貞泣留聘金，鬻田自贍。逾年，有從其父母議婚者，毓貞聞，絕粒死。

右貞女。

永安縣(三七)

皇朝

賴五十妻莊昭 黃真勝妻陳氏 張懋妻賴啓娘 陳氏女 嚴師訓妻鄧氏 鄧林彩妻陳氏 羅氏

娣姒 吳天性妻鄧氏 林尾姑

賴五十妻莊昭 年十七歸賴，明年生子璧，又明年夫亡，人迫百端，莊不爲移。姑老無齒，日哺甘脆爲養。璧甫成立，又歿，攻苦服勤，鞠育諸孫。壽七十九卒。徐文貞公謫郡推時，稱其「標赤幘於三綱之途」。

黃真勝妻陳氏 適未幾，夫遭異疾，舅姑尤陳命所招，送歸母家。陳獨處樓中，廢寢食。及夫亡，往哭哀毀，殮畢自縊死。

庠士張懋妻賴啓娘 夫喪子亡，姑憐其少，欲立後托以老而別嫁之。啓娘曰：「立後在婦。」竟終其節。嘉靖中，旌表。

陳氏女。嘉靖中，流賊入境，時女甫笄，賊脅以刃，堅拒不從，女怒詈，爪賊面流血，遂遇害。

嚴師訓妻鄧氏。被賊執，欲污之，唾罵不屈。賊裂其口，罵聲含糊，頭斷乃止。

鄧林彩妻陳氏。賊執在營，不受污辱，厲聲罵之，延頸求殺。賊怒亂斫，棄溪中。

羅正茂妻劉氏。同夫弟正卿妻姜氏，與衆男婦赴舟避賊。賊追及，各抱携子投水死。

吳天性妻鄧氏。被賊執至林宅井隅，度不能潔，給賊釋手，墜井而沒。

林尾姑。同母被賊執，鎖空室中，思難脫離，拜母自縊。

右貞女。

延平衛(三八)

皇朝

劉雄妻曹妙玉(三九) 糜曹婢

劉雄，應襲指揮也。妻何妙玉，以節守。

糜曹婢。早失怙恃，依父妹居。年十九，許聘王文珍，未嬪，文珍卒，越三日，知葬柩必過其門，更衣登樓，於窗隙中日送其喪過，即自縊。

右貞女。

〔校記〕

〔一〕「甌寧縣 建陽縣 崇安縣 浦城縣 政和縣 松溪縣 壽寧縣」二十一字，各本原脫，據本書體例補。

〔二〕「建安縣」三字，各本原脫，據本書體例補。

〔三〕「楊公載妻」，本傳作「楊公載繼室」。

〔四〕「李舜妻」，本傳作「李堅繼妻」。

〔五〕「甌寧縣」上，各本原衍「建寧府」三字，據本書體例刪。

〔六〕「劉寬妻」，本傳作「劉寬繼室」。

〔七〕「雷用龍妻」，本傳作「雷用龍繼室」。

〔八〕「建陽縣」上，各本原衍「建寧府」三字，據本書體例刪。

〔九〕「陳盡產仁之」，各本原作「余盡產仁之」，據文義改。

〔一〇〕「文」字，各本原脫，據文義補。

〔一一〕《朱文公十二世孫鎰妻詹氏傳》及以下二傳，原置《李汝樞妻朱無瑕傳》下，據傳記目錄移。

〔一二〕「崇安縣」上，各本原衍「建寧府」三字，據本書體例刪。

〔一三〕「李存妻彭氏」，各本原脫，據本傳補。

〔一四〕「夫去夫在」，原文如此。

〔一五〕「浦城縣」上，各本原衍「建寧府」三字，據本書體例刪。

〔一六〕「章惇妻張氏」，各本原作「章惇妻張氏」，據本傳及《宋史》本傳改。

〔一七〕「蘇公亮繼室」五字，各本原脫，據本傳補。

〔一八〕「政和縣」上，各本原衍「建寧府」三字，據本書體例刪。

〔一九〕「卒」上，據文義，當脫「朝佐」二字。

〔二〇〕「林昭得妻李氏」，本傳作「林昭得祖母李氏」。

〔二一〕「奉匱」下，各本原殘一字。

〔二二〕「松溪縣」上，各本原衍「建寧府」三字，據本書體例刪。

〔二三〕「葉繼生」，本傳作「黃繼生」。

〔二四〕「壽寧縣」上，各本原衍「建寧府」三字，據本書體例刪。

〔二五〕「將樂縣 大田縣 沙縣 尤溪縣 順昌縣 永安縣 延平衛」二十字，各本原脫，據本書體例補。

〔二六〕「南平縣」三字，各本原脫，據本書體例補。

〔二七〕「吳庠生」，疑作「邑庠生」。

〔二八〕「將樂縣」上，各本原衍「延平府」三字，據本書體例刪。

〔二九〕「大田縣」上，各本原衍「延平府」三字，據本書體例刪。

〔三〇〕「田稀八」，本傳作「陳稀八」。

〔三一〕「溫玉娘」，本傳作「溫玉」。

〔三二〕「沙縣」上，各本原衍「延平府」三字，據本書體例刪。

〔三三〕「游天與妻張氏」，本傳作「陳天與妻陳氏」。

〔三四〕「尤溪縣」上，各本原衍「延平府」三字，據本書體例刪。

〔三五〕「張廣」，本傳作「趙廣」。

〔三六〕「順昌縣」上，各本原衍「延平府」三字，據本書體例刪。

〔三七〕「永安縣」上，各本原衍「延平府」三字，據本書體例刪。

〔三八〕「延平衛」上，各本原衍「延平府」三字，據本書體例刪。

〔三九〕「曹妙玉」，本傳作「何妙玉」。

閩書卷之一百四十三

閩閣志

汀州府 長汀縣 寧化縣 上杭縣 武平縣 清流縣 連城縣 歸化縣 永定縣(一)

長汀縣(一)

宋

賴仲元妻葉氏 吳宅祖妻王氏

石城人賴仲元妻葉氏 建炎初，盜起寧化，直搗石城，時仲元客游嶺表，葉以夫婿外出，舅姑年邁，勢不能逃，委命以待。俄寇至，閭里婦女悉被驅逼，葉極口罵賊，以身觸刃。寇怒，斷其喉舌，子女皆遇害。

吳宅祖妻王氏 適未幾，夫歿。王年十九，遺腹生男，兩目俱盲，養姑撫子，竟全其節。

元

羅良妻陳德金

晉國公羅良妻陳德金 字怡清。良守漳州，與陳友定戰死，德金投後園池，(三)池水三尺爾，鞠躬匍伏爲自盡。有丫環亦從死。漳人哀之，昇葬綠江之墳，名烈婦塚。

皇朝

張麟妻熊真姑〔四〕

賴紹祖妻曾氏

彭泰妻李足姑

胡富妻陳細娘

修業妻賴官姑

胡一中妻

張睿娘 王珪妻廖三娘

張麟妻熊真姑

年十六歸，又二年寡。

家貧無子，孝事舅姑。舅姑歿，以禮喪葬。

賴紹祖妻曾氏

方笄適賴，未二年，紹祖歿，父母欲令再嫁，卽剪髮誓也。立侄禎爲嗣，撫而教之。

禎長，補郡庠。

彭泰妻李足姑。

庠生胡富妻陳細娘。

修業妻賴官姑。

舉人胡一中妻張睿娘。

王珪妻廖三娘。

右貞女。

寧化縣〔五〕

皇朝

劉辛一妻張氏 李勛妻賴氏

謝子良妻伊普姑

陰茂倫妻羅氏

馬儒姑

羅政妻吳氏

羅仲倫

妻謝氏 陰昆生妻張氏

劉辛一妻張氏。

賴氏 衡州教授海孫女也。配邑人李勛，年二十寡，孝事舅姑。舅姑憐其少無子，欲改之，賴曰：「敢玷吾祖？」

謝子良妻伊普姑 爲沙、尤寇所獲，不污，死焉。

陰茂倫妻羅氏。

馬儒姑 州判允德女，年十五。正德初，寇破邑城，擄女子五十人，儒姑與焉。至漳南道前官池，躍入死之。

羅政妻吳氏。

羅仲倫妻謝氏。

陰昆生妻張氏。

右貞女。

上杭縣〔六〕

皇朝

邵氏娣姒 梁時亨妻林台姑 黃友杭妻丁氏 雷廣生妻郭氏 馬宏妻黃氏 曾宗哲妻張氏 鍾世瑄妻丘細姑 官曦妻羅氏 朱永寬妻劉氏

陳氏、黃氏 邑民邵縉紳纓妻也。正統己巳，沙寇至縣，獲二婦於梅溪寨，欲污之。給曰：「隱之，可

至船中。」中流，各抱其嬰兒投水死。越數日，屍浮，嬰猶在抱。

梁時亨妻林台姑 年二十五夫卒，襁褓子殤，撫侄爲嗣。長爲娶婦郭，生四孫矣，而嗣又卒。林與郭撫育幼孫，并心一志。正德初，旌表。

太學生黃友杭妻丁氏 友杭卒，丁年二十，誓靡他。友杭有女弟適丘福泰，亦蚤寡，不二，常曰：「吾嫂教我。」

雷廣生妻郭氏 年十八歸，閏八月夫卒，而外伯氏將貳之，跣足慟曰：「將履誰門？」瑩居六十二年。

馬宏妻黃氏。

曾宗哲妻張氏 年二十四，夫卒，遺二孤，存政三歲，存用一歲。而祖姑郭氏年九十餘，姑溫年七十，俱以蚤歲寡者。張承志勵節，事育兩盡，年七十六卒。

鍾世瑄妻丘細姑 嘉靖間，被賊擄，罵之以死，遺三歲女。身旁家犬守之三日，夫逃歸乃收之。

官曦妻羅氏。

朱永寬妻劉氏 年二十四，夫亡，撫遺腹兒至成立。兒拾遺釵，令反諸其人。歲饑，煮粥以活餓。右貞女。

武平縣(七)

皇朝

陳萬受妻張氏 王氏姑婦 舒祥妻周妙蓮 王源妻廖氏 修仁智妻廖氏 李禎妻鄧福娘(八)

陳萬受妻張氏 年二十，夫亡，守節。正統間，避賊牛輓嶺，見掠。賊艷而欲侵之，不從，被剖腹死。

王宗安妻鍾氏 年二十一，夫亡，守三歲兒英。英亦娶於鍾，五載而英亡。二孀相守，冰蘖一致。

舒祥妻周妙蓮 年十九，夫亡，痛哭死。旌表。

廩生王源妻廖氏。

庠生修仁智妻廖氏 十九而寡，遺孤尚幼，族有奪其居宅者，或謂直之官，廖曰：「撫孤成立，以續夫脉，吾幸也。尚敢他較？」里人稱之。

李禎妻鄧福妹。

右貞女。

清流縣(九)

皇朝

賴世傳妻鄧氏

賴世傳，行人也，授官，蚤卒。妻鄧年二十六，扶櫬歸葬，事姑盡孝。姑年九十遭疾，籲天減壽。及終，喪葬如禮。

右賢女。

葉福妻陳氏 雷世魁妻伍成姑 胡文顯妻湯申娘 伍材妻黃金娘 鄒銓妻李延娘

舉人葉福妻陳氏 夫亡，取篋中首飾衣服之美者，悉分諸妹，絕迹歸寧。年踰七十終。福，見韋布。庠生雷世魁妻伍成姑。

國子生胡文顯妻湯申娘 年二十六，文顯以事謫邊卒，僅二女。湯撫女養舅姑，送終如禮。

伍材妻黃金娘 年二十五，夫亡，築鴛鴦塚以自備。

鄒銓妻李延娘。

右賢女。

連城縣(一〇)

皇朝

寡婦蕭氏 黃珣娘。

寡婦蕭者，戴景禎妻也。以貧聞邑中，爲邑人建橋砌路。正德四年，大帽山賊反，令蔣璣築土城守禦，既成，欲建危橋數座，蕭自創西門焉。

黃珣娘 應禮之女，林廷玉之妻。年十四，父病篤，百藥不痊，割股以進，父病尋愈。及長於歸，事舅姑以孝聞。

右賢女。

吳繼養妻丁三娘(一一) 謝文中妻盧氏 黃霆妻江辛娘 黃文舉妻童氏 黃廷瑛妻謝氏 江瑛妻童氏 余文炳妻黃氏 童綸妻李德娘 李以實妻伍氏 賴璟妻姚氏 童佐乾妻姚婢娘 黃椿芳妻趙

氏 林忠妻黃妙貴 林祿妻李妙全 黃慶妻沈玉璫 李應開妻羅滿姑 謝濂妻李壽妹 童志輔妻李
妹孫 童憲妻揭福金 李氏妯娌 李齊妻黃氏 江熹妻丘氏 姚松妻吳金秀 李樞妻沈癸金
吳繼養妻丁三娘 洪武時人。夫卒，丁年二十三，一子方二歲，堅志守節，以長以教。子畢婚冠亦
卒，丁熹然終志。

謝文中妻盧氏。

黃靈妻江辛娘。

庠生黃文舉妻童氏。

庠生黃廷瑛妻謝氏 年二十二，夫卒，奉姑弗懈。家赤貧，緝績度日。姑沒，鄉鄰曰：「嫗寡且貧，喪
儀可殺。」氏曰：「稱家有無，何敢殺也？」所以持喪一如男子之禮。

庠生江瑛妻童氏 年十七歸江，甫九月夫卒，守節自誓。立其侄湖秀爲嗣，娶婦林。未幾，湖秀亦
死，僅遺一女，童蚤夜撫育。林亦克成童志。

庠生余文炳妻黃氏。

國子生童綸妻李德娘。

李以實妻伍氏 年十八，夫以解料卒於京，有遺腹二月，孤苦無依。宗侄欲陰逼其再醮，伍號天盟
守。已，生一子，曰：「吾所不死，視此呱呱。」既，李之子孫隨以大。

庠生賴璟妻姚氏 以死殉。

庠生童佐乾妻姚婢娘 佐乾舌耕外境，訃至，痛哭幾絕，強起出郭營喪。既葬，迎主畢，夜投劉公井

死。

黃椿芳妻趙氏 年二十二，夫死，晝夜慟，不食六日，亦死。

林忠妻黃妙貴 年二十一，夫喪，遺二幼子，甘貧守節，饋乳以事病姑。壽八十餘。

林祿妻李妙全。

黃慶妻沈玉琰。

李應開妻羅滿姑。

庠生謝濂妻李壽妹。

童志輔妻李妹孫 年二十三守節，事姑孝敬，撫摩嗣子幼孫底於成立。年七十一卒。厥媳謝金秀，子大穆妻也，年二十二穆卒，亦矢志終。人稱雙節。

童憲妻揭福金。

李士愈妻吳應聘、士志妻錢妹子 妯娌也，俱以寡節終。

庠生李齊妻黃氏 齊卒，氏年二十四，痛夫苦學亡，閉戶誓守，不輕言笑三十餘年。族爲立嗣子，更名曰學賢，蓋曰賢母也，當學以爲士。

江熹妻丘氏。

姚松妻吳金秀 年二十二，夫亡，悉出產業歸其夫弟，自力女工，以度餘齒。

李樞妻沈癸金 於歸，事寡姑惟謹。樞早世，氏操家政，撫幼子，內極哀慟，外和顏色以慰姑心。姑卒，年百歲，氏亦七十，殯殮如禮，鄉黨稱爲女師。

右貞女。

歸化縣(二二)

皇朝

羅仁妻楊氏 謙進姑 夏周生妻謝氏 謝黻妻李氏 葉氏姑婦 張氏姑婦 湯夢恩妻聶氏 揭春震妻樂氏

羅仁妻楊氏 仁死，楊年二十四，甫百日，自經。時弘治甲寅歲也。

謙進姑 年二十二，夫逝，養姑。嘉靖辛酉，山寇蜂起，姑婦被擄。賊艷進姑，欲私之，給曰：「請入夜。」驅至芋畬，過將軍橋，私泣謂姑曰：「媳恐辱姑，與姑訣矣！」遂自投橋下。賊意其誤，援之，愈遠，俄沉。賊去之三日，屍浮起。

夏周生妻謝氏。

謝黻妻李氏 年十八適黻，未三期夫死，矢志養姑。遺腹一子，撫育成立。至五十，遺腹子又死，煦其孤孫。年九十餘卒。

葉茂連妻揭氏 年二十二寡，撫其二歲孤世淳，長爲娶婦梁，生子時發，甫兩月，世淳復故。梁年十七，與姑同守一孤，課之詩書。姑年八十九終，而時發又先歿，梁哀毀殯葬，一稟禮文。邑令扁其門曰雙節。

張玳妻陳氏 年二十四，玳故，撫其前妻子縉，踰所生。縉長，爲邑諸生，善事陳，而復蚤卒，妻陳與

姑守節，共撫遺孤。朝政雙節並堅，邑令三旌焉。

湯夢恩妻聶氏。

廩生揭春震妻樂氏 年二十二，春震病不支，樂夜焚香割股進之，忽痊。越數月，復病，乃亡。矢志不二，侍公姑而訓二子。

右貞女。

永定縣(二)

皇朝

賴守正妻簡氏 張召妻賴氏 賴世弘妻鄭氏

鄉舉賴守正妻簡氏。

廩生張召妻賴氏。

賴世弘妻鄭氏 年二十四，夫卒，事姑孝，教子儉，後登第。右貞女。

興化府 莆田縣一

宋

方子容妻沈氏 鄭耕老母林氏 陳文龍母林氏

方子容妻沈氏 崇寧五年，子容孫略登第，沈與子容皆年八十餘，方對弈窗下，捷至，兒童歡呼，子容曰：「爲六郎登第，錯認一著。」却徐收子歸奩中，語沈曰：「吾翁媼不喜殖資產，飯盂又仰是子矣。」

鄭耕老母林氏 子四人，耕老其季也。父亡，林訓諸子曰：「家事盡以累吾，汝等一意向學，無負先君之思，無謂予婦人而欺予。欺予易，欺場屋難。」詔四下，諸子舉於鄉者凡十，而三人同中者，再成名者二，耕老與仲必箕老也。

林氏 陳文龍母。文龍爲元人械繫送杭，母繫杭州尼寺中，病甚，無醫藥，左右視之泣下，母曰：「吾與兒同死，又何恨哉？」亦死。衆歎有斯母宜有是兒，爲收葬之。

元

陳高妻林道外

陳高妻林道外 林氏世有冠紳，至道外父節，亦爲仙游尉，蚤死，餘三子儼然，（四）道外勤而撫之。

既歸高，以孝敬聞。久之，三弟先後繼亡，林氏且無後。道外每值暮春，輒往祭林先墓，涕泗交流，復告其族子書院山長履爲主其田賦，以供粢盛。

皇朝

林淑圓 李六秀女 吳士誠妻鄭氏 劉貴文妻朱氏 許克溫妻林氏 宋端儀妻黃安人（五） 郭

三莊 鄭采繁 張四姐（六） 黃思綱妻羅仙娘 周道純妻林氏 張秉孚妻吳氏 蔡繼璣妻劉氏 周

希瑜妻彭氏 方孝女 徐德英

林淑圓 按察使時之女。時，見縉紳。其觀政刑部日，坐事繫獄，發北京營建。淑圓甫七歲，擊登聞

鼓訴冤。仁廟監國，矜其幼，賜之飯，遂有時罪。後隨任陝西，母病，諸藥弗効，淑圓潛割左臂和粥以進，母遂差。時年十二矣。長嫁西安左衛指揮使費銘，壽七十卒。

李六秀女 少而終鮮，矢志奉親。及長，父母與劉億衷爲婚，億衷適長，不可出贅。於是，朝夕垂涕少食，請求終養。舅姑憐其志，許之。既得歸，恒致甘旨，不廢婦職。父多病，每病劇，告天刲股者一，減壽者二。及卒，哀毀骨立，罄貲營葬，終奉祭祀。

吳士誠妻鄭氏 蚤寡，有色，其姊夫唐姓堅求之，不應。適太監徵珠民間，唐誣語曰：「鄭珠甚多。」官索之急，鄭曰：「奴害我。」携兒詣監言狀，太監義而歸之。後其兒名希聖者爲郡諸生，蚤卒，妻陳誓志不嫁，年至六十。希聖子曰則文，娶於李，生子二歲，而則文夭。其後子得癩疾，不省人事，李語姑曰：「吾家三世守寡，所恃者子。今已矣。」候姑寢，自投於井中。

劉貴文妻朱子貞 劉閔之母也。三十六守寡，閔方三歲，次子闌猶在妮，三子闌則出於媵俞氏，方二歲。朱堅確守志，俞氏化之。女稍長，教女儀，既嫁，教以婦道。男稍長，遣就外傳，始有知，卽教以人倫大義。勤儉立家，撫諸子均平如一。

許克溫妻林氏 姑歿，事舅盡婦道。舅年老衰邁，左右扶持如護嬰兒。宋教諭叔明居隔一壁，經年不聞其少有齟齬聲，以語人而服之。

宋端儀妻黃安人 端儀提學廣東，欲往謁陳文恭於新會，安人出所手成二幣上端儀，將之，曰：「明婦所自治，非虛物也。」及端儀沒於官，同官憫其貧，有欲安人粥，生徒以治具者，安人曰：「如之，何其賊人之子，以羞其夫也！宋雖貧乏，可家於喪耶！」

郭三莊 父輔，官海豐倉使，三莊與母從。母病，侍藥弗効，羹左股以進，病尋愈。月餘，父復病，割右股，亦旋愈。海豐士民上孝感狀，當道禮而旌之。時年方十四。郡人鄭弼求爲仲子東都婦，不幸蚤卒。

鄭采繁 浙西安人方召南繼室也。諳文史，年十六歸召南。召南登進士，卒京邸，鄭在西安，聞訃，扶輿歸甫，年方二十一，矢志養姑。閱諸書，見《小學》中載漢陳孝婦事，手抄百餘楮以自況。姑病，刲股奉之。撫庶子如己出。知府周大禮扁其堂，陳膳之。

張叔昭女 名四娘。母病，焚香祝天，刲股和糜以飼，病尋愈，衆請孝感。

黃思綱妻羅仙娘 事姑以孝聞。姑病，刲股調粥食之，姑病愈。

周道純妻林氏 家貧，孝事舅姑。嘉靖乙巳，蕭大荒，舅老疾，百方不治，林刲股和粥以進，舅絕飲食數日矣，強吸一餐，遂愈。知府沈鑒旌扁，給米一石、帛一疋、肉二十斤，以恤其舅。

張秉孚妻吳氏 姑林病劇，焚香祝天，願代。比家人睡定，當空取刀刲股肉，和粥以進，姑病尋愈。

蔡繼璣妻劉氏 姑病，刲股進之，焚香手腕，告天請代。

周希瑜妻彭氏 姑病，焚香右臂，籲天請命，姑立愈。有司旌門。

方孝女 父瀾，官儀制郎中，卒京師。孝女年十四，無他兄弟，日夜哀號。其叔爲扶父輿南歸，渡揚子江，中流舟覆，輿浮。孝女與庶母同舟，皇遽呼救，許酬金帛。時風濤洶怒，人自救不暇。孝女仰天大哭，遂赴水死。經三日，屍浮父輿之旁，同泊南岸。

徐德英 郡丞徐廷龍女也。好讀書，善屬文，適俞氏子。女紅之外，未嘗釋卷，所著《建文紀》、《孟

母、仇氏等贊》，五言古近詩，具有才識。顧坎軻多病，鬱鬱以死。嘗作《悼志賦》，其詞曰：「金天氏之遐颺兮，近烈祖乃肇聲。昔遭世之紛濁兮，民弗騰其靡寧。奮義武以鷹揚兮，實奠夏而攘狄。爰帶礪於南服兮，遂燕翼而貽則。承惠澤之汪濊兮，雖永世而靡忒。肆大考之振墜兮，敦仁厚以式穀。洎嚴君之揚華兮，蓋有光於先烈。歷伯昆而降予兮，歲上章吾以育。顧薄軀之陋微兮，具二氣之靈淑。承家世之儒風兮，敢沉浮於流俗。奉嚴慈之明訓兮，竊企前修之芳躅。列圖史以鑑戒兮，覽經書以自勗。欽栢舟之貞烈兮，慕關雎之賢哲。哀晨牝之禍國兮，憫桑中之自賊。悵去古之日遠兮，傷徽音之莫贖。念盛年之不再兮，虞日月之逼促。惟聖學之宏深兮，懼寡陋之弗格。勵余志以力追兮，恒昕夕而警惕。理雖微而必究兮，事何幽之罔燭。吾又綴寶璐以爲佩兮，紉明璣以充禕。集桂莖以爲裳兮，索蘭茝以爲衣。芳與澤其雜揉兮，紛郁郁而菲菲。羌棟蓼之並茂兮，同厥志而弗違。進承歡於膝下兮，退切磋以委蛇。追遐風於上古兮，指《二南》以爲儀。奈流光之蹉跎兮，歲忽忽而若馳。倏玉樹之凋折兮，又鴈鴻之分飛。感離居之寂寥兮，情惓惓而懷思。慨賦質之涼薄兮，嗟性命之多否。疾疢軫其頻仍兮，又酷烈之交罹。氣鬱鬱而不解兮，愁悄悄而莫支。中悵憶之苦辛兮，魂怔營而莫特。悲華年之難再兮，悵素志之終違。沂女子之生世兮，雖顯揚之罔恃。試歷觀於今昔兮，亦垂休於彤史。或際遇之赫煊兮，播昌烈之文詞。或振藻於芳禕兮，亦增輝於門楣。哀余生之薄祐兮，徒撫躬而懷悲。念鞠育之劬勞兮，恩浩蕩而不訾。曾涓埃之莫酬兮，顧惟疾而憂之。中心感以忉忉兮，神悵恍而飛颺。惟天道之昭昭兮，善惡降以禍祥。羌軫患之纏綿兮，繫百艱而備嘗。抑吾愆之積稔兮，何年命之不常。也循本初而自省兮，余衷折其孔章。也長太息而自悼兮，淚浪浪而沾裳。稽往哲之儀履兮，諒天命之弗爽。懷宵堂於共姬兮，賦綠衣於莊

羌。韞何才而屯阨兮，采胡烈而參商。何彼懿哲之茂行兮，亦遭災而遭殃。牛蹈道而疾夭兮，蹠恣睢而壽康。嬰肆穢而獲考兮，王履貞而燔亡。信玄理之可徵兮，悵天道之茫茫。心脅惑而不釋兮，招靈氛使爲予詳。循往軌之冥昧兮，何邇鑑之有常。孰非仁而可蹈兮，孰非義而可長。熊與魚之難并得兮，蘭芷不以非地而改香。往者既以已矣，余何爲以獨傷。具憂戚以玉汝兮，豈徒連遭而無當。守天衷之秉彝兮，循至性而毋忘。盡吾生之大道兮，等壽夭於彭殤。觀大化之微茫兮，曠千古而徜徉。苟予心而日休兮，雖沉痾庸何傷。亂曰吁嗟性命胡不長兮，增懷永歎愴中腸兮，遵道履仁吾何傷兮，抱貞委順樂未央兮。」

右賢女。

宋

林昭度妻翁氏 趙子乙妻王氏 王孝曾妻李氏 陳用虎妻朱氏 方婦薛氏林氏

林昭度妻翁氏 父允成，殿中丞。昭度隨計卒舒城，翁年二十一，守節不二，孝事舅姑，教督二子嗣宗、嗣□俱擢進士。〔二七〕郡表其里門曰孝義。

趙子乙妻王氏 世居睢陽。王三十守義，事其姑秀容縣君惟謹。靖康失守，王墜土自毀，背負姑，携幼子，避地而南，他子引裾纍纍，展轉亂屍間，越四年始達溫陵，徙居於莆，終焉。一時陳正獻、龔莊敏及諸名士皆以詩表之，有云：「疇昔干戈百戰場，精神曠節半蒼黃。如何婉婉閨房秀，能麗精神日月光。」其子伯愚、伯達，並登第，仕進不絕。

士人王孝曾妻李氏 嫁期月，夫死，請姑爲立後。事姑訓子，皆應禮法。王始窶甚，李累銖寸，遂成中產，舉三世之喪以葬。年五十六卒，劉文定公志其墓。

通判本軍陳用虎妻朱氏 元兵寇閩，用虎兄文龍知軍事，發兵固守，及元兵執文龍去，朱自經死。
方大鏞妻薛氏 嫁九年而寡，子紹孫方晬，怡孫方娠，薛撫之慈且嚴，卒以有立。同宗有口松妻林氏者，嫠居貞行，亦亞於薛。

元

顧本中妻鄭氏 林子順妻黃氏

顧本中妻鄭氏 本中卒，鄭誓志永貞，盡心經紀四十餘年，葬再世之柩，續垂絕之桃，士大夫稱之。

林子順妻黃氏 夫卒，居喪以禮，事姑以孝。喪葬畢，自誓益固，困窮不改。子善同領鄉薦，以祖母老不赴禮闈，行省賢之，借注泉山書院山長。（一八）

皇朝

李安妻林氏 鄭氏妻妾 周則川妻鄭淑清 黃子厚妻林氏 王崇貢妻林茂正 顧文嘉妻楊靖娥
吳師舜妻余淑玉 黃文廣妻吳淑貞 陳遜勵妻鄭懿德 莊季妻鄭淑真（一九） 江遜居妻林淑真（二〇）
柯澍妻王貞淑 彭宏著妻吳貞善 陳氏 陳銓妻鄭氏 陳珍妻林氏 林景靖妻陳氏 林魯儒妻方淑貞 學士柯潛二妾 林崇妻趙氏 宋寄伯妻林四姐 翁氏妻妾 林貞一 李汝能繼室鄭妙義（二一）
陳邦貢妻林氏 陳經疇妻林淑清 林克紹妻李淑潔 王伯善妻祁氏 黃德茂妻吳貞玉 柳氏三婦
方旭伯妻戴節英 朱智深妻徐淑靜 洪則幹妻林氏 陳邦琛妻吳氏 李孟宜妻林淑清 林道淵妻黃氏 王德滋妻陳淑貞 蔡本澄妻戴清 余舜民妻朱氏 朱氏三節 林伯量妻鄭氏 林氏姑婦 林廷諫妻王秉潔 程麗甫妻方氏 陳瑛妻吳淑（二二） 黃與瑞妻林淑清 林仲熹妻陳玉潔 黃儀韶妻李純

德 趙朝妻林淑德 黃樂善妻陳氏 李廷舉妻方伯善 李朝禹妻王氏 葉繼甫妻郭端 陳永年妻周
 淑志 林廷貢妻洪蘭 宋思益妻鄭氏 洪宗文妻林氏 陳公裕妻方肅英 周孟聲妻宋氏 吳崇著妻
 李氏 歐茂仁妻胡氏 王明德妻陳氏 陳宏和妻吳氏 林遜學妻宋氏 何思澄妻黃氏 張從璧妾陳
 氏 張源泰妻陳氏 周伯讓妻林德昭 黃惟善妻王淑清 吳徽珍妻郭氏 林思益妻柳淑貞 陳體從
 妻洪氏 陳誠卿妻吳氏 周伯服妻康睿 周元惠妻黃銀奴 周則裕妻黃氏 陳朝妻周淑儀 陳景正
 妻郭氏 曾既綱妻卓貴香 高瑤妻林淑書 黃弘器妻林氏 林士直妻陳氏 林仁伯妻吳氏 朱氏世
 節 林鉉妻王氏 崔儀妻陳氏 鄭璟妻林氏 鄭汝潔妻吳玉美 陳紹妻翁氏 方攸宜妻林氏 徐從
 敬妻陳氏 趙希鄒妻方應娘 曾睿卿妻林氏 黃世泰妻蔡氏 俞時和妻陳氏 黃從周妻吳娥娘 林
 汝學妻吳氏 陳効忠妻方氏 陳氏三節 黃師器妻林淑婉 林成甫妻周氏 吳于源妻林氏(二三) 黃
 肯堂妻張淑貞 林守元妻劉氏 林實夫妻方氏 林世誠妻江氏 林在勉妻許氏 陳紹卿妻廖氏 周
 祐妻黃氏 俞應星妻林氏 朱道本妻鄭氏 盧士行妻陳氏 張氏姑婦 丁汝川妻陳靜莊 陳永臨妻
 林氏 陳以信妻蔡氏 吳廷淑妻鄭氏 吳廷昭妻常氏 方子道妻林氏 黃大雅妻林氏 郭潤夫妻洪
 氏 姚文燦妻吳氏 李激甫妻王氏 黃貴德妻唐氏 陳漢生妻李氏 凌文塾妻陳氏 陳氏三節 姚
 在正妻陳氏 黃宏川妻何氏 李汝謹一門三節 游潛周妻劉貞肅 許師德妻李氏 陳宏慶妻金氏
 林仲華妻鄭氏 周景潛妻羅氏 朱文妻王氏 鄭一清妻楊氏 廖大訓妻陳氏 廖奇進妾黃氏 曾宗
 平妻鄭氏 張儀度妻陳氏 鄭舜弼妻許氏 趙良厚妻鄭氏 李景昕妻林氏 方于養妻吳氏 康正福
 妻吳氏 李一復妻姚氏 余氏娣姒 孝子蟻鳴虞妻陳氏 黃子隨妻洪氏 鄭國贊妻林氏 柯木妻林

氏 方子受妻張氏 朱景說繼室吳氏 黃希東妻方氏 宋玉卿妻陳氏 黃潭妻林氏 陳梅妻黃氏
朱君直妻翁氏 陳淳妻蕭氏 林獻策妻黃貞秀 鄭子會妻張氏 余國盛妻李氏 丘茂濟妻張氏 周
道本妻程氏 卓大楊妻陳氏 鄭三娘 張廷光妻王氏 朱仕顯妻林貞淑 黃漢妻陳氏 陳會妻卓氏
張純昭妻林氏 朱茂良妻吳氏 康子瞻妻葉氏 唐堯章妻林氏 李允時妻鄭氏 林獻表妻陳淑婉
林廷燦妻陳氏 陳守信妻林氏 朱雲衢妻陳氏 鄭大猷妻林氏 吳三重妻林氏 沈會奇妻林氏 周
大能妻宋氏 鄭守典女 朱光騰妻林氏 蔡賢妻張氏 林夔一妻陳氏 吳宗猷妻丘氏 許朝肅妻林
氏 庠生陳志舉妻黃氏 鄭汝陽妻林氏 鄭善卿妻陳氏 朱紀未婚妻翁妹娘(三四) 潘遜妻黃氏 康
長源妻崔氏 嘉靖癸未與廣寇之難者四人合傳 嘉靖壬戌與倭難者四十七人合傳 鄉貢士蔣龍妻林
四娘 林積華妻陳氏 陳汝久妻林氏 陳汝誨妻吳氏 周子恭妻唐氏(三五) 游汝才妻黃清娘 卓世
芳妻林氏 廩生陳洪宗妻鄭氏 鄭璟妻林氏(三六) 鄭孚可妻林氏 方詩妻林繡 吳良質妻戴氏(三七)
楊岐妻宋氏 劉環未婚妻陳金娘 林加猷未婚妻鄭一娘(三八) 庠士劉箕妻陳氏(三九) 謝景賢妻姜氏
庠士林龍妻黃氏 劉貴文妻朱季貞 林道妻黃氏 康貞卿 陳若瑛 鄭孟恭妻蔡氏 庠士李約妻陳
氏 庠士柯礎妻黃氏 柯林妻黃氏 鄉貢士方珊妾吳氏 胡繼垣妻周氏 黃恭甫繼室林氏 林氏姑
婦 庠士黃承志妻林氏 庠士陳仕瞻妻張氏 周興邦妻曾氏 梁續妻方氏 郭鑒妻黃氏 庠士吳東
周妻謝氏 庠士李楠妻曾氏 庠士吳如珪妻黃氏 庠士鄭遂期妻陳氏 祁應科妻陳氏 余應瑞妻朱
氏 陳遜妻祁氏(三〇) 葉在穎妻俞氏 周洪德妻黃氏 知縣鄭正規繼室林氏 司獄曾泰妾陳氏 陳明
德妻黃氏 藍景光妻林氏 楊鎮妻林氏 郭大化妻鄭氏 庠士宋夢奎妻林氏 陳道妻黃氏 庠士林舉

巖妻曾氏 鄭從龍妻吳氏 庠士吳一桂妻林氏 顧養達妻林氏 洪肇曾妻張氏 林應棧妻林氏^(三二)
庠士郭文采妻宋氏 周輔邦妻郭氏 徐東華妻周氏 馬全妻陳氏^(三三) 庠士陳致恭妻林氏 吳氏世
節 程庠妻方氏 蔡應可妻吳氏 戴宗仁妻林氏 顧啓宗妻陳氏 庠士方湛繼室吳氏 丘伯載妻鄭
氏 俞康妻林氏 林崇生妻趙氏 庠士李景昕妻林氏^(三四) 庠士林仕養妻黃氏 庠士林堅妻曾氏
庠士戴宗泗妻林氏 張珣妻俞氏 歐陽節妻鄭氏^(三五) 葉九苞繼室鄭氏 庠士鄭明瑞妻顧氏 林標
甫妻謝氏 庠士陳嗣楚妻鄭氏 曾于材妻張氏^(三六) 葉氏雙節 俞氏雙節 庠士林芳栢妻唐氏^(三七)
余待佐妻梁氏 庠士林應述繼室丘氏^(三八) 林道相妻戴氏 許有容未婚妻陳冰娘 朱朝勳妻陳氏
庠士魏雲璋妻林氏

李安妻林氏 年二十一，安卒，誓志撫孤，逮見曾玄。明興，首被旌門復家之詔。

鄭永迪妻徐氏，妾許氏 永迪沒，二人並年二十餘，各撫其孤，如同一出。許先卒，徐年八十一，見其
孫師烈鄉薦。有司上事，旌表。

周則川妻鄭淑清 則川死，無子，淑清年二十二，養夫兄子爲嗣，守節六十餘年。孫軫爲戶部主事。
事聞，旌表。

黃子厚妻林氏 守節。旌門。

王崇貢妻林茂正 年二十二喪夫，守節撫育。子稜，後爲高唐州訓導。茂正年八十餘卒。郡上事，
旌門。

顧文嘉妻楊靖娥。

吳師舜妻余淑玉 旌門。

黃文廣妻吳淑貞 旌門。

陳遜勵妻鄭懿德 年二十二生子衍，甫四月而寡。誓志養舅姑，撫教衍。後領鄉薦。詔書旌門。

莊季妻鄭淑慎 旌門。

江舜居妻林淑貞 旌門。

柯澍妻王貞淑 旌門。

彭宏著妻吳貞善 旌門。

陳氏 彭惠安韶祖母也。年二十二寡，撫孤思孝，底於成立。

陳銓妻鄭氏 旌門。

陳珍妻林氏 旌門。

林景靖妻陳氏 國初，重旌節之典，其初縣里正上郡縣，郡縣下其里，取耆老鄰佑保結，上禮部。部後下布政司，轉行郡縣覈實，覆奏。後咨都察院，轉行按察司重覈，方取旨施行如制。或當旌者先卒，遂不得覆奏，以故民間難之。至是，陳子稜傾貲爲母舉節，未被命而陳歿，分巡僉事況真乃立坊通衢以表之。莆人哀稜志云。

林魯儒妻方淑貞 父昌齡，文雅善藻繪。淑貞亦知書，工父業。永樂間，父以畫召至京師。女兄淑儀亦以畫女選入禁掖。三弟俱幼，淑貞獨與母居，扶植門戶，乃贅魯儒。未幾，魯儒卒，誓不改圖，撫立諸弟。壽八十。

翰林學士柯潛妾王氏、曹氏。潛卒，王生子宗文幼，而曹未子也。二妾年各二十餘，並辛勤守志，依正室俞終其身。以雙節旌門。

林崇妻趙氏。生子真寶未晬而崇亡，時年二十，守節終身。孫熊，仕御史。

宋寄伯妻林四姐。守節孝養庶姑，教育幼子勸至成立。後勸爲沐陽訓導。林享年九十有三。

翁志宏妻祁淑惠。嫁數年無子，勸夫買妾祁氏，生子可璋。未幾，志宏沒，淑惠年二十四，妾年二十，相與勵志，力貧養姑教子。

林貞一。年十三，父母許嫁方氏，未及歸，而方氏子遠戍，尋卒。貞一爲服喪三年，寡守不嫁，年七十。

李汝能繼室鄭妙義。

庠士陳邦貢妻林氏。

陳經疇妻林淑清。學士文之妹。

林克紹妻李淑潔。

王伯善妻祁氏。年二十一而寡，一子生甫三月，族屬有欲奪其產者，侵虐備至，祁操益厲，卒存王門。

黃德茂妻吳貞玉。年二十三，夫卒，携遺腹子寬依兄家以居，守節四十年，家雖貧甚，不改其操。

柳氏三婦。柳惟豫妻林孟貞、廷茂妻陳淑慧、廷新妻林玉清，並以節稱。

方旭伯妻戴節英。年二十五，夫卒，二子岳、岱俱幼，矢志撫育。岳後登第成名。

朱智深妻徐淑靜。

洪則幹妻林氏。

庠士陳邦琛妻吳氏。

李孟宜妻林淑清。

林道淵妻黃氏。

王德滋妻陳淑貞。

蔡本澄妻戴清 年十四適本澄，居二年，本澄當戍遼東，念婦少艱跋涉，買妾與俱。戴父與約曰：「遠左天末，寧得遽返？五年不歸，可聽女嫁。」許之，立券爲信。至期，父語清曰：「可如約。」清泣不從，獨居十有五年。本澄歸，生一子未晬，相繼亡殞。清哀毀幾絕，父憐清無依，潛受吳公瑞聘，清聞，曰：「人呼女蔡本澄婦矣，又云吳耶？」即往父家與吳絕婚。公瑞訟之官，欲奪其志。太守陳表嘉歎，判令歸蔡。太守王弼扁曰寡婦清之門。

余舜民妻朱氏 太守王弼扁門。

朱洪妻官氏 夫沒，撫一子興宗甫六歲。既長，爲娶吳淑婉，生一子定慶方晬，興宗又沒。淑婉與官鞠孤，官沒，撫教定慶，長爲娶王靜。靜年二十一，定慶復沒，遺一子曰文旺，淑婉復與靜鞠孤，終老如前日。守王弼扁門曰三世一節。

林伯量妻鄭氏 守王弼扁門。

林從弼妻李源清 年二十五，夫卒，二子秀、茂俱幼，守志終身。秀娶謝氏，生一子曰有年，未幾復

天，謝亦誓志依姑爲命。有年後官至副使。

林廷諫妻王秉潔 嫁數年無孕育，爲夫納妾張氏，生子大順。數月，夫卒，王年二十九，張年二十，誓節守貧。郡太守扁其門。

程麗甫妻方氏 守王弼扁門。

庠士陳瑛妻吳淑清。

黃與瑞妻林淑清 年二十二，夫卒，盡鬻奩具以葬。孝事尊章，持閨門嚴肅。後以子相登第，封太安人，詔書旌門。方淑清寡時，相方二歲。

林仲熹妻陳玉潔。

黃儀韶妻李純德 守王弼扁門。子文鸞領鄉薦。

趙朝妻林淑德 夫亡，家貧子幼，父母及姑欲嫁之，引刀截一指。

黃樂善妻陳氏。

李廷舉妻方伯善。

李朝禹妻王氏。

葉繼甫妻郭端 嫁三年，夫卒，力貧撫遺腹子，孝養老姑，鄉稱節孝。年七十七卒。

陳永年妻周淑志 年二十二，夫卒，（三八）無子，陳無傍近親可嗣，淑志歸依父母家，盡鬻奩具，置田宅，伏臘供陳祀。壽八十四終。

林廷貢妻洪蘭。

宋思益妻鄭氏。

洪宗文妻林氏。

陳公裕妻方肅英。

周孟聲妻宋氏。

吳崇著妻李氏 年九十卒。

歐茂仁妻胡氏 寡守苦嚴，內外所重。郡有獄久不斷，人白府君，可問胡寡婦。守陳表過婦問之，一言而決。

王明德妻陳氏 十八而寡，守遺腹子仕輅，著聲郡庠。

陳宏和妻吳氏 夫亡子夭，以侄孫爲嗣。薦遭閔凶，不貳厥志。

林遜學妻宋氏 年二十六，夫卒，紡績育孤邦輝。後邦輝領鄉薦，仕爲令。

何思澄妻黃氏。

庠士張從璧妾陳氏。

張源泰妻陳氏。

周伯讓妻林德昭。

黃惟善妻王淑清。

吳徽珍妻郭氏 夫卒，無子。三年喪畢，貧不自存，依母以居。郭、吳相去里許，伏臘忌辰必躬奠酌，慟哭而歸。

林思益妻柳淑貞。

陳體從妻洪氏。

陳誠卿妻吳氏。夫卒，僅一子。父母憫其少寡，欲嫁之，不從。逼之，給父入室治行，遂引刀落髮，出問曰：「不知今尚可嫁否？」嫠居十有五年，卒。

周伯服妻康膏。

周元惠妻黃銀奴。

庠士周則裕妻黃氏。

庠士陳朝妻周淑儀。

陳景正妻郭氏。孝子義重裔，從父榮爲贛州小官。景正就婚焉，閱兩月先歸，卒。郭聞訃哀慟，卽欲奔喪，父母不許。閩有爲贛學官者，其子喪耦，來求婚，父母許之。郭泣誓不從，一夕自經，衆覺救免，因寢疾嘔血。自是力求歸陳，陳亦遣人來迓，父母連挂之。三年喪畢，父解官歸，居五日，不辭而返於陳氏。

曾旣綱妻卓貴香。

高瑤妻林淑書。

黃弘器妻林氏。

林士直妻陳氏。

林仁伯妻吳氏。

朱本實妻吳氏、子欽文妻黃氏 姑婦相依，撫藐諸而教之。

林鉉妻王氏 蚤寡，以鉉兄次子渠爲嗣，撫教如己出。渠後以鄉薦入官。

進士崔儀妻陳氏 以死殉。弘治中，旌表。

鄭璟妻林氏 璟父傑，官青陽教諭。璟省覲，卒於途。林年二十六，矢志守節。青陽致政還，滄瀨之養必虔。歿，則脫簪珥助喪葬。撫二孤朝陽，穠有成。卒年八十四。

鄭汝潔妻吳玉美 年二十六，夫亡，無子，哀痛摧毀，屏絕華飾。既而家門多故，先業蕩盡，夫弟二人流落艱窶。玉美奉姑獨勤。姑卒，旦暮慟哭，哀動里閭。有司各加禮獎。嘉靖中，旌門。

庠生陳縉妻翁氏，年二十四寡。翁故出高門，自斷容華，撫二子成立。縉魂常憑而慰之。

庠士方攸宜妻林氏。

徐從敬妻陳氏 從敬弱冠，從祖父朝儀官彭澤學諭。宸濠叛，學諭投印歸，從敬道亡，莫知所之。陳矢節自靖。後子純仕廣德知州。

趙希鄉妻方應娘。

庠士曾睿卿妻林氏 守節養姑，割股甦姑病。守陸美中以孝節旌之。

黃世泰妻蔡氏 嘉靖中，旌表。

俞時和妻陳氏 嘉靖中，旌表。

黃從周妻吳娥娘 嘉靖中，旌表。

林汝學妻吳氏（三九） 嘉靖中，旌表。

陳効忠妻方氏。

陳氏三婦 陳氏兄曰璉，國子監丞，弟曰琅。璉卒於官，琅往奉柩歸。璉妻曰鄭，妾曰康。康臨清人也。璉歿，鄭有遺腹，而康生一女矣。柩過臨清，欲返康於家，康誓死從鄭。後鄭生遺腹子曰德昌，康與鄭並以壽終。而琅時扶璉柩亦歿於道次，其妻黃亦守節育孤，年七十餘卒。方黃守節時，爲年二十三爾。御史奏請立坊，曰三節。

黃師器妻林淑婉 旌表。

林成甫妻周氏 旌表。

吳于原妻林氏 年二十四，夫歿，力貧守節，撫育三孤。詔書旌門。仲子大選裕州知州。舉人黃肯堂妻張淑貞 旌門。

林守元，庠士也。妻劉氏，夫亡，無子。力貧勤生，爲夫弟畢婚娶，夫弟母事之。

林實夫，庠士也。妻方氏，育其遺腹子轍。後轍以貢仕陽春訓導。方年八十有五卒。

林世誠妻江氏 年二十四，夫沒，生子菁莪，甫及晬，誓死鞠育。菁莪補府庠生，死。未幾，江痛哭亦死。

林在勉妻許氏。

陳紹卿妻廖氏。

周祐妻黃氏。

俞應星妻林氏。

庠士朱道本妻鄭氏。

舉人盧士行妻陳氏。士行卒，陳視殮畢，潛以帛自經，家人覺得解，遂絕粒，水漿不入口者十餘日，嘔血數升而歿。御史吉澄表堂曰貞烈。

張子文妻吳氏。子文夭卒，無子，吳誓死守節。後擇夫弟次子大觀爲嗣，撫教成立，爲娶江氏。大觀尋亦夭卒，姑婦榮榮以女紅自給。吳以壽終。守葉觀旌之。

丁汝川妻陳靜莊。

陳永臨妻林氏。

陳以信妻蔡氏。以信瘋癲癰疽，久而氣不可近，氏扶持勤慎。家屢甚，舅姑憐而欲嫁之，蔡曰：「命也，倍之不祥。」以信卒，蔡爲立嗣，事舅姑益專謹。

吳廷淑妻鄭氏。

吳廷昭妻常氏。

方于道妻林氏。

黃大雅妻林氏。夫歿，時年二十二，僅生一女，貧甚。武弁有欲請婚者，斷髮自誓。孀居六十餘年。

郭潤夫妻洪氏。

庠士姚文燦妻吳氏。年二十，夫歿，斷髮自誓，終身未嘗見齒。

李激甫妻王氏。

黃貴德妻唐氏。

陳漢生妻李氏。

庠士凌文塾妻陳氏。

陳氏三節 陳尚樂妻俞氏，蚤寡，守志。後其孫泉娶於方，亦蚤卒，方撫二子甘露、甘雨。甘露娶鄭，亦沒，鄭守節如一姑。甘雨後貴，封方爲孺人。

姚在正妻陳氏。

黃宏川妻何氏 黃鞏爲之傳。

李汝謹一門三節 汝謹妻林氏。汝謹之子曰敦化，孫曰天錫，曾孫曰于蕃。敦化之妻曰程氏，天錫之妻曰陳氏。汝謹父子孫皆蚤夭，而敦化、天錫、于蕃並遺腹所生，一門三節，俱以壽終。而程氏又能割股以救林姑之病。

游潛周妻劉貞肅。

許師德妻李氏。

陳宏慶妻金氏。

林仲華妻鄭氏。

周景潛妻羅氏。

庠士朱文妻王氏。

鄭一清妻楊氏。

廖大訓妻陳氏 遺腹子曰慶。慶登進士，詔書旌門。

監生廖奇進妾黃氏 撫四歲孤寡。竇後仕爲德興令。

曾宗平妻鄭氏。

張儀度妻陳氏。

鄭舜弼妻許氏。

趙良厚妻鄭氏。

廩生李景昕妻林氏。

方于養妻吳氏 年廿一，夫亡，取遺簪自誓，奉舅姑孝聞。

康正福妻吳氏。

庠士李一復妻姚氏 年二十，以死殉。

余永冲妻陳氏、永盛妻朱氏 娣姒，皆蚤寡，撫遺孤，以壽終。

孝子蟻鳴虞妻陳氏 鳴虞從御史陳傑講學，事父母孝，蚤卒。陳矢志甘貧，撫遺腹男成立，以壽終。

黃子隨妻洪氏。

鄭國贊妻林氏。

庠士柯木妻林氏。

方子受妻張氏。

朱景說繼室吳氏。

黃希東妻方氏。

宋玉卿妻陳氏。

黃潭妻林氏。

陳梅妻黃氏。

朱君直妻翁氏。

陳淳妻蕭氏。

林獻策妻黃貞秀。

鄭子會妻張氏 會臨盡不能語，書「節孝勤儉」四字，出木尺一條付張。張抱二子與訣，斷一指爲

信。髹縵藏字若尺，時出示孤：「孤毋忘乎？」家告竭，日僅二餐，以祈昌後。子會以孝聞，有盆蓮並蒂之

瑞。

余國盛妻李氏。

丘茂濟妻張氏。

周道本妻程氏。

卓大棉妻陳氏。

鄭三娘 母許婚庠生吳世勳，其兄耻吳貧，挾勢悔婚，別納富人聘。三娘縞素臨之，曰：「吾有死而已。」碎其聘，登樓不食死。御史聶豹按莆，親往吊焉，爲築烈女墓，撰墓碑之文。詔書旌表。

張廷光妻王氏 廷光隨父卒官邸，久之，父亦卒。王年方二十，姑私其季子，（四〇）謀嫁之，王誓不再

醮。姑苦之百方，及子稍長，自經死。

朱仕顯妻林貞淑。

黃漢妻陳氏。

陳會妻卓氏。

張純昭妻林氏。

朱茂良妻吳氏。

康子瞻妻葉氏。

唐堯章妻林氏。

李允時妻鄭氏。

林獻表妻陳淑婉。

林廷燦妻陳氏。

陳守信妻林氏。

朱雲衢妻陳氏 年十九，以烈殉。

鄭大猷妻林氏。

吳三重妻林氏 守志撫孤。孤道立，後以鄉薦仕知縣。

沈會奇妻林氏。

周大能妻宋氏。

鄭守典女 幼議婚於陳七。七弗類，祖希珍請悔婚，鄭絕食誓死。及於歸，事希珍孝謹，而七果有昭。

惡。鄭乃以扇掩孤，自經而死。

朱光騰妻林氏。

蔡賢妻張氏。

林變一妻陳氏。

吳宗猷妻丘氏。

許朝肅妻林氏。

陳志舉妻黃氏。

鄭汝陽妻林氏。

鄭善卿妻陳氏。

朱紀未婚妻翁妹娘 紀亡，女欲躬弔之，守志奉姑，父母不可。含哀不食。越月，父爲卜婚，自經死。

晉江潘遜妻黃氏 年二十二從遜戍鎮海，逾年，夫卒，與姑吳携骨歸葬，齧斷右拇指以誓。年八十五卒。

康長源妻崔氏 夫卒，子大和僅七歲，翁孱羸衰老。崔拮据辛勤，奉翁課子，縑車聲聞丙夜。後以大和貴，累贈淑人。

右貞女。

〔校記〕

〔一〕「寧化縣」上杭縣 武平縣 清流縣 連城縣 歸化縣 永定縣「二十一字，各本原脫，據本書體例補。

〔二〕「長汀縣」三字，各本原脫，據本書體例補。

〔三〕「德金」，各本原作「德清」，據文義改。

〔四〕「張麟」，本傳作「張麟」。

〔五〕「寧化縣」上，各本原衍「汀州府」三字，據本書體例刪。

〔六〕「上杭縣」上，各本原衍「汀州府」三字，據本書體例刪。

〔七〕「武平縣」上，各本原衍「汀州府」三字，據本書體例刪。

〔八〕「鄧福娘」，本傳作「鄧福妹」。

〔九〕「清流縣」上，各本原衍「汀州府」三字，據本書體例刪。

〔一〇〕「連城縣」上，各本原衍「汀州府」三字，據本書體例刪。

〔一一〕〔一五〕〔三五〕「妻」字，各本原脫，據本傳補。

〔一二〕「歸化縣」上，各本原衍「汀州府」三字，據本書體例刪。

〔一三〕「永定縣」上，各本原衍「汀州府」三字，據本書體例刪。

〔一四〕「三子」，各本原作「三孫」，據下文改。

〔一六〕「張四姐」，本傳作「張四娘」。

〔一七〕「嗣」下，各本原闕一字。

〔一八〕「借注」，疑誤。

〔一九〕「鄭淑貞」，本傳作「林淑貞」。

〔二〇〕「江遜居妻林淑貞」，本傳作「江舜居妻鄭淑慎」。

〔二一〕「鄭妙義」，各本原作「鄭妙巖」，據本傳及弘治《八閩通志》卷七十二《人物》改。

〔二二〕「吳淑」，本傳作「吳淑清」。

〔二三〕「吳于源」，本傳作「吳于原」。

〔二四〕「朱紀未婚妻」五字，各本原脫，據本傳補。

〔二五〕「周子恭妻唐氏」，本傳作「周子泰妻陳氏」。

〔二六〕「鄭璩妻林氏」，各本原闕本傳。

〔二七〕「戴」字，各本原脫，據本傳補。

〔二八〕「林加猷」，本傳作「陳加猷」。

〔二九〕「劉箕」，本傳作「鄭箕」。

〔三〇〕「祁氏」，各本原作「祈氏」，據本傳改。

〔三一〕「林氏」，本傳作「黃氏」。

〔三二〕「馬全」，本傳作「馬全昌」。

〔三三〕「岸生李景昕妻林氏」，各本原闕本傳。

〔三四〕「歐陽節」，本傳作「歐嘉節」。

〔三六〕「林芳栢」，本傳作「黃芳栢」。

〔三七〕「林應述」，本傳作「林應述」。

〔三八〕「夫」字，各本原脫，據文義補。

〔三九〕《林汝學妻吳氏傳》，各本原置《陳効忠妻方氏傳》下，據傳記目錄移。

〔四〇〕「姑」字，各本原作「吳」，據文義改。

閩書卷之一百四十四

閩閩志

興化府 莆田縣二 仙游縣 興化故縣(二)

莆田縣二(二)

嘉靖癸未，廣賊寇閩中，與難者四人。曰王文奎女，江口前王村人，方笄。被賊掠，行至屋後山，給曰：「吾欲汲江水飲之。」約帛束衣，投下死。順流下海，數日，屍乘潮回，肌體不露，顏色如生。曰詹秉直妻黃氏，與其姑同爲賊獲，賊索金帛，簪姑慘楚，黃曰：「願代。」賊不聽，殺姑。黃奪賊刀自殺。事聞，並賜旌表。鄭善夫作《苦節行》曰：「下南四郡三郡兵，閩盜此日真縱橫。安溪莆口備慘毒，殺氣上冒天爲腥。六師不發無戰情，賊過一程移一程。兵驕將怯往必敗，疆場之事誰曾經。官軍長賊遠護送，民兵不教將何用？坐遣群羊啖虎口，萬姓何辜死無訟。前王少女不就虜，抽身抱石沉江水。詹家少婦賊殺姑，罵賊不屈同姑死。我歌《苦節行》，泪下哽咽悲不止。吾輩堂堂七尺軀，況作男兒把天紀。清風嶺，曹娥渚，長使志士哀千古。吁嗟乎，詹家少婦前王女！」曰王原德妻陳氏，居王莊，寡居二十八年。賊至，盡得王莊諸婦女，惟陳抗死房闔中。事聞，旌表。鄭善夫爲作《傷哉行》曰：「傷哉乎！尚陽之南，廣業之

里，千數茅茨變賊壘，殺人成丘山，旬月不見官軍至。我思八閩十七衛，太祖以來食盡多少官倉米，一朝緩急不得分寸力，惡用餉爾民膏髓！臘風吹塵污詩禮，安能一沃滄溟水。傷哉乎！壩頭山，新渡嶺，婦女不行刃加頸。新渡嶺，壩頭山，黃金滿意婦女還。可憐娥眉七十二，竟無一下清風灘。死生在前良獨難，傷哉乎！前王寡妻獨死房帷間。令人苦憶太古時，上有堯舜下皐夔，契敷五教張四維，稷播百穀民忘饑，九州分理十二牧，天子端拱而無爲。四凶既誅戮，六合歌雍熙。耕且讓畔行讓路，重門暴客從何來。嗟彼盜賊，豈無民彝，犁鋤化兵誰使之。傷哉乎！聖王不作吾已而。」曰高安簿陳準妻丘氏，年方艾。流賊入其家，丘時在樓，二賊捉之，遂投樓下死。郡邑旌之，塋於舅姑之墓側，夜時時有火光。後占墳有水，啓別竈皆水滿，獨丘竈有團火出穴，人謂正氣所感。

嘉靖壬戌與倭難者四十七人^(三) 四十一年，倭陷興化城，與難者四十七，其事可表，其志嘖如也。庠士林觀頤妻柯氏，倭圍城，語妯娌曰：「城陷，死矣。」賊至，被執。至顧提學池亭，賊稍侵之，遂赴水死。庠士林須恭妻劉氏，年二十六，姿貌殊麗，賊強侵之，劉抗拒。刃割其腹。同俘者見其屍仆地，猶手執禪襴。賊感動，爲之具棺殮。高翰妻翁氏，賊入城，翁抱姑哭。賊殺姑，礮刃翁頸曰：「不從，砍矣。」翁伸頸罵曰：「賊奴便砍，何可從也！」賊復殺其幼子，而擬以兵曰：「砍矣。」翁復罵曰：「姑死子死，吾獨生乎？」伏姑屍大哭，遂被害。陳復拱妻黃三姐，年十七，垢面冀免污。賊獲，逼之梳洗。黃哭罵，奮前奪刀。賊大怒，拽之出。黃且指且罵。賊擊之，五指俱落，仍刺殺之。同俘者覆以青袍，積薪焚其屍。知縣鄭文煥繼室郭氏，賊執，欲污之。厲聲罵，遂遇害。魚臺尹鄭任妻陳氏，賊入城時，卽投井，家人救出之。同夫被執入營，奮必死。旣而夫釋，獨留，遂罵賊死。歸殯之，顏色如生。知縣黃約妻高氏，城陷，抗賊死。

節。庠士蘇繼茂妻唐氏，城圍急，指後庭井中謂賊獲曰：「城陷，此吾死所矣。」倭入城，盡室逃竄，唐氏投井死。鄉貢士方繼曾妻林氏，夫歿，貧且無子，忍死養舅。城陷，亟扶舅縋城。舅老，悸不能下，乃垢面男髻，扶舅歸，伏其夫棺側。賊獲之，笞舅，請以身代。賊兩釋之，戒諸黨勿蕪其居。庠士周大佐妻游氏，城陷被執，賊責贖金，露刃臨之，游無懼色。值他賊過，欲以金代贖。游罵愈厲，遂被害。廩生鄭東野妻陳氏，年二十五，賊入城，即投井，家人救出之。同夫被執，罵賊死。庠士林觀文妻陳氏，年二十四守志，又四年被執，不屈。賊生縛而投之火中。庠士鄭肇妻鄭氏，肇被賊執，舅引姑及鄭匿鄰舍。天明，賊獲之，逼使前，鄭奮曰：「死即死，不可前也！」賊怒，刀刺洞胸，血被地，猶屹然坐。姑驚號，賊斫姑頰。愈憤罵激烈，賊刺其喉死。庠士宋茂淳妻張氏，賊逼之，具脂粉使自飾，張號咷盡碎其具。賊欲刃之，受以頸。乃禁之密室，潛自牖出，抱乳兒下井死。庠士李啓謨妻黃氏，方盛年，賊至，匿其男鷄櫛中，覆以麥草，與二女赴水死。州判黃采妾朱氏、張氏，城陷，朱自經死。張與采被執，賊屢犯，不從。執采焚之，張自投烈火死。朱年二十五，張年二十。李塗妻陳氏，塗嬰疾，陳事姑甚孝。年十九，倭執而逼之，罵賊投水死。庠士鄭日新妾蕭翠鬟，與其婢同爲賊執，曰：「吾必死之。」即以所生子付其嫡妻。既至，賊逼之，不從。佯欲殺之，即引頸受刃，如是者三。婢勸之曰：「何自苦乃爾？」怒罵愈厲，賊刃之。吳緒妻鄭氏，年二十八，夫亡，勵節。城陷，死焉。林文鉞妻王氏，早寡撫孤，有孫矣。城陷遇賊，賊欲刃之，孫廷準曰：「祖母守節，請殺吾。」賊殺準，王得釋。準妻黃氏縋城遁入山，聞夫訃，不食死。準弟廷灝以護幼弟出城，爲賊所殺，未娶婦。鄭氏適被繫，亦自投白馬潭中。黃懋志繼室翁氏，莊重美姿，賊見而悅之。給以更衣，自縊死。王大勳妻張氏，年二十一，夫亡，姑老，自吃糠覈，以米啗姑。遺腹生男，撫教之。賊入城，與婦朱

氏肩門燔死。吳應桓妻陳氏，年二十七，寇獲之，大號曰：「一死便休，從汝虜卵。」仆地不起，賊斬之。黃士寵妻陳氏，士寵，宕也，陳爲倭拾仰取，生有男女矣。而士寵歿，服闋，舅欲嫁之，涕泣踞庭，自明志義。亡何，男女夭喪，志節益堅。賊且至，城中屢驚，語人口：「吾聞死而無辱，則魂魄不媿。」竟被擄，赴水死。郭景順妻何氏，年二十五，猝遇賊，勒之，不從。欲兵之，口：「可死，不可辱！」賊五舟聯爲一舟，縛何氏出，刃摩其頸，以示同俘諸婦。時冬方衣絮，絮領故厚，何自抑衣領，伸頸受刃，嫚罵祈死。賊怒，殺之，投屍海中。鄭若濟，居江口，妻蕭方入城。若濟遇害，訃聞，蕭哭投江橋死。阮有道妻黃細娘，居海上，聞倭警，携一子附舟避之。賊追至，赴水死。有道從弟道充妻陳氏，遇賊亦赴水，年俱二十餘。蕭奇烈、奇照，兄弟也。其一婦皆林氏，同孀共節。倭至城，二婦相語曰：「吾二人嫠居十年，不可辱也。當求所以生一孤耳。」奇照妻縋兒城外，投城下從之。奇烈妻則毀面易乞人服，從城門出。奇照妻足傷，尋卒。奇烈妻被傷仆地，力護其兒，居月餘亦卒。雍士憲妻林氏，倭臨城，姑方卧病，林不忍去姑。賊至，將殺姑，林請代。賊見林色，悅之，免其姑，縛林去。至渠河，林給曰：「不須縛也，願自行。」賊信而解之，遂投河死。陳在良妻方邵娘，城陷，與姑若夫出避賊。賊擁至，姑若夫俱相失。賊逼之，邵娘罵賊，投河死。林承芳妻鄭氏，遇賊，罵不從。賊怒，割其左耳，罵愈厲，復割其右耳，又復罵。賊大怒，割鼻逐之。劉氏二女，被倭擄繫人知府林介祠中。倭飲而酣，遍視繫中，得一女出之，姊妹也。姊年可十七八，有殊姿。倭先取姊，姊厲聲曰：「我家女也，肯污賊？」倭莫知云何，詢舌人，具以對。倭微笑，命慰之曰：「若從我，終當詢父母歸汝耳。」女曰：「父母未可知，此時尚論歸耶！」倭知其不，然以姿故，乃撫背作款語狀。女雖視，罵益甚。時黃昏，倭方縱火，女即赴火死。已，復侵其妹。妹大罵曰：「我姊爲汝死，

我豈汝污！」夷雖不辯其音，然見其色厲甚，露刃脅之。女不爲動，曰：「死卽死。」倭無可爲計，欲強犯之。女知之，給舌人曰：「吾固願從，姊屍未化，吾不忍也。化姊屍，從汝矣。」倭聞譯言，有喜色，身負薪爲諸酋先。火熾，女又赴火死。倭恚甚，連創其膚，殺其被逮四五人以洩怒。黃河妻陳氏。河陷賊，賊質以索鎗。陳氏遍過宗人無所得，乃自入虜圍請代，告賊曰：「必放夫出，鎗乃可得。」逾旬，河不至，賊以爲給已，引出割其乳，立斃。西門女子者，賊至，匿西門涵寶中。賊得之，據地不起。賊怒，刺其喉。四五日顏色如生，但頭微俯如支頤之狀。二弟女，姊妹也。賊欲汚姊，姊厲聲大罵，值火發，遂赴死。已而，意及妹，亦投火從之。賊吐舌去。溝頭地嫗者，賊將殺一男子，嫗固抱持云：「夫也。」賊奪而殺之。嫗拊屍裹血，哭移時，亦被害。北門嫗者，賊殺其姑，抱哭同死。水關旁女子者，賊執之，罵賊。賊斷女子舌，寸斬焉。後村婦人者，容色甚盛，不受賊污，曰：「請受刃！」賊戀之，置之房。乃自垢其面，請死甚切。賊不忍。復以火燬面皮，決之如癰。賊舍之。釘壁女子者，抗賊不屈，賊釘其手足於梅峰寺前之壁間，以死。槐樹下女子，與父同執，賊欲質其父取贖金，女曰：「吾女流，無能爲也。可放吾父。」賊出其父。女知父貧，無所取金，遂代父死。衣紅女子，丘家女也，容色麗都。賊住西洲，得之。厲聲罵賊死。

鄉貢士蔣龍妻林四娘。龍計偕，卒旅邸，四娘年二十二，無子，勵志艱貞，事姑甚孝。時海賊蜂起，扶姑匿山谷間，遇賊，驅至水塘，挺身投之。載沉載浮，賊以矛鉤置塋上，氣絕，移時復生。數載，姑沒，推衣被爲殮。薄衫度寒，三餐不給。及卒，御史何淳之禮葬之。

林積華妻陳氏。

陳汝久妻林氏。

陳汝誨妻吳氏。

周子泰妻陳氏。

游汝才妻黃清娘。

卓世芳妻林氏。

廩生陳洪宗妻鄭氏 憲使玉之女。婉孌篤孝，姑病，刲股以進。玉病，爲刲股。洪宗早沒，立志守節，食貧撫孤。年六十四卒。

鄭孚可妻林氏 生兒五歲，夫卒，林矢志防禮。舅七十餘，性嚴憚，患瘡痿，卧者數年，林終始孝敬之至。

方詩妻林繡 年二十一，詩亡，子正梁方三歲，林矢志育。姑疾疢，湯劑必親，三年不懈。姑卒，號痛無已。家貧，治麻縵車，二鼓爲常。課孤讀書，偶有過不貸。後正梁官趙府長史。

吳良質妻戴氏 年二十二無子而寡，刲股愈姑。

楊岐妻宋氏 年二十五，守志奉姑。姑目翳，舐之五年，忽開明如初。

劉環未婚妻陳金娘 以烈殉。

陳加猷未婚妻鄭一娘 以烈殉。

庠士鄭箕妻陳氏 旌門。

仙游謝景賢妻姜氏。

仙游庠士林龍妻黃氏。

劉貴文妻朱季貞 夫亡子幼，堅守撫育。媵俞氏亦化其貞，俱以壽終。子閔，兄縉紳。

林道妻黃氏。

康貞卿 仕人女也。仕人爲秀才時，與人林瑛友善，以許其子九錫，已行繫臂禮。及貴，抵家聞瑛繼妻不恤前人子，遂潛取宗人女，并載宦游，意欲爲女代也。女知之，卽不食。父母多方勸之，亦不食，惟私泣語宗人女曰：「吾誓必死。」宗人女亦歔歔泣下。比至驛舍，病轉劇，父母問之，垂淚不能語，遂絕。越二日，宗人女亦暴卒。其夕，林瑛髣髴見康氏二女來拜謁，心驚訝，數時，果聞其事云。

陳若瑛 義門人。聘舒郎，未嫁舒沒，陳不食死。其日，題詩云：「有女名若瑛，義門陳氏子。女紅中饋餘，頗亦嫻書史。十九聘舒郎，雙璧燦盈貯。百年偕老期，竟爲天所阻。妾身雖未明，妾心良已許。豈無展轉匹，志奪妾所耻。名旣爲君婦，能不爲君死？我生尚氣節，賦終毛髮豎。」

鄭孟恭妻蔡氏。

庠士李約妻陳氏。

庠士柯礎妻黃氏。

柯林妻黃氏 年十九，林沒，無子，孀居三十餘年，雖同舍莫窺其面。

鄉貢士方珊妻吳氏 年十七，纔納三日，珊卽北上，卒於途。吳同嫡洪氏守節，年七十六終。

胡繼垣妻周氏。

黃恭甫繼室林氏 年十七而寡。夫已抱疴，氏供湯藥，剝股肉和粥進。三年，夫卒，無子，氏自經，賴家人救免。杜門撫前人女至於成立。

林端五妻吳氏 守節，撫遺孤應俊。俊死，婦朱氏復勵志守節奉姑，以雙節聞。

庠士黃承志妻林氏。

庠士陳仕瞻妻張氏 年二十而寡，甘貧守節，刲股愈姑。

周興邦妻曾氏。

梁績妻方氏。

郭鑒妻黃氏。

庠士吳東周妻謝氏 二十三歲而寡，雙白在堂，家無擔石，辛勤節儉，養生送死，各盡情禮。宗族稱

之。

庠士李楠妻曾氏 適楠而寡，刲股愈姑。

庠士吳如珪妻黃氏。

庠士鄭遂期妻陳氏。

祁應科妻陳氏。

余應瑞妻朱氏。

陳遂妻祁氏 年十九而寡，孤承科纔四月，矢志秉節，刲股愈姑。

葉在穎妻俞氏。

周洪德妻黃氏。

合浦知縣鄭正規繼室林氏 年十七，父携往合浦成婚，至則規病篤，不克合。櫬歸，父家口：「未

成婦也，可重行。」不許，孀居二十餘載卒。

司獄曾泰妾陳氏 年十九孀居，矢心事嫡，年九十終。

陳明德妻黃氏。

藍景光妻林氏。

楊鎮妻林氏。

郭大化妻鄭氏。

庠士宋夢奎妻林氏。

陳道妻黃氏。

庠士林舉巖妻曾氏。

鄭從龍妻吳氏。

庠士吳一桂妻林氏。

顧養達妻林氏。

洪肇曾妻張氏 年二十而寡，遺孤纔兩月。舅老，姑其繼也，張奉養惟謹。已而，姑忽失明，持侍洗綸，二十年如一日。兩世之喪，悉出經理。有司旌門。

林應械妻黃氏。

庠士郭文采妻宋氏。

周輔邦妻郭氏。

徐東華妻周氏。

馬全昌妻陳氏 知州文熙女。年二十而寡，矢志奉姑。刻夫像，朝夕哭奠，持齋一十四年。病篤，姑與母欲延醫，泣辭之。命垂絕，晝家至，欲圖其面，猶以兩手蔽面而卒。

庠士陳致恭妻林氏 二十而寡，事姑孝。倭亂，兒達墀方八歲，爲所擄，粥產贖歸，備辛苦，迄於成立。

吳氏二婦 吳概妻陳氏，年十九而寡，孤甫四歲，陳守節存孤。孤明卿錄庠，娶婦周氏，又十九而寡，孤甫三歲。姑婦相依，閨內肅然。

程庠妻方氏 壬戌之變，庠嬰成疾，方扶縋城，又傷足。方追隨壕莽中數日，取衣裹水濡沫之。庠自分必死，勸方去，方垂淚而已。亡何，庠斃，乃尋故居，同家衆負尸歸殯。時年一十四，僅一女，事姑甚

蔡應可妻吳氏。

戴宗仁妻林氏。

顧啓宗妻陳氏。

庠士方湛繼室吳氏 夫歿，矢志撫前人子承郁，以至成立。詔立坊旌之，以承郁貴贈孀人。

丘伯載妻鄭氏 二十二而寡，無嗣，舅早世，與姑曾相依靡他。家貧，紡績蔬素二十年。營葬夫翁畢，卽減食，哀痛卒。

俞康妻林氏 夫卒，茹荼孀居五十餘年。奉翁姑以孝，教子有方，後以子誨貴贈孀人。

林崇生妻趙氏。

庠上林仕養妻黃氏 年二十，夫客死。訃聞，欲絕，念二白在堂，遂矢志孝養。嘉靖壬戌之變，冒矢石全姑。孀居五十四年。

庠上林堅妻曾氏 年十八寡，遺腹一女。誓志嚴潔，事姑以孝聞。

庠上戴宗泗妻林氏 憲副廷陞女也。夫卒，矢志靡他。積金創祀舅姑，而夫附焉。父病，刲股至再。

張珣妻俞氏 年十九寡，無子，矢志靡他。刲股愈姑者再。

歐嘉節妻鄭氏。

葉九苞繼妻鄭氏。

庠上鄭明瑞妻顧氏 年二十而寡。有妾王氏 年十八，遺娠三月，已舉男。翁沒姑病，刲股以進。孀居者五十年。

林標甫妻謝氏。

庠上陳嗣楚妻鄭氏 年二十三而寡，一子繼歿，誓死靡他。孀居三十餘載，未嘗蹶戶外。

曾于材妻張氏。

葉宗仁妻鄭氏、葉時煥妻亦鄭氏 宗仁、時煥，叔侄也。二鄭並寡，人稱雙節。

庠上俞爾陽繼室鄭氏、俞爾昕妻李氏 妯娌也。以節相厲，久不渝志。

庠上黃芳栢妻唐氏 年二十二而寡，遺孤僦甫四月，矢志勵節。僦又早世，與婦兢兢相守，拮据營二

代葬。晚節孤苦，尤人所難。

余待佐妻梁氏 年二十七而寡，子振〔甫二歲。〕有妾陳氏，年十九，遺腹生男。撫孤守節，二人同心，六十年如一日。

庠上林應速繼室丘氏 年十六適林，甫半載，夫亡，翁亦繼喪，丘矢志孀居，撫前人子如己出。及孤授室而歿，又撫其孫。勤苦拮据，以存先業。

林道相妻戴氏 年二十，夫亡，守節，辛勤紡績，買土葬夫。姑病，刲股以進。郡縣扁之。

許有容未婚妻陳冰娘 以烈殉。萬曆三十三年，旌表。

朱朝勳妻陳氏 夫病，刲股，籲天自代。及卒，衾殮畢，闔扉縊死。

廩生魏雲璋妻林氏 雲璋病，林氏刲股而愈。九年，病復作，竟不起，林氏痛哭奠辭，更衣密縫，自縊而卒。

右貞女。

仙游縣〔五〕

宋

蘇洸母 蔡高妻程氏 葉傳妻黃氏 侯官陳韓妻林氏

蘇洸母 蘇欽妻也。洸以賓州倅攝桂府，武弁陳姓者交通諸蠻，納賄巨萬，事覺，逮獄。當路有爲地者，屬洸治之，卒正典刑，一府肅然。時欽妻年七十餘，聞洸治獄事，曰：「昔人以平反悅其親，吾無疚

矣！」

蔡高妻程氏 高爲太康簿，卒官。時程年二十四，縣人哀其貧，以錢百二十千爲贈。泣曰：「吾家世廉吏，不可以此污吾夫。」却不受。鄉里賢之。

贈少保葉傳妻黃氏 傳蚤死，黃年二十四守節，傾家貲創義齋，聘名師教族里子弟。治家最嚴，子弟間起居，非正衣冠不接見。後以曾孫頤爲相，贈衛國夫人。

侯官樞相陳韓妻林氏 知縣渙女。知書能文，有丈夫志。紹定間，寇陷汀、邵、延平諸郡，韓起守延平，兼招捕使。林遺韓書，請從官示死守。許之。邦人感激相告曰：「太守携家，我輩何畏？」有從韓行間而妻子無依者，林延養之州宅。有能學者，使與己子同學。人人爲盡死，以是有成功。

皇朝

柯文炯繼室胡氏

胡氏者，嘉興府司訓柯文炯繼室也，海鹽人。父蚤世，母適人。文炯年六十三官嘉興，爲喪子而娶之，時年甫二十。居四年，文炯乞休歸，胡氏母若兄詣文炯請胡氏，文炯從其請。胡氏聞之，於邑自矢，以死相隨。濱行，母兄踵至舟次，欲奪之。胡氏以死拒之，竟與同歸。囊蕭索，菱田門復被盜，益罄。而文炯患不仁之疾，胡提抱水火，臭穢不厭，三年如一日。文炯爲五言古謝之，既竟不起。胡年二十八，哀毀終喪。及除，蔬水粗糲，坐卧一室，盤盂匕箸巾櫛必躬滌用，不以人代。子姓雖垂白不得覲其面，時問安否，及堂止耳。嗣孫有庸及孫婦林氏孝事維謹。間有疾，有庸精岐黃業，亦不許握手診脉。撫按聞之，月給糧終身。

右賢女。

皇朝

張琳妻王氏 盧瑞妻陳信 郭長吉妻李氏 鄭恒順妻朱氏 林邦祥妾唐氏 楊行清妻陳氏 陳德遇妾戴氏 林孔昇妻黃氏 宋元英妾陳氏 吳尚瓊妻鄭氏 茅宏慎妻傅氏 陳氏姑婦 王希吉妻李淑貞 陳景亨妻蔡氏 張洪濬妻陳氏 黃永齡妻薛氏 周禮妻鄭玉姬 林咸妻陳氏 傅沂妻蔡氏 吳大符妻陳氏 吳文臣妻張氏 陳念一妻曾氏 鄭主一妾黃氏 吳文釗妻林氏 程填妻周氏 林翔鳳妻王氏 李子紓妻吳氏 官起鳳妻王氏 鄭箕妻陳氏 李應辰妻陳氏

張琳妻王氏 年十九，琳卒，養姑鞠子，堅節四十餘年。成化中，旌門。正德己巳，寇焚其居，反風息火，而門獨存。後曾孫文鏞登進士。

廩生盧瑞妻陳信 旌門。

郭長吉妻李氏 旌門。

鄭恒順妻朱氏。

林邦祥妾唐氏。

楊行清妻陳氏。

陳德遇妾戴氏。

林孔昇妻黃氏。

宋元英妾陳氏。

吳尚瓊妻鄭氏。

茅宏慎妻傅氏。

陳氏姑婦 陳景星妻曰王氏，歸景星時，祖居燬兵，產業先貸於人，王斥奩資，勤紡績，相夫復業。年二十七，景星卒，二子坦、城俱幼，家又落，誓死甘貧，撫以成立。而城復早卒，婦鄭氏年二十一，子在襁，王微諷之，鄭泣曰：「豈姑能之，婦不能耶？」遂俱以全節終。

王希吉妻李淑貞 早寡，守其三歲孤。所居一室，掃壁滌地。詔書旌門。

陳景亨妻蔡氏。

張洪濬妻陳氏 早寡，遺腹子常。後常亦夭，又撫其孤，終始一節。

黃永齡妻薛氏 年少而寡，撫其遺孤。及婚，亦夭。幼係失明，搏醵籲天，得完一目。年七十卒。

莆人周禮妻鄭玉姬 侍郎鄭紀女也。夫喪子殤，終守婦節。旌門。

林咸妻陳氏 年二十二，夫卒，子幼家貧，紡績養舅姑。母兄憐其少，陰許富豪爲繼室，陳自經而亡。

傅沂妻蔡氏。

吳大符妻陳氏。

吳文臣妻張氏。

陳念一妻曾氏 年二十八，夫歿。養子，子又歿。撫孤孫，以堅苦終。

鄭主一妻黃氏 年二十五，主一歿，守節撫遺孫紹業。後紹業死，與婦陳氏孀居，人稱雙節。

吳文釗妻林氏。

程填妻周氏。

林翔鳳妻王氏 年二十六而寡，事繼母盡孝。

李子紆妻吳氏。

官起鳳妻王氏 年二十四寡守，奉舅姑，撫孤子。年九十餘。

庠士鄭箕妻陳氏。

李應辰妻陳氏 年二十三而寡，撫育遺孤。姑病，刲股者再。

右貞女。

興化故縣(六)

唐

陳如寶妻王氏 林可德妻董氏 鄭如賢妻方氏 吳器妻林氏 方正道妻黃氏 羅士程妻吳氏

陳如寶妻王氏 寶卒，無子，王守志奉姑。姑年八十一卒。嘗捐金建寺於萍湖東山之麓，曰順姑

寺。

林可德妻董氏。

鄭如賢妻方氏。

吳器妻林氏。

方正道妻黃氏。

羅士程妻吳氏。

宋

林坊妻薛氏 薛瓊妻方氏 方至道妻黃氏 官曰海妻潘氏 薛夢鯉妻謝氏 方綱妻杜氏 陳所

蘊妻常氏 薛元第妻高氏 陳元伯妻李氏 崔世德妻張氏 方大道妻章氏 鄭如理未婚妻伊氏

林坊妻薛氏 年十八，夫卒，父母欲嫁之，薛漆身爲癰。邑令孫逢吉扁曰節義幽光。

薛瓊妻方氏 光祿卿偕女也。年十九，夫卒，方日夜哭，居數月自縊死。

方至道妻黃氏。

官曰海妻潘氏。

薛夢鯉妻謝氏。

方綱妻杜氏。

陳所蘊妻常氏。

薛元第妻高氏 夫卒於外，高日夜號慟，三年喪畢，遂自盡也。

陳元伯妻李氏 元伯死於溺，李求不得其屍，亦投水死。

崔世德妻張氏 嫁三年，世德死，自經以殉之。

方大道妻章氏 家遭疫風，死亡已半，章謂大道曰：「天災其免乎！」卒不免。章撫棺大慟，_(七)數月

自縊死。邑令捐金瘞之。

鄭如理未婚妻伊氏 進士伊樸女也。以烈殉。

皇朝

鄭世貴妻蕭氏

庠士鄭世貴妻蕭氏 早孀，撫二孤。一孤相繼夭，守摻益堅。右貞女。

邵武府 邵武縣 光澤縣 泰寧縣 建寧縣 邵武衛[△]

邵武縣^{〔九〕}

皇朝

王禮娘 王椿妻章秀娘 黃僑妻余瓊娘

王禮娘 都憲陳泰妻。泰嘗司訓安慶，王侍姑謝抵安慶。謝忽病，醫藥不効，泰剖股爲湯以進，王焚香籲天，願減己算，謝病尋愈。泰居官廉甚，王飭內外，毫釐不苟，以成其節。又以寬嚴相濟爲泰勸，贊助良多，時論賢之。

王椿妻章秀娘 椿年十七，患瘋疾，不能動履。氏父出四十金，浼其離婚，椿父母謀曰：「此子終成痼疾，許之可也。」氏聞之，晝夜泣，告曰：「許婚後方有疾，女命所致，又誰怨！嘗聞，好女不嫁二夫。」遂私自縊，嫂覺救甦。既於歸，藥食扶持，皆躬親焉。三年而椿疾愈，復鬻奩，勤績以資椿讀，爲博學聞人。子

焯，以貢領青陽訓，乞歸養。卒年八十六。

黃僑妻余瓊娘 年十九，夫死，無子，矢誓不嫁。末年盡以財產建祠堂。
右賢女。

宋

龔氏二女

龔氏二女 父慎儀，開寶初守歙。賊盧絳脅慎儀，慎儀拒罵，遂舉家被害，二女被擄以行。至邵武王堂香嚴寺，絳置酒恣飲，二女遂縊於寺後之小墩。後人名其死所曰烈女臺。去臺百餘步，有雙塚焉。

元

黎氏

黎氏 孀居，事姑甚謹。其姑年至百歲，黎旦夕察饑寒，夜則抱衾侍寢，若是者四十餘年。

皇朝

陳文清妻丘氏 黃黑未婚妻饒紅姑 朱氏 吳誠妻陳正娘 盛文昱妻鄭淑娘 鍾彌臯妻徐觀娘
楊進提妻蔡康娘 何弗保妻丘榮娘 庠生上官阜妻丁氏 程清娘、陳玉娘 楊容妻周鳳娘 郡
學生鄭瑞妻龔杏娘 傅長遠妻李榮娘 李氏、羅氏 丘禮奇妻黃長娘 謝源貴妻危瓊娘 郡廩生張
楫妻龔住娘 庠生王時雨妻鄭氏 高科妻侯氏 王鈞妻虞氏 陳鏞妻丘氏 鄭東海妻金氏 羊懋妻
吳氏 舉人王錫繼室謝氏 羊國用妻王氏 杜鍾英妻周氏 監生羊國器妻吳氏 王价妻陳氏 李宜
雨妻葉氏 監生王文冲妻何氏 張大綬妻朱氏 丘命妾范、熊、林三氏

陳文清妻丘氏 永樂初侍文清從戍福州。文清以公事適延平，遇疾卒，丘時年十七，子永宗生甫四月，訃至，遂抱永宗奔延平，函殯歸葬，誓不再適。後永宗官至陽武令。

黃黑未婚妻饒紅姑 黑沒，紅姑聞訃，持服，既闋，父欲改之，堅不從。父強受聘，潛人卧內縊死。御史聶豹爲立石於墓。

朱氏 年二十一，苦節孀居，義方教子，以壽終。子禮，孝行著聞。

吳誠妻陳正娘 都御史泰女。誠卒，目不瞑，所親曰：「爲未立後乎？」請立後，猶不瞑。陳曰：「君念父母矣。」仰天矢曰：「所不終事有如日。」乃瞑。抑哀，畢喪葬，無傷舅姑，遂爲立後。已，爲柩置寢側，曰：「未亡人就此致命地下矣。」成化十四年，（二）旌表。

盛文昱妻鄭淑娘 年二十三而寡，撫二子。二子繼歿，同長婦黃足娘以節終。

鍾彌阜妻徐觀娘。

楊進提妻蔡康娘。

何佛保妻丘榮娘。

庠生上官阜妻丁氏。

程清娘、陳玉娘 清娘，郡庠生吳衡妻。玉娘，郡庠生吳衍妻。娣姒也，以雙節。

楊容妻周鳳娘。

郡學生鄭瑞妻龔杏娘。

傅長遠妻李榮娘。

堯一言妻李氏 年二十，一言卒，甘貧砥節，教子世美，中鄉舉，早卒。妻羅拮据生計，與姑同操。郡守吳國倫扁之曰節孝雙勵，先後旌門。

丘禮奇妻黃長娘 生子澄甫歲，而禮奇死。黃年十八，矢志撫孤，孝事繼姑，伯叔昆季不相面。禮奇爲叔嗣，其產甚殷，其姑取禮奇嗣產均他子，黃無難色，且誡子勿爭，曰：「天若祚女，女業將大。」孀居六十年。嘉靖中，旌門。

謝源貴妻危氏 蚤寡，自忍饑寒，以奉老姑。爲夫立嗣，辟纓伴讀。〔三〕萬曆中，旌表。

郡廩生張楫妻龔住娘。

庠生王時雨妻鄭氏。

高科妻侯氏。

王鈞妻虞氏 幼涉經傳，動遵女則。年二十餘而寡，嘗自書以見志云：「婦人四教，無一可虧。婦德缺則行誼乖，婦言輕則辭令慢，婦功惰則織紉荒。」時有豪家謀娶虞，以死自誓，不爲所奪。鄰居失火將及虞室，虞仰天號哭，倏爾反風，人以爲貞節之應。

陳鎬妻丘氏 鎬死於兵，丘年二十有二，訃聞，親奔死所，取屍函殖歸葬。遺腹生子，撫教成立。孀居五十餘年。

鄭東海妻金氏 年十九而寡，遺腹七月。東海死，與金訣曰：「生女可勿育。生男待三年後付祖母撫之，汝可改適。」金勵志守節，奉養舅姑，教子成立。親戚有喪不能舉者，脫簪珥以贖之。年七十九卒。

羊懋妻吳氏 年十九懋故，前室遺一子震甫四歲，吳撫之如己出。有利震家者，逼吳改嫁，吳抱震號

哭，取刀截髮，以死自誓。

舉人王錫繼室謝氏。

羊國用妻王氏。

杜鍾英妻周氏。

監生羊國器妻吳氏 年二十一而寡，奉姑極孝，撫庶子不啻己出。

王价妻陳氏 年十六而价卒，孤方在襁。孤復殤，歸母家，晦處深閨，竟全其節。

李宜雨妻葉氏。

監生王文冲妻何氏 年二十五而寡，姑病痰喘，侍湯藥不解帶。嘗患瘡痢，瀕危，不就醫診脉。（二三）

教子以義方。

張大綬妻朱氏。

丘命妾范、熊、林三氏 命雄於貲，有行誼，卒時遺二孤，宗戚無可依。熊守其孤，范會計賦役，林綜

家政。郡人謂之三貞。

右貞女。

光澤縣（二四）

皇朝

梅繼芳妻郭氏

梅繼芳妻郭氏 正統間，出粟千石備賑。朝廷賜勅諭，勞羊酒。有司樹坊旌之。

右賢女

元

朱溫妻危氏 上官成一妻李氏 危萱妻陳氏

朱溫妻危氏 至正末，唐子寇陷杉關，危氏被執，罵不絕口，夫婦俱遇害。

上官成一妻李氏 至正末，江西寇陷光澤，邑民依烏君山玉隆宮以居，鄰寇乘機入山剽掠，李氏被賊執，驅繫前行。經龍床石崖，壑深數百丈，李氏曳繫與賊俱投崖死。

危萱妻陳氏 至正末，寇陷杉關，驅掠男女，棚於里之金靈山，既盡殲之，遂及於萱。陳氏罵曰：「強盜！強盜！汝殺吾夫，恨不殺汝！」亦被害。子璫方七歲，伏屍不起，血流滿身，盜義之，携而去。

皇朝

龔均實妻吳氏 郭子成妻鄧奴娘 陳宗妻危道娘 李彝妻危五娘 高振妻彭就娘 高明妻危栢娘 李毓妻何翠娘（一五） 李紹義妻官氏 傅政妻施五娘 王天寶妻危瑄娘 黃應斗妻王祥娘 李子春妻黃足娘 彭仲弼妻何金娘

龔均實妻吳氏 均實蚤喪，家貧，吳紡績給孤仲賢，撫而教之。及長，以孝行稱。

郭子成妻鄧奴娘 子成洪武中繇人才舉，以疾卒於旅邸。時鄧年二十二，撫二子，奉舅姑。舅姑沒，罄產營葬。葬畢，尋卒。

陳宗妻危道娘 宗有姑無子，鞠宗爲嗣，宗奉之不異所生。宗疾革，以姑托危。既卒，姑命改嫁，危

道宗臨終之言，事之益謹。姑以壽終，喪葬盡禮，鄉黨稱之。

李彝妻危五娘。

高振妻彭就娘。

高明妻危栢娘。

李毓英妻何翠娘。

李紹義妻官氏。紹義故饒貲財，邑有平濟橋圯，紹義欲修之，未果而卒。氏年方二十，慨然建造，以成夫志。遺腹誕男，遂名橋生。事姑王始終無倦。俄里中回祿，延燒二百餘家，氏獨無恙，人謂孝義所感。

傅政妻施五娘。政死於寇，舅亦被虜，施葬夫贖舅。兒未一週，舅又雙瞽，人勸之嫁，施不事膏沐，侍養終身。

王天寶妻危瑄娘。

黃應斗妻王祥娘。年二十而斗卒，苦節教子，辟繡易食以奉姑嫜，典衣供饌以延師傅。人咸稱之。

李子春妻黃足娘。

彭仲弼妻何金娘。

右貞女。

泰寧縣（六）

宋

蕭玠妻葉氏 鄒侯妻江氏 上官氏

蕭玠妻葉氏 祖洽孫女也。生二子舜咨、舜申，早孀家貧，紡績教子。後二子貴，服布素、勤女工如貧時，子勸止之，葉曰：「登枝捐本，古人記之矣。」卒年百歲。

鄒侯妻江氏 侯卒，寡居教子。先患目疾，日夜誦經，忽一日目明，知慮開朗，預知人事，樂善好施，有陰德。歲九十，沐浴更衣，作偈曰：「解即不解，悟即不悟。誰死誰生，誰來誰去，因盡緣空，當生淨土。」言訖而逝。

上官氏 和平望族。貞順勤儉，涉獵經傳。適邑人鄒衡，早卒，刻意教子，買布爲束修，每課讀盡丙夜。後子應麟、應博皆登第，恩封令人。卒年九十五。

右賢女

宋

葉氏二女

葉氏二女 紹定二年，寇犯邑，二女與嫂義不受辱，相與結襟投於溪流。邑人鄒應博爲立祠祀之，扁曰三潔。

元

黃氏

黃氏 邑士元實之女。至正十三年，鄉惡少爲亂，邑令延元實諮討賊計。賊奄至，元實遇害。黃氏被髮跣足奔父死所，抱屍哭踊。賊憐其色，欲污之。女罵曰：「恨不生啖爾肉，尚敢爲不道！」罵不絕口，

亦遇害。

皇朝

李榮妻龔氏 杜幼童妻聶氏 王氏、江氏 李祥妻鄧氏^(一七) 無名氏 江顯得妻趙氏 鄧勝達

妻江氏 吳景馨妻何氏 呂斌妻雷氏 官世慎妻王秀娘 江寬妻羅氏 馮朝明妻李氏 黃宸妻謝氏

施必甫妻李翠娘 吳衛妻曾纓娘 王錫妻黃氏 曾約妻官美娘

李榮妻龔氏 二十八而孀。遭元季兵亂，奉姑携幼，不離姑側。後壽八十餘。

杜幼童妻聶氏。

王氏、江氏 徐二婦也。王夫曰存，江夫曰忠。正統戊辰，同避寇於里之掃箒寨，預相謀曰：「萬一

危急，有死而已。」一日，寇果至，王抱幼女投崖，江繼之，俱死。惟江子福昭懸崖樹間得活，以存徐氏之桃。

李祥妻杜全 正統戊辰，避寇於獅子巖，爲賊所執，欲犯之，全曰：「請就崖穴隱僻處。」及崖，抱幼子投死焉。

無名氏 沙、尤之亂，舉鄉避寇於里之登雲寨，爲寇所襲。賊悅氏色，欲虜之去。氏抱子墜崖而死。

隆慶間，有里人營菟裘於其地，取石崖下，因見其屍，手仍抱子，顏面如生，頃乃隨風而灰。

江顯得妻趙氏 成化三年，旌表。

鄧勝達妻江氏 成化四年，旌表。

吳景馨妻何氏 年二十四而寡，守遺腹子志崇，足不踰閩。舅卒，姑繼。一八家災於火，結廬以居，

奉姑於床，而自席地。病，抱如廁，穢，手理之。嘉靖二年，旌門。

呂斌妻雷氏 其母寡無子，斌來贅。雷年十八，斌沒，子嵩甫一歲。雷後病革，啓其手出袂三寸示婢曰：「浴我密室。吾寡居，腕以內無人能窺也。」嘉靖三年，旌門。

官世慎妻王秀娘 隨翁判台州。世慎卒於台，王悲傷哭不輟口。時兵部尚書譚公守台，素知其賢，及巡撫閩中，特以禮旌之。

江寬妻羅氏 年十九，寬沒，家貧無子，哀思矢志，日懸大像，三餐設奠。閱五十年餘，未嘗見齒。寬族弟江留餘貲財，哀其節，時時周之，乃得自存。監司旌羅之節，併獎留之義。

庠士馮朝明妻李氏 年十六歸明，兩月而明卒。起卧隨姑，刻步不離。避亂登崖，不以男子手引。年七十餘終。

監生黃宸妻謝氏。

施必甫妻李翠娘。

吳衛妻曾纓娘。

廩生王錫妻黃氏。

監生曾約妻官美娘。

右貞女

建寧縣（九）

宋

黃淑

黃淑 字致柔。幼通經史，能詩文，詞翰俱美。適同邑進士王防。防爲泗州戶曹，卒，黃營柩其柩以歸。未幾，黃之母又卒。黃哀毀骨立，竟憂鬱死。臨終，囑其妾曰：「幸納我詩文槧中也。」

元

官勝娘

方寧妻官勝娘 寧擢州，勝娘饁之，虎方攫寧，勝娘棄饁奮挺連擊之，虎舍去。有司以聞，旌復其家。

皇朝

丁貴鼎妻孔廷娘

丁貴鼎妻孔廷娘 夫亡，矢志孀居。上奉公姑，下撫二子，上濂、上洛，怡怡友恭，歷五世不分居，皆孔之教也。年九十七。道院旌其門口節孝。

右賢女。

皇朝

楊玉英 范安童妻李氏 廖大器妻王淑 朱氏 甯餘質妻范寧娘 黃孟安妻俞氏 丘伯春妻應

鳳姑 吳鳳姑 艾仲魁妻姜辛姑 李奇夢妻何長娘 楊彥八妻范鸞娘 李奇壠妻楊氏 李希周妻謝

氏 余秀妻黃氏 廖傑妻汪氏 黃淵妻高氏 李寅妻宋氏 姜白泰妻朱俞娘 李容娘 朱建妻施氏

謝國徵妻何氏 黃燭妻余京娘 官異香 王龍妻何氏 廖士倫妻余氏 王約妻廖足娘 張紳妻李末

娘

楊玉英 獵涉書史，善吟咏。年十八，父母許適儒流官時中。既聘，時中家有事，父母遂悔前盟，改受黃廬山聘幣。玉英聞之，囑其婢曰：「吾懷有荷包布鞋諸物，異日以遺官官人。」婢弗悟，諾之而已。於是，竊入寢室自經死，日不瞑。時中間訃，具禮往祭，以手掩之，遂瞑。婢出所欲遺時中物付父母，啓之，有詩云：「崑山一片玉，既售與卞和。和足苦被刑，玉堅不可磨。」若再付他人，其如平生何？」

范安童妻李氏 年十七適安童，生一女甫三歲，安童以邑庠生貢成均，授陵水令，瀕行，語李曰：「吾二親老，遠不可致養，又無兄弟，汝善代我。」李曰：「君行矣。妾聞廣東瘴地也，善自愛。朝夕奉舅姑，婦分也。」後安童以事遠謫，卒配所。李哀毀幾絕，以死自誓。舅尋得瘧疾，姑亦多病，家乏如洗，李勤紡績佐之。後舅姑俱八十餘，以天年終。

廖大器妻王淑 別駕王用賢女。方震，而器歿。已復舉女，舅姑叱之嫁，王以死自矢。旦暮拂拭巾履席硯，若乍出而候其歸者。久之，季姒余舉子，而余病篤，屬其子於王。解出嫁時裝買山窆器，虛右以待己，徙余姒復附己右。如母黨永訣，死。

朱氏二節 一名祥，朱伯宗之女；一名莊，朱伯義之女。祥年十八，歸同邑甯宗佩。正統中，沙寇倡亂，宗佩偕民兵往遏之，被執而死。祥親詣死所，輿屍以歸，撫其遺腹女，獨居。莊年十七，歸永城保黃瑞。瑞中丁卯鄉薦，會試卒於京。時莊年十九，聞訃哀毀，柩抵家，首號觸欲絕，族人力解乃已。亦生一女，無男。二人皆用完節終。

甯餘質妻范寧娘 年二十寡，撫育遺腹子，妻不易志。年七十餘終。

黃孟安妻俞氏 年十八寡，撫遺腹子，奉舅姑，以節終。

丘伯春妻應鳳姑 年二十，伯春卒，鳳姑自投於汪，鄰婦救起之，取刀斷右手中指置伯春懷中，以己衣爲斂。既葬，旦夕號哭墓前，曰：「君有靈，速邀我。」是夕，果夢其夫來邀，忽得疾卒。

吳鳳姑 父祚，鉛山司訓，時時教以《烈女傳》。及長，頗通書史。年十八適宋存禮，二十而存禮卒，無嗣，以節終。

艾仲魁妻姜辛姑 正德庚午寇亂，姜年十九，趨北關外，被執。悅其色，欲污之。給之曰：「前水碓隱處也。」至水次，遂投死。屍三日不流，寇退，仲魁收斂之，面色如生。

李奇夢妻何長娘。

楊彥八妻范鸞娘。

李奇壅妻楊氏 期年，夫故，無嗣，舅姑謂其尚少，宜自圖。泣曰：「此足更可履他人門乎？」舅姑窺其誠，乃擇夫兄子宏爲後，教之讀書。久之，宏卒，二孫尚幼，楊與媳黃氏約飭勵行，不墜先業。邑人稱雙節。

李希周妻謝氏。

監生余秀妻黃氏。

廩生廖傑妻汪氏 傑故，汪二十三，無嗣，立夫兄子濶爲後。孀居六十餘年，貧苦益甘。厥後濶成立，事之至孝，汪因名之曰孟孝。至今子孫蕃衍。

黃淵妻高氏 淵故，高年二十有五，撫男梗三歲，誓死不他。先年，賊縱火延焚黃居，值淵出外，父樞

停家，同室咸走，高惟撫棺慟哭，既而烈焰自滅，鄉人咸稱孝。

李寅妻宋氏 寅蚤夭，寅之兄暨嫂亦相繼夭，宋僅依叔妯爲生。踰三年，叔死，宋與妯黃約節勵行。居無何，黃遽疾卒，黃子傑甫二歲，氏鞠之如所生。父母憫其蚤寡，諭再醮，泣謝曰：「不念李家一錢之緒耶？」抱傑大慟，卒不可奪。

姜自泰妻朱俞娘。

庠士□□妻李容娘 年十九，夫亡，欲以死殉，其母曰：「舅姑垂白，待汝養，孤方配，待汝養。」乃已。孀居四十餘年，臨終囑曰：「我平生守節，不敢一露面，幸全歸。諸子婦親殮我，毋假手他婦人。」

朱建妻施烈婦 年二十四，有殊色。嘉靖辛酉歲，賊擄烈婦，欲辱之。烈婦觸石破頭，罵聲不絕，更擲石中賊。賊怒，擊烈婦，強劫再三，竟不屈。遂擊死之，橫梁貫腹，磔尸而去。

庠士謝國徵妻何氏 年十九，徵故，悲泣損一目。事瞽姑盡孝，撫繼子底於成。年八十餘。

黃燭妻余京娘。

官異香 失其夫名。姑遺惡少闖入婦室，欲併亂之。異香度難以自完，雉經死。

王寵妻何氏 年十五許配寵。寵忽病瘋，父母有他志，氏固請於歸，侍湯藥。未幾寵死，氏號泣欲殉，賴家人隄防得免。毀容匿跡，雖兄弟亦罕見面。

庠士廖士倫妻余氏 年二十四而士倫卒，割髮納柩，矢無他志。久之，改葬，復刺臂血以殉。姑病，祝天請代。家貧，辟繡課孤，不事歸寧。居常以《烈女傳》訓女。女歸李紹學，學尋夭，痛哭數月，亦嘔

血而斃。邑人哀之。

王約妻廖足娘。

張紳妻李末娘。

右貞女。

邵武衛〔三〕

皇朝

鄭玉妻黃圓娘 李榮妻黃妙端

邵武衛軍餘鄭玉妻黃圓娘。

邵武衛指揮僉事李榮妻黃妙端 榮遘疾，百藥不効，黃剖股肉爲湯食榮，榮疾隨瘳。

〔校記〕

〔一〕「仙游縣 興化故縣」七字，各本原脫，據本書體例補。

〔二〕「莆田縣二」四字，各本原脫，據本書體例補。

〔三〕「四十七人」，各本原作「四十三人」，據本書卷一百四十三傳記目錄及下文改。

〔四〕「子振」下，各本皆漫漶。

〔五〕「仙游縣」上，各本原衍「興化府」三字，據本書體例刪。

- 〔六〕「興化故縣」上，各本原衍「興化府」三字，據本書體例刪。
- 〔七〕「章撫棺大慟」，各本原作「張撫棺大慟」，據上文改。
- 〔八〕「光澤縣 泰寧縣 建寧縣 邵武衛」十二字，各本原脫，據本書體例補。
- 〔九〕「邵武縣」三字，各本原脫，據本書體例補。
- 〔一〇〕「何弗保」，本傳作「何佛保」。
- 〔一一〕「十四年」上，各本原衍「中」字，據文義刪。
- 〔一二〕「辟繡」，各本原作「繡繡」，據文義改。
- 〔一三〕「診脉」，各本原作「脉脉」，據文義改。
- 〔一四〕「光澤縣」上，各本原衍「邵武府」三字，據本書體例刪。
- 〔一五〕「李毓」，本傳作「李毓英」。
- 〔一六〕「泰寧縣」上，各本原衍「邵武府」三字，據本書體例刪。
- 〔一七〕「鄧氏」，本傳作「杜全」。
- 〔一八〕「姑纒」下，疑有脫字。
- 〔一九〕「建寧縣」上，各本原衍「邵武府」三字，據本書體例刪。
- 〔二〇〕「玉堅不可磨」上，各本原衍「足」字，據文義刪。
- 〔二一〕「庠士」下，各本原闕三字。
- 〔二二〕「邵武縣」上，各本原衍「邵武府」三字，據本書體例刪。

閩書卷之一百四十五

閩閭志

漳州府 龍溪縣 漳浦縣 龍巖縣 南靖縣 長泰縣 漳平縣 平和縣 詔安縣 海澄縣 寧

洋縣 漳州衛 鎮海衛(二)

龍溪縣(二)

宋

魯國太夫人崔氏 田家婦蔡氏 田家女陳氏 顏少保婦史氏

魯國太夫人崔氏 蜀郡人。知學能文，少師黃公彥臣之妻。初，少師娶於陳，贈陳國夫人，生殿撰願。再娶括蒼吳，贈吳國夫人，生大夫碩、御史預、穎，同朝侍奉，彩衣斑斕，子婿刪定陳錫，亦聯朝綴，時人榮之。穎偶以公過褫一官，國太責之曰：「汝在官不懋！」穎皇恐拜謝。預與婦翁諫議陳師錫同僚，國太喜曰：「汝當知無不言，以汝子婦翁爲法。」預卒忤蔡京者，國太誨之也。

田家婦蔡氏 熙寧間人。夫日與惡少游，蔡涕泣諫。一日，夫携財物夜歸，蔡曰：「盜矣。」諫止彌切，夫竟不悛。蔡私歎曰：「吾以吾夫行事先告於鄉里，庶其免乎。」他日惡少敗，夫獨免，郡中士大夫爲

文美之。

田家女陳氏 父病，藥不能愈。女年十五，禱神，剔肝父食，遂療。

史氏 忠職王孫女，顏少保之婦。姑病，憂形於色，不離左右。姑卒，極其哀慟，喪葬如禮。景定初，特封孺人，號曰孝。

右賢女。

宋

謝家婦林氏 蘇宋傑妻王氏

林氏 年十九適謝，踰年寡，以全節終。嘉熙間，宰趙絳夫、守李韶碑於墓，曰宋節婦。

蘇宋傑妻王氏 年二十一，夫夭，而王有身矣。父母以家貧，欲奪之。王指腹誓曰：「男耶守男，女耶守女！」父母怒，絕其往來。既生男，不歸寧者七載。壽八十五終。

元

魏亦顏妻廖氏 陳端才妻蔡三玉 郭德明妻林佛奴

魏亦顏妻廖氏 亦顏，本莆人，家龍溪，未幾卒。廖年二十四，子方七歲。時宇內騷騷，扶姑携子，轉徙村落間，饑寒不給，截髮自誓。大德間，旌表。

陳端才妻蔡三玉 時鄰邑盜起，擄掠鄉村，端才與三玉父廣瑞各竄去。三玉偕夫妹匿神祠中，盜人殺妹，見三玉美，驅而納諸舟，欲污之。三玉給口：「衣濡，請予善衣。」賊往取，得間，遂投江死。越三日，屍浮，依廣瑞舟側。廣瑞移舟上流，屍亦逆流而上，如是者三，怪而視之，則其女也。事聞，旌表，復役，給

錢以葬。

郭德明妻林佛奴，夫死，家貧，父母欲有他圖，佛奴不從。至元中，南勝寇作，城中洶洶出走，或勸佛奴行，曰：「姑病，何行？」已，賊潰，婦姑無恙。至正間，陳友定入漳，亂兵執其孫惠，佛奴抱持之，刀斫其手，乃捨之去。

皇朝

長泰李德淵妻陳氏 康居祿妻黃五姐 宋史妻陳貞姐 蔡安繼室黃妙觀 丘孔文妻戴祐姐 吳可贊妻鄭順常^(三) 方本誠妻林淑清 王尚友妻劉柔 顏克一妻蘇機宜 莊士因妻李淑明 林瑞儀妻陳淑德 錡萬邦妻杜從正 顏士朝妻魏婉 涂華妻陳俞 徐于海妻韓氏 鄭溶哲妻林懿敏 蔡邦禮妻張氏 蔡頤舉妻鄭淑潔 王廷思妻涂氏 貢十莊同妻林淑瑤 舉人汪範妻顏氏 陳子容妻周氏 鄭景政妻林氏 楊常典妻趙氏 蔡朝靜妻鄭氏 黃衷誠妻朱氏 蔡子善妻林氏 陳景育妻黃氏 顏波妻鄭氏 陳文滔妻曾氏 陳汝賢妻蘇氏 王虞德妻黃氏 昌森妻蔡氏 蔡應魁妻洪氏 郭士侗妻陳氏 康光顯未婚妻徐烈女 黃二姐 霍通妻林氏 王從彝妻陳二娘 王嘉圖妻李氏^{嗣婦吳附} 蔡一清妻黃氏 庠生黃弘妻鄭氏 顏曾光妻丘氏 陳漢鳳妻李氏

長泰李德淵妻陳氏 年十九喪夫，遺腹四月，生男。時舅、姑與夫三喪未葬，陳艱苦拮据，以克襄事。子成立，陳壽終。洪武二十四年，旌門。

康居祿妻黃五姐 居祿卒時，黃年二十六，男昇方四歲，奉舅姑鞠孤子，孝慈備至。洪武丙辰夏五，雨暴下，平地水高數丈，居民漂溺。黃升屋呼天，水爲之殺。

宋史妻陳貞姐 年二十六，史卒，姑欲嫁之，入室自經，遇救得免。以全節終。

蔡安繼室黃妙觀 安仕元爲潮陽令，道過家時，陳友定人漳大掠，安被執，與妙觀訣曰：「生死未知，汝可再嫁。」答曰：「君薄妾甚矣！」剪髮示安。後安果不歸，妙觀以節終。洪武間，旌門。

丘孔文妻戴祐姐 孔文暴死，戴年二十，父母欲奪其志，涕泣不從。母密受人聘，戴聞，投水死。

吳可贊妻鄭順祥 年十九適吳，未踰年，夫卒，將營葬，謂姑曰：「乞雙壙。」姑不從，告其父母，懼而防之。壙成，飲藥死。

方本誠妻林淑清 永樂八年，本誠以事逮入京，死焉。淑清年十八，遺腹生女，繼祖姑老且病，勤勞奉養。祖姑沒，田產悉爲豪族侵奪，乃抱神主，携孤女，依父母家以居。壽七十。

王尚友妻劉柔。

顏克一妻蘇機宜 年二十寡，自幼讀書，以禮自持，教二子俱成立。壽六十。

莊士因妻李淑明 夫死不嫁，養姑無怠。姑沒，貧不克葬。正統間，寇掠鄉里，李哀麻慟踊，盜憫之，不入其家。寇平，鄉人憐其節義，助營葬焉。

林瑞儀妻陳淑德 嫁七月，夫卒，哀毀幾喪明。事舅姑盡禮。以壽終。

錡萬邦妻杜從正 年二十二而寡。家貧，節縮事姑撫子，而自素食終身。年八十。

顏士朝妻魏婉。

涂華妻陳俞 夫卒，男方晬。家貧，事舅姑盡禮，人稱節孝。

徐于海妻韓氏 年二十四，夫亡，生子昱，甫七歲。後昱亦夭，所生孫復死，韓年七十餘，孤苦無歸，

鄉人哀之。

鄭濬哲妻林懿敏 早寡，撫孤。姑性卞，能委曲事之。

蔡邦禮妻張氏 嫁三年，夫故。家貧，孝養奉姑。姑沒，夫族有謀害其子者，乃携依母家，辛苦三十餘年，以存蔡之門。

蔡顯舉妻鄭淑潔 夫卒，年少，父欲嫁之，淑潔盡出奩粧衣服返之，終身不復歸寧。

王廷思妻涂氏 廷思父彝，見閭巷孝子也。涂事舅謹至，彝教諸孫女，他日事舅姑當以涂爲法。年二十二，廷思卒，停柩在堂，溪水暴漲，舅携孤避之，涂不離柩傍，立水中一晝夜。孀居積淚，兩眼昏潰。正統間，旌門。

貢士莊同妻林淑瑤。

舉人汪範妻顏氏 天順甲申會試，範挈顏行，是年場屋火，範與其厄，顏求夫灰燼中，屍殮載南還。陳子容妻周氏 讀書知大義。年二十五，夫亡，守節課子俊讀，後俊以貢授博羅訓導。弘治間，旌門。

鄭景政妻林氏 年少守節，教子奉姑，六十六年如一日。孫慶，領鄉薦。

楊常典妻趙氏 早歲孀居，時流賊鄧茂七等沿掠鄉村，相戒不入其室。

蔡朝靜妻鄭氏 年十七，夫亡，傭績撫孤。母陰受人聘，斷指自縊，得夫女弟救存之。

黃衷誠妻朱氏 衷誠死於外，朱年二十三，聞訃絕粒，數日死。

蔡子善妻林氏 夫卒，姑欲奪其志，自刎死。旌門。

陳景育妻黃氏 年二十寡，父母欲奪其志，斷髮自誓。子國華娶韓氏，方生子道元，而國華亦亡，韓同姑撫育。及長，娶婦魏，生二子，而道元又亡。魏與二姑三世一節，俱以壽終。

顏波妻鄭氏 年少，夫亡，舅姑繼沒，一門五喪，罄產殯葬。以壽終。嘉靖十四年，旌門。

陳文滔妻曾氏。

陳汝賢妻蘇氏。

王虞德妻黃氏 夫死，喪居闔閭嚴肅，鄉族以爲楷範。年九十一。

昌森妻蔡氏 夫亡無子，哀毀盡禮，坐卧不離柩傍。隆慶間，夫將就葬，治酒食請姑及母，若訣別者。及至葬所，周視墳中完備，密出袖中剃刀，自剄於墓側，挺立不仆。時面蒙孝巾，（邑）人弗見狀，及血迸衰外，視則死矣。

蔡應魁妻洪氏 適三載，夫沒，遺腹生男，與姑相依。姑沒，喪葬盡禮。自孀居後，不足外家之門。

郭士侗妻陳氏 歸二年，侗卒，遺腹生男，復殤。妹適於謝，其夫亦沒，以柩舟相勉。及病却藥，死，年三十二。

徐烈女 父侯，許聘康光顯，久之殤。時徐年十五，執聘釵奔喪。父農夫也，莫解所謂，女曰：「釵，婦盟也。」入門抱夫魂帛，哭奠如禮，坐卧柩側三年。將殯，密治殉衣，一日自縊死。萬曆間，旌表。

黃二姐 庠士元陽女，許配林舉人子，林嫌黃貧，別娶張。二姐沐浴更衣，死父柩之旁。萬曆間，旌表。

霍通妻林氏 通外死，訃至，號哭欲絕，人勸曰：「娠臨月，當少俟。」領之。已，得雄。數月，柩至於

北郊，往哭之。還，乳兒，謂其夫弟曰：「嫂適暈，暫寄兒小郎。」隨闔戶投繯死。

王從彝妻陳二娘 以烈殉。萬曆二十六年，旌門。

王嘉園妻李氏 嘉園故，李年二十一，立夫兄子瑱爲後。瑱聘吳伯達女三姐，未婚而病，三姐減齡密禱。瑱故，衰服奔喪。值李有疾，侍湯藥旬餘，密製殉衣。李稍愈，卽自縊。解纒端立，其色如生，時年十八。萬曆中，旌門。

蔡一清妻黃氏 萬曆中，旌表。

庠生黃弘妻鄭氏。

顏光曾妻丘氏。

陳漢鳳妻李氏 鳳盲一目，其一亦微眇，李事之甚恭。已，染風癩不可近，李朝夕湯洗。漢鳳死，小祥後，托言歸寧，別諸老幼，退自縊房中。萬曆三十八年也，年方十九。

右貞女。

漳浦縣〔五〕

唐

勤自勵妻林氏

勤自勵妻林氏 天寶末，自勵充健兒，隨軍安南，及擊吐蕃，十年不反。林父母奪其志，嫁與人。其婚之夕，而自勵還，聞不勝忿，出其破吐蕃時利劍，伏詣婦家。行且至，屬暴雨天晦，電光燭爍，見道左有

空心樹，人避之。少頃，前聞有呻吟來者，捫之婦人也，問姓氏，云：「妾林氏女，夫勤自勵，從軍未還，而父母迫嫁我。我不從，即後園桑樹自縊，爲虎所取，幸而遇君，當能相救。」自勵曰：「自勵我是，今夕還矣。不聞此言，幾失賢妻。」泣而告之故。有頃，虎追妻至，自勵出其吐蕃劍，刺殺虎。又一至，又殺之。

宋

李氏 王太孺人

李氏 雲霄人，以詩名。其姊大李，亦能詩，與相唱和也。有《汲水》、《書懷》二詩，《汲水》詩云：「汲水佳人立曉風，青絲轆轤盡轆轤空。銀瓶觸破殘粧影，零亂桃花滿井紅。」《書懷》詩云：「門對雲霄碧玉流，數聲漁笛一江秋。衡陽鴈斷楚天濶，幾度潮來問過舟。」

王太孺人 吳與之母也。與爲懷安令，太孺人迎侍居官舍，日緝綴絲紵爲女工。與卽廨中治亭宇，植花果，幾樂太孺人。太孺人乃不改素工，與固請，太孺人曰：「吾少而治之，如吾兒治公事之外，更復讀書，何間然也？」太孺人自與初官時，卽戒以事君臨民大節，令其勤公潔己，移孝於君，慎無貪躁，貽母耻辱。與學有所造，所至必保清譽，爲福於民，太孺人有力焉。

右賢女。

元

高耿妻阮二姐

高耿妻阮二姐 耿家貧，讀書，年二十卒，以貧故，頓柩北關外。久之，外姻竊用火化，阮駭聞，奔往痛哭拊心，遂投烈焰死。

皇朝

許惟長妻郭貞姐 王緒妻蔡氏 林聰妻陳氏 徐循介妻陳氏 林琥妻陳氏 涂毅妻林文姐
楊氏 舉人徐輔妻林氏 婦周氏附 張品妻陳妙姐 鄭承惠妻黃楣 程嗣哀妻王京女 鎮海康起鳴妻
陳氏 沈同訓妻許氏 施君蓋妻陳清藻 陳類妻徐氏 詹瀚妻陳氏 張冠期妻朱氏 蕭哲妻黃氏
吳貞姐 王大景妻蘇大姐 林作惠妻郭氏 陳纘妻程氏 劉養大妻陳氏 蘇可教妻胡氏 鄒大澤妻
許佳娘 庠士沈汝棟妻劉氏

許惟長妻郭貞姐 手患癰疾，許氏父母欲悔之，惟長曰：「誰復娶者？」人門，事舅姑孝敬備至。未數月，惟長卒，父母徇俗火葬，貞姐俟火烈，遂投死。鄉人義之，共爲之墳。

王緒妻蔡氏。

林聰妻陳氏 少寡，守二子。有暴鄰凌轢之，乃悉棄田宅，歸依母兄家。母兄勸之嫁，不從，徙匿荆棘中，拾斷穗，採草根爲食。長子忽病，目盲，陳呼天叩禱，目復如初。後子成立，子孫多以文學中科顯。

徐循介妻陳氏。

林琥妻王氏 年二十七，夫亡，慟不欲生。姑曰：「高堂垂白，遺孤未長，死而置此，豈謂慈孝？」乃惟命。後壽九十，詔書旌門。子文貢，博士。孫偕春，見縉紳。

涂毅妻林文姐。

楊氏，嫁李氏子 夫亡，義不再適。正統寇亂，被獲，至南馬場欲犯之，罵不絕口，死。
舉人徐輔妻林氏 輔北上道卒，林撫孤藻。及長，娶婦周，而藻又歿，遺孤棟，甫三歲。姑婦矢志，白

首相依。嘉靖四年，邑令鄭禧上計，表奏於朝，詔旌門曰雙節。及禧計還，林已死，親旌周門。周幡然跽謝曰：「寡婦之有今日，先姑之教也。」令改容禮之。

張品妻陳妙姐 嫁踰年，夫沒，舅姑欲嫁之，以死自誓。一日，偶拾夫金圈，悲不自勝，遂飲毒死。邑人葉覺爲賦《梁山高》。

鄭承惠妻黃楣 以死殉。嘉靖二十一年，旌表。

程嗣袞妻王氏 以烈殉。

鎮海康起鳴妻陳氏 以烈殉。嘉靖二十一年，旌表。

沈同訓妻許氏 嫁三月，以烈殉死。三日，屋出汗如雨，聞者異之。嘉靖二十八年，旌門。

施君蓋妻陳清藻 以烈殉。

陳類妻徐氏 以烈殉。

詹瀚妻陳氏 以烈殉。

張冠期妻朱氏 嘉靖季，倭寇攻埔尾城，冠期登城禦賊，被傷死，朱立繼殉。

蕭哲妻黃氏 年二十六，夫卒，舅姑令其改適，已受聘矣。黃懇於姑曰：「亟還聘，死不入其門。」姑怒詈之。夜負週歲女，自投於汪。

吳貞姐 年十五未配。嘉靖初，海賊突至，與其父可法俱被擄上船，欲犯之，唾罵不從。賊曰：「我欲室汝。」携首飾置前，強之櫛縫。女曰：「父在別船，當聞父。」賊移船近父，遂跳入海。屍浮水面，數里不沉。鄉士民咸祭之江澚。

王大景妻蘇大姐 嘉靖季，避倭鎮海衛。饒賊襲陷衛城，蘇扶姑出走，被執，忿罵中刃死。賊退，家人殮之，面色如生。

林作惠妻郭氏 年二十八，夫亡，誓以死殉，家人謹防之。及葬，白姑曰：「請視墳。」許之。拜哭盡哀，投墳前潭中死。

陳續妻程氏 續客死高郵，程年二十有八，訃至，號慟幾絕。成服，拜舅姑畢，以其舅氏托姆氏曰：「死有日。」且就寢，視之，則死矣。有司上事，旌門。

劉養大妻陳氏 年二十四，夫卒，遺孤五月，卽欲身殉，諸母曰：「如舅姑與五月子何？」乃已。亡何，盜起，鄉人竄避。陳以死衛柩，盜亦尋他之。舅姑歿，拮据喪葬。至其訓孤，不獨任慈，曰：「所以哺子，人飴我茶，人乳我血。」後子庭蕙成進士，賜旌門。

蘇可教妻胡氏 年二十二，可教應試溺死。胡求得其屍，手沐以殮。時遺孤民俊甫六月，忍死撫教。後民俊成進士，賜旌表。

鄒大澤妻許佳娘 以烈殉。

庠士沈汝棟妻劉氏 以節終。

右貞女。

龍巖縣(七)

皇朝

張六一妻連新玉 查福隆妻江真奴 張仲子妻蘇勝金（八） 寧洋楊希白妻葉妙玉 蔣二姑 吳從學妻丘五姑 翁汝貢妻陳氏 諸生張鳳翼妻黃寬姐 蘇秉文妻蔡了姑

張六一妻連新玉 六一死，子方八月，家貧姑惡，負薪於道，日謹事之，姑感而慈焉。歲大饑，姑曰：「不能兩存，莫圖便否。」終無他意。以壽卒。

查福隆妻江真奴 年十九，夫死，遺孤二歲，因夫舊業，製扇自給，人微諷，江嚙指出血，指扇自誓。永樂間，知縣徐拱辰詣廬禮之。

張仲子妻蘇勝金。

寧洋楊希白妻葉妙玉 夫死，家貧，辛勤奉姑，非大故不輕至父母家。

蔣二姑 庠生宇女也。許聘丘鋒，逮請期，鋒疾革，白父母曰：「忍不往視？」父母難之，固請行。入門，鋒目之，一爲舉七粥，乃絕。二姑慟哭幾盡，上堂拜尊嫜曰：「終爲婦矣。」立兄鐃子爲嗣。以壽終。旌門。

吳從學妻丘五姑 歸再歲，夫病革，與訣，許以死。既沒，出嫁時衣飾盡散所親，曰：「寡不可飾。」越二日，自盡。

翁汝貢妻陳氏 汝貢歿，撫遺腹子。已生孫矣，而又歿，復撫孫，底於成。

諸生張鳳翼妻黃寬姐，鳳翼疾革，寬姐取一錢中剖之，半繫鳳翼之襟，而半自藏，曰：「他日地下當作完錢。」夫死，子復殤，舅姑相繼淪沒，因取侄字之。嘉靖季，爲流賊所擄，受刃不屈，賊義釋焉。以壽終。

蘇秉文妻蔡了姑 年十八，夫亡，罄鬻服飾爲喪具，葬畢，盥櫛更衣，托姑於伯氏，家人懼而防其自盡。

也，遂服藥死。

右貞女。

南靖縣〔九〕

皇朝

李吼子妻杜氏

李吼子妻杜氏 家赤貧，奉姑至腆。嘗與夫上山採筍，虎攫之，杜追及，拔其尾，斫其背，虎爲舍去。負還復生，鄉里咸驚異。

右賢女。

元

戴氏、張氏

戴氏、張氏 俱吳氏婦也，戴姆而張姒。戴夫卒，遺孤一，姑欲更之，誓不從。已，姑卒，張之夫亦卒，諸母復欲更張，張曰：「他日吳氏之門有姑與叔在，戴氏姆尚死不更。」今其兄弟相繼淪沒，諸姑並幼，可與姆同艱而不與同誼。」時元季喪亂，父子兄弟離析，二婦與諸孤相保無恙，時謂天實祐節。

皇朝

林輝祥妻黃坤貞 陳欽成妻黃瑛玉 陳宗妻柯氏 許應鴻妻蔡氏 林伏豸妻陳氏 陳江妻杜氏
王良佐妻陳氏 陳文閑妻盧氏 陳泰妻林氏 庠生王維垣妻楊氏 李碩果妻王三姐 邑訓導曾安邦

妻孫氏 吳應魁妻陳氏 鄭宗奇妻陳氏

林輝祥妻黃坤貞 早寡，堅志育子性聰，以鄉薦起家。黃壽七十。成化間，旌表。

陳欽成妻黃瑛玉。

陳宗妻柯氏 年二十四，夫亡，遺五孤兒。柯上事姑，下撫兒。後以子昂貴，封太安人，賜旌表。

許應鴻妻蔡氏。

林伏豸妻陳氏 夫歿，寡守。姑病癰，口吮之。及舅姑歿，家有九喪，拮据萬狀，並歸窆窆。

陳江妻杜氏 年二十四，夫亡，夫妹亦寡，杜迎於家，與之同義，俱以節聞。杜壽八十九。

王良佐妻陳氏 正德八年，流寇劫掠鄉村，陳潛身遁至深渡，賊猝至，度不免，赴河死。後以子命爵貴，贈太安人。

陳文閑妻盧氏 夫死，苦節自持。鄰火，姑樞在堂，盧拊棺大慟，欲與俱焚，火忽滅，所居無恙。

陳泰 口資傳。妻林氏 泰孫茂馨妻許氏。林年二十八，夫沒，長男漢甫九歲，次湍在孕，剪髮自誓，撫育成立。嘉靖四十一年，湍應貢郡城，饒賊陷縣，林年九十四，病不能起，獨茂馨與許氏及曾孫女二姐侍側不去。賊至，許度不免，泣辭茂馨曰：「吾與吾女義不受辱，祖姑老矣，汝可扶去。」遂投井死。時二姐年方十四。茂馨後以貢爲校官。隆慶初，旌表。

庠士王維垣妻楊氏 嘉靖季，饒賊陷城，與夫相失，被執，不污，罵賊死。

李碩果妻王三姐 年十七歸李，未及二年，倭寇至，被擄，卽投河死。知縣殷伯固爲文吊之。

邑訓導曾安邦妻孫氏 曾鄆都人也，孫年十六歸訓導爲繼室。嘉靖季，賊圍城急，孫言於夫曰：「君

儒官也，非有民社寄，脫不測，愿自愛，妾則有死。」城陷，賊執訓導，刺之。孫卽赴火死。其子三俊哀號伏地，賊爲感動，訓導得免。事聞，撫按給厚資與歸葬。

吳應魁妻陳氏。

鄭宗奇妻陳氏 年十八而寡，節操凜然。所坐室前株梅，白雲時繞，冬有青萼。壽八十。右貞女。

長泰縣(二〇)

皇朝

蔡德和妻林氏

蔡德和妻林氏 幼時，家稱爲孝女。迨歸德和，家素貧，忍饑餓以養舅姑。舅染疾，隆冬思笋，多方供具。姑病瘡，當澣衣，久雨乏薪，身燠之。繼病癰，親爲吮舐，及不起，泣血幾絕。後德和坐非罪摧獄，不食十餘日，死。夏月飛霜，鄉人哀奠者數百。

右賢女。

皇朝

黃伯英妻雍氏 楊佳任妻張氏 蘇會嘉妻陳氏 鄭鴻澤妻詹氏

黃伯英妻雍氏 早寡，孝養舅姑。嘗携男向水磨磨豆，鄉約以次爲序，有廖仲絃後至而奪之，麥入磨，磨不旋。絃曰：「水弱也。」益堰水激磨，水下如雷，不旋如故。衆驚訝，趣絃出麥，而下雍豆，磨旋如

初。咸詫爲節孝所感。洪武二十六年，旌門。

楊佳任妻張氏 喪夫時，年二十三，遺腹甫四月，泣血不食，絕復蘇。生男，忍艱鞠育。後壽至百餘歲。

蘇會嘉妻陳氏 宣德中，夫隨使者封夷王，溺海死。陳紡績奉舅姑，撫遺孤，以壽終。

鄭鴻澤妻詹氏 孝事舅姑。嘉靖季，倭寇充斥，詹謂諸婦曰：「儻見擄，有死。」賊至，抱一子坐田間，賊奪子，劫使行，詹唾罵不顧。抽刀刺之，相與嘉歎其節，因舍子置近村，得全活。

右貞女。

漳平縣（二）

皇朝

陳輔繼妻杜氏 陳如玉妻張氏

陳輔繼妻杜氏。

陳如玉妻張氏。

右貞女。

平和縣（二）

皇朝

李氏姑婦 庠生張淵妻戴氏 張國材妻李氏 張志穆繼妻林靈金 張鳳妻潘氏 朱明妻曾氏
庠士陳士選妻吳氏

李廷仰妻戴氏 夫卒，遺孤思賢，撫教之，長人邑庠。中歲而殂，婦張痛夫，堅餓以死。其子正心方七歲，戴復撫之，至於成人。

庠生張淵妻戴氏 年二十五，夫亡，無子。舅姑憐欲嫁之，憤泣赴水，以救免。足不踰閭，雖子侄稀見其面。

張國材妻李氏 年少，夫沒，姑老喪明，懼無所依，李善事姑，矢同存亡。

張志穆繼妻林靈金 生子六歲，而志穆卒。姑逼嫁之，至篳楚，竟不易志。撫其前妻一女二子如己出。後姑卒，哀毀盡禮，躬爲營墳，并葬前妻。及三子成立，友愛如一出。

張鳳妻潘氏。

朱明妻曾氏。

庠士陳士選妻吳氏 年少守寡，善事繼姑。姑性鋹急，獨能得其歡心。撫一子，繼儒業。有貞女。

詔安縣(一)

皇朝

陳養望妻吳英姐 許榜妻林月娘 庠士胡士麒妻鍾尾娘 孫氏娣姒

陳養望妻吳英姐 夫死，未卒哭，自經柩側。令吳桂表之。

許榜妻林月娘。

庠士胡士麒妻鍾尾娘 舅姑先喪，事祖姑以孝聞。士麒教讀於外，病革，鍾往視之，竟死，賃舟載歸。蓋棺，潛入卧內自縊。

孫信妻張氏、孫价妻湯氏 信、价兄弟也，俱業儒。信死，張欲從之，爲父母所持，未得聞。亡何，价以哭兄亦死。湯語張曰：「吾二人從夫九原矣。」張然之。湯屢縊，家人覺而解亦且屢。歲十一月，二婦從俗拜讖畢，人曰：「嫁乎？」曰：「然，必同室。」人莫測也。張有女，先以囑鄰人，遂同浴洗，結衣自斷其帶，各懷夫遺書一、所照鏡一，共懸一楹而自盡。萬曆中，旌表。

右貞女。

海澄縣（二四）

皇朝

柯三娘

柯三娘 父乾恭，僅生三女，長、次俱適人。三娘及笄，父爲擇婿，辭曰：「請侍養父母。」曰：「贊我家，侍養，適人兩得之。」三娘曰：「能分女孝，非願始也。」至咬指出血，截髮垢面。父母乃弗強。父母沒，哀毀盡禮，衰經未嘗去身。服除，年未四十也，諸母謂曰：「今可適人矣。」三娘泣曰：「若欲適人者，適已久。」年七十七卒，其夕有黑雲繞宅，久之漸散。

右賢女。

皇朝

林瀾妻陳氏 黃顯妻魏氏 蘇鴻節妻曾氏 阮紹煌妻李義姑(五) 郭四娘 郭瑄妻陳氏 吳廷

興妻鍾氏 柯喬清妻李氏 周應泉妻林氏 周氏二婦 南詔郭千戶三節

林瀾妻陳氏 適三歲，瀾卒，生男纔一歲，陳誓死不嫁。姑染疫病篤，陳日夜侍湯藥。亡何，姑沒，俗忌疫不敢哭，陳哀莫如儀，竟與孤子俱無恙。以壽終。有司表門。

黃顯妻魏氏 顯臨沒，魏斷指與訣。後翁姑俱死於疫，躬殮如儀，不避凶厲。享年八十九。

蘇鴻節妻曾氏 年二十，夫亡，父母強之再適，擲石爲誓，不復歸寧。請於舅姑立嗣。以全節終。

阮紹煌妻李義姑 夫歿，斷髮誓志。以壽終。

郭四娘 父明先，許劉運復。甫笄，運復得疾，四娘減食毀粧。亡何，訃至，告父母往殉之。父母防護甚密。歷五日，乘間死，嘉靖三十八年也。

郭瑄妻陳氏 夫死，家貧，罄資殯殮。尋值凶荒，減餐養兒。時時哀慟泣血，至於喪明，人義而哀之。

吳廷興妻鍾氏。

柯喬清妻李氏 喬清客死饒，李聞訃，哀慟絕食者七日。時孤挺尚幼，課之力學，竟用挺貴，封孺人，以壽終。

周應泉妻林氏 泉以儒士赴省試，溺死。林痛哭，求屍不得，坐卧一席地，淚漬數磚，久之隱隱有血

跡。子尚德，萬曆辛卯鄉薦。

陳氏、洪氏 學正周、陽子婦也。陳氏者，長子學樂婦。洪氏者，次子學射婦。二氏並孀，奉事舅姑，勤儉持室。一陽清修學古，二婦冰玉相映，時論美之。洪氏起元，二子舉萬曆進士。

南詔千戶郭泰妻陳氏 夫亡，遺腹生子繼，織紵撫育。繼長，生子良弼，未襲職而歿。良弼子藩，襲職，未幾又歿。良弼妻馬氏，藩妻許氏，與祖姑陳氏守志，同其冰潔，人稱異之。

右貞女。

寧洋縣（一七）

皇朝

吳從學妻丘五姑

吳從學妻丘五姑 嘉靖間，夫卒，爲立後。處分已定，遂自引決，時年十九。縣上其事，致奠立碑。右貞女。

漳州衛（一八）

皇朝

百戶徐繼妻王氏

百戶徐繼妻王氏 夫亡無子，妾鍾有娠，已，生男，王撫如己出。事姑李三十餘年，小心敬愛。家有

四喪，皆舉而葬之。嫡庶相守至沒齒。

右貞女。

鎮海衛（一九）

皇朝

陸瓊妻陳氏 陸鰲千戶林華妻莊氏 郭道妻蔡氏 應襲指揮桂蕃妻張氏 張氏 鄭洪顯妻魏氏
林裕妻陳氏 鄭加猷妻陳氏 陳應科妻黃氏 林可貞妻游氏 衛學生陳基妻黃氏 黃氏姑嫂 翁瑞
夫妻林氏 朱氏四烈 吳志豪妻陳氏 生員朱鐸妻戴氏 蘇氏 陳維妻林氏 諸生黃龍妻吳尾姐
朱良賢妻黃阿姐 鄭彥明繼妻何氏 張舜化妻涂氏

陸瓊妻陳氏 年十九嫁瓊。未幾，瓊卒，舅以室隘，移柩山陬。陳請置卧內，不聽。明日，往視柩，大慟曰：「我在也，夫暴荒野。」歸，自經死。

陸鰲千戶林華妻莊氏 以烈殉。

郭道妻蔡氏 以烈殉。

應襲指揮桂蕃妻張氏 蕃爲父奏事於京，途卒。張年二十二，子方在乳，哀毀守志，坐卧一小房，人罕見面。以壽終。

張氏 千戶明次女也。衛指揮王瑤有二子，長聘桂，次聘張。未幾，長子死，悔張盟，以次子婚於桂。明往瑤家，欲與死鬪。女私謂母曰：「慕富，人情也。我家貧乏，何往不見棄？」勸父勿以女故重自

傷，因潛閉戶自經死。

鄭洪顯妻魏氏 以烈殉。

林裕妻陳氏。

鄭加猷妻陳氏 嫁七月，夫死，絕粒八日而亡。(二〇)

陳應科妻黃氏 嘉靖季，饒賊陷城，黃適歸寧父家，父命與俱逃，嘆曰：「賊盈城，逃焉往？」賊至，攻撤其門，黃義不受辱，投井死，而其母繼之。

林可貞妻游氏 被饒賊擄繫，行至天尊堂，遇井即投死。

衛學生陳基妻黃氏 饒賊陷城，基持刀與鬪，賊格殺之，黃投井死。

生員黃師文妻朱氏、涂文妻黃氏 姑嫂也。嘉靖辛酉饒寇之難，同被執，俱投井死。

翁瑞夫妻林氏 被賊執，不屈，抱子投井死。

朱簣妻蕭氏 同妯娌許氏、蔡氏、張氏，知寇亂不免，(二二)共繩連縊。

吳志豪妻陳氏 聞寇陷城，先投井死。

生員朱鐸妻戴氏 扶姑避賊，遇賊，欲繫之，罵曰：「吾頸可斷，不可繫！」賊怒，斫之，并欲殺姑。戴負重傷，翼蔽姑曰：「寧殺我。」賊義，並釋之。出城，復遇倭寇，不屈如初，遂見殺。後五日，家人收其屍，面色如生。(二三)自陳應科妻至此，皆遇饒寇之難者。

蘇氏 遇賊罵不絕口，賊支解其體。

林氏 戶部郎林文煥孫女也。年十八適陸鰲所人陳維，事舅姑孝。二載，維亡，無子。林懷緦於腰，

佯托登樓，自縊而死。

諸生黃龍妻吳尾姐 以烈殉。

朱良賢妻黃阿姐。

鄭彥明繼妻何氏 年二十適鄭，三載，夫亡，撫前子若己出。舅憐其寡，給銀四十兩爲資用。何俟孤十六歲，付之，封識宛然。孫爾相，以歲薦仕祁陽知縣。

衛軍餘張舜化妻涂氏 以烈殉。

右貞女。

福寧州 福安縣 寧德縣 福寧衛(二三)

宋

黃楫妻翁氏 羅氏母(二四) 楊孝寧妻徐氏

黃楫妻翁氏 有刲股之孝。子沐之，見縉紳。

羅氏母 年過百歲。淳祐元年，特封孺人，勅有司歲時存問，以厚風化。

楊孝寧妻徐氏 年十九，夫亡，守節誦佛經，自號無住道人。逾五十，將逝，留偈云：「五十年來一夢中，臨岐撒手疾如風。鐵牛掣斷黃金索，踢倒虛空事一同。」

元

張義婦

張義婦者，本鄒平人李午妻。午同從子零戍福寧，午客死。張力作養舅姑，凡四割股療其疾。舅姑歿，^(三)喟然嘆曰：「夫死千里外，不能歸骨，舅姑在也。舅姑歿矣，猶不獲歸，奚以生爲？」卧水自誓曰：「夫骨能歸，終不凍死。」月餘不死，鄉人驚異，相率贈之。張書事衣背，且行且丐，四閱月乃至。見零，問夫葬處，則荒莽莫辨矣。張哀號幾絕。忽午憑童子發狂，言將死時狀，且曰：「西郊夫人橋，我葬處也。」張啓視得之，持骨祝曰：「誠妾夫也，人口當融如雪，黏如膠。」已果然。有司上其事，請給復，使零護喪歸。至正間，旌門。

皇朝

周墀妻丘美娘

周墀妻丘美娘，年三十四，墀死，家無十金，親操井臼，勤儉兼至，日課五兒讀書。孟君澤，年八十二，仲君濟，年八十六，叔君授，年八十二，季君聘，仕灤山丞，年七十八。五世同堂。丘九十六卒，衰杖之男，皆龐眉鶴髮，人稱間見。

右賢女。

宋

建陽朱填妻翁壽安 鄭貞娘 丘腴妻葉氏

建陽朱填妻翁壽安，二守達觀之女。填，文公六世孫也，爲長泰令。任甫三日，以公事入郡，寇卒起攻縣城，填不得歸，城陷。翁方盛年，二女及笄，有美姿，度不能免，因戒女曰：「女尚貞潔，義不可辱。」長女先赴井死，次女繼之。翁引刀自刎。賊相顧駭嘆，因全其子鎬焉。

鄭貞娘 父日靖，兄君老。貞娘少端莊，不妄言動，未笄許嫁里人林森。德祐元年，元兵南下，凶徒四起。一日寇至，貞娘懼見污，取剃刀自刎。已死仆，手刀甚堅。時君老在外，亦被賊傷，及甦而歸，見貞娘死，悲哀而殮之，乃舒手釋刀，人咸異焉。

丘腴妻葉氏 事姑以孝。諸婦有讒葉者，姑始疑之。迨姑病，諸婦無憂色，葉朝夕不懈，怛然以憂。姑感其孝，以子允貴，贈郡夫人。

元

孫氏 林福使 林克威妻陳氏

孫氏 福建宣慰都元帥陳端孫妻也。端孫作鎮福清，拒陳友定，中流矢墜馬，被執見殺。孫氏曰：「吾夫死國事，可獨生？」抱女投井死。

林福使 父天成，爲袁天祿參謀。天祿擁兵屠其家，福使未嫁，天祿悅之，驅以行。女唾曰：「賊耶！賊耶！殺吾父母，恨不能手刃汝，尚從汝耶？」天祿怒斬之。

林克威妻陳氏者 福使嫂也。家被袁天祿屠戮，扶姑抱子，走匿山谷。後潛往母家，收克威家遺骨葬之。時年方二十有四，母憐其少，微諷使改適，泣曰：「禽獸不爲也。」養姑撫子，八十三而終。（二六）

皇朝

林羨之妻鄭佛奇 楊收妻林氏 張文妻施妙錦 王選妻鄭細娘 黃坦妻連婉娘 舒祥妻陳氏
尤進妻李星娘 丁相妻莊玉娘 林源妻周催小 張翊妻方氏 高紀妻張妙珠 王滿妻鄭賢娘 彭煥
妻卓氏 應惟進妻陳妙緣 王淮妾張氏 楊橋妻徐女孫 鄭道保妻王氏 楊塾妻葉氏 柳森妻張婉

娘 李門三節 生員林術妻周瑛娘 鄭龍妻李息娘 顧氏雙節 庠士周文昌妻熊招娘 趙璧妻馮氏
林湮妻吳煜娘 杜妹懿 曾羅蓮 胡鍾妻楊氏 張鈇妻夏氏 翁茂椿妻林珠娘 投水四婦 庠士張
璋妻趙壽娘 王思仁妻吳氏 周文國妻陳氏 庠生尹應節妻周坤娘 盛抑妻林氏 庠生張應宿妻王
氏 王良仕妻葉織娘

林羨之妻鄭佛奇。

楊收妻林氏。

張文妻施妙錦。

王選妻鄭細娘 選亡，母憐其少，令改醮。鄭磕頭流血，誓死，抱夫兄子贊爲嗣，携父家撫養，爲其娶婦，遂有曾玄。詔書旌門。

黃坦妻連婉娘 年二十，坦卒，子鏹生而瘖，或勸之曰：「青年守志，恃有子也。子瘖，奚恃？」曰：「當使不瘖於心。」遂延師教之。鏹長，竟綿黃氏之脉。正統十三年，建寇犯境，盡輸儲粟以餉師，人曰丈夫哉。

舒祥妻陳氏 家貧無子，依夫侄以居，每不能舉火，忍饑無悔。年六十餘卒。

尤進妻李星娘。

丁相妻莊玉娘。

林源妻周催小 源早卒，舅、姑、長子淪沒，留一幼子滕。催小力營葬四喪，延師教滕。後滕通書史，善詩工古篆，生子文盛、文孟，以士行稱。

張翊妻方氏。

高紀妻張妙珠 紀卒，貧苦立門戶，教諸孫以書，曰：「人不讀書，便是虛生一世。」年七十二卒。

王滿妻鄭賢娘。

彭煥妻卓氏 煥死，一子，家貧，伯叔欲奪其志，絕其薪水，屹不爲動。拾薪易米，紡績度日，年七十卒。

應惟進妻陳妙緣 二十四寡，僅一子。舅姑亡，分田業并白金四百。已，子亡，伯叔欲嫁之，陳出田遺金，求全其節。

王淮妾張氏 臨清人。淮卒於官，僅遺一女，張年十九，侍生母薛氏南還，獨處小樓，不與人接。服滿，父自臨清來，薛惜其少，令諷更嫁，矢志不從。有郭都司浼沈指揮求聘，張訴詢之，尋自縊，得救而蘇。事薛如姑，苦節五十年，以壽終。

楊橋妻徐女孫。

鄭道保妻王氏。

楊塾妻葉氏。

柳森妻張婉娘 森疾篤，刲臂和藥，不効。一子甫兩月，力苦自持。中年子沒，撫二孫底成立。孫媳張采娘孝事之。

李門三節 李材妻鄭氏，年二十三夫亡，遺腹生子，娶於周，其孫娶於楊。子與孫相繼死，鄭撫周、楊二婦，孀居不貳。

生員林術妻周瑛娘。

鄭龍妻李息娘。夫卒，子甫兩月，誓志不二。男七歲殤，息娘拊屍大慟，自經而死。

顧氏雙節。其娣曰葉鴻妻，其姒曰張應妻。

庠士周文昌妻熊招娘。嫁三載文昌死，招娘斷指自誓。居四年，有謀委禽者，招娘大慟，圖自經，不獲，人赴井死。嘉靖初，旌表。

趙璧妻馮氏。

林澠妻吳煜娘。澠疾革，無子，囑他適。吳泣曰：「妾恨不同死，直以堂上一老姑耳。」遂取夫從子梁爲嗣，事二姑並八十餘。吳年七十六。詔書旌門。

杜妹懿。字淑貞。年十七，從母避賊，走海岸上，賊追急，恐見污，遂投於海中。鹵淖沒胸，舉手與母別，奮躍及深而死。

曾羅蓮。許聘包氏子墳。包家日替，父滋不悅，既墳死，喜曰：「吾女脫苦矣。」羅蓮泣曰：「見雖未行，父當往吊。」父如言往包，而羅蓮死矣。

胡鍾妻楊氏。

張鉞妻夏氏。

翁茂椿妻林珠娘。

投水四婦。嘉靖末，倭寇盡驅男婦人舟，有投水四節婦：其一楊文進妻尤氏，其一楊景賢妻官氏，其一卓永弁妻敖氏，又其一不知其姓。

庠士張瑋妻趙壽娘。

王思仁妻吳氏。

周文國妻陳氏。

庠生尹應節妻周坤娘。

盛抑妻林氏。

庠生張應宿妻王氏。

王良仕妻葉織娘。

右貞女。

福安縣〔七〕

元

黃汝大妻胡淑娘

黃汝大妻胡淑娘。孝養舅姑。夫卒，年二十三，育其三歲子應延，誓志孀守。邑被寇，且旱荒，出粟百餘石賑之。橋梁圯廢，輒捐貲營造。縣爲立經濟坊。

右賢女。

元

劉氏女

劉氏女 至正間，大安社掠鄉村，有袁安文者，欲污之。女大罵，安文怒，擊之幾死，乃捨去。

皇朝

吳得珍妻陳四姐 趙德謙妻陳氏 吳龜妻黃氏 李宗妻陳氏 陳門四節 鄭繼宗未婚妻詹月娘

黃富妻上官氏 鄭紹雋妻林閨秀 鄭仁九妻謝蘭娘 陳伯昌妻鄭氏 郭門三節 黃必高妻羅巧娘

黃均妻林貴娘 趙佛祐妻劉氏 郭允修妻鄭氏 陳公旺妻林氏 趙琳妻詹氏 王時習妻張聚娘 劉

元熊妻詹氏 劉廷興妻陳氏同時九婦附。 繆氏雙節

吳得珍妻陳四姐 得珍蚤卒，陳撫七歲孤，不他姓。伯氏素狠，欲奪其田，固勸改適，陳泣不從。後揣知伯氏意不善，乃手書先世產業一紙匿之故籍中，削髮爲尼。伯氏又逼之，遂投溪死。鄰里皆爲嘆惋，而郡邑未之聞也。成化十九年，伯氏孫仍奪其孤田。孤簡故籍中，得母手書，訴於同知馬迪，爲剖析之。陳之貞烈始白於世。

趙德謙妻陳氏。

吳龜妻黃氏。

李宗妻陳氏 善事舅姑，敬夫如賓。一子二歲，夫卒，舅姑憫陳少，自誓曰：「如令改適，寧賜一索。」陳門四節 張氏，陳景深繼室也。景深娶張，有前妻子二歲，恐張弗愛，寄之他所。張詢知，亟取以歸。後生二子，愛撫如一。景深死，張矢志守節。而景深侄鏡妻林氏，侄孫清妻林氏，元宗妻高氏，皆年二十餘守節。

鄭繼宗未婚妻詹月娘 年十四聘繼宗。一年，繼宗死，月娘聞訃，即欲歸守服，父母不從。是服喪三

年，卒不嫁。平居孝友慈愛，年六十七卒。

黃富妻上官氏 夫死，無子，富民艷其美，欲娶之。時方應役，乘勢訟於官，伏轎夫於儀門，俟其出，即強昇以歸。上官素袖刀自備，出儀門，見勢不可脫，即抽刀自割。衆皆駭散。家人扶歸，救治得不死。松溪知縣陳槐以事至縣，聞其事，躬臨慰勉，仍爲傳贊。士夫皆有詩表之。

鄭紹雋妻林閨秀 夫死，子甫二歲，外家逼奪，誓不改適。家遭水火，窘甚，紡績事舅姑。舅姑病篤，籲天減壽，及相繼亡，假貸殯葬。壽九十一。

鄭仁九妻謝蘭娘 夫卒，無子，舅姑早喪，竭力殯葬。父母憫其少且貧，受陳氏聘。蘭娘將赴江自溺，奔救乃免。八十四卒。

陳伯昌妻鄭氏 年十四，遂能刲股療母病。父本教鄉塾，鄭聞父教，晰大義，擇得伯昌以歸之。祖姑老病，侍湯藥不懈。夫卒，子元暎六歲，元曙方晬，誓志苦節。喪事頻仍，罄奩爲給。以《孝經》、《論語》授其二子，及長，俾學詩禮，俱入仕。初寡時，賴夫弟增同財共爨，百凡支持，克成其節。

郭門三節 郭德元妻趙，郭景充妻劉，郭景端妻余，三婦志節相砥礪，並以壽終。

黃必高妻羅巧娘。

黃均妻林貴娘。

趙佛佑妻劉氏。

郭允修妻鄭氏。

陳公旺妻林氏。

趙琳妻詹氏。

王時習妻張聚娘。

劉元熊妻詹氏。

劉廷輿妻陳氏 嘉靖末，與夫及姑爲倭所掠，語夫曰：「妾死不足惜，君母子奈何？」乃給賊以身爲質，脫廷輿與母歸，取贖金。廷輿母子出稍遠，遂自刎。同時遭倭變而著節者，又有臨亨訓導繆思恭妻林氏、阮承祖妻楊宙娘、王崔女盛娘，自刎死。生員陳時表妻趙氏，携二子赴火死。寡婦陳國祉妻郭氏，自經死。陳九思妻劉錦娘，郭守元妻李氏，郭理妻，不知其姓，皆罵賊死。又有一婦，下裳繫束，首斷於床。

繆氏雙節 黃氏，繆季弘妻，陳氏，繆頌妻，婦姑也。右貞女。

寧德縣（二八）

唐

黃岳妻林氏 林廿五妻謝氏

黃岳妻林氏 岳，見韋布，不受偽閩之辟，投淵而死。林曰：「夫能爲忠臣，妾不能忠臣妻乎？」亦投淵從之。

林廿五妻謝氏 始自澤頭徙感德場所治之陽，家於斯，葬於斯矣。會偽閩升場爲縣，有逞其私者，謀建桓門，將沒廿五居，而夷其墓。謝方新寡，撫其幼子，徒步四千里赴汴京，坐肺石三日，得訴，符下所部，

俾勿壞。廉訪使孫澤撰墓碑極稱之。

宋

陳晏妻丘氏 宋氏女

陳晏妻丘氏 慈孝好義。姑病篤，刺血寫經，爲姑祈庇，姑果感夢而愈。時出私財給施囚徒。建州葉儂未作賊時，稔知丘孝行，建炎間，作賊犯境，戒其徒曰：「勿焚蕩丘家，勿戮其親屬，驚動孝婦。」古田洋杉有避寇者奔入丘家，賴以全活。縣西一帶，免罹兵火。其後，孫言應、元應俱登第。

宋氏女 事父母以孝聞，有司立坊表異。

皇朝

貢生薛旭妻黃氏 林胄妻彭氏 林文輅妻陳氏 林元魁妻陳氏 知縣左承芳妻陳氏 陳鸞妻倪

氏 徐傳妻鄭氏 庠生左守貴妻彭氏

貢生薛旭妻黃氏 事舅姑孝謹，處娣姒恭敬。旭兄弟六人，作室未成，計所需，當人出十餘金以足之。兄弟念旭貧，欲代爲費，黃語旭曰：「他日子孫群聚，倘有言及費出兄弟者，君之子孫將何以對？」借貸充之，人稱其識。

林胄妻彭氏 年三十二，胄亡，理家教子，嶄然有法。宗族窘乏，傾囊相濟，有假貸，不取息。大雨水，里多漂溺，生者矜之，死者瘞之，垣屋傾壞者助修之。年七十五病革，取貸券盡燔焉。

林文輅妻陳氏 輅早喪，撫教四子，勤女紅。奉養舅姑，每食必致佳味。人稱賢孝。

林元魁妻陳氏 元魁，見閭巷。陳事舅姑孝謹，御媵妾有恩。庶子五人，視如己出。有媵子母死，懷

負抱之。賙貧恤乏，族黨稱賢。

知縣左承芳妻陳氏 倭賊陷城，舅姑老病，陳氏以身先，後卒全其命。承芳，見縉紳。

陳鸞妻倪氏 弘治戊辰，縣人病疫，繼姑死，諸婦慮傳染，毋敢近。倪親爲殯斂，坐尸傍二晝夜，方舁入棺。鄰里嘆賢。以子勗貴，贈安人。

徐傳妻鄭氏 方於歸，舅罹非禍，鄭罄粧奩無難色。舅姑亡，遺一小郎，(二九)撫如自出。季郎幼，病痢，調藥滌穢，久久不息。季納婦，婦亦多病，病以十年所，鄭又撫之。婦臨死，泣謝曰：「妾夫婦受恩，後生願効犬馬也。」

庠生左守貴妻彭氏 事姑孝順。萬曆三十八年，姑病篤，割胸取肝以救之。

宋

進士何晉之妻陳宗

陳宗 年二十適進士何晉之，事姑孝謹。甫再期，晉之卒，有遺腹，默禱曰：「天後何氏，死不悔矣。」後果得男，撫教之，以文學名。孫元，兩請漕舉。邑人張翰爲書其事於《觀過錄》。

皇朝

林愍繼妻王氏 薛祥妻龔氏 詹文啓妻林氏 龔達妻薛氏 薛机妻龔氏 馬浩妻陳氏 馬鑄妻
劉氏 彭鏡妻陳氏 林麟妻黃氏 陳江妻林氏 陳高妻何氏 黃桂妻宋氏 宋府妻韓氏 庠生林文
徵妻何氏 崔昊妻姚氏 左氏姑婦 湯寬妻鄭氏 黃叔恭娣姒 林元鼎繼室黃氏 韓志源繼室林氏

陳門二節 庠士龔佐妻左氏 吳澄妻鄭氏 漁人妻 彭祖振妻黃昭娘 庠士陳珪妻湯氏 陳大漢妻黃氏 陳樞妻鄭氏 周文普妻林氏 庠士林示乾妻彭氏 林示約妻黃氏 崔允純妻林氏 庠士陳庚妻林氏 庠士林文珽繼室謝氏 嘉靖中被倭死難者十七人合傳 薛文茂妻何氏 林懋繼妻黃氏 生四子而寡，撫前人子若己出，力貧養姑，內外稱賢。年九十六。子著，孫文迪，皆以科第顯，並見縉紳。

薛祥妻龔氏 年二十六，祥當從戎，囑以養老母、撫幼子，期以五載當還。既別二年，沙寇鄧茂七反，龔扶姑攜子，避亂草莽間。亂稍定，祥訃至，悲慟幾絕。事姑訓子一如祥囑。

詹文啓妻林氏 年二十七，夫亡，二子俱幼。夫弟文華甫十歲，林撫之，爲娶婦，同居。身率諸婦，勤力女紅，家日以殷。顧自絕滋味，謝華飾，止栢木爲簪，竹篋壓簪而已。年八十五卒。

龔逵妻薛氏。

薛机妻龔氏 年二十二，夫亡，二子俱幼。伯氏利其貲，奪不從，繼以撻辱。龔撫棺而號，徧告親鄰，呼天誓死，卒不能強。

馬浩妻陳氏。

馬麟妻劉氏。

彭鏡妻陳氏。

林麟妻黃氏 年二十五，夫亡，撫孤，事舅姑孝謹。後子鉞官蕭山訓導。陳江妻林氏 年二十二，江死，三子俱幼，力貧撫鞠。長子榮樂以孝聞，鄉人稱其是母是子。

陳高妻何氏。

黃桂妻宋氏 年二十五，桂亡，子四歲，矢志不貳。夫妹適福安士人，新寡無依，亦來就宋。姑嫂同處，勤女事以給衣食，並以清節終。

宋府妻韓氏。

庠生林文徵妻何氏。

崔昊妻姚氏 年十七歸昊，四年而寡，止育一女。屏居閉影，不足外氏。

左洪妻陳氏 年二十二，洪死，一子甫二歲，力貧撫養。子長復娶陳，尋夭。婦姑相依，人稱雙節。

湯寬妻鄭氏 生子二歲而寡，事姑孝謹，剪髮繫臂，誓不易心。

黃叔恭妻韓氏 年二十五而寡，有子七歲，矢志不貳。叔恭弟叔和，後其兄一年死，無子，妻左氏依守志，事舅姑，生養死葬，力貧不失。人稱二貞。

林元鼎繼室黃氏。

韓志源繼室林氏 夫亡，子幼，里有富人慕其美，求爲側室。林抱子大慟，誓且罵。或曰：「渠也，側室人乎哉？」未幾，有求爲妻者，不從如初。或曰：「渠有子也，妻人乎哉？」未幾，子暴亡，復有求聘者，力斥之，曰：「吾夫與吾子可死也，而不可死吾心！」

陳續妻林淑惠 年二十，續歿，一女在襁，誓死守志。伯氏夫婦俱歿，遺一男煥，林撫育之，長爲娶於彭，生一子。煥又歿，彭、林相依，清節凜然。彭事林孝謹，年幾五十先卒。林又撫孫，至長成。壽終。時稱一門二節。

庠士龔佐妻左氏 子邦卿甫五歲，佐與父繼亡，內外無靠。左舉三喪，重遭回祿，孤苦酸辛，日夜紡績，課邦卿讀書，仕爲訓導。其後遇倭變，赴水死。邦卿，見縉紳。

吳澄妻鄭氏 年二十一，澄與弟覆舟俱溺，澄將登崖，顧其弟在中流，復回救之，力竭而死。鄭力貧撫孤，持志不二。年七十餘。

漁人妻 從漁人徙福寧古縣。漁人死，無以斂，哭三日，殯之海濱，畢，躍入海死。

彭祖振妻黃昭娘 年十七適祖振，無內道，昭娘謹事姑，無怨悔。居八年，祖振病，侍疾周至，終始不息。祖振死，撫猶子爲嗣。人聞其猶處女也，多來求聘，誓死不從。知縣蔡稠以「奇節」表其堂。

庠士陳珪妻湯氏 年二十一，珪死，一子甫六月，卽脫簪珥造墳，穿墳其右，以示同穴之志。孝養舅姑，教成孤子，以全節終。

陳大濩妻黃氏 服事舅姑，克循內則。祖姑年老，溫清備至。大濩死，一子甫一月，百苦撫孤，雖貧窘，未嘗見顏色，亦不請求外家。女紅婦道，一家取法。

陳樞妻鄭氏 夫卒，遺二子，携往父家，勤苦撫育。年七十四終。

周文普妻林氏 文普出繼嗣叔父，林年甫十九，方懷娠，文普死。兄弟共議出林，而瓜分其業。林號泣誓死。既生男，屏居一室，雖至親罕見。

庠士林示乾妻彭氏 夫死陷城，家無爲殯，百計成禮。倭亂，獨自扶姑山中。姑病篤，減壽籲天。舅病，朝夕侍養，未嘗就寢。有司以「節孝」扁堂。

林示約妻黃氏 示約被倭殺於銅鏡，黃自奔收屍，朝夕哭奠踰禮。舅姑父母憐其芳年無子，諷之再

醮，不從。屏飾絕葦，日閉門誦經。未幾，舅姑歿，秉家肅然，諸郎敬事如父母。

崔允純妻林氏 年十九，夫歿，父母哀年少無子，泣曰：「有遺腹，天必成婦志也。」後果育男，堅守撫養。嘉靖季，值變，逃匿山鄉，舅姑俱染病，林日夜辛勤調護，雖孝子不能有加也。壽卒。

庠士陳庚妻林氏 素閑內則，所以佐庚學，有樂羊妻之風。庚夭死，長子三歲，次尚遺腹，苦志居孀。辛酉之變，提携孤幼，艱危萬狀，竟底有成。

庠士林文斑繼室謝氏 二十於歸，甫二年，斑病篤，一子胎髮未燥。文斑謂曰：「能終事乎？」謝掩泣剪髮示斑。未幾，倭賊充斥，抱孤子莽竄凍饑荒山草莽中，竟以撫孤而完節。

嘉靖中與倭難者一十七人 庠士林鴻漸妻崔氏，倭擄不從，見殺，身磚地。已而屋燬屍焚，天陰雨，其形宛然着磚。庠士林執中妻吳氏，執中被擄，吳以身衛，執中得脫，吳斷兩截。庠士林邦京妻陳氏，崔允約妻薛氏，崔文泰妻林氏，陳銓妻黃氏，徐元呂妻龔氏，俱被倭刃者。林文奎妻何氏，陳翰妻林氏，曹逞妻謝氏，林若山妻周氏，林二陽妻阮氏，林金妻何氏，俱赴水者。庠士黃煜寡妻林氏，赴火死。林示續未婚妻陳淑慈，彭瀾未婚妻陳愛婉，湯日進未婚妻陳繼靜，俱自刃以殉。

薛文茂妻何氏 夫卒，長子方在襁褓，次子遺腹。兄憐年少，諷之再適，何曰：「兄善謀我，而不善爲我謀姑與孤。」奉姑育子，冰操炳然。監司、邑令俱獎異之。

右貞女。

福寧衛〔10〕

皇朝

千戶劉泉妻楊靜德 百戶陳鑣妻謝氏 舍人焦成繼妻熊四妹(三) 軍朱祚妻顧氏 舍人張鑒妻辛氏

後所千戶劉泉妻楊靜德 泉卒，楊年甫二十九，三乳而生五子，曰琇，曰瑋，曰瑋，曰琪，曰璘，曰琥，俱在襁褓。井臼紡績，日夜親之，撫教諸孤，咸底於成。年八十，無疾卒。

百戶陳鑣妻謝氏。

舍人焦晟繼妻熊四妹。

後所軍朱祚妻顧氏 嫁於祚，家赤貧。祚且死，囑曰：「我在也，且饑，今死，將何支？少無子，宜再醮。」顧泣，矢靡他。祚死，粥裙布以殯。時爲人紡績，取傭資供饋奠。有濟之者，則疑污己，弗納。念夫未葬，未卽死。一日，罄鬻釜甑陶器之具，葬祚木梳山。欲兩其壙，默詛於襄事者，不得畢葬。母強其歸，不往，絕粒七日而卒。時嘉靖六年也。

舍人張鑒妻辛氏。

右貞女。

何子曰：郡邑志志閭閻，取其貞與烈。有貞以烈，有貞以德，予是以列賢、貞二門。贊曰：持貞作幹，以順爲正，處爲女師，嫁爲婦鏡。

〔校記〕

〔一〕「漳浦縣 龍巖縣 南靖縣 長泰縣 漳平縣 平和縣 詔安縣 海澄縣 寧洋縣 漳州衛 鎮海衛」三十三字，各本

原脫，據本書體例補。

〔二〕「龍溪縣」三字，各本原脫，據本書體例補。

〔三〕「鄭順常」，本傳作「鄭順祥」。

〔四〕「孝巾」，各本原作「孝中」，據文義改。

〔五〕「漳浦縣」上，各本原衍「漳州府」三字，據本書體例刪。

〔六〕「陳氏」，本傳作「王氏」。

〔七〕「龍巖縣」上，各本原衍「漳州府」三字，據本書體例刪。

〔八〕「張仲子」，本傳作「張仲予」。

〔九〕「南靖縣」上，各本原衍「漳州府」三字，據本書體例刪。

〔一〇〕「長泰縣」上，各本原衍「漳州府」三字，據本書體例刪。

〔一一〕「漳平縣」上，各本原衍「漳州府」三字，據本書體例刪。

〔一二〕「平和縣」上，各本原衍「漳州府」三字，據本書體例刪。

〔一三〕「詔安縣」上，各本原衍「漳州府」三字，據本書體例刪。

〔一四〕「海澄縣」上，各本原衍「漳州府」三字，據本書體例刪。

〔一五〕「李義姑」，各本原作「李義始」，據本傳改。

〔一六〕「洪氏」下，當有脫文。

【一七】「寧洋縣」上，各本原衍「漳州府」三字，據本書體例刪。

【一八】「漳州衛」上，各本原衍「漳州府」三字，據本書體例刪。

【一九】「鎮海衛」上，各本原衍「漳州府」三字，據本書體例刪。

【二〇】「八月」，各本原作「八月」，據文義改。

【二一】「知寇亂不免」，各本原作「知寇亂不勉」，據文義改。

【二二】「面色如生」，各本原作「色生如生」，據文義改。

【二三】「福安縣 寧德縣 福寧縣」九字，各本原脫，據本書體例補。

【二四】「母」字，各本原脫，據本傳補。

【二五】「舅姑歿」，各本原作「舅姑及」，據文義改。

【二六】本句次行，各本原衍「右貞女」三字，據本書體例刪。

【二七】「福安縣」上，各本原衍「福寧州」三字，據本書體例刪。

【二八】「寧德縣」上，各本原衍「福寧州」三字，據本書體例刪。

【二九】「舅姑亡，遺二小郎」，各本原作「舅姑遺亡二小郎」，據文義改。

【三〇】「福寧衛」上，各本原衍「福寧州」三字，據本書體例刪。

【三一】「焦成」，本傳作「焦晟」。

閩書卷之一百四十六

島夷志

琉球國 在閩東北大海中。曩時貢往來泉州，後移福州。冊封朝使自長樂梅花所開洋，南風順利，十八日可至。操舟多用漳人，以子午針量其水道，古指南法也。其國繇漢周以來，不通中華。隋時嘗遣兵俘其男女五千人入閩中，竟不內附。元遣使諭之，不至。我明洪武初，國三分：中山、山南、山北，鼎峙稱王，各遣使朝貢。十五年，賜中山王察度、山南王承宗鍍金銀印、金幣。使還言，三王爭雄，治兵相攻。賜詔諭之，并諭山北王怕尼芝。十六年，賜山北王印及文綺，王妃、相國而下有差。二十五年，中山王遣子姓及陪臣子弟人太學肄業，上禮遇之，賜閩人三十六姓習水善者，與往來朝貢。永樂二年，察度卒，詔封其世子武寧嗣王。是年，山南王承宗卒，無子，令其從弟汪應祖攝國事。應祖來請，命如山北王故事，詔應祖嗣山南王，賜冠服。九年，中山王思紹令坤宜堪彌貢馬及方物，以其長史程復來見，表言：「長史王茂輔導有年，乞陞國相兼長史事。」又言：「復本中國饒州人，輔臣祖察度多歷年所，不懈於職。今年八十有一，乞令致仕還鄉井。」上從之，陞復琉球國相兼左長史，致仕還饒，茂相國兼右長史。宣德初，王思紹卒，子巴志請嗣封。三年，遣內監柴山往。自是，以遣使冊封爲故事。正統八年，巴志卒，子忠嗣，遺給事

中陳傳往册封。十三年，忠卒，子思達嗣。景泰元年，中山王思達遣人朝貢。三王嗣封，皆請於朝。既而，山南、山北悉爲中山所兼，遣使朝貢，三年一至，人來無過百五十，著爲令矣。自察度後，五傳乃至尚圓。尚圓者，尚德之仲子也。長子宣威嗣位，未幾卒，不及封。成化十五年，圓卒，子真嗣。嘉靖四年，真卒，子清請封。十二年，遣給事中陳侃、行人高澄往，以太牢祀真，册清嗣王，并賜王妃冠服、錦幣。使臣疏言：「弘治、正德間，修撰倫文叙等使安南，安南乞留誥勅爲鎮國之寶。倫爲奏請，得留。卽琉球有請如安南，海外遼遠，不得卽請，乞下禮官議。」議從其請。使至國，奠册如禮。嗣王清稽首上告：「天朝詔勅，藏金匱八葉於茲矣，請留。」使者許之。比還，遣王親寧吉、長史蔡瀚表謝。侃、澄《使琉球錄》言：「《大明一統志》載《琉球錄》，有落漂，及王居壁下聚鬪，非實事。又杜氏《通典》、《集事淵海》、《羸虫錄》、《星槎勝覽》諸書，所記述皆傳者妄也。」嘉靖三十四年，清卒，子元嗣。四十年，遣給事中郭汝霖、行人李際春往。隆慶五年，元卒，子永嗣。萬曆二年，遣給事中蕭崇業、行人謝杰往，皆禮如初。然或以倭亂，或以風期，待渡於閩，凡三閱歲乃行。使旋，所錄極其往來險阻艱辛狀。又其國貧，無以給使者，僭從。十九年，復以嗣封請。於時倭犯朝鮮，海氛不靖，令其使者自齎詔册歸，使臣罷勿遣。更十餘年，朝鮮師解，復堅乞如故事。上嘉其爲不叛之臣，復許之。三十二年，命兵科給事中夏子陽、行人王一楨往。始，杰册封琉球還，言：「其國有日本館，群聚數百人，待封使之舟轉，與市。其人出人挾利刃，琉球心懾之。」及子陽還，復言：「日本近千人，露刃而市，琉球行且折於日本矣。」居一年，其國王果爲日本所執，且欲代日本求貢於我。中丞丁繼嗣直指陸夢祖，因具疏請緩外貢，修我內備。許之。琉球人深目多鬚，有職事者，以金、銀簪爲差等，廁賤，祇空髮束之。土人結髻於右，漢裔結髻於中，俱用色布纏首，紫黃爲貴，紅綠

次之，以青爲下。衣則寬博廣袖，製如道士服。腰束大帶，亦以色布稍貴者纏。文錦價可三五金。凡屋地多鋪板簾，潔不容塵。無貴賤皆着草履，入室則脫，惟謁見使臣始具冠履，殊苦束縛。然頃年讀書號秀才者，亦戴中國方素巾，足不草履而鞋矣。婦人以墨黥手外指爲花草鳥獸形，首不簪珥，顏無粉黛。足與男子同履，富室以蘇蓆藉屨底，略加皮緣。上衣之外，更用幅如帷，周蒙背上，見人則升之以蔽面。下裳褶細而制長，欲覆足，不令顯也。名族大姓之妻，出人戴簪笠，坐馬上，女僕三四從之。無羅紋布帽，織獼縷皮毛，衣螺貝之飾。君臣上下，各有節級，王親雖尊，不敢與政理。武職則法司官、察度官，以司刑名，遏闢官、那霸港官，以司錢穀，耳目官以司訪問。文職則設大夫、長史、都通事等官，以專司朝貢之事。王則并日視朝，自朝至日中晏，凡三次。群臣以搓手膜拜爲敬。尊且親者，延之殿內，賜酒饌，疏則移時跪階下，不輒起。遇聖壽、長至、元旦日，王統衆官，肅冠服高呼祝慶，儀同內地臣僚。父子幼雖同寢，長必異處。食用匙筯，削素木爲之。異味先進尊者。子居親喪，數月不肉食。死者以中元前後日用溪水浴其屍，去腐收骨，纏布裹草，櫬土而殯，上不起墳。若王及陪臣之家，則以骸匣藏山穴中，截木板爲牖戶，歲時祭掃啓視。地無貨殖，商賈鮮通，時時資潤於鄰島之富者。有盜竊，輒加開腹剗荆之刑。鹽舶漁艇，制與中國小異。陪臣入貢，則乘巨艦，航海而至。縛竹爲筏，不駕舟楫。俗敬神，神以婦人不二夫者爲尸，降則數著靈異，能使愚民竦懼，王及世子陪臣莫不稽首下拜。故國有不良，神輒告王，指其人擒之。倭寇謀犯境，神輒易水爲鹽，化米爲沙，尋卽解去。尸婦名女君，首從動至二三百人，各頂草圈，携樹枝，入王宮中。王宮建於山巔，國門榜曰歡會，府門榜曰漏刻，殿門榜曰奉神，圍堞儼然，石壁矗矗，門前百武許，砌石梯數重，左下甃小池，水自石龍口噴出，榜曰瑞泉，王則汲之。殿宇渾素，不雕鏤爲奇巧。山則南

有太平，出禾、苧，男女頗耕織其中。（三）西有古米，出土絲。又有馬齒，地藪曠，饒樵牧。東北有硫黃、葉壁、灰堆、繇奴野刺、普吉佳、七島，雜出紫菜、魚鰲、海貝諸物。鼉鼉等嶼，澎湖等島，蓋其大者。樹有鳳尾蕉，四時不凋。野鮮熊、虎、豺、豹，而獨出鹿，且富牛、馬、羊、豕、鷄，形多瘦削，其價極廉。家不畜犬，愛養異色貓。有奇蛇可入藥。鳥、雀、谷、蔬、菓品、花木，稍同中國，獨不宜茶茗，即藝之，亦不萌。蟲有壁間蝎虎，聲大噪。海錯如龍蝦、螺、蚌，則味加閩越矣。賦法略如井田，王臣民各分土爲食，有事暫取諸民，事竣即已。婦人嚼米爲酒，男子煮海爲鹽。燕會亦設中國金酒，侑以歌曲。陶冶如鐵耕、釜甑，王主其市易，有厲禁。罽皆自閩往，非所有也。地產貝甚多，顧獨用日本小錢，如宋季鵝眼、縵環，每十折一。厥田沙礫瘠薄，樹藝鹵莽。日食飯僅一二碗。地卑濕，氣候常溫，隆冬沍寒，亦有小雪。陪臣子弟與凡民之秀，則請致士大夫教之，以儲長史、通事，習華言入貢。餘不慧者，宗倭僧，學書番字而已。間有學詩，僅曉聲律偶對。其地去澎湖不下數千里。宋志云：與泉州煙火相望，閩人嘗言：霽旦登鼓山，可望琉球，皆非也。又有小琉球，與閩海稍近，未嘗朝貢。或言并人琉球。饒甲矢，人武健，以金鼓爲節，鄰國曰爲勅敵。其國西南則暹羅，東北則日本，聞東隅有人鳥語鬼形，不相往來，蓋毗舍那國云。

貢物曰馬，曰刀，曰金銀酒海，曰金銀粉匣，曰瑪瑙，曰象牙，曰螺殼，曰海巴，曰摺子扇，曰泥金扇，曰生紅銅，曰錫，曰生、熟夏布，曰牛皮，曰降香，曰木香，曰檀香，曰速香，曰丁香，曰黃熟香，曰蘇木，曰烏木，曰胡椒，曰硫黃，曰磨刀石。以上象牙等物進收，硫黃、蘇木、胡椒運送南京該庫，馬就於福建發缺馬驛站走遞，磨刀石發福建官庫收貯。

淳泥國 本閩婆屬，在西南大海中。統十四州。洪武三年八月，福建行省都事沈秩與監察御史張敬

之等，奉詔往諭其國。十月，繇泉南入海，明年三月乙酉朔，達闍婆，又踰月，始至。國王馬合謨沙僻據海中，倨傲無人臣禮。秩令譯人通言曰：「皇帝撫有四海，日月所照，霜露所隊，無不奉表稱臣。淳泥彈丸之地，欲抗天威耶？」王大悟，舉手加額曰：「皇帝爲天下主，即吾君父，安敢云抗？」秩卽折之曰：「王既知君父之尊，爲臣子者，奈何不敬？」亟撤王座，更設香几，置詔其上，命官屬列拜於庭。秩奉詔立宣，王俯伏聽，成禮，退。明日，王辭曰：「近日蘇祿起兵來侵，子女玉帛，盡爲所掠，必俟三年後，國事稍紓，造舟人貢。」秩曰：「皇帝登大寶有年矣，四夷之國，東則日本、高麗，南則交趾、占城、闍婆，西則吐蕃，北則蒙古諸部落，使者接踵於道，王卽行已晚，何謂三年？」王曰：「地瘠民貧，愧無奇珍以獻，故爾遲之，非有他也。」秩曰：「皇帝富有四海，豈有所求於王？但欲王之稱藩，一示無外爾。」王曰：「容與相臣圖之。」又明日，其相王宗恕來曰：「使者言良是，請以五月五日戒行。」闍婆有人問王曰：「蘇祿來攻王，我實帥師却之。今聞歸誠中國，無我闍婆矣。」王惑之。秩復走見王，王辭以疾。秩大言謂宗恕曰：「爾謂闍婆非中國臣耶？闍婆尚稱臣，於爾國乎何有？使者朝還，大兵旦夕至，不悔噬臍耶？」宗恕悚然曰：「敬聞命。」乃入白王。王大會其屬共議，遣亦思麻逸等四人以金表報箋及方物入貢。臨發，贈秩金佩刀、吉貝布，秩峻辭之。王顧近侍曰：「中國使者廉潔如是。闍婆來人，誅索每無厭，況強之而不受邪？爾曹宜効之。」秩以涉海萬里，不可以無紀，乃與敬之各賦一詩。王大悅，請書於版中懸之。既與王別，再行至海口，王又惑左右言，令人謂亦思麻逸曰：「使者不受刀布，爾等必不還矣。」秩恐王不安，復入王所，反覆譬曉。王曰：「使者言如此，中心釋然。」已，舉酒爲別，酬地祝曰：「願使者蚤還中國，願亦思麻逸蚤歸敝邦。」秋八月十五日還京師，十六日以亦思麻逸等人見，錫宴於會同館。已而，遣歸，以金椅賜其王。永樂

三年，遣使封其國主麻那惹加那乃爲淳泥國王。〔四〕六年，王率妃子來朝，遣使迎勞之福建。至南京，王表獻珍物，妃箋獻中宮。賜宴奉天門。是年，王卒於會同館，謚恭順，葬石子岡，樹碑，建祠祀之。封其子遐旺嗣王，護送歸國。洪熙元年來朝貢，後不可考。閩三川壇有淳泥三川之神，尚附祀典。

貢物曰五色鸚鵡，曰倒挂鳥，曰孔雀，曰鶴頂，曰犀角，曰熊皮，曰生玳瑁，曰龜筒，曰寶石，曰珍珠，曰金戒指，曰金繖環，曰金銀八寶器，曰梅花龍腦，曰米腦，曰糖腦，曰降香，曰沈速香，曰檀香，曰丁香，曰肉豆蔻，曰黃蠟，曰螺殼，曰西洋白布，曰黑小廝。

麻刺國 在東南大海中。永樂十八年，國王幹刺義亦敦奔率妻子及陪臣來朝，貢方物，請給印誥，仍其舊號。行至福州，卒。詔謚康靖，勅葬閩縣，令有司歲致祭，陪臣子孫皆與廩食於官。嘉靖中，有葛良貴者，爲侯官諸生，同時陪臣子孫多不延所食於官，惟葛及一二姓云。

日本 古倭國，在東海中。縮波而宅，自玄菟、樂浪，底於徐聞、東莞，所通中國處，無慮萬餘里。其地東高西下，勢若蜻蜓，古亦曰蜻蜓國也。國君居山城，以王爲姓，以尊爲號。徐福齎五百童男女入海，爲秦始皇求仙，無所得，惧不敢歸，避居焉，今其裔也。所統五州七道三島，爲郡五百有奇，皆依水，嶼大者不過中國一村而落而已。戶可七萬餘，課丁八十八萬三千有奇。而攝摩、伊勢、若佐、博多，其民相矜，以質積貲或百萬。和泉一州，鼎食擊鐘，謠俗有中國之風也。薩摩之鸚哥里，其民備札重爲邪。獨伊紀之頭陀僧三千八百房，頗羯羶嗜殺。〔五〕而薩摩、肥後、長門三州之人，最喜人寇諸州郡，統於山口、豐後、出雲三軍門。三軍門相掎剽，國分爲三，而總屬山城君。以後豐後獨強，國人服之愈於山城。其朝貢始末，具載前史。元時，世祖遣黑的、趙良弼等諭之，不至。使將將十萬兵往征，風覆其舟於蛇海，終元世不相

通也。高帝卽位，方國珍、張士誠既誅服，諸豪亡命，往往糾島夷入寇山東傍海諸郡。帝以卽位之二年，使行人楊載諭其國王良懷，賜之璽書，曰：「上帝好生而惡不仁。我中國自趙宋失馭，北夷據之，凡百有心，莫不興憤。辛卯以來，中原擾擾，爾時來寇山東，乘胡衰耳。朕本中國舊家，耻前王之辱，師旅掃蕩垂二十年，遂膺正統。間者山東來奏，倭兵數寇海邊，生離人妻子，損害物命。故修書特報，兼諭越海之繇。詔書到日，臣則奉表來庭，不則修兵自固。如必爲寇，朕當命舟師揚航捕絕島徒，直抵王都，生縛而歸，用代天道，以伐不仁。惟王圖之。」良懷得之，不至，復寇山東，轉掠溫、台、明州傍海民，遂寇福建沿海郡。上復使萊州同知趙秩責讓之。良懷遣其臣僧祖來隨秩奉表稱臣。上賜文綺帛若僧衣，遣僧仲猷、克勤等八人護送還國，賜良懷明曆、雜繒。是爲洪武四年。然其人時時剽掠海濱不絕，官軍乏舟，不能追擊。五年，命浙江、福建瀕海諸衛造海艘。德慶侯廖永忠請增造多槽快舡，來則大船蕩之，快舡逐之。上曰：「善。」居久之，丞相胡惟庸得罪懼誅，欲借倭人爲不軌。惟庸已敗，又久之，事覺。上追怒，於是名日本曰倭，下詔切責其君臣，暴其過惡天下，著《祖訓》絕之。而命信國公和、江夏侯德興經略海上郡。成祖卽位，國王名道義者，獲擾邊魁醜以獻，蒸之海上。上嘉之。四年，以俞士吉爲都御史，齎賜之龜鈕金印，誥命封爲日本國王，名其國之山曰壽安鎮國，上親製文勒碑其上。遂給勘合百道，令十年一貢，貢道繇寧波，船無過二隻，人無過二百。然倭狡易叛，亦復時時寇略東北邊，顧其時我方招徠海外諸夷，頗得資給互市。倭國入貢，亦時踰額。宣德初，復增例船三隻、人三百。是倭往往載方物、戎器行海上，爲詐欺，得間則張其戎器，不得則陳其方物，無所不得利。至其小小抄盜，或不絕，其主良不知也。要以利，給資互市，其貢常先期至。至正統中，乃人桃渚，犯大嵩，海濱人絕苦。於是，朝廷命重帥恒鎮要地以備之，按堵

者几十餘年。成化二年，復詐來稱貢，遂破大嵩諸處。十一年，復使貢。及歸，閩帥用金鼓送之，出海隨以砲銃擊其舟，多沉者。正德中，鄭人朱竊變姓名爲宋素卿，亡入其國。國王源義澄悅之，遣入貢。素卿與其故族人耳目爲奸利，厚賂閹瑾，得賜飛魚服以歸。嘉靖二年，其西海道大內誼與國遣僧宗設入貢。居數日，素卿復爲南海道海川高國所遣，與僧瑞佐以來，皆止寧波江下。故事，番使止寧波有宴，先至者居上。素卿賄市舶太監，義先閱貢，宴之，坐上座。宗設衆不平，攻瑞佐，殺之，追逐素卿抵紹興城下。素卿竄入慈谿，縱火大掠。指揮劉錦與戰，死，遂蹂躪寧紹間。九年，國王源義晴復附琉球使來言，爲素卿乞宥罪，并請復修貢獻。是時，夏言爲兵科給事中，言：「夷人仇殺之禍，皆起市舶。」禮部請罷之，而日本貢使絕矣。十八年，復以修貢請，許之，期以十年，人無過百，船無過三。然諸夷嗜中國貨物，至者率遷延不去。貢若人數，又恒不如約。是時，市舶既罷，貨主商家商率爲奸利，（六）虛值轉粥，負其責不啻千萬，索急，則投貴官家。夷人候久不得，頗搆難，有所殺傷。貴官家輒出危言撼當事者，兵之使去，而先陰泄之以爲德。如是者久，夷人大恨，言：「挾國王貲而來，不得直，曷歸報？」因盤據島中，並海不逞之民，若生計困迫者，糾引而歸之，時時寇沿海諸郡矣。朝議置大臣兼巡浙福海道，詔以巡撫南贛、汀、漳都御史朱紉爲之，是爲二十五年。紉至，則嚴勾連主藏禁，犯者戮，無少假，上章鐫暴二三貴官家。浙人口語藉藉，罪及建議主議之臣。而歙人王直者，少任俠多略，一時惡少若葉宗滿、徐惟學、陳東、王汝賢、王澈等樂與游，而激爲直義子。直奸出禁物，歷市西洋諸國，致富不貲。夷人信服之，貨至，一主直爲僮。紉禁既嚴，諸奸商藉是益負，倭競責直。直無所出，招亡命千人逃入海，推許二者爲帥，引倭結巢鄞衢之雙嶼港。閩、浙蜂起之徒益附之，浸淫蠶食，海上聚保矣。紉居浙二年，盛集舟師雙嶼，挑之不出。會夜風雨，

將逸去，紈火攻之，多所斬捕，更令福建都指揮盧鏜搗之，俘斬溺死者數百人，餘黨遁入福建之浯嶼。紈帥鏜勦平之，躬督兵衆填塞港口，令不得復入。當鏜破雙嶼時，許二逸，不得。王直收合其餘衆，更泊他嶼。而廣東有海賊陳四盼者，自爲一黨，直計殺之，扣關獻捷，以求關市。官司弗許，賜米百石而已。直大訴，投米海中，益人盜。此時有滿刺加夷者，故商漳州之月港，漳民畏紈厲禁，不敢與通，捕逐之。夷人憤起格鬪，漳人擒焉。紈語鏜及海道副使柯喬，無論夷首從若我民，悉殺之。殲其九十六人，謬言於朝：佛郎機夷行劫至漳界，官軍追擊於走馬溪上，擒得者。紈以厲禁爲浙中二三貴官家所不樂。先是，言官業請改巡撫爲巡視，以消浙人缺望之意。至是，御史九德劾紈專擅濫殺。詔罷紈，下鏜、喬吏，遣都給事汝楨卽訊。訊報則滿刺加夷來市，非佛郎機行劫者，專擅濫殺，誠如御史言。詔鏜、喬論死，繫獄，逮紈至京師訊之。紈驚，仰藥自盡。從此，當事者以紈爲戒。三十一年，朝廷以王忬提督軍務，巡視福、浙，許便宜從事，以俞大猷、湯克寬爲分守參將。其明年春，破其寇溫倭。閏三月，大猷入烈港，火賊營。王直突圍去，更集餘黨，掠嘉定劉家河，揚帆西。六合知縣董邦政追及於吳淞，直值採陶港賊與合，遂復大糾入寇。羽書狎至浙東、西及蘇、松、淮北諸郡。直更造巨船連舫，棚木爲樓櫓，人倭據薩摩洲之松浦津，僞稱徽王，部署宗滿、惟學、東爲將領，汝賢、激爲腹心，而三十六之夷皆其指使矣。倭賊勇而贖，每戰赤體舞刀前，不復別生死，大率狡悍善設伏，能以寡擊衆。而內地久寧，目不見寇，遇輒靡潰，沿海諸郡僅僅保孤城。賊往來聚散，如入無人之境，是年，陷福建之嶸嶼所矣。此時，忬請添設海防副總兵，總督金山等處，以克寬爲之，出盧鏜爲福建備倭都指揮。詔如忬言。復改忬爲巡撫。其明年正月，倭攻嘉定，圍上海，陷嘉善，犯海寧，大掠蘇州，轉掠崇德。上命南京兵部尚書張經不妨原務，兼右副都御史，總

督南直隸、浙江、山東、兩廣、福建等處。會大同患虜，上復用忬大同，而以李天寵代。是時，倭大擾江南，而經故總督兩廣有歲，爲諸蠻夷所信服，奏調田、東蘭諸州狼土兵及承順、保靖二土司兵備前行。所調兵未至，經持重未卽戰，而朝廷遣工部侍郎趙文華出視師，劾經養寇玩賊，逮死西市，是爲嘉靖三十四年。先是，徐惟學者貨夷人金，以其侄子海爲質。惟學死，夷求海金，令取償於寇掠。海乃偕辛五郎聚舟結黨，入南畿、浙西諸路。是時，應天巡撫都御史爲南京戶部右侍郎楊宜，而天寵以怠廢黜，代之者胡宗憲也。此時，倭大猖獗江以南，其冬，復有一百餘人犯福建莆田縣鎮海、鎮東等衛，泉州指揮童乾震所與戰死於海口者也。蓋閩中犯倭自此始。先是，賊未寇輒謬詭曰，某島某倭東南人。久知王直叛，而不知寇來皆直所坐遣。是歲，朝廷立賞格，有擒斬王直者封伯爵，賞萬金。於是，遺生員蔣洲、陳可願充市舶提舉，入海說王直。而是時徐海已擁薩摩洲夷人寇浙中，戰敗於崇德。宗憲復使人賄誘之。海念欲歸，恐諸酋疑怨。宗憲使擇便地自營，竟行間賊黨中，復殺海。其年，獻俘京師。此時，文華復以總督尚書視師至，上則加文華少保。宗憲以兵部右侍郎兼僉都御史，上則擢宗憲右都御史兼兵部右侍郎云。又一年，宗憲計誘王直，擒之。上加宗憲太子太保云。直雖已擒，然其餘黨毛烈知無所歸，尚據舟山，阻岑港，巢柯梅，連犯吳越，首尾巢閩中七八歲，聞所破滅城十餘，掠子女財物不可勝計。官吏軍民戰及俘死不下數十萬，轉漕軍食橫賞賜，乾沒人橐中者費以鉅萬，而東南膏髓竭矣。是冬，則又犯福州洪塘、南臺等處，巡撫都御史阮鶚坐逮繫，罷爲民。三十七年四月辛巳，倭大至，犯浙江台、溫、福建興、泉等府。丙申，陷福清，殺縣令，劫庫獄，擄男婦千餘，攻惠安，殺知縣林咸。五月戊申，入南安。甲戌，倭自福清海口出港，參將尹鳳等擊之，斬獲溺死者甚衆。十一月，烈自柯梅駕舟出海，泊福建浯嶼，復移衆南澳山，造屋以居。

福、興、潮、廣間，紛紛以倭警聞矣。三十八年，又大至福建，攻福寧州，不克，攻福安、寧德，破之。福、興、泉、漳，無地非倭矣。三十九年，破永定城，又破寧德縣，殺參將王夢麟、知縣李堯卿。興、泉、漳三郡，城以外皆爲賊藪。貧民無賴者竄入賊中，爲之謀主、羽翼，掠行人，發墳塚，量其家貲索贖。諸將帥冒功飾敗，賊滿載歸者，指爲逐遁，阻風旋者，指爲遮擊，上下相蒙，遂成故事。先後巡撫王詢以避難引疾去，而劉燾貪縱欺誣，厚賄分宜相，言官交章論詆，猶得以風土不便調外矣。是年，胡宗憲檄浙江參將戚繼光來援。繼光故訓練義烏兵，有勇可使，則率之來。時倭據寧德之橫嶼，沮水爲營，官軍坐守踰年。繼光令軍人持束草填河進，力戰，大破之，生擒九百，斬首二千六百餘，焚溺死者無算，奪所擄三千七百餘人。乘明勦福清牛田倭，又大破之。夜迴人興化，連破其六十餘營，而繼光復歸於浙。四十一年八月，新倭大至，犯福清、羅源、連江等縣，殺游擊將軍倪祿。十一月，攻興化府，陷之，殺一同知奚世亮，據城中者三月，分衆攻陷壽寧、政和。其明年，巡撫都御史游震得具陳失事狀，上從部議，起丁憂參政譚綸，統浙兵三千人往，以副總兵戚繼光統義烏兵一枝而江西兵一枝則令撫臣自擇良將，星馳應援。震得尋被論罷，陞綸爲僉都御史，代之。二月，興化倭結巢峙頭，都指揮歐陽深率兵追勦，陷伏中，死之。賊乘勝陷平海衛，引舟出海。把總許朝光率輕舟抄之，賊焚舟還屯平海衛。四月，繼光與總兵劉顯、俞大猷夾攻，大破之，斬首二千二百餘級，墮崖溺水死者無算，縱所掠男婦二千餘人。是戰也，賊與顯及大猷對壘，日久頗懈，謂繼光遠來疲乏，未能軍。而繼光兵至如風火，擒殺無遺。興化人德繼光如親父兄。興化圍解，繼光分前將趨福州，合擊長樂寇，破之。倭屯海上者盡遁，殘寇五百餘北嶺窺莆城，千總胡世驅之，多赴海死。四十三年，繼光復擊仙游殘倭，破之。賊趨同安，繼光追至王滄坪，又追及於漳浦之蔡丕嶺，斬首千餘。

級。其殘寇得脫者，流入廣東。令兩廣、南贛徵調土兵，大集急擊之。賊掠漁舟人海，遇風多覆溺，乃復登岸，屯海豐金錫都。總兵俞大猷率兵圍之，相守且二月，賊食盡，將遁，報効副總兵湯克寬設伏待之，^(七)擒斬二千餘人。自是，倭寇絕。自東南中倭以來，十餘年間，生靈之塗炭已極，倭亦大傷，至盡島不返。隆慶時，海上通寇曾一本等復稍稍勾引人犯閩、粵，我亦嚴爲備，旋至旋撲，非如嘉靖之季矣。萬曆中，一使中貴人權非稅中貢，搜求百出，海禁懈弛，市舶縱橫，逐臭之夫，且爭趨爲樂土，又有亡賴如中行說者，陰爲之畫，東踐朝鮮之郊，南設琉球之版，雖伏梟張，漸窺堂奧。夫志止於剽掠，則癰疥之憂，志不止於剽掠，則膏肓之患矣。

貢物曰馬，曰盔，曰鎧，曰劍，曰腰刀，曰鎗，曰塗金裝綵屏風，曰灑金厨子，曰灑金文臺，曰灑金手箱，曰描金粉匣，曰描金筆匣，曰抹金銅提鐃，曰灑金木銚角盃，曰貼金扇，曰瑪瑙，曰水晶數珠，曰硫黃，曰蘇木，曰牛皮。

呂宋 在海中，國甚小，額產黃金，以故富厚。永樂三年朝貢，以後罕通。嘉靖季，國人來閩，請夾攻海賊林鳳。^(八)萬曆二十年，其主爲漳人所殺，衆來告訴，所挾珍奇衣物甚夥。至三十六年，盡殺我人之貨其國者，閩、廣二省不敢以聞於朝。語在版籍志。

東番夷人 不知所自始。居彭湖外洋海島中，起魍港、加考灣、歷大員、堯港、打狗嶼、小淡水、雙溪口、加哩林、沙巴里、大幫坑，皆其居也，斷續凡千餘里，種類甚蕃，別爲社，社或千人，或五六百。無酋長，子女多者衆雄之，聽其號令。性好勇喜鬪，無事晝夜習走，足蹋皮厚數分，履棘刺如平地，速不後奔馬，能終日不息，縱之，度可數百里。鄰社有隙，則興兵，期而後戰，疾力相殺傷。次日卽解怨，往來如初，不相

鐮。所斬首，剔肉存骨，懸之門。其門懸骷髏多者，稱壯士。地暖，冬夏不衣。婦女結草裙，微蔽下体而已。無揖讓拜跪禮，無曆日文字，計月圓爲一月，十月爲一年，久則忘之。故率不紀歲，艾耆老耄，問之弗知也。交易結繩以識。無水田，治畝種禾，山花開則耕，禾熟拔其穗粒。米比中華稍長，且甘香。採苦草，雜米釀，間有佳者，豪飲能一斗。時燕會，則置大壘圍坐，各酌以竹筒，不設肴。樂起跳舞，口亦鳴鳴若歌曲。男子剪髮，留數寸披垂，女子則否。男子穿耳，女子年十五六斷去唇兩傍二齒，以爲飾也。地多竹，大數拱，長十丈。伐竹構屋，茨以茅，廣長數雉。族又共屋，一區稍大曰公廨，少壯未娶者曹居之。議事必於公廨，調發易也。娶則視女子可室者，遣人遺瑪瑙珠雙，女子不受則已，受，夜造其家，不呼門，彈口琴挑之。口琴薄鐵所製，齧而鼓之，錚錚有聲。女聞，納宿，未明徑去，不見女父母。自是，宵來晨去必以星，累歲月不改。迨產子女，婦始往婿家迎婿，如親迎。婿始見女父母，遂家其家，養女父母終身，其本父母不得子也。故生女喜倍男，爲女可繼嗣，男不足著代也。妻喪，復娶。夫喪，號爲鬼殘，終莫之醺。家有死者，擊鼓哭，置尸於地，環燭以烈火，乾，露置屋內，不棺。屋壞，重建，坎屋基下，立而埋之，不封，屋又覆其上。屋不建，尸不埋。然竹櫨茅茨，多可十餘稔，故終歸之土，不祭。當其耕時，不言不殺，男婦雜作山野，默如也。道路以目，少者背立，長者過，不問答，卽華人侮之，不怒。禾熟復初。謂不如是，將不年也。女子健作，女常勞，男常逸。有盜賊，嚴剔之，戮於社，故夜門不閉，禾積場，無敢竊。有床無几案，席地坐。穀有大、小豆，有胡麻，又有薏仁，無麥。蔬有蔥，有薑，有番薯，有蹲鴟，無他菜。菓有椰，有毛柿，有佛手柑，有甘蔗。畜有貓，有狗，有豕，有鷄，無馬、驢、牛、羊、鵝、鴨。獸有虎，有熊，有豹，有鹿。鳥有雉，有鴉，有鳩，有雀。山最宜鹿，千百爲群。人精用鏢，鏢竹插鐵鏢，長五尺有咫，銛甚，出人携

自隨，試鹿鹿斃，試虎虎斃。居常禁不許私捕鹿。冬，鹿群出，則約百十人卽之窮追，既及，合圍衷之，鏢發命中，獲若丘陵，取其餘肉，雜而腊之，鹿舌、鹿鞭、鹿筋亦腊。鹿皮、角委積充棟。鹿子善擾，馴之與人相狎習。鹿腸中新咽草，將糞未糞者，剖而食之，名百草膏。食豕不食鷄，畜鷄惟拔其尾飾旗，射雉亦但拔其尾。見華人食鷄、雉輒嘔。居島中不能舟，酷畏海。捕魚則於溪澗，故老死不與他夷相往來。永樂初，鄭和航海諭諸夷，東番獨遠竄不聽約。於是，家貽一銅鈴，使頸之，蓋狗之也，至今，猶傳爲寶。始皆聚居濱海，嘉靖末遭倭焚掠，乃避居山。倭鳥銃長技，東番獨持鏢，故弗格。居山後，始通中國，今則日盛。漳、泉之民充龍、烈嶼諸澳，往往譯其語，與貿易，以瑪瑙、瓷器、布、鹽、銅簪、環之類，易其鹿脯、皮、角。間遺之故衣，喜藏之，或見華人一着，旋復脫去。得布亦藏之，不冠不履，裸以出人，自以爲易簡云。連江陳第曰：「異哉！東番從烈嶼諸澳乘北風航海，一晝夜至澎湖，又一晝夜至加老灣，近矣，乃有不日、不月、不官、不長、裸體、結繩之民，不亦異乎！且其在海而不漁，雜居而不鬪，男女易位，居處共處，窮年捕鹿，鹿亦不竭。合其諸島，庶幾中國一縣，相生相養，至今曆日書契無，而不闕，抑何異也！南倭北虜，皆有文字，類鳥跡古篆意，其初有達人制之耶，而此獨無。飽食嬉游，于于衍衍，其無懷、葛天之民乎？自通中國，頗有悅好，奸人又以濫惡之物欺之，彼亦漸悟，恐淳朴日散矣。萬曆壬寅冬，倭復據其島，夷及商漁交病。浯嶼沈將軍有容往勦，余適有觀海之興，與俱。倭破，收泊人員，夷目大彌勒輩率數十人叩謁，獻鹿餽酒。余雜覩其人與事，故綴其大略云。」

何子曰：宋置市舶於泉州，以通諸番，舊志所載有占城、賓達儂、三佛齊、浮泥、真臘、登流眉、大食、

日本、注輦、靈牙蘇嘉、麻逸、三嶼、白蒲延、日囉亭、真里富、三泊、單馬令、閩婆、羅斛、雪峰俱輪、須華公、琶離、佛囉安、達囉希、吉蘭丹、西棚、波斯蘭、高麗諸國。元三山吳鑒爲泉州榷玉立修《清源續志》，余於友人家僅得其一，曰《島夷志》，志所載凡百國，皆通閩中者。其載三島國有云：「國男子嘗經紀泉州，罄其資囊，以文其身。既歸國，國人以其至唐國，貴之，待以尊長之禮，延之座，雖父老不得爭焉。」有土塔國，國中有土磚塔，其高數丈，刻漢文云：「咸淳三年八月畢工。」蓋我人爲之書。有古里地悶國，其國淫濫，兼婦不耻，至者多染疾死。泉州吳宅有百餘人貿易其間，既畢，死者十八九。間存一二，類羸弱乏力，隨風回舶。安瀾之夜，則狂魂游蕩，唱歌搖櫓，夜半或時添炬燐燿，使人魄游而膽寒。而其他則載其風俗土物。夫是百國者，蓋皆大西洋之國也。於今則大西洋貨物盡轉移至呂宋，而我往市，以故不復相通如元時矣。乃余茲所志琉球、淳泥、麻刺、倭諸夷耳。琉球，恭順之國也。淳泥、麻刺，於今不至，以其王死而葬此。嘉靖之季，閩受倭斃矣，我防而絕之，自國初於今爲甚。然聞有中國人人其地，皆來敬禮。古《論語》在其國中，其人皆通書史，有文墨，特其俗尚佩刀劍，勇不畏死。其悍譎者，海上行劫，而實我奸民勾引之。奸民所闌出犯禁物，得利十倍，走之如驚矣。呂宋、東番，小夷也。呂宋與我市，而東番密邇，我民時至其地市薪與鹿，聊併記焉。

贊曰：來王來享，曰是商常。我所備禦，則在海荒。外壯舟舵，內愆池隍，則永鞏固，號曰金湯。

〔校記〕

〔一〕《嘉慶錄》，各本原作《嘉慶錄》，據陳侃《使琉球錄·群書質異》改。

〔二〕「王一禎」，《明史·琉球傳》作「王士禎」。

〔三〕「男女頗耕織其中」，各本原作「男女領耕織其中」，據蕭崇業、謝傑《使琉球錄》卷下《群書質異》改。

〔四〕「麻那惹加那」，各本原作「麻邪惹加那」，據《明史·淳泥傳》及黃省曾《西洋朝貢典錄》卷上《淳泥國》改。

〔五〕「頗羯辣嗜殺」，各本原作「頗羯辣嗜殺」，據文義改。

〔六〕「第二個」商「字疑衍」。

〔七〕「報効」，各本原作「報効」，據《明史·湯克寬傳》改。

〔八〕「請」，各本原作「清」，據文義改。

閩書卷之一百四十七

靈祀志

福州府 閩縣 侯官縣 古田縣 長樂縣 連江縣 永福縣(二)

閩縣(二)

會應廟 其神號五龍順化王，塑位五方，配以方色，相傳偽閩所建。宋皇祐中久旱，邑人祭於廟，暴雨大霽，殿中北位黑龍，鱗甲猶帶池萍。紹聖四年，守溫益修其廟，廟成，神光發殿屋。其冬大旱，率僚屬爲民祈麥，讀祝未竟，雨至。乾道二年夏，不雨，守王之望一禱而應，歲以大稔。請於朝，賜廟額靈澤。淳熙十四年，安撫使賈選以禱祈屢應，大新廟宇，奏改今名。大觀二年，詔封青龍神廣仁王，赤龍神嘉應王，黃龍神孚惠王，白龍神義濟王，黑龍神靈澤王。

永惠廟 在仁慶坊。內有龍井，常有金鱗隱見。歲旱禱之，有霧覆井上，卽雨。宋紹聖中，里人弗戒於火，延燬民居，人望見屋上標竹林旗甲士撲火者無數，火尋滅。淳熙間，廟前周氏火，亦然。凡雨暘疾患，禱無不應。嘉泰三年，賜廟額。

烈武神廟 在使君橋北。神姓陳，與其二弟名諱俱失傳。生當五季之衰，一家以貞義自持，沒而能

爲民禦災捍患。宋時累封威烈昭濟侯。二弟，長封威顯侯，次封顯應侯。

水西大王廟 王審知建，以祀其兄潮者。初，審知入閩，(三)閩開多事，(四)經費不給，孔目吏陳峴獻計，請以富人補和市官，恣所徵取，薄酬其直。富人苦之。峴由是寵遷爲支討官。數年，有二吏執文書詣峴里中，問陳支計家所在。人問故，對曰：「渠獻計置和市官，坐此破家者衆。凡破家者，祖考皆訴於水西大王，王使來追耳。」峴方有勢，人俱不敢言。翌日，峴自府馳歸，急召家人設齋置祭，意色惴惶。是日，里中復見二吏人峴家，遂暴卒。

北廟王 姓劉，名行全。唐末，其妻兄王緒爲秦宗權所逼，拔其軍南徙，以王爲先鋒。至漳州，緒忌而殺之。王審知有國，悼其死非罪，爲立廟州北。又行全與弟二人，皆有禦黃巢功。宋淳熙間，建靈顯廟於螺江之滸，並祀之。其二弟，一曰德全，一曰待全。

厚嶼廟 在厚嶼山。神姓葉，諱忠，官至泉州守。既沒，顯其英靈，鄉人立廟祀之。凡舟楫往來，禱無不應。

振遠安福行祠 相傳北鎮之神也。宋嘉泰初建。元季海寇攻城，廉訪使司掌司記曲時敬領兵擊之，禱於神，不許，與戰，果不利。明日再禱，許之。兵既接，彷彿若有神助，遂大勝。時敬乃大新祠宇焉。

彰義祠 皇朝嘉靖季，總兵戚繼光以祀前後水陸殺倭亡將卒，有把總童子明等若而人。

侯官縣(五)

七賢祠 宋建炎初建，以祀王忠竭、鄭仲賢、鄭謹淨、鄭守道、鄭誠、王子元、王子清凡七人，(六)神皆

鉅野人也。當五代唐天成中，群盜嘯聚，闔境之民賴以得全。

古田縣(七)

拓主廟 祀唐劉疆。疆，土人也。開元間，以其溪洞地與林溢、林希輩請朝立縣，玄宗嘉其忠順，使掌縣。未幾，納職請吏，束身退處。天子如其志，詔有司叙其功德，加其封爵，使食祿於家。疆天性仁孝，友愛諸弟，延及其下。沒後，邑人思之，爲立廟，稱爲古田拓主廟。累加封贈，至宋謚爲順寧正應侯，父母妻子同享廟食。皇朝洪武初，縣作城隍廟，移神像於外。知縣鄧恭晝寢，忽夢一神冠冕而前曰：「我無宮室，何以處我？」覺而異之，以語左右，有答曰：「拓主劉侯也。」恭隨往視，一如夢中所見，遂別爲宮雲津坊，以奉像焉。

安邑廟 宋知縣李堪建，祀林溢、林希。邑有旱乾水溢，隨禱輒應。宋時賜廟額曰顯應。元重建，改今名焉。

孚應廟 在水口鎮。劉疆弟也。宋紹興中，賜額，封英濟侯。

臨水順懿廟 神陳氏女，家世巫覡，父昌，母葛氏。生於唐大曆二年，神異通幻。嫁劉杞，孕數月，會大旱，脫胎往祈雨，果如注，因秘洩，遂以產終。訣曰：「吾死後，不救世人產難，不神也。」卒年二十有四。自後靈跡顯著。臨水有白蛇洞吐氣爲疫，一日，有朱衣人執劍索蛇斬之。(△)鄉人詰其姓名，曰：「我江下渡陳昌女也。」忽不見。亟往下渡詢之，乃知其爲神，遂立廟祀焉。宋浦城徐清叟子婦，孕十有七月不產，舉家憂危。忽一婦踵門，自言姓陳，專醫產。徐喜，留之以告。陳婦曰：「此易耳。」令徐別治有

樓之室，樓心鑿一穴，置產婦樓上，仍令備數僕持杖樓下，候有物墜地，即捶殺之。既而，產一小蛇，長丈餘，自竅而下，群僕捶殺之。舉家相慶，酬之以物，不受，但需手帕一方，令其親書「徐某贈救產陳氏」數字，且曰：「吾居古田縣某處，左右鄰某人。異日若蒙青眼，萬幸！」出門忽不見，心常疑異之。後清叟知福州，憶其事，遣人尋訪所居，鄰舍云：「此間只有陳夫人廟，常化身救產。」細視之，則徐所題守帕已懸於像前矣。人歸以報，徐爲請於朝，增加封號，并宏廟宇。

靈淵廟 在縣北五里。廟瞰溪流，下有洞穴，祈雨輒驗。舊號羊角龍王廟，宋紹興十四年賜額，封溥濟侯。

長樂縣（九）

金吾祖廟 在縣東北大宏里。唐開元中，里人有林姓者名通玄，有善行，後卒，人莫知其神也。宋初，有寇自梅江而上，欲剽掠其鄉，望見神人樹旗幟，率兵禦之，寇遂退。是日，降靈於人，自述平生。後封爲金吾顯通王。

瑞溝行祠 在二都後澳。其神宋莆田縣法曹也。時有犯法者數百人，當刑，法曹陰縱之，獨抱文案溺溝而歿。縣令上於朝，遂祠祀焉。

連江縣（一〇）

大小亭廟 縣東江口。晉時，有黃助兄弟二人，漢黃香裔也，舟回自海南，至是遇風，兄弟連臂浮於

江岸，夜則畫沙成字，表其履歷，復見夢於鄉人曰：「爲我南山作墳，北山立廟。吾能辟災降福。」如其言，里無虎豹之患，建鹽其利。人號其兄廟爲大亨，弟廟爲小亭。

永福縣(一二)

威濟廟 在縣東南二里許。神姓陳，諱必勝，漢丞相平之後也。家於閩城烏石山，兄弟九人，皆著奇節，歿而爲神，而神則廟食於此。唐永泰二年，茲邑初置，溪潦暴漲，有若枯木溯而上者，數四，乃湫口祠所立神之刻像也。邑人柯氏取之，卽今廟之址，累石爲屋祀之。民禱祠或樵牧過者，往往石室中獲銅錢。宋開寶中，號湫口通靈護境廟。紹興元年，賜額威顯。九年，封靈貺侯。

泉州府 晉江縣 南安縣 惠安縣 德化縣 永春縣(一一)

晉江縣(一三)

鐵爐廟 在府城西宣明坊內，留從効造兵器之所也，故名鐵爐。廟之神曰應魁聖王，郡士子求科名者多謁夢焉。宋慶元三年秋，曾從龍來禱，夢有書幅紙示之云：「兩燭並耀於今秋，一荐獨橫於天下。」又夢一人屈指數云：「四十年事。」是科兄弟同舉，所謂「兩燭並耀於今秋」，明年春擢狀元，所謂「一荐獨橫於天下」。四十年者，蓋泉自梁克家登大魁之後，至從龍時恰四十年也。及余兄弟同時登科，復有大城、小城歸附明主之應云。

南安縣〔一四〕

靈濟廟 祀唐人，姓虞名天保。宋淳祐中，有弭蝗驅虎之異。

惠安縣〔一五〕

靈應廟 有二像，一曰鹽倉陳公國忠，一曰青嶼鄭公濟時，皆固始人，避地入閩，歿而廟食。宋紹定庚子，海潮暴溢，民居盡沒，惟廟獨存。淳祐六年，賜今額。

德化縣〔一六〕

英顯廟 在湯泉上園。神諱謨烈，宋紹定三年，以扞汀寇功，賜今額。

小尤廟 在小尤上園。二神，一姓章，一姓林，唐末人，避黃巢亂居此，歿而有靈，鄉人祠之。庚寅，汀寇自尤嶺而來，忽皆遁去，若有驅之者，人歸以爲神功。

永春縣〔一七〕

留廂使廟 廟神爲固始人，名失傳。梁乾化間，石晉永隆四年，補廂使闕練。次年，契丹犯闕，神避地於此，既沒自靈，鄉人廟祀之。

建寧府 建安縣 甌寧縣 建陽縣 崇安縣 松溪縣(一八)

建安縣(一九)

神應廟 在光孝觀之左。廟祀二神，俱袁姓，其一名賜，一名申。相傳宋時郡寇竊發，郡人夜夢神報云：「翌日寇至。」遂告於郡守，相率禱神。其日寇果至，俄而烈風四起，揚沙走石，又有蜂蟻數萬飛螫之，寇遂驚潰。紹興間，賜今額。水旱疾疫，靡禱不應。

唐顯祐公廟 在縣治東。神姓林，諱旺，爲郡軍校，正直明靈，人爲圖像。既卒，祈禱輒應，立祠祀之。宋時累加封號。咸淳五年，郡失火，守禱於神，風雨遂至。封顯祐公，妻唐協靈靖惠夫人。建炎間，郡卒葉儂等叛，推魏勝爲首，勝謀降，衆疑勝，勝曰：「請質明神兆之。」得吉。儂等人就降，一城獲全，神之力也。

廣武王廟 在將相里南。神姓李，諱文昌，開寶中仕閩，掛冠居城南精舍。既卒，僧爲立祠，鄉民懷其德，請於刺史陸長源，移祀今所。(二〇)建中三年，始創祠宇，鄉民夢神云，其所有儲錢一倉。掘其處，果得錢，土木之費咸取給焉，因名錢倉廟。乾符間，封廣武王。

甌寧縣(二一)

石磯靈祐廟 在禾供里。神姓蔣。宋紹興元年，賜今額。先是，有張逼者，在唐之季，里有妖邪爲

虐，且疾疫盛行，遲一日於靈祐廟焚香祝曰：「遲生不能救民，願死爲神，以拯鄉厄。」遂卒。鄉人因塑像神側，附祀之，甚著靈響，後封昭衛侯。

建陽縣〔三〕

鎮國王廟 在縣南隅。神姓陳，名景仁，任北門將軍，分鎮興化軍節度使，沒而民廟之。其神護國有功，唐宋累封鎮國廣威靈王。皇朝正德庚申，廟基見侵，移祀古稅局。嘉靖丙午，局燬，改爲社學。神故在座下，忽產紫桐壹章，靈長奇茂，甫十年，合抱矣。己未，海夷平，先期應夢於署縣曾某，遂斷桐復像而祀之。

庇民王廟 神景仁子，名長開，五代時任都曹使。王從珂侵州境，神率義兵拒守，授銀青光祿大夫、檢校太保，嘉禾縣永落鎮公事。〔三〕以戰歿，唐封庇民侯，加封顯祐公。宋政和初，賜今額。宣和中，封靈貺侯。淳熙末，累封顯濟應孚惠福安王。一云神姓李，失其名。

江河廟 在交溪城隅。奉祀晏公，卽所稱九江八河神也。

廣祐侯陳舍人 神諱通，字伯泰。政和丁酉，委身東岳昭烈廟，誓以公忠報國，惠澤及民。既歿之明年，紅光見廟祠，民刻木像祀之。淳熙間，威靈益顯。紹定庚寅，邵武寇掠本邑，侯跨馬拒之，賊懼而遁。端平甲午，唐石、龔十八嘯聚，統制周喜領兵追捕，相持間，見舍人旗陣閃爍，金鼓鳴空，賊衆駭懼，不數日平。丙午夏，兩浙大旱，侯與武夷君力救有功，追封翊真侯。嘉熙己亥，閩、浙大旱，屢禱屢應。漕司上其事，加封翊真廣祐侯。

七姓廟 在仁德里。舊志云：唐時有七姓者，從刺史熊博討賊，遇害於此，鄉人祠祀之。

威惠廟 地名蓋竹，舊稱蓋竹神祠。神姓陳，諱勳舊志作淳。唐貞元中爲建陽錄事。剛狠不容物，爲縣吏十人誣其罪，與其子三人同時遇害，棄屍於溪，溯流而上數十里，邑人收瘞之。勳死之明年，家爲設齋，妻哭畢，獨嘆於靈前曰：「君平生以剛直稱，今枉死逾年，精魂何寂然耶？」是夕，卽夢勳曰：「吾却不知死，向聞卿言，方大悟。吾當報仇，然公署非可卒人者，卿明日爲我入縣訴枉，吾當隨之。」明日如言往，出門卽見勳伏劍從之。至縣，遇一仇吏於橋上，勳以劍擊其首，吏卽顛仆死。旣入門，勳徑之曹署，以劍四擊，中者皆死。十殺其八，惟二吏奔至臨川得免。是後，鄉人恒見之，因爲立祠，號陳府君廟。後府君墓忽有二竹從樹柯中出，衆以爲異，因名蓋竹神祠。建人方言，「蓋」與「怪」同音，蓋云怪竹也。元豐中，封威惠侯。政和中，賜今額。紹興中，加封顯濟靈應冲祐威德王。三子皆封侯，長曰協義，次曰協信，末曰協濟。

崇安縣(二四)

江武廟 在石雄里。神一江姓，一武姓，以勇義相善，相許以死。時有虎患，二人持勁弩逐之，江誤犯弩死，武曰：「平生相許死，可獨生乎？」自觸弩死。時顯英靈，鄉絕虎患，民廟祀之。

松溪縣(二五)

顯聖廟 宋初，武尉吳大辨沒於王事。紹興間，知縣林敏元廟祀之。

順英廟 神姓陳，兄弟二人，名淑公、淑美，左右李勝、傅賜。二侯靖寇於斯，卒有功，鄉人祀之。正統、天順間，黃坑、西里二寇皆藉神靈殄滅之。

延平府 南平縣 尤溪縣 永安縣(二六)

南平縣(二七)

靈貺廟 在開平里。宋嘉熙中建廟。神姓劉，名矜，郡人也，嘗有功民，(二八)故得血食。

尤溪縣(二九)

正順廟 在縣東崇文坊。宋嘉定二年建。神姓謝，名祐，郡人也。元豐中，從劍浦黃裳學，爲人質直，素慕張巡之忠烈，願爲其廟從神，預塑像於巡側。及卒，數著靈響，凡有禱者，輒形夢寐。紹興九年，封靈惠大將軍。淳熙十年，賜今額。咸淳七年，加封廣惠。

永安縣(三〇)

唐田王廟 在縣治南門外。神姓李，名肅，字行申，陳州人。唐世以功封田王。(三一)建中間，天子幸奉天，叛將牛勣乘中原有事，閉關竊據。及朱泚平，天子錫王弓矢，命之曰：「閩、粵弗庭，汝實征之。」王率精銳數萬，至臨江浮流口，卒與賊遇，後兵不繼，力戰死。屍浮水上，彌月不變，鄉民倉糾閩王忠勇，具殯殮而祠之，凡有所禱輒應。貞元十五年，有司以聞，勅封孚祐廣烈王。妃陳氏，配享。從神五，曰胡，曰陳，曰周，曰張，曰湯，皆其裨將也。皇朝正統十三年，沙、尤寇亂，一夕，鄉民聞廟中喧闐達旦，俄而魁渠

鄧茂七率其徒數千人來攻浮流，聞空中有金鼓聲，遙望四山皆旗影。賊震恐，鄉兵從而敗之。明年，賊黨羅丕復攻浮流，火其廟，神飛騰於北蓮花巖上。景泰四年，鄉民蔡巖復迎神像歸故址，重建廟宇。

汀州府 長汀縣 寧化縣(三)

長汀縣(三)

洲湖潤德大王廟 在富文坊。相傳神漢末人，以忠義死於此，時顯其靈異，郡人爲立小廟。一日，山水驟漲，廟隨流而下，於南山之麓，後枕石屏，前瞰麻潭，鄉人卽其地建新廟焉。

助威、盤瑞二王廟 在駐劄寨。相傳神漢末人，以身捍敵，死城下，郡人祀之，號石固大王，累著靈響。廟前小澗，一日忽漲溢，有神像乘流而至，屹立爲石固之左，衆異之，號石猛大王。後以息火功，封石猛爲助威王，石固爲盤瑞王。宋元豐中，建廟。

則順王廟 在鎮南門外。宋建炎中，瘴癘大作，郡倅許瑞妻夢紫金人謂曰：「無如揚州紫蘇散。」問其官族，自稱城中廢廟王。明日，如方施藥，活者甚衆。乃訪舊址建廟，瑞自爲記。

靈蛇廟 在青泰里，舊傳唐統軍洪元故居，塑像，其軀也。所遺印、劍各一，其印文曰「大唐統軍之記」。後經火，惟劍印騰去，火滅，乃於平田中得之。

寧化縣(三)

顯應廟 在縣西草倉。神姓長孫，名山，偽閩銳將也。護駕至縣而歿，縣人祀之，(三)雨暘疫癘，有

禱輒應。宋嘉祐，賜額。

興化府 莆田縣 仙游縣〔三六〕

莆田縣〔三七〕

靈顯廟 在涵江監倉西。祀里人陳應功。應功弱冠，忠義自許，慨然鄧南陽、諸葛忠武事功。太平興國初，陳洪進尚據漳、泉，應功詣洪進條陳古今天下分合之由，備述天命、人心歸屬之意，洪進遂納土於宋。其年，游洋草寇竊發，應功詣軍前，請爲前鋒，越谿谷鏖戰，竟爲賊刃所劇，鄉人廟祀之。建炎初，里人觀察使陳淬宣撫海南，神現靈阻寇。淳祐十二年，賜廟額。以後荐封忠裕侯。

顯應廟 在寧真門外。宋乾德二年創，元豐二年更新之，里人鄭叔僑爲記。建炎元年，郡卒謀不軌，求神助之，屢卜屢却。凶徒攘臂出，若狂醉然，乃盡狀告，俄就擒戮。賜廟額曰顯應。

英惠廟 在前埭。宋大觀初，里社鼓自鳴，而神童黃泳賜五經及第。紹興間，郡人王晞亮請於朝，賜今額。

靈祐廟 在寧真門外。神姓詹，名持，紅社人。〔三八〕有道術，能伏虎療病。卒，人祠之。

龍官顯應廟 在連江里東亭。神姓龐，名珪，原爲天神。天旱，莆七月不雨，神憫民呼籲，爲洒硯水，時黑雨三日，水浸半壁，卽今灰壁半黑遺跡也。以此謫爲下界神，鄉人崇祀之。宋度宗時，又旱甚，神反風降雨。寇陷郡城，疾癘大作，神露形驅癘殄寇，宰士者以聞，封爲祐文侯，時咸淳七年也。勅書纖黑字。

於黃絹，今漫漶猶存。

朱醫廟 在黃石新溪。朱醫，不知何許人，并亡其名。以醫顯，尤神於眼科。宋端平間，理宗病翳，〔三九〕嘗召入宮中，詔無得用金針，朱藏針筆端，一撥瞭然，遂賜冠帶繡鈔。邑人府判戴釗與朱善，因携入莆，寓黃石錦園東，莆藉是多復既盲之視。無何，卒於錦園，異香七夕不散。里人禮葬於埔面道左，而錦園地忽產一樟，非久成抱，用雕像焉，稱爲朱醫先生。

靈惠廟 在縣廣業里之馬洋。神姓林，名寧，馬洋人也。得秘術驅役邪神，馴服猛獸，常騎虎出入，號伏虎林公。後入深山，乘馬倚樹而化。沒後，靈響大著，鄉人立壇祀焉。宋乾道丙戌，勅封靈惠聖侯。

祥應廟 在尊賢里白社。五代時已有祠宇，號火官廟。宋大觀元年，部使者上其靈跡，賜今額。宣和四年，封顯惠侯。初，睦州妖賊盜有江浙數州地，欲掠舟於海，以據七閩，閩人多奔竄失所。莆民先禱於神，得吉卜，後賊果就擒。葉儂寇福州，莆民震駭。賊徒忽見神兵四集，旗幟皆有顯惠侯字，始怖恐，不敢南下。楊勅叛入閩，由漳、泉而來，軍士懼不敢進。忽空中有聲曰：「顯惠兵來矣。」於是，賊衆望風畏遁他邦。若旱蝗疾疫之災，商賈風濤之險，禱多靈應。

仙游縣〔四〇〕

興福廟 在孝仁里。神姓林，名義，邑人也。歿而神靈，人祀之。宋紹興間，汀寇猖獗，神出陰兵禦賊，賊驚懼潰去。乾道間，賜額。嘉泰以後，累封威祐彰應通靈孚順侯。淳祐間，封孚祐昭德公。

靈惠哀侯廟 在聞賢里上余。侯名草，〔四一〕甘陵人也。少以驍鷟剛毅聞，仕宋爲武翼郎、殿前司思

第四將。〔四二〕紹興十五年，江廣寇侵軼縣境，侯隸都統張淵麾下，與賊戰，死於磨石山。邑人哀之，爲立廟。邑有丘析者，良家子，與忠義社首善武藝，嘗與賊戰於九座山下，親殺凶渠一人，賊遂退走。後復與賊戰，賊不能肆掠，而析矜勇深入，遂沒於陣。知縣陳致一嘉其勇義，亦附祀焉。致一自爲記。

邵武府 邵武縣 光澤縣〔四三〕

邵武縣〔四四〕

惠靈通應廟 按廟錄，神有三：一宋度宗次子，一樞密院使，一金吾將軍，姓名俱逸。德祐二年，與元兵戰於郡城蓮塘前，元兵縱火焚民居，三人力不敵，遂赴火死。郡人義其忠烈，因卽其地立祠祀之。按〔宋史〕，度宗三子，長卽端宗，次帝昀，次帝昺，無卒於此者。此云度宗次子，豈宗室子歟？

惠應廟 在二十九都水南。神姓陸，名大巖，五代時爲泉州牧。道經昭武，愛其溪山之勝，卜居焉。卒葬石岐山下，頗著靈異，鄉人廟祀之。宋政和四年，賜額。紹興間，封靈應祐通濟侯。廟傍有泉極甘冽。

光澤縣〔四五〕

惠濟廟 在縣治西南種德坊。相傳宋末郡盜入境，有王姓者率衆禦之，死於寇，身流白血。鄉人殮葬之，仍立祠。

漳州府 龍巖縣

通靈廟 在官岵東南隅。神鄒磐，固始人，以宣府校尉從王審知入閩平汀寇，以功鎮鴈石。卒，民懷而祀之。元至正四尸年，賊李志甫寇龍巖，官民禱神，神著靈異，大敗之。事聞，封武勝侯。

福寧州 寧德縣

王都相廟 在縣北十四都東洋里。廟神凡三，曰都將，曰尚書，曰指揮使，皆祀於王氏。相傳都將，尚書姓劉，避錢王鏐諱，去卯刀爲金。而指揮使則黃氏，乃劉氏義子也。寇葉儼過縣境，見金甲三人擁兵騎，凌山四出，遂不敢肆暴去。又有群不逞嘯聚，然炬出門，神陰滅其炬。縣尉李元宗令人掩捕，時夜未央，忽聞鷄鳴，廟中金鼓震響，光明如晝。及既獲，天復明矣。

何子曰：凡八閩靈神，有山川可附見者，業分隸於山川，亦或載其行於英舊，其未盡者，具列曰靈祀。

贊曰：惟我高皇，禮削繁紛。祀典有經，咸秩無文。禦災捍患，亦匪淫昏。肱靈社里，報賽鑄茲。迎釐萃祉，盪釋埃氛。屈平有述，《司命》《雲君》。

〔校記〕

〔一〕「侯官縣 古田縣 長樂縣 連江縣 永福縣」十五字，各本原脫，據本書體例補。

〔二〕「閩縣」二字，各本原脫，據本書體例補。

〔三〕「審知人閩」，各本原作「審知人晉」，據《十國春秋·閩》改。

〔四〕「閩開」，疑有誤。

〔五〕「侯官縣」上，各本原衍「福州府」三字，據本書體例刪。

〔六〕「王子清」，各本原作「王子請」，據弘治《八閩通志》卷五十八《祠廟》改。

〔七〕「古田縣」上，各本原衍「福州府」三字，據本書體例刪。

〔八〕「執劍」，各本原作「報劍」，據文義改。

〔九〕「長樂縣」上，各本原衍「福州府」三字，據本書體例刪。

〔一〇〕「連江縣」上，各本原衍「福州府」三字，據本書體例刪。

〔一一〕「永福縣」上，各本原衍「福州府」三字，據本書體例刪。

〔一二〕「南安縣 惠安縣 德化縣 永春縣」十二字，各本原脫，據本書體例補。

〔一三〕「晉江縣」三字，各本原脫，據本書體例補。

〔一四〕「南安縣」上，各本原衍「泉州府」三字，據本書體例刪。

〔一五〕「惠安縣」上，各本原衍「泉州府」三字，據本書體例刪。

〔一六〕「德化縣」上，各本原衍「泉州府」三字，據本書體例刪。

〔一七〕「永春縣」上，各本原衍「泉州府」三字，據本書體例刪。

〔一八〕「甌寧縣 建陽縣 崇安縣 松溪縣」十二字，各本原脫，據本書體例補。

〔一九〕「建安縣」三字，各本原脫，據本書體例補。

〔二〇〕「移祀」，各本原作「移記」，據文義改。

〔二一〕「甌寧縣」上，各本原衍「建寧府」三字，據本書體例刪。

〔二二〕「建陽縣」上，各本原衍「建寧府」三字，據本書體例刪。

〔二三〕「嘉禾縣永落鎮公事」上，據弘治《八閩通志》卷五十九《祠廟》，當脫「領」字。

〔二四〕「崇安縣」上，各本原衍「建寧府」三字，據本書體例刪。

〔二五〕「松溪縣」上，各本原衍「建寧府」三字，據本書體例刪。

〔二六〕「尤溪縣 永安縣」六字，各本原脫，據本書體例補。

〔二七〕「南平縣」三字，各本原脫，據本書體例補。

〔二八〕「嘗有功民」，據弘治《八閩通志》卷六十《祠廟》，當作「嘗有功於民」。

〔二九〕「尤溪縣」上，各本原衍「延平府」三字，據本書體例刪。

〔三〇〕「永安縣」上，各本原衍「延平府」三字，據本書體例刪。

〔三一〕「唐世」，各本原作「陳世」，據弘治《八閩通志》卷六十《祠廟》改。

〔三二〕「寧化縣」三字，各本原脫，據本書體例補。

〔三四〕「寧化縣」上，各本原衍「汀州府」三字，據本書體例刪。

〔三五〕「祀之」，各本原作「祀之」，據文義改。

〔三六〕「仙游縣」三字，各本原脫，據本書體例補。

〔三七〕「莆田縣」三字，各本原脫，據本書體例補。

〔三八〕「紅杜人」，各本原作「紅杜人」，據弘治《八閩通志》卷六十《祠廟》改。

〔三九〕「病醫」，各本原作「病醫」，據文義改。

〔四〇〕「仙游縣」上，各本原衍「興化府」三字，據本書體例刪。

〔四一〕「侯名章」，弘治《八閩通志》卷六十《祠廟》作「侯名章」。

〔四二〕「殿前司思第四將」，據文義，當作「殿前司第四將」。

〔四三〕「光澤縣」三字，各本原脫，據本書體例補。

〔四四〕「邵武縣」三字，各本原脫，據本書體例補。

〔四五〕「光澤縣」上，各本原衍「邵武府」三字，據本書體例刪。

閩書卷之一百四十八

祥異志

福建布政使司

唐

大曆二年秋，福建水災。

貞元六年六月，福建大旱、疫，井竭人渴。

開成五年夏，福建蝗疫。

五代唐

長興四年，閩地震。《通鑑綱目》：初，閩王審知性節儉，府舍皆庳陋。及延鈞僭偽，人作宮殿，極土木之盛。尹氏發明曰：「延鈞以弑逆得國，遂至僭竊，又驕淫不道。《綱目》書閩地震者，明他國無預，閩地獨震也。未幾，兵亂繼作，遂至不得其死。天之告戒，不可忽矣。夫以區區蕞爾，而猶若此，況奄有四海者耶！」

宋

天聖四年九月壬申，閩諸州雨水，壞民廬舍。

治平四年十月丙午，漳、泉二州地震。戊申，建州、邵武、興化軍地震。

元祐八年，福建海風駕潮害民田。

大觀三年，福建旱。

紹興二年春，福建饑，斗米千錢。餉饋繁急，民益艱食，令憲臣移廣粟以賑。

六年春，福建饑，令帥臣、部使者振粟勸分，且漕廣粟以助。

隆興二年正月，福建諸州地震。

乾道三年八月，霖雨，閩禾麻菽粟多腐。六年夏，福建路旱，福、漳、建三州爲甚。

淳熙十一年，福建旱。十二年，福建饑，亡麥，令守臣賑粟。十四年，福建旱，賑之。十六年，福建大霖雨。

紹熙二年四月，福建路霖雨，至於五月。五年九月雨，至於十月。福建亦苦雨。

慶元五年，建寧、南劍水。

嘉泰二年六月，福建路霖雨，至於七月。丁未，大風雨爲災。

開禧元年，福建旱。

嘉定八年，閩旱。十四年，閩旱，福州爲甚。十六年，閩亡麥禾。十七年五月，福建大水，建寧、南劍尤甚。七月丁酉朔，命福建路監司賑恤被水貧民。

紹定三年，福建蝗。

嘉熙四年，福建大旱。

淳祐七年，福建水。十年，閩旱。

寶祐元年，閩旱。

咸淳十年，閩中旱。冬十月，閩中地震。

德祐元年三月，閩中地大震。

宋幼主以德祐二年五月卽位於福州，改元景炎，命赦。其日黎明，有大聲出府中，衆皆驚仆。

元

元貞二年，福建饑，賑粟有差。

至正十四年，福建大旱。

皇朝

洪武十四年三月己亥，閩縣、莆田縣地震。

永樂六年，戶部言：自五年至今九月，福建建寧、邵武疫。時仁宗監國，遣人賑恤。是年，巡按福建監察御史趙昇及布、按二司奏栢生花，賜勅切責曰：「朕主宰天下，於生民休戚未能徧知，故委爾等鎮撫藩方，以圖安輯。爾等不言軍民疾苦，而言栢瑞。夫時和歲豐，物無疾疫，生民足食，四夷順安，此國瑞也。爾等驗之人事，豈有是耶？朋比戲侮，安在忠君恤民哉？姑宥爾等，若復爲欺，必不免矣！」十七年五月戊辰，建安縣張準言：「建寧、延平二府自永樂以來屢大疫，民死七十七萬四千六百餘口，巡按御史趙昇已經覈實。其徭賦及各衛勾補軍役俱未除豁。」仁宗監國，命戶部、兵部悉除之。

正統十年六月，福建布政使司奏：四月多雨，水溢壞延平府衛城，沒侯官、晉江、南安等處田禾民舍，

人畜漂流無算，存者不能聊生。

景泰三年十一月辛酉，鎮守福建孫原貞奏：「自去冬至今春，積雪連旬，窮陰彌月。」得旨：「蠲福興二府稅糧十之三，漳、泉二府十之五。」七年正月，暴風。都指揮僉事桂福率兵人海捕賊，至南澳溺死百七十餘人。

正德十二年四月，地震。是歲，地五六震，皆有聲。

嘉靖十一年，彗星見西方。二十三年甲辰，二十四年乙巳，相繼大旱饑。巡按御史何維栢賑之。三十五年正月，大雨雹。是歲，赤青見，民間訛言有海驢精，狀如螢，着人衣裾必死，婦人觸之輒昏仆。城中国家擊金鼓若防巨寇，夜不帖席。數道士市符治之。有司疑卽道士所爲，將置之法。道士逸去，怪亦絕。四十一年四月初一日，日光摩盪。

萬曆五年，彗星見。七年，太白星晝見。三十二年十一月初九日，閩中地大震，復連震者數夜。三十七年五月，大水。二十四日，建寧蛟水發，冲壞城郭，漂流廬舍，壓溺男女以數萬計。是日，延平之將樂、順昌等縣蛟水亦發，所蕩村落悉爲丘墟。二十六日，澎湃而下，勢若奔馬，倏忽間會城中平地水深數尺，郭外至丈餘，一望彌漫，浮屍敗椽蔽江塞野，五晝夜不絕。水皆滷濁，人不敢江汲者浹月。當事以異災聞奏，請蠲賑。

福州府

唐

貞元十二年，大水。十七年，劍池水赤如血。

宋

至道二年四月，福清縣廨雨黃黑豆。又長樂、太平二鄉雨黑豆，皆堅實異常。

景德二年八月，福州海上有颶風，壞廬舍。

政和二年，福清縣龍首橋溪流暴溢，忽深數丈，有物翻騰波浪間，蕩民居數百家。

紹興十八年六月，侯官縣有竹實如米，饑民採食之。二十九年七月戊戌，水入城，漂閩、侯、懷三縣田廬。官吏不以聞，憲臣樊光遠坐黜。

隆興二年，大旱，首種不入，自春至八月。

乾道二年三月丙午夜，福清縣石竹山大石自移，聲如雷。石方可九丈，所過成蹊纔四尺，而山之木石如故。

淳熙四年五月庚子，大雨，至於壬寅，漂民廬數千家。五年六月戊辰，古田縣大水，漂民廬，圯縣治市橋。閏月乙巳，暴風雨夜作，福清縣及海口鎮大水，漂民廬、官舍、庫倉，溺死者甚衆。十年八月，霖雨，自己未至於九月乙丑。十三年冬十月甲戌，火。十五年，水。

紹熙二年五月己酉朔，水浸附郭民廬，懷安、侯官二縣漂千三百餘家。古田、閩清亦壞田廬。十一年四月，不雨，至於八月。

嘉泰二年七月，水害苗稼。丙午，古田縣水漂官舍、民廬甚衆，溺死者二百七十人。三年十一月甲午，火燔四百餘家。

嘉定四年十月辛卯，福州一夕再火，燔城門、僧寺、民廬千餘家，死者數人。九年五月，大水，漂田廬，害稼。十三年，饑，人食草根。十六年秋，大水，壞田稼十五六。十七年五月，大水，漂水口鎮民廬皆盡。侯官縣甘蔗皆漂數百家，人多溺死。是秋，颶風大作，壞田損稼。

端平七年，大旱。十二年，大水，詔賑之。

景定四年，颶風。十一月，福州火。

咸淳十年，長樂、福清二縣大旱。

宋季時，晝錦坊有賣米者，一夕，雷震死其家三人，大書屍上，凡九字，其文曰：「兴口曰大辰口凡六耳。」雷所書九字，人不能識。有好事書於萬壽塔柱，以詢知者。有一老過之，曰：「貫晝直之，蓋謂『米中用水，糠中用木查』也。」時盜起民貧，至有買糠充饑者。雷擊之家，賣米則先噴以水，賣糠則和以木查。按《羅源縣志》所載如此，而不著年月，姑附於此。

元

大德六年，饑。五月丁巳，賑以糧一萬四千七百石。

至正四年，大旱，自三月不雨，至於八月。是年夏秋，大疫。十四年，大饑，人相食。二十三年正月，連江縣有虎入縣治。羅源縣猛獸害人，非虎非熊，或曰駁馬云。是年，譙樓鷗尾吐氣如霧。二十四年七月，白晝獲虎於郡城西。二十七年十月丙辰，雷雨地震。十二月庚午，又震，有聲如雷。

明朝

洪武六年六月癸酉，福州地震。十月辛酉，又震。十三年六月壬午，閩縣烈風暴雨發民屋，人有壓死

者。是年□月甲戌，〔三〕福州府地震。二十年，大旱。

二十一年，長樂大水。二十七年十月丙申，福州府地震。

永樂十年，長樂首石山鳴。識云：首石山鳴出大魁。是歲，馬鐸及第。後六年，李騏又及第。

成化十三年，火燬還珠門及民廬數百家。長樂縣平地突起一山，山旁池忽生大蜺，民取食之，死者千餘人。十六年，長樂縣十八都昆由里地平突起小阜，高三四尺，人畜踐之輒陷，鄉人聚觀以爲異。明年，復於其左湧起一山，廣袤五丈餘。是年大疫，傍近居民病死甚衆，嚮聚觀者悉罹其禍。十八年七月癸巳，長樂縣大雨，至八月丁酉朔，漂禾稼，壞公私屋宇。先是，半占山裂，時十一年也。至是，崩壓居民廬舍，死者二十有七人。連江縣亦於七月甲午風雨惡甚，至八月戊戌，洪水橫溢，縣治、學官、倉廩、壇壝及民舍田禾俱爲所壞，溺死者百二十人，牛畜、穀粟漂沒不可勝計。十九年六月庚辰，大風雨拔木發屋，壞公署民廬無量，城敵樓戰屋推毀殆盡。福州九縣濱江溪屋宇夷蕩尤甚，田疇禾稼崩陷推流過半，官私舟船漂沒萬數，民溺死者千餘人。二十年十二月戊寅夜，地震有聲。二十一年，自三月雨不止，至閏四月溪溢人市，閩、侯官、懷安、古田、連江、羅源、閩清、永福八縣俱災，繼復大疫，死者相枕藉。是年十月丁未，地震起自西北，有聲。二十二年春，旱，五月以後大旱，連江、古田二縣疫。是年六月己卯夜，地震。九月丙寅夜，又震。二十三年春，旱，無麥。秋，大旱，無禾。

弘治七年正月，還珠門火，延居民二百餘家。十六年，長樂馬江大風，覆舟死者幾百人。

正德三年，還珠門火，延民居廬舍百餘家。四年，連江地生白毛，焚之有髮氣。十三年四月，雷震常豐倉。五月，雷震東城。是月，福州三衛軍作亂。初，官軍月餉八斗，時給之價，布政使伍符以糴賤殺之。軍士訴御史，議未定，有

進貴、葉元保者，鳩黨鼓譟，鑰七門，執伍布政一子一婿，將殺焉。邑人林中丞廷玉、高副使文達出諭，乃定。至八月，貴等復亂，大索城中金銀聚屯開元寺。中丞、副使復出諭，密會兵備李志剛、潘計討之。有姚景通者，亦貴黨也，以分金不平，請爲內應。李與鎮守謀，遂率北門軍攻貴。貴走，追斬之，殲其黨。十四年，長樂雨雪。

嘉靖四年，梅花鎮海水忽變赤色，經旦復清，魚蝦可數。五年正月夏旱，三知府汪文盛奏蠲租賦。

四月，長樂太常山鳴。十一年，大雨雪，犬群吠。是歲，閩果不實。十三年二月，雷震萬歲寺浮屠，火。布政使屠僑冒雨救火，得塔頂識。識見九仙山。十八年閏四月，颶風大作，瓦屋皆飛。二十一年，羅源大水山崩，沙壓田。長樂饑疫。二十九年，地大震，海賊人長樂。三十年，雨石於連江，有聲如雷。十一月，福州地震。三十一年二月，烏石、九仙二山土中產珠，人競取之，着手輒碎。三十四年六月，大雨雹。是月，倭寇福清海口鎮，殺數百人，大掠而去。三十五年十一月，大雨雪。四十一年正月朔，地震有聲。是年三月，三衛軍郭天養等作亂。先時，游巡撫震得遣兵征古田山寇，通判彭登瀛與指揮王毫爭禮不相得，師旋無功，通判委罪於指揮，巡撫怒，斬隊長四人。三衛軍因閱教場，大譁，侮辱監軍副使汪道昆，圍之，自旦至暮。馬侍郎森、陳參政元珂出諭，乃定。至十月，天養等以藩司勾算月糧，復譁，突入龔祭酒用卿家，斧其柱，毀莆田黃侍郎大用新構將軍山居。馬侍郎復出諭，乃散。四十二年，巡撫譚綸以威繼光麾下千人自衛，計石天養誅之。四十五年正月朔日，地震。

萬曆二年八月，晝暝，空中有聲如雷，地大震，方山巨石墜於田。六年五月，大水，侯官、懷安稼損十之八。是秋，大旱。十八年正月，不雨，至秋八月。十九年夏，大旱。二十年三月二十五日，有星隕於閩縣東南者三。二十二年二月，不雨，至夏五月。穀涌貴，饑民譟劫者三月。三十年七月，颶風作，長樂渡覆，溺三十餘人。八月二十五日夜，長星亘天。三十四年八月初七日，大風，陽岐江五舟並覆，溺死千餘。

人，皆興、泉、漳三郡生儒就試者。三十六年夏五月，大饑。秋九月，閩縣鼓山石崩，有聲如雷。冬十一月二十二日，東門守門軍蘇九郎妻鄭氏一產二男二女。十二月十七日巳時，布政司火藥庫火。三十七年八月，大雨彌旬。初六日，烏石山崩，貢院內文場垣舍盡傾壞，巡按御史陸夢祖改初場試期，至十二日始入試。四十年二月十一日，大風，馬江渡覆死者百餘人。四十二年，稅監高宗抑勒市價，市民火稅監門。宗策馬佩刀直入都御史府，執都御史袁一驥於市，欲劫之。事聞，撤宗還京。

泉州府

唐

貞觀二年，蝗。二十一年八月，海溢。

宋

至道三年五月，甘露降。

咸平三年二月，甘露降。

天禧五年三月，甘露降。

治平三年夏六月，大雨，城市水漲，壞民屋廬數千百家。四年秋，地震如雷。

熙寧二年，大風雨，溪洪激潮，損田稼，漂民廬。十年，饑。

紹聖三年七月，水三日，壞城郭廬舍。

崇寧元年，大旱水涸，民多渴死。

乾道三年五月，郡城火。是月丙午，大雨，四旬不止。

淳熙元年十二月，郡城火，燔城樓及民居。十一年四月，不雨，至於八月。是年，無禾。

嘉定九年，大水，漂田廬害稼。十六年秋，大水，壞田稼。

元

至元二十七年二月，地震。六月，大水。

泰定元年，饑，賑糴。

元統元年，大水，漂民居數百家。

至正二年九月，大風雨，永春縣南象山崩，壓死甚衆。十月，安溪侯山鳴二日。十三年七月，雨白絲。丁卯，海水日三潮。十四年，大旱，種不入土，人相食。二十六年七月，同安大雷雨，三秀山崩。

皇朝

洪武九年，大水，蕩沒民居無數。二十年，德化里虎爲災，有白晝噬人牖下者，民死亡轉徙相續，戶口耗，田野荒。二十一年四月壬申，地震。五月庚子，地震。八月壬辰，地震。二十九年十二月壬辰，地震。三十一年，大水，壞民廬舍。

正統十年五月，大水，壞城郭廬舍。

成化十二年，大旱。十八年七月，永春大雨，至於八月，瀕溪居民多死。二十一年，自春徂夏，積雨連月，晉、南、德、同、永五縣田廬禾稼多壞。二十二年三月，旱。五月、六月，大旱，禾死。秋，復旱，民多流移。九月，地震三次。二十三年春，旱，無麥。秋，大旱，無禾。

弘治六年七月初三日，大風雨，自卯至申，揚沙石，林木多折，城堞頽，壞官私廬舍，商舶、民船不可勝計。是年大有，秋甲寅，麥大熟。十一年，安溪縣三公峰崩，聲如雷。十二年冬，甘蔗生花，其結實如黍。是年饑。十三年三月，地震有聲。十四年，大旱，無禾。是年，安溪縣午山崩。十六年七月、九月，大水漂沒民居。

正德八年，饑旱，民採草水實，有餓死者。十一年八月，地大震，安溪午山又崩。十二年地生毛，一夜長二三寸或四五寸，有白有黑，兩閱月乃沒。十三年，南安縣麥一莖兩穗，同安縣粟一莖五穗。十四年，安溪地震。十五年三月二十五日，安溪地大震，聲如雷。十六年，同安縣有虎患。時感化里小平民有捕石崙魚者，夜墮深谷中，比曉視之，虎穴也，有虎子三，穴四圍皆窰，莫攀緣，委虎矣。俄虎噬一豕人，張目者久之，嚙其豕爲四，三與子，一與捕魚者，遂跑去。後數歸皆如之。捕魚者始憂駭，且不能食腥，卒餒甚，勉而食，如是者閱六七日。一夕，虎還，咆哮臨穴，三負其子以出。復躍下，捕魚者試跨其背，抱其肩，遂偕以上，相隨至林薄外。捕魚者泣謂虎曰：「恩我至矣，將何報？」他日至吾鄉，吾願以牛爲謝。」抵家數月餘，鄉人檻得一虎。捕魚者聞之，匍匐前曰：「得無生我者？」憑檻視之，已不復識別，乃謂虎曰：「生我者歟，則三號。」虎帖尾俛首號者三。捕魚者大呼曰：「是矣，是矣！」遂宰牛食衆鄉人，而請出是虎。

嘉靖五年，永春五月不雨。七月十七日，忽有物如西瓜從天下流，轉於地，有聲若雷，不甚烈。須臾火發，聲震，衆皆昏眩仆地，有震死者。既而雨下如注。六年十月，南安縣二十七都牛生人孩。七年八月，同安初九日夜大風，拔木發屋瓦，至初十日晚，雨下如注，風乃止，惟荔枝、龍眼葉焦然。十一年冬，雨雪。同安次年大熟。十五年丙申，十六年丁酉，旱饑，民多流殍，施粥發賑，無救死者。十七年，同安

縣甘露降，凝木末如飴，人爭採食。御史李元陽奏進，薦於太廟。二十一年五月十三日，同安縣將隤時，海中氣蒸如霧，有斷虹飲海而起。日下，赤雲夾擁南飛。至夜分，大風起，屋瓦盡落，巨木悉拔。二十五年五月，南門橋十字街災，燔民居三百七十餘間。二十六年八月，大雨，郡城南街水入人家，滄至半壁，各鄉俱水災。三十七年，同安鴻漸山石墜山下，溪源涉壓。自戊午至甲子，大荒大疫。四十一年，郡城瘟疫，人死十之七，市肆寺觀屍相枕藉，有闔戶無一人存者。市門俱閉，至無敢出。是年，德化田鼠大作，一畝之田，至有數千，春食秧，冬食穀，畦畔介然鼠道，草爲不生。次年穀貴，人多饑死。四十三年五月，淫雨不止，大水入郡城，鄉村皆浸，人畜多死。是年五月十九夜，德化暴雨，黎明，縣前水深丈餘，衝激雷發，民居漂流過半，男女逃縣後山，東城崩壞無餘。四十四年三月十七日，同安縣疾風迅雷，陰雨如注。至未時，忽昏如夜，咫尺不可物色，申盡乃稍開霽。四十四年十二月初六日，大雪，山村雪厚至三四尺，四五日方消。四十五年正月元日夜，地震，牆屋搖動。是月十六日，德化大雨雹。五月二十一日夜，郡城大風雨如雷響，城堞壞，田禾多害。七月初十日午，德化雲暗如昏，大風猛烈，冰雹如彈，移時四山盡白，平地盈尺。秋冬大旱，晚禾無收。

隆慶元年正月二十九日酉刻，地震。二月二十一日未時，小震。四月初三日酉時，又震。初八日，雨，至五月初一日乃止。永春縣四、五都岐山崩。是月，有豹入郡通淮門，至於教場，獲之。二年春，麥禾大熟。二年至萬曆元年，俱有年。

萬曆二年九月，暴雨三日，洪水高漲，郡城東西隅尤甚，市可行船，廬舍傾圮，瀕溪民畜溺死無數。七年正月，不雨，大旱蝗，民饑饉。六月，乃雨。八年，同安縣饑。九年五月，同安縣長興從順里蛟起，兩傾

如注，漂流人居，多溺死者。十三年，有年。二十一年四月，惠安縣地震如雷。二十四年八月，惠安縣颶風大作。九月，地大震。是年，同安縣地生黑毛，小兒隨處掘吹之，俱有毛，長寸餘，若猪毛。二十五年，同安縣積善、翔風等里雨雹，大如瓜，小如桃，碎瓦損麥，移時而止。三月，有黑雲一片如簸箕，自縣口出南城去，所過瓦屋皆擗，至劉五店尤甚。二十八年八月，同安地大震。二十九年七月，永春縣霖雨數日，大水自山中發，溢人郡城。三十一年七月，惠安縣地震。八月，同安縣大颶風，海水漲溢，積善、嘉禾等里壞舍溺人無數。十月，地生毛。十一月二十八日申時，有大星如毬，自南有聲。是年，漳、泉人販呂宋者數萬人盡爲所殺。三十三年十二月，南街頭火發，延燒百餘家。三十四年八月初七日，颶風異常，作一晝夜，城中石坊飄倒十餘座，開元西塔銅葫蘆鐵蓋飄折崩壞。是年，饑。三十五年正月，地震，門戶搖動有聲。八月二十八日，颶風大作，府儀門、府學櫺星門頽，東嶽帝殿壞，北門城樓半圯，城自東北抵西南，雉堞、窩鋪傾圯殆盡，洛陽橋梁折，城中石坊飄倒六座。三十七年五月初六日，地震，門戶屋瓦俱搖簸有聲。四十一年八月，水爲災。四十二年，水。四十三年，水。四十五年，水、饑、大疫。

建寧府

晉

太康八年十二月癸卯，建安雷電大雨。

元熙元年，建安人陽道無頭正平，本下作女人形體。

唐

貞觀十三年，鼠害稼。

大曆二年，水災。

貞元十二年，大水。

嗣聖九年，蝗。

宋

淳化三年十二月，建安軍城西火，燔民舍、官廨等殆盡。

至道二年七月，溪水漲溢入州城，壞倉庫、民舍萬餘區。

天聖四年六月丁亥，大水，詔賜被災家米二石，溺死者官瘞之。

寶元元年，自正月雨至四月不止，溪水大漲入州城，壞民廬舍，溺死者甚衆。賜死傷家錢有差，無主者官葬祭之。

至和五年三月，崇安縣嘉禾一本九十莖。

治平四年秋，地震。

熙寧元年三月，大雷雨，州民楊緯所居之西有黃龍見，下有一木如龍，而形未具。七月，大雷雨，復有龍飛其下。及霽，木龍尾、翼、足皆具，歸合舊木，宛然一體。明年，繪像以進。

政和四年八月，州境竹生米數千萬石。是年，木連理。

乾道四年六月，旱。五年七月丁巳，瑞應場大隙、山、東等處山暴水湧出，漂民廬，溺死甚衆。淳熙四年五月庚子，大雨，至於壬寅，漂民廬數千家。十五年，水，圯民廬。

紹熙元年十二月，大雪，深數尺。查源洞寇張海起，民避入山者多凍死。戊申，海寇浦城縣，焚五百家。二年二月庚寅朔，大風雨雹，仆屋殺人。三月癸酉，大風雨雹，大如桃李實，平地盈尺，壞廬舍五千餘家，麻蔬果皆損。五月戊申，水。

慶元庚申，朱文公故宅前，其山絕頂有數百年合抱木一株，勢干雲霄，一旦爲巨風所拔，而文公卒。至其夏六月，溪流大湧，朱文公宅前岸爲洪濤捲去數百尺。

慶元六年五月，大水，自庚午至於甲戌，漂民廬害稼。

嘉泰二年七月，水害苗稼。丙午，建安縣漂軍民廬舍百二十餘。丁未，山推，覆民廬七十七家。

嘉定二年十一月丁亥，政和縣火，燔百餘家。十一年，旱。十七年五月，大水，沒平橋入城。

淳祐十二年六月，大水，冒城郭，漂室廬，死者甚衆。

景定元年，建陽縣嘉禾生。本十五穗，詔改縣曰嘉禾。

元

後至元元年，(五)饑。

至正三年秋，浦城縣民家豕生豚二尾八足。十一年十一月，浦城縣雨黑子如稗實。十九年四月己丑，甌寧縣有星墜於營山前，其聲如雷，化爲石。

皇朝

永樂二年正月癸巳，府儒學及孔子廟、朱文公祠燬。十四年七月十五日，大水入城，壞城郭，漂廬舍，民溺死甚衆。

成化三年六月十三日，地震。十六年九月壬戌暮，有大星若奔，自西南流於東北，色赤形長，其尾如炸，其聲如雷，數刻始沒。十九年五月戊戌，浦城縣連日驟雨。庚子，西南鴈塘等六里山水泛溢，高三丈餘，山崩地拆，漂民廬百二十家，壞橋梁十又三處，淤民田三十八頃有奇，溺死者四十人。十九年二月甲子夜，火，燔軍民屋宇百六十三家。二十一年夏，霖雨，山水驟溢，建安、甌寧、建陽三縣鄉市民居多壞，瀕溪聚落屋宇夷蕩尤甚，田苗淤沙，人畜有溺死者。

正德元年正月初一日，正北天裂紅光，闊二丈，長數十丈。有頃光滅，自下而上，若捲席然。是年，崇安縣饑。二年，大饑。十六年八月初一日午刻，日食之，既星見鳥宿。是年，壽寧夜半地震，居屋劃然有聲。

嘉靖七年四月十五日未時，壽寧縣龍過，往復升降，隨落大雹，人畜屋瓦皆害。十一年，崇安縣火。十三年四月十三日，建陽、松溪大水。十四年七月，壽寧縣東街民陳孟十妻繆氏紡至三更，出門見布政司前街裂爲河，數丈許，有男女往來，身服紅綠綺衣，內有器用，燈灼熒熒，頃之如舊。三十年五月初十日，松溪大水。十一日，建陽大水。三十一年五月十一日，郡城大水，城中以舟行。三十九年八月，崇安青見，自南來，民家插桃柳，震金鼓禦之，兩月始息。四十年春，崇安縣鼠引群自城渡溪，夜宿於樹。夏四月，雨雹。六月，大雨雹，鳥獸多擊死。

隆慶二年夏六月，崇安大風，自東而南，仆學宮左右廡及城隍廟鐘樓并民舍。秋七月，雨雹如彈。三年三月，崇安縣水。

萬曆元年八月初十日，郡城地震。六年正月初六夜，有一大星如日，出自西方，衆星皆西環。十三

年，甌寧縣管門巷火，巷隘火急，民擠蹂死者三百餘人。十五年二月十三日，定安坊火，延燒至中和坊水街頭，民房數千，建、甌二縣治西察院、城隍廟、清軍、督糧、理刑俱燬。十五年八月二十四日夜，建陽火，焚朝天橋，居民救火死者二十三人。十六年六月，建陽蝗。十七年，建陽大旱，夏四月不雨，至於秋七月。永安門外溪中巖石刻字云：「永樂間，旱至此處。」是年，溪乾亦至刻字處。浦城縣大疫。八月十五日，松溪縣火，焚普濟橋，延及城南河棟。十八年六月初二夜二鼓，郡政和門火，延千餘家，城樓燒陷。是年，建陽縣虎，松溪縣大旱。夏六月，不雨，至秋九月。二十二年，建陽縣饑。二十三年三月十八日未時，大雨雹，大如鷄子，小者如棋子，響如彈子，四面而來，民屋皆壞。二十八年二月初六夜，建陽雨雹，大者徑四寸許。八月二十三夜一鼓，地震，自東而西，屋宇搖動。三十一年五月二十一日午時，浦城縣火，延燒四百餘家，縣庫廨宇皆燼。三十六年六月夜，浦城大雷電，風擊尊經門鰲尾，貫至屋柱，惟柱傍四簷碑如故。三十七年三四月間，日有黑暈四面圍繞，未幾，有大水之災。七月，暈復見。五月二十四日夜，洪水驟漲，雨下如注三晝夜，舟從城垛上人。城樓崩塌，漂流通都橋及城內外民居，溺死男婦無算。自威武門至通仙門城墻俱壞，萬安州演武場一帶地方淪沒殆盡，兩縣治東西察院、各館署、衙門一時俱浸圯。而東察院適巡撫徐學聚駐節，幾不免。父老謂，自永樂十四年以後，水災是年最大。八月初七日，壽寧大風雷雨四日四夜，水驟漲，各山崩裂，壓死男婦數百口，流壞田產不可勝計。三十八年秋，浦城演武亭邊禾熟未收，忽正午大風從田旋起水珠五丈餘，盤旋周遭，上下數十畝，其色轉變不常，始白，而綠，而紅，復成焰，火之乃滅。三十八年冬至夜，建陽縣火。十月二十八日，大中寺前和義坊火災，延燒民屋，登科、名宦牌坊俱燬，惟「名儒梓里」一坊巋然獨存。三十九年六月當午，大風，通都橋頭敵樓崩倒，壓死男婦十餘

人。

延平府

宋

太平興國七年七月，江水漲，壞居民廬舍二百四十餘區。

至道三年，州民劉栢妻產三男。

景德四年六月，山水泛溢，漂溺居人。

乾興元年，麥一本五穗。

天聖四年六月丁亥，大水，壞官私房舍千餘區，溺死者百餘人。詔賜被災家米二石，溺死者官瘞之。

皇祐四年九月，有禾一本雙莖二十穗。

元豐元年五月，木連理。

元祐初，順昌縣瑞粟一本十二穗。六年，順昌縣粟一本三十九穗。

元符元年，禾一莖九穗。

宣和五年春，順昌縣交溪廖懋以奉議大夫家居，役夫解柿木爲薪，木中有文曰「聖元天何」四字，字體製楷，墨色瑩然。

紹興十八年秋，尤溪縣雨黑雨。

乾道四年，順昌縣槎溪祥雲彌布，大雨至田間，水隨雲湧上，高三十餘丈，東流百餘丈，皆澄潭，視之

蒼然，有神物變化其中。

淳熙四年五月庚子，大雨水，至於壬寅，漂民廬數千家。十六年九月，大火，民居存者無幾。

慶元六年五月，大水，自庚午至甲戌，漂民廬害稼。

嘉泰二年七月，水害苗稼。丙午，劍浦縣圯三百五十餘家，溺者衆。

嘉定九年七月甲戌，沙縣火，燬縣門、官舍及民廬千百餘家，有死者，令郡邑賑恤之。十七年五月，大水，圯郡治城樓、郡獄、官舍、城壞，民避水樓上者皆死。

淳祐十二年六月，大水冒城郭，漂室廬，死者甚衆。宋時，尤溪縣有陳油妻產二子，肢體異而胸腹相連屬，驚異不敢舉。按郡志所載如此，而不著年月，姑附於此。

元

至正四年夏秋，大疫。六年八月己巳，火，燬官舍、民廬八百餘區，死者五人。

皇朝

永樂十四年夏，大水。

成化八年，尤溪大水。漂民廬屋。十二年，大旱，順昌縣原田拆裂，深或至丈餘，濶至一二尺，人民艱食。十九年，大饑，斗米百錢。二十一年，自三月雨，至閏四月終不止，溪水泛湧高十餘丈，舟楫縣城上往來，害田傷稼，壞公私屋宇，瀕溪民居漂蕩尤甚，溺人畜不可勝紀，所轄諸縣皆然。二十三年三月，大雨，水漲十餘丈。五月，復漲，勢逾於前，害田傷稼，壞民居無數。八月甲戌夜，火，延燬四鶴、西水二城門樓，并公署、民廬、佛寺几千餘區。十一月己未夜，廣豐倉火，燬倉之文牘、米廩八間，延及預備倉米穀。

弘治十一年夏四月，大水。十二年，大雨水，境內山崩。五月，大旱，民多饑。是年，順昌縣正月大雨，至於四月，境內山崩頽，禾稼薄收，民多饑饉。朝命賑濟，仍免民稅十之六。十三年，尤溪縣大水。十七年，甘露降順昌縣庭。

正德元年，沙縣梓樺林溪漲，漂民居百餘家，溺死五十餘人。五年秋七月，沙縣火，焚民居五十餘家。八年春二月八日，災，甚於五年夏四月。沙縣大水。十四年己卯正旦，順昌縣大雪，雜以霰，有如珠玉者，有如米穀者，有如菽豆者。童謠云：「天官賜福，滿地雨粟，時和歲豐，家給人足。」是歲及庚辰皆有年。四月夏，沙縣大水。十五年四月夏，沙縣大雨，水漲人城，民多溺死。十一月十六日，地震。

嘉靖二年，大田縣虎。四年冬十二月二十八日，沙縣災，焚民居百五十餘家。五年，尤溪縣自五月不雨，至七月。六年十二月，沙縣火。十一年，沙縣歲登。十二年秋八月，沙縣北鄉寨災，焚民居二百家。冬十一月五日，地震。歲復登。十五年，沙縣虎爲患，尹方紹魁禱捕之。三十三年十一月，沙縣地震，山林皆湧如浪濤。三十五年，尤溪縣大雨水。三十七年，尤溪縣災。四十年，沙縣大饑。四十一年，沙縣患虎、賊亂，城中多虎患，率排門壁人人室攫人，或人人卧內就席攫之。道路持戈結陣以行，前後被害者數百人。四十五年，沙縣火。

隆慶三年七月十三日，沙縣北鄉寨大雨，水漲十餘丈，漂民居無數，溺死者二十餘人。

萬曆元年，沙縣鄉民黃壽一乳三子。二年夏五月初五日，沙縣大水，人城丈餘，凡三晝夜。秋七月十二日，大水，復人城七尺餘。三年五月初五日，大水。是年，順昌縣冬稼倍熟，一畝四五十穗。四年六月，沙縣大風雨雹。六年，沙縣火。十一年秋八月，有虎十餘，自福州流至延平、尤溪及沙縣五都，害人無

數。十四年，沙縣水。十六年，沙縣大雷風雨雹，飄屋瓦如飛柴，有火一道自空中流過，雷電林木數處。十七年六月，旱。是年，沙縣稔。三十六年，大田縣稔，瑞穀一本兩三穗遍於郊原。

汀州府

宋

治平四年六月，進桐木板二，有文曰天下太平。

元祐五年，嘉禾生三十六穗。

紹興十七年，州羊生無角。是年，以盜妨農，令郡縣賑粟貸種。二十三年六月，生蓮同蒂異萼者十有二。

淳熙十一年四月，不雨，至於八月。是歲，亡禾，令守臣賑粟貸種。十四年三月辛未，水，漂百餘家，軍壘六十餘區。十六年，大水，浸民廬千五百餘家，溺死者三千人。

紹熙二年三月，寧化縣連水，漂廬舍田畝，溺死二十餘人。

嘉泰二年七月，水害苗稼。丙午，上杭縣水圯田廬，民多溺死。

淳祐三年，上杭縣水。十一年八月甲辰，山水暴至，漂人民。

元

後至元五年六月庚戌，〔六〕長汀縣山蛟出，大雨驟至，平地湧水深三丈餘，沒民廬八百餘家，壞民田二百餘頃，溺死者八千餘人。戶賑鈔半錠，死者半錠。

至正四年夏秋，大疫。十四年，大饑，人相食。

皇朝

景泰元年，上杭縣大饑。

成化二十一年夏，霖雨，山水驟溢，長汀、清流、歸化、寧化、上杭、永定、連城七縣鄉市民居多爲所壞，瀕溪聚落屋宇夷蕩尤甚，田苗淤沙，人畜有溺死者。二十三年七月戊午夜，疾風迅雷擊破預備倉氣樓棟柱，燔米七百餘石。

正德四年，連城縣火。九年，上杭水。十三年四月，上杭縣地震。十五年，地震。十六年，寧化縣大饑疫。

嘉靖三年十月，甘露降郡堂及城隍廟松樹。四年，淫雨，山水暴漲，長汀縣館前驛沿河田地推壞八百餘畝，店房貨物不可勝數。六年三月，甘露再降郡署及府學、司獄司桃樹。十年，寧化縣霜殺禾稼。十三年十一月，寧化縣地震。十六年，清流大雨，災與成化二十一年同。十七年，雨，寧化縣會同諸鄉山多崩。是年，隕星如雨。十九年，饑。二十三年，地震。秋徂冬，疫。三十二年，黃竹花，其實如米，居民取食之。三十四年，連城縣水。三十五年正月，寧化縣大雨雹。是年，清流、寧化、上杭、連城四縣水。三十九年，清流縣黃竹花，諺云：「黃竹若開花，人頭混泥沙。」次年，盜賊起，劫掠鄉村，殺人盈野。三十七年七月，永定縣忽大水至，漂沒橋梁。四十年，清流縣被賊，米穀盡燒燬，穀大貴。

隆慶二年，上杭縣水。

萬曆二年五月，連城雨水爲災。六月二十六日夜，永定縣電光異常，洪水遽高數丈，衝壞深溪黃田一

帶田二百餘畝，全家溺水死者一十六家外，又五百餘人。撫按題奏，大行賑恤。六年，大旱。歲登。八年，連城縣地震。九年立夏日，連城縣雨霜三晨，虎狼所在傷人，城西南火。十一年立夏日，連城縣雨霜三晨，八月寒露節亦如之。十二年，疫。十四年，清流縣水。二十年，連城縣姑田一里出竹米數萬斛，時饑民食之得活。三十八年夏，大旱。明年，旱。

興化府

唐

貞元八年三月，甘露降於文賦里潘嶺之原。

宋

太平興國八年八月，颶風拔木，壞廨宇民舍千八十區。

熙寧十年，饑。

元祐五年，風大作，海居之民漂蕩萬數。

崇寧元年，旱。

大觀四年十二月二十日，雨雪，山盡白，荔枝凍死。

紹興九年五月，甘露降於壺公深瀆村，芝草生華蓋，岑鬱樓閣崢嶸。二十年春，郡大廨有五色雀集於榕木上，芝產後圃，麥秀兩岐，太守陸渙扁堂曰三瑞。夏四月，芝復生於飛觴臺之東南，如嬰兒之拳者五，其色初如塗金，旬日如凝脂，又如渥丹，後變如紫暈金，又變中黃色。太守爲壇，聚黃冠祝之三日，觀者如

堵，遂以五芝名亭。

隆興二年，艱食，詔守臣及常平使者賑之。

乾道四年，游洋民鑿井二丈餘，得石有文曰「石上狀元」。明年，鄭僑廷試第一，清源石起宗亞之。

淳熙中，仙游九座山古杉木末生花，其臭如蘭。五年閏六月乙巳夜，風雨暴作，漂廬舍，民有溺死者。

紹熙四年七月，海風害稼。

嘉定九年五月，大水，漂田廬害稼。

元

至正十九年三月，連日雨雹。二十五年十月壬申，地震，有聲如雷。

寶祐三年六月，仙游縣南橋溪中涌出開元錢，背有「閩」字或「福」字，居民取之。

皇朝

洪武二十七年十月甲辰，地震。

永樂十四年，大饑。四年，海堤崩壞，白浪長驅，直至壺公山下，草木盡死，民無粒食，逃散他郡。

正統中，興化縣大疫，虎兇縱橫。邑人經歷蕭敏奏革本縣，從之。

景泰二年春夏，大旱，斗米二百錢。五年五月三日，江口人觀競渡，橋梁折，溺死甚衆。六年夏，旱，民艱食。

天順三年，北山虎食人，持杖群行亦不免。山中數月絕人跡。

成化八年，虎害復作，太守潘琴募人捕之，乃止。十二年夏秋，大旱，原田壘拆，晚禾不成。太守陳表以聞，其年稅糧免什之三。十五年，蟲食禾，斗米百錢，境內無可糴者。十九年夏，海風作，海溢田，禾淹死，斗米百餘錢。二十一年春夏，雨不止，壞田廬，殺禾稼。二十二年春夏，旱。通判周正以聞，不報。其年六月己卯，地震有聲。九月丙寅，又震。二十三年，二麥失收，其秋亡禾。

弘治六年，海風大作，海船入平田，官爲鑿渠，乃出。其秋，沿里分禾無收。八年九月八日巳時，地大震。十年七月十二日，自未至酉，大風掀揭，雷雨晦冥，屋上瓦磚皆隨風飛舞相敵擊，屋下人無竄伏處。山中合抱大樹皆折斷，如折麻槁然。十一年四月初二日至初五日，大雨不止，各處龍蛇奮迅，水溢山崩，近山處水深及丈，漂流人畜。有豹乘水至龜塘上樹，爲人所獲。平地水亦沒胸，人家墻垣皆應時而倒。五月十八日，大雨復作，寧海橋近北兩門折斷，其下瀝爲深淵。數日前，居民聞橋煌煌有聲，至是折斷。十二年夏秋冬，三時不雨，民至無水可食，南北洋爭水有操戈相殺者。按史胡華以聞，其年稅糧全免。十三年春，疫，太守陳効施藥，又令各村攘禱。十四年正月二十八日酉時，地震，踰時乃止。二月初二日卯時，又震。其冬隆寒，水結冰厚半寸，荔枝凍枯。

正德十五年己卯，^(七)地大震。十七年辛巳六月初一日，^(八)慶雲見壺山之頂，三日、六日、九日連四見。

嘉靖二年七月初四日夜，火光見東北隅，良久乃散。初五日夜，星入於月。三年元日，雨雪。四年春日，又雪。五年，大旱，無禾麥。七年，大旱，禾稼絕收。十一年冬，大雪。十八年九月，火災。十九年，歲大熟。二十二年五月十八日，五色雲見於壺山之上。七月二十六日夜，星流如火。二十八日近晚，石室

巖後雲氣如人馬旗幟，人遙指爲賊，久之乃散。三十五年七月，日間天鼓鳴，雨下如雹。三十七年六月既望，天鼓鳴，如風水相札，移時不絕。三十九年夏五月，郡中雨毛，又雨雹，大風拔木飄瓦，海濱瓜園根芟盡拔。四十年，自夏徂冬，賊三寇。是夏，又雨毛。秋，有獸渡海人塘下惠洋地方，狀如羊，大如馬，人搏食之。東郊外有酒嫗家，猪生一頭六足。四十一年春，城中大疫。八月初旬，紫帽山鳴三夜。四十二年，大風雨，堤決，海水泛溢至城外。

隆慶四年，風雨雷雹大作。八月初七日，雨大作，至九日止。壺公山有蛟起，土崩數丈。六年八月，文賦里西冲院有大蛇出吞鹿，人不敢捕，遙視蛇腹下有字。

萬曆二年八月初四日未時，地震，從東南方起，至西北方止，聲大如雷，大小房屋搖動，溝水泛溢。三年七月初四日，當晝有龍起自東北，黑雲四繞，黑中一直白如雪，迤邐升去。是夜，雨如注。七年六月，南山寺贍拜亭墻下第三株杜松樹雷起其中，電光閃灼，雲霧迷人，咫尺不辨。雷轟轟地上，半日不起，抵晚方震，樹尾折。次早視其下，多龍文，金碧隱見。今樹尾禿，而下鬱蒼依舊。十一年八月，霖雨，至次年正月，陰雲不開，冬禾沒水中，民間用火焙稻，頗爲艱食。十四年，孝義里地裂丈餘，水湧出黑沙，臭如硫磺，沙上多牛跡。是年及次年，連歲旱，十庶祈雨，呼聲震天，田禾大損。十七年正月，虎到孝戶地方傷二三人。二十八年七月，大雨三日，水溢，城不浸者丈餘。四野一壑，鄉村屋傾，無數海船至城下，小艇直入南市。三十年，烈風連五日，冬禾大損。三十一年十二月，地一夜五震。三十三年，早禾大熟。三十四年，大旱，田禾盡枯。是歲，斗米二百錢。三十七年四月，五色雲見北方。五月初六日午時，地震。三十八年，歲大熟。三十九年八月，五色雲見紫帽山。六月，龍起西門外北磨地方，磨屋皆毀。山崩水湧，大雨

如注。是年大熟。四十年正月三十日夜深時，火光見城內東廂等處，衆疑火起，光燁異常。是夜四鼓復見。四月十二日夜，近黃石地方雨雹，大如拳，風雨大作，折木飛瓦。四十一年二月初十日，黑光摩盪。七八月，大旱。

邵武府

宋

天聖四年夏六月，大水，壞廬舍溺人。詔賜被災家米二石，溺死者官瘞之。秋九月，雨水壞民居廬舍。

天禧四年三月，甘露降。

治平四年秋，地震，地裂泉，〔九〕壓覆州郭屋宇，兵民溺死甚衆。〔二〇〕

乾道三年秋八月，霖雨，禾麻菽粟多腐。六年，旱。是年，泰寧縣有爵飛鳴，立死於瑞寧佛刹香鼎。

先是，紹興初有雀立死於丹霞佛刹之鼎，皆羽孽也。釋子因釋其妖，謂之羽化。

淳熙十二年，饑，亡麥。十六年夏五月，大雨。

紹熙二年夏四月，霖雨，至五月。五年秋九月，雨，至十月。

慶元六年春，大旱，井泉竭，疫死者甚衆。

嘉泰二年夏六月，雨，至於七月。

開禧元年，水。

嘉定十四年，旱。

淳祐七年春正月戊寅，水。詔淮浙發運司給米二萬濟建寧、邵武諸州被水之民。夏六月己酉，旱。

秋七月癸酉，詔賞福建路監司州郡所申官民之家濟糴凡九人，補轉官資有差。十二年，水。秋七月庚寅，以諸路水災，令學士院降詔，遣使分郡賑恤。是月辛丑，大水冒城郭，漂室廬，人民死者以萬數。徐清叟奏：「水退之後，貧民無以爲生，亦有自經溝瀆者，聞帥臣、漕臣發楮米以賑之，乞與除豁。」後得蠲。

德祐元年，大疫，民亡者幾半。

元

至元元年，大旱，饑。四年夏六月，大雨，水入城郭，平地二丈，漂沿溪民居殆盡。秋八月，大旱。五年秋七月，邵武、光澤二縣大水。

至正四年夏秋，大疫。八月，旱。五年，饑。六年秋九月戊午，地震。翌日，地中有聲如鼓，夜復如之。十一年冬十一月，大雨震電，雨黑黍如蘆稜。十三年秋，邵武、光澤二縣隕霜殺稼。十四年，大饑，人相食。二十二年春三月，邵武、光澤二縣大水。

皇朝

洪武十七年，大饑。

永樂十四年秋七月，邵武、光澤大水，渰沒軍民男女以萬計。八月，大疫。十九年，泰寧大水。

正統九年，大饑。十四年，邵武、泰寧二縣饑。秋，大疫。

景泰六年，大饑。

天順二年四月，邵武、光澤二縣大水。四年秋，疫、饑。

成化二年，疫、饑。三月，光澤二縣饑。八年，大水。十年秋，旱。十一年四月，大疫，泰寧寇亂。十二年夏秋，大旱，泰寧民倡亂。十三年，光澤縣饑。十六年四月，泰寧大水。十七年夏，大水。十八年，饑。十九年，光澤饑。二十一年夏，淫雨，山水溢。二十二年，光澤饑。二十三年夏秋，泰寧旱。

弘治元年，饑。七年，光澤饑。十二年正月，大水、山崩，廬舍漂蕩。

正德二年五月，大水。六月、七月，旱。邵武、光澤二縣大疫。四年，邵武、光澤二縣饑。九年十二月，邵武火。十二年，邵武、光澤春夏旱，秋疫。十三年三月，邵武軍亂。七月，邵武饑。十四年，邵武、泰寧二縣大水。七月，疫，泰寧火。十六年三月，建寧縣水漲。六月，邵武火。十二月至次年四月，邵武民饑。

嘉靖元年夏，邵武火。秋，大疫。二年七月，邵武霖雨害稼。泰寧雨黑黍如蘆稜。三年八月，邵武火。七年正月，建寧火。二月，泰寧火。五月，邵武大水。八年七月，邵武大水，溪漲。十月，建寧火。九年四月，建寧大水。五月，邵武饑。七月，邵武大水。十一年九月，隕霜殺稼。十二年夏，邵武淫雨。九月至十月，米價大湧。十五年七月，邵武淫雨隕稼。十月，建寧火。十七年，建寧、泰寧二縣大雨雹。二十年十二月，邵武火。二十一年夏，霖雨，山水驟溢，邵武、建寧、泰寧三縣鄉市民船多爲所壞，瀕溪屋宇夷蕩尤甚，田苗淤沙，人畜有溺死者。

漳州府

梁

大同六年，九龍晝戲西江。

唐

開元十三年十一月朔，漳浦縣梁山祥雲現，絢爛亘百里，彌月而止。

宋

咸平二年十月，山水泛溢，壞民舍千餘區，州民黃擎等十家溺死。

治平四年秋，地震，裂長數十丈，濶丈餘，有狗自中出，視其底，皆林木，枝葉蔚然。

熙寧十年，饑饉。

崇寧元年，旱。

政和七年二月十二日，甘露降於司理院雙梅上，光燦射日，味甘如飴，三月未晞。

紹興四年春，威惠廟燕堂中山茶葉上下吐兩花如龍爪，一本五出，一本八出，青綠色而有異香。十四年，靈芝三莖產於郡學戟門之東櫺。十六年，有瑞蓮同蒂異萼，產於郡學直舍前池中。十八年，漳浦崇照鹽場海岸連有巨魚，其一高數丈，割其肉數車，不動，及剗其目，乃轉驚震，旁船皆覆。又其一爲漁人所獲，長二丈餘，重數千斤，剖之有人橫腹中，膚髮如生。

隆興二年，大旱，首種不入，自春至八月。

淳熙四年，州守治災，守趙公綱建堂署，方度地，間有白鶴自空而下，翱翔飛舞，有薦數十從之，移時乃去，因名其堂「至鶴」。十年九月乙丑，大風雨，水暴至，州城半沒，浸八百九十餘家。十一年四月不雨，至於八月。是年，亡禾，令守臣賑粟貸種。

嘉定九年五月，大水，漂田廬害稼。十六年秋，大水，壞田稼十之五六。

紹定九年，龍江書院仰高堂產芝九莖，色如截肪。

淳祐九年，祠山門前桂樹上花一簇十四莖，莖間五葉，狀如紅梅。

元

至治三年九月，水。

泰定三年九月，水。

皇朝

洪武十三年，南靖縣颶風大雨，折木發屋，民被死傷。

永樂五年，龍巖縣夏旱。

宣德三年，龍巖縣夏疫。五年，長泰縣狀元林震將登第時，其家門前兩井鳴三日。

正統十年十一月癸未，地日夜連九震，鳥獸之屬皆辟飛走，山崩石墜，地裂水湧，公私屋宇推壓者多，凡百餘日乃止。龍巖、長泰、南靖其震皆同。

天順五年五月戊午夜，風雨大作，墜石拔木，洪水泛溢，漂人畜甚衆。龍溪縣鴻山崩，杉木隨陷。漳浦縣漂人畜尤甚。七年七月，疾風暴雨，北溪洪水漲，平地深五丈，柳營江橋亭漂沒無遺。

成化十年四月，大鳥止郡庭榕樹上，身色青灰，翅黑，嘴足淡紅，頭舉高丈餘，舒其翼盈二丈，攫紫背白鷺而吞之，（一）後爲弩人射死。七月戊午夜，暴雨不止，山崩，洪潦奄至，城垣幾沒，人物漂蕩，浮屍蔽江，軍民廬舍壞者不可勝計。丙申、丁酉歲，漳浦大饑。十二年，大旱，至八月中旬。漳浦七都坂下社有

物若雲片亂墜，形類猴猿相接引，長一二丈，初活動，少頃消滅。十八年秋八月甲寅夜，火燔雙門樓及公私廬舍數百區。二十一年春，霖雨，龍溪、漳浦、龍巖、南靖、漳平五縣田廬、禾稼多壞。

弘治十五年，龍溪縣十一都有泉自東埭山暴湧而出，漂石流沙，壅田數十畝。十六年秋七月，長泰縣大水漂沒民居。十七年四月，文山大楓樹上產異花一簇，其狀如蘭，其葉如桂，有殊香，凡四十日乃謝。九月，西方有大星墜地，其聲如雷，園蔗燒枯。末年，漳浦九都有巨魚入港，潮落不能去，鄉人爭剖其肉，時賴濟饑。

正德四年，漳浦蝗入境食禾稼，令胥文相爲文以祭，害旋息。八年、九年，饑。十四年秋八月，平和縣地震。詔安縣漸山上龍起，聲如推屋，山塌裂深廣丈餘。十五年二月二十五日，長泰縣地大震，其聲如雷。

嘉靖四年，歲大稔。七年，龍溪、龍巖、平和、甘露降松柏上如霜錫，食之甘。漳浦梁山鳴，凡三日乃止。其年春，甘露降於松栢，潔白凝沍，味甘如飴。守臣以聞。八年，長泰元夕張燈譙樓前，自相蹂死者凡百有七人。本年，埭田蔡世美聽後妻讒，殺其子有雄。鷄生一獸如貓兒狀。十月，平和白虹見。九年，漳浦饑。其春，麥熟，山竹生實如米，採之數百石，饑民賴之。十年，彗見西方，踰年始沒。十一年，彗見東方，冬盡乃沒。十一月，龍巖、平和雨雪尺餘。自是年，歲大熟。十二年五月十三日，龍巖縣大雨，壞東西二橋。十四年，平和夏旱，秋大水。十一月，海澄八都火，延燒千餘家。十五年，南靖大旱，蝗起。十六年，又旱。龍溪甘露降。十七年，長泰上曷地方巨石無雷裂數十片。平和縣春三月地震。龍巖冬大疫，至次年三月。二十一年，龍溪、長泰二縣地震，自四至六月凡三震。平和縣清寧里龍見，黑紅色，飛人雲，

自北而東，移時沒，既大雨。二十三年，龍溪、平和二縣大饑。海澄縣九都火起，燒數百家。漳浦縣大饑，自二十三至二十五年。二十四年正月十六日夜，南山寺災。是年，旱，龍溪、漳浦、長泰、龍巖、南靖五縣俱大饑。平和縣有虎患。長泰、龍巖二縣夏六月大雨雹，大水漂廬，禾稼傷。二十五年，饑。秋七月，龍溪縣雨雹。二十六、七、八年，連歲俱大熟。春三月，龍巖大雨，水漲，敗田廬。二十七年三月，二白虹頭貫日中，其長竟天。漳浦縣大水，漂溺民居。二十八年五月五日，南河競渡，城中男婦盡出，相率粧採蓮船游翫，忽午後颶風大作，船覆，溺死者六十餘人。是冬十月，地震，漳浦、龍巖、長泰俱地大震。三十三年，郡城黑雨，水面浮煙動搖。本年十二月，龍巖縣除夕西北有三星隕，未至地數丈，向東南流，如二朱鳥，頤頤相逐。三十四年春二月，府治災。龍巖縣登高山丘宅井開蓮花。夏四月，長泰縣有群虎出害人，欽化地方尤甚。三十六年，亦如之。三十五年春二月，彗星見北方，長丈餘，凡三十餘日乃滅。三十五年，龍巖縣歲連熟。三十六年，詔安縣三月十二日午時雨雹，大如鵝卵，破屋者，二時乃止，四都爲甚。三十七年三月，漳浦、海澄雨雹，大如斧，碎屋傷畜無數。六月，有黑雲降於郡西郊，溝水皆沸，屋瓦亦飛。其夜，有大星隕。十月二十四日，詔安紅水隨潮上，瀕海居民取蟻食者多死。三十八年六月十六日夜，海澄縣一鼓時有星隕如雷，自西北方起。是年十月，漳浦有星墜地，大如斗，自西及東，其聲如雷。三十九年七月，大水夜至，黃井村民有全家漂沒者。四十年，龍溪、南靖二縣春夏旱，穀貴。四十一年，又旱。四十二年夏，大水，高三丈餘，壞龍溪、南靖二縣民田千餘頃，漂流民居百餘家。四十三年六月，南靖縣北大帽山鳴三夜。秋，復大水，淪男婦五十餘口，漂民廬二百餘區。長泰縣林前地方，一日，三虎下山，噬一家男婦七人。四十四年，南靖永豐里雨雹，大如鵝卵，折樹碎瓦，人畜俱傷。詔安縣二月初六夜，東

北城上鋒尖出火。四十五年，龍溪縣三月十二日黑光摩盪，自辰至巳。十月，南靖後堀、院前、阡丘等處池水滾起尺餘。詔安五都村自七月不雨，至於來春二月，井水皆渴。四十六年，（一）龍巖縣正月二十九日地震。

隆慶元年，平和縣正月二十九日地震。二年三月十七日，海澄縣有黑雲挾龍自八都東方起，捲尾裂瓦，火光倏忽，燒燼苗蔬，古塚棺槨亦有擊移者，至港口而滅。三年至四年，連歲大熟，米斗直錢二文。四年夏六月初六日，龍溪、漳浦、長泰、南靖、平和五縣烈風暴雨，洪水漂沒民居不可勝數。七月初十日，長泰縣良岡、石高山二山鳴，五夜乃止。十二月十七日夜，南靖屋隕，鳴如雷。五年四月十三日夜初鼓，海澄縣八都月港橋板忽壞二間，溺死者一十三人。

萬曆元年六月二十四夜，月港橋失火，燒店屋百有餘間。六月，旱。七月，大雷雨。是年，南靖縣程溪民歐氏生兒六手，隨死。九年五月二十四日，有龍起於十一都蘆洲渡江里，至雲洞而止，禾稼損傷而無風雨。十八年庚寅四月，穀貴，城內外饑民聚衆搶掠大戶數十餘家。知府李載陽召兵緝捕，逾三日乃定，執倡亂者斬於福州。六月二十一日，大風自卯至辰，吹折東門、北門二樓，拔木壞屋不可勝數。十九年辛卯二月二十九日夜，長泰縣獄囚叛，殺傷縣官。二十年，長泰縣大雨雹，小者如卵，大者如拳。二十一年四月初九日申時，雷震府文廟及明倫堂。二十三年七月十九日、二十日，大風雨壞民廬舍，漳浦、銅山發屋拔木。二十五年春，遍地生毛。八月二十八日，溪池自湧，水溢數尺，各縣俱同。二十六年正月十六日，淨衆寺前火藥局井中藥自生火，（二）爆發，震劈旁居男婦二十七人，房屋碎壞百有餘所，聲聞百里。六月二十日，平和縣東廂外陳孫家雷震，適幼孩在轎中，轎飛出屋外打碎，孩跌地存。二十八年八月二十

三夜戌時，地異常震。二十四日酉時，又震。二十九年九月二十二日，大水壞新橋，聞聲數里。十月十一夜戌時，地大震，子時又震。至五更，有星變如雨。三十一年八月初五日未時，颶風大作，壞公廨、城垣、民居。是日，海溢堤岸，驟起丈餘，浸沒沿海百里龍溪、海澄二縣民舍數千餘家，人畜死者不可勝計。有大番船漂衝入石美鎮城內，壓壞民舍。十一月初九日，地大震有聲，連震二十餘日，至十二月初始靜。三十六年正月，疫起，至五月。又自三月不雨，至於六月，人渴米貴。三十九年六月二十日戊辰申初，慶雲見於郡城西北，五色彌天，移時乃散。四十五年六月，大雨水異常。

福寧州

宋

建炎二年七月一日，建寇葉儂焚燬寧德縣治及城郭，民廬悉爲灰燼，惟文廟獨存。

紹興十四年五月，寧德縣淫雨水漲，漂流官民廬舍，人畜多溺死者。六月，詔下賑恤。

乾道元年四月至六月，不雨，田禾皆槁。五年，長溪大火，道士陳使君者居鄉，和同而賦性剛介，火將逼於居，鄰黨相率請避，^{〔一四〕}陳曰：「吾平生毫無私枉，今天降災，必不及我。」焚香於庭，朝夜而禱曰：「此屋皆清俸之餘所建，神天其監之。」須臾，四向皆爲煨燼，惟陳一區獨存。

淳熙十年八月己未，浮雨，至於九月乙丑，大風雨，水暴至，長溪、寧德二縣瀕海聚落廬舍皆漂入海。

元

至元二十一年，火，焚寧德縣治及民舍二百餘家。

皇朝

洪武七年，火，延燒寧德縣廟學及民居百餘家。

永樂十七年三月至五月，不雨，禾秧不植。

景泰五年七月十四夜，寧德縣颶風大作，壞禾覆舟，人溺死者無數。六年五月十四日，寧德縣驟雨，水暴至，隴田流壞，禾苗俱廢，是歲民饑。

成化三年五月，寧德縣六畜俱生蛇蟲。十三年三月，虎入寧德縣城。十六年閏八月，白鶴南山有聲，隱隱如雷。十八年七月十九夜，寧德縣暴雨，各鄉山崩屋壞，人被壓死者甚衆，水漲十餘日，田禾盡死。十九年，寧德縣海嘯，鄉都塘田俱陷成海。二十一年，霖雨連旬，洪潦泛溢，州境及福安縣田稼多爲所傷。二十二年春，旱，五月以後大旱，禾稼薄收。三月，寧德縣連日大雨，水漲，民疾疫，十無一二寧者。六月，地震。九月，又震。寧德縣自十八年至二十三年相繼凶荒，斗米百錢，民皆取蕉頭、蕨根充饑，路多餓殍。二十四年，寧德縣又旱。

弘治五年三月，寧德縣鄉村群虎縱橫，多傷人畜。十年秋七月，淫雨，至十五夜，寧德縣西鄉北洋山蛟出，大風雷電，各都山溪並漲，頃刻水高二丈，漂壞田廬、橋梁無算，人畜溺死甚衆。十四年三月，寧德縣小嶺山鳴如雷，三時乃止。

正德二年，寧德縣大疫。三年五月，旱，至七月不雨，寧德縣田禾皆槁。七月三日，寧德縣儒學古榕樹上各巢禽數百，飛繞四日。至七夕夜，火，從鳳池境延燒廟學及縣治，火星飛過城牆，城內外人家各燒三百餘家。寧德縣八月以後大疫，死千餘人。四年八月二十夜，颶風大作。十月望日，大霜連日，寧德縣

三都、六、七都荔枝、龍眼皆殺死，自是二果遂稀。五年，地一月三震，聲如微雷。十二月十八日，大雪連日，平地深尺餘。六年六月八日夜，寧德縣雨雹，大如鵝鴨卵，屋瓦打碎飄積溝澮，水湧倒流。

嘉靖五年，寧德縣六月至七月不雨，地如龜拆。九年八月十九夜，寧德縣颶風拔木。十一年九月八日，寧德縣大霜殺禾，西鄉絕收，餘都得半。十二年夏，大雷，寧德縣二十二都虎潭鄉松樹可數十圍，雷分作兩半，自根至頂，中間相去五寸，宛如鋸解。八月十二夜，寧德縣颶風大作，折木飄瓦。十月，地震有聲。十三年六月，寧德縣南山鳴二晝夜。十五年，地震。六月，兩虎往來寧德縣西南門，五日不去，知縣程世鵬爲文告城隍，乃遁。十六年冬至後一夜，大雨雷電。二十一年壬寅六月，大風，摧折樹木如割麻。二十二年癸卯五月，地震，房屋搖動有聲，硯水潑躍。六月，寧德縣二十二都虎潭鄉林、鄭二家忽有蛇數千，大小不一，遍地充滿，日漸加多，蜿蜒蠕動，狎人不傷，月餘始絕。二十五年丙午春，寧德縣有米穀從白鶴峰後飛過四都金字峰，不知所止。二十九年五月間，寧德縣儒學泮池水赤，早淺紅，至午大紅，渾如鮮血，及晚轉黑，如是者五十餘日，人以器盛之，亦一日三變。次年，倭賊陷城，瘟疫大作。

隆慶元年丁卯七月，大風，拔木摧屋，瓦如蝶飛，寧德縣二都蘇家石臼括去丈餘。六年，寧德縣鄭洋虎人民居，登樓攫人。

萬曆元年癸酉二月，寧德縣有皂隸阮五者，性凶悍，後改爲漁，撐船至東門外三叉港被雷打死，軀殼雖完，骨皆粉碎，一身衣裳無跡。是年，寧德縣西鄉二十三、四、五都群虎害人，行旅樵採必同數十人鳴鑼鼓譟乃敢往，自春徂秋，其患始息。八年壬午四月，^(一五)寧德縣米穀飛集白鶴巖。十二年九月，寧德縣火，從鳳池境延燒，通縣民居三去其一。^(一六)二十七年庚子，^(一六)雨雹。三十一年甲辰，^(一七)地大震。三十五

年戊申七月十五日，〔一八〕寧德縣颶風大作，林木盡折，海洋人船覆溺。

〔校記〕

〔一〕「冬」下，各本原衍「月」字，據文義刪。

〔二〕「是年」下，各本原闕「字」。

〔三〕「五年正月夏旱」，當作「五年正月春旱」或「五年四月夏旱」。

〔四〕（嘉靖）「十六年丁酉」，各本原作「十六年丁巳」，據方詩銘《中國歷史紀年表》改。

〔五〕「元」字，各本原脫，據弘治《八閩通志》卷八十一《祥異》及方詩銘《中國歷史紀年表》補。

〔六〕「五」字，各本原脫，據弘治《八閩通志》卷八十一《祥異》及方詩銘《中國歷史紀年表》補。

〔七〕「正德十五年己卯」，據方詩銘《中國歷史紀年表》，當作「正德十四年己卯」或「正德十五年庚辰」。

〔八〕（正德）「十七年辛巳」，據方詩銘《中國歷史紀年表》，當作「十六年辛巳」或「嘉靖元年壬午」。

〔九〕「地裂泉」，據《八閩通志》卷八十一《祥異》，當作「地裂泉涌」。

〔一〇〕「兵民」，各本均作「丘民」，據《八閩通志》卷八十一《祥異》改。

〔一一〕「攫」，各本原作「攫」，據文義改。

〔一二〕（嘉靖）「四十六年」，據下文及方詩銘《中國歷史紀年表》，當作「隆慶元年」。

〔一三〕「火藥局」，各本原作「大藥局」，據文義改。

〔一四〕「鄰黨」，各本原作「鄰當」，據文義改。

〔一五〕（萬曆）「八年壬午」，據方詩銘《中國歷史紀年表》，當作「八年庚辰」或「十年壬午」。

〔一六〕（萬曆）「二十七年庚子」，據方詩銘《中國歷史紀年表》，當作「二十七年己亥」或「二十八年庚子」。

〔一七〕（萬曆）「三十一年甲辰」，據方詩銘《中國歷史紀年表》，當作「三十一年癸卯」或「三十二年甲辰」。

〔一八〕（萬曆）「三十五年戊申」，據方詩銘《中國歷史紀年表》，當作「三十五年丁未」或「三十六年戊申」。

閩書卷之一百四十九

萑葦志

福州府

宋

鄭廣 海寇也。陸梁莆、福間，驅駛兵犀，雲合亡命，無不一當百，自號滾海蛟。有詔勿捕，命以官，使主福之延祥兵，以徼南溟。廣旦望詣帥府，群僚以其故所爲，徧賓次，無與立談者。廣一日晨入本衙，群僚偶語風簾，或及詩句，廣矍然起於坐曰：「鄭廣粗人，欲白拙詩，可乎？」衆屬耳。乃長吟曰：「鄭廣有詩上衆官，文武看來總一般。衆官做官却做賊，鄭廣做賊却做官。」滿座慚噤。章以初好誦此詩，每曰：「今天下士大夫愧鄭廣多矣！」

元

至元十六年，獲福州叛賊林天成，戮於市。

皇朝

洪武四年，永福賊溫九作亂，寇掠鄉里，有司捕之，逃去。復來寇，義士楊惟吉率衆圍獲之。

泉州府

隋

王國慶 隋氏人。江表自東晉已來，刑法疏緩，世族陵駕寒門。隋氏平陳之後，牧民者盡變更之，蘇威復作「五教」，民無長幼，悉使誦教，世族莫不嗟怨。民間復訛言欲徙之人關，遠近驚駭。於是，婺州汪文進、越州高智慧、蘇州沈玄愔皆舉兵反，自稱天子，署置百官。泉州人王國慶與樂安蔡道人、蔣山、李稜、饒州吳世華、溫州沈玄微、杭州楊寶英、交州李春等，皆自稱大都督，攻陷州郡，執縣令，或抽其腸，或齣其肉，曰：「更能使儂誦五教耶？」詔以楊素爲行軍總管討之。諸反者前後被素擊破，獨高智慧走保閩越，而王國慶自恃海險北人不習，殊不設備。素從會稽泛海奄至，國慶遑遽棄州縣，餘黨散人海島或守溪峒。素分遣水陸追捕，密令人說國慶斬送智慧自贖。國慶執送智慧，泉州餘黨悉降，江南大定，則開皇三十年也。（二）

宋

建炎中，楊勅寇安溪，還集里人鄭振率鄉兵破走之。紹興十三年，盜四起，號曾少龍、周老虎、何白旗、陳大刀、詹鐵義，擁衆數萬。帥司檄鄭振擊之，賊遁去。十六年，詹鐵義復來寇，振率衆興敵，手殺數十人，遂死之。

元

至元二十五年，湖頭賊張治罔掠泉州。二十六年，南安縣賊陳七師反，討平之。

至正三年，泉州民劉應總作亂，命江浙行省遣兵捕之。十四年八月，安溪賊李大，南安賊呂光甫、劉廣仁等陷仙游城，執達魯花赤倒刺沙殺於龍華寺。三月，萬戶成三寶以福州軍及關作官保兵敗之於大濟溪。二十六年，泉州賽甫丁據福州路，福建行省平章政事燕只不花擊敗之，餘衆航海還據泉州。

皇朝

嘉靖二十六年，劇寇陳日輝聚黨據安溪覆鼎山大小尖、白葉版諸峒，不時出掠。是冬，突至同安郭外劫贖男女挾贖，屯二十里弗去。分巡僉事余熿督兵驅回安溪，直搗其穴，平之。嘉靖季，倭亂本郡，作賊者有呂尚四、褚鐸、潘荷海、江一峰、謝愛夫、蘇光祚、施思切、高老清、江曾老、李五官。

建寧府

高宗建炎二年，建州卒葉儂叛。先是，元年，建州軍校張員等以州司不支卸甲錢，謀作亂，執守臣張勳，轉運使毛奎爲所殺，判官曹仔嬰城自守。二年，轉運判官謝如意執員等六人誅之。是年六月，儂遂作亂，寇福州陷。七月，三人寧德縣，復還建州。朝命御營中軍統制張俊同兩浙提點刑獄趙哲率兵討之，大破儂兵於建州城下，儂遁而降，復謀叛，尋擒斬之。四年七月，建州民范汝爲作亂，命統制李捧討捕之，復命福建安撫使程邁與會兵。捧擊汝爲於建州，官軍潰，自遁去。十月，遣前御史臺檢法官謝嚮招汝爲。十月，復命神武副將軍都討制辛企宗討之。十二月，汝爲降，詔補民兵統領。紹興元年正月，嚮率汝爲討平建陽賊劉時舉。二月，以辛企宗爲福建制置使，詔企宗及嚮罷遣汝爲兵，汝爲不聽命。六月，崇安民廖公招合汝爲餘黨熊志寧作亂。既散，志寧復與建陽民丁朝佐合兵陷二縣。八月，遣企宗移軍福州。

討志寧及胡江等諸賊，尋遣御史胡世將督捕。十月，汝爲復叛，入建州，守臣王浚民棄城走。企宗退屯福州。汝爲犯邵武，守臣吳必明、統制李山率兵拒之，衆潰，退保光澤縣。十一月，以孟庾爲福建、江西、荆湖宣撫使，神武右軍都統制韓世忠副之。是月，汝爲犯光澤，李山走信州。十二月，汝爲遣葉徹寇南劍州，守臣張巒拒戰，大破之。企宗仍罷，追三官。（三）率兵赴軍前自効。二年正月，世忠兵至建州，直抵鳳凰山。五月，破之，汝爲自焚死，斬其二弟及附賊者。時建民附賊者衆，世忠欲盡誅之，李忠定綱政寓建州，告世忠止之，令其同前脅從者汰遣，所生子女悉皆育之。二月，以施逵、謝嚮、陸棠黨汝爲，逵除名，婺州編管，嚮、棠械赴行在，俱道死。按：棠，楊龜山女婿也。初見龜山，容貌莊整，端坐不動，每來必如是，以此善之。一日，引入書院坐，久，忽報有客，龜山出接，棠凝坐如故。宅眷壁外窺之，大致驚異。棠別去，家人以告龜山，愈爲所取，以女妻棠。汝爲作亂，棠乃入其黨中。逵故與歐陽穎士、吳宗友善，蘊文章，富材藝。少游鄉校，有僧善風鑒，過其家，援手周視，口：「子有奇相，他日當語子。」又數年，遇諸塗，逵方躡場屋，不勝困，因扣所向。僧復援逵手曰：「面有權骨，可公可卿。而視子之身，毛皆逆上，且覆腕，然則必有合乎此而後可貴也。」時汝爲汀建、劍，逵心欲以嚴莊尚讓自期，而未脫諸口，聞僧言，大喜，杖策徑謁，干以秘策。汝爲亟尊用之。汝爲敗，變服爲傭，渡江，易名曰宜生。至泰州，有吳翁者，家僮數千指，宜生傭其間三年。一日，翁屏人問曰：「我視爾非傭，必實告，不然，捕爾於官。」宜生初不服。翁曰：「日者燕客，執事咸餒，汝獨孫諸儕，撤器有噫聲，若飲然不怡此魚服而角也。我將全汝，何以文爲？」宜生告之繇，翁曰：「官購方急，汝安所逃。」龜山主僧余之心交，汝宜往投。」介以人，比至寺，主僧出見，鄉校舊識也。便留數旬，持橈夜濟，宜生於淮上，曰：「必得志，毋忘中國。逆而順，天所祐也。」虜

法，無驗不可行，遂殺一人，奪其符。至燕，上書自言道國虛實，不見用，縻之黃龍。會赦得釋，因以教授自業。虜有附試畔歸之士，謂之歸義，試連捷。逆亮時有意南牧，較獵國中，一日而獲熊三十六，遂以命題試士。宜生奏賦曰：「聖天子講武功，雲屯八百萬騎，日射三十六熊。」亮覽之喜，擢爲第一。不數年，仕至禮部尚書。紹興三十年，虜來賀正旦，宜生以翰林學士爲之使。宋人聞之，命張焘以吏部尚書館之都亭。時戎盟方堅，國備大弛，而諜者傳造舟調兵之事無虛日，上意不深信。館者因以首丘風之，至天竺，微問其的，宜生忽度語曰：「今日北風甚勁。」又取几間筆扣之曰：「筆來！筆來！」於是始大警。及高景山告變，而我粗有備矣。歸爲介所告，虜人烹宜生也。

元

至元二十六年，建寧賊黃華弟福，結陸廣、馬騰，復謀亂，事覺皆論死。

延平府

宋

紹興二年，順昌賊余勝等作亂，通判南劍州王元鼎捕殺之。

皇朝

鄧茂七，沙縣人。正統十三年，御史柳華按閩，檄諸郡縣嚴守城郭，鄉巷里門創柵立隘，重疊合還爲複屋，各置金鼓，鈎刀凶器具有。村落無大小各立望高樓，小者立其中間，大者立於四維。鄉民各設總，小甲統率之，夜則番直鳴鼓擊柝，以備不虞，不從者聽總、小甲懲治。所在嚴警，若大寇將至。繇是，總、

小甲各得號召其鄉人，藉此生事豪奪。而茂七與其弟茂八，健兒也，被編爲二十四都總甲。鄉例，佃戶歲還田主租外，有鴨、米餽，名曰冬牲，佃戶納田主租當負擔送其家。茂七倡其鄉民率罷不應。田主訟縣，逮茂七。茂七等率衆拒捕，縣下巡檢司追攝之。茂七等殺其弓兵數人。縣以聞官司，官司召官軍三百往捕。茂七聚黨格鬪，遂殺巡檢及本縣官，刑牲歃血，誓衆反，是年之二月也。時福建參政宋彰者，交趾人，與中官有親舊，大肆侵漁，餽送王振，貪緣得陞左布政，計營所費，驗戶斂銀。貧下愁苦，久不勝怨，一聞茂七起，旁近尤溪縣民，聞風相煽，烏合萬餘。茂七僭稱剡平王，偽設官屬，殺千戶楊琮，虜千戶張能，延蔓八府，破二十縣。朝廷命御史丁瑄入福建捕撫，命左都督劉聚、右僉都御史張楷選調南京官軍、達官達軍同行征勦，命浙江、江西選調二千人聽聚指揮。巡按御史張海上奏：「自十一日茂七率衆攻延平，臣等與參政金敬登城諭以禍福，中有衣紅者言：『我等俱是良善，苦被富民殺害，有司官吏不與分理，不得已聚衆爲非，乞奏聞朝廷，儻蒙寬宥，即當自散。』既退，復來言：『我等家產蕩破已盡，乞免徭役三年，庶幾生聚。』臣等許以奏聞，即各舞蹈去。」上覽畢，諭兵部曰：「朕即位以來，惓惓以奉天安民爲心，累頒詔勅省刑赦罪、輕徭薄賦，凡可寬恤黎庶，無不用心。又戒勅官吏非奉朝廷明文，一夫不許濫役，一毫不許濫科，意在休息天下，共饗太平。比者鄧茂七等聚衆爲盜，所司請發大軍勦捕，朕雖遣衆調兵，然猶慮其出於不得已，必有激變之者，屢遣御史齎勅揭榜，叮嚀撫諭，庶保全之。茂七果爾悔禍，城下訴冤，自求生路，且冀寬免徭役。御史海以聞，朕悉從之。爾兵部其備述朕言，出榜往諭。榜文至日，不分罪犯輕重，但能洗心改過者，俱貸其罪，仍免徭役三年。凡遞年逋負，悉免追徵。」然茂七等卒不從命。其冬，復命寧陽侯陳懋佩征夷將軍印，充總兵官，保定伯梁瑤充副總兵，^(四)平江伯陳豫充右副總兵，都督僉事范雄充

左參將、董興充右參將，刑部尚書金濂參贊軍務，太監吉祥、王瑾提督神機銃砲，率京軍二萬、浙江漕運軍二萬七千人，合前調官軍征勦。是時，茂七擁賊徒二千餘逼建寧城結寨，時出擄掠。建寧知府張瑛及建安縣典史鄭烈帥民夫吳保等，會合都指揮使徐信等官軍，分三路乘霧暗襲之，斬首五百餘，拔其寨。上降勅獎諭，陞瑛福建右參政，掌本府事，烈本縣主簿，授保爲巡檢。其明年春，沙縣民羅汝先詭爲從賊，誘茂七復攻延平。御史丁瑄督官軍分路衝擊，賊大敗。茂七爲指揮同知劉福追及，斬其首，擒獲亡算。於是，招撫沙、尤、南平民爲所脇從者凡五百一十戶二千五百口。而賊黨尤溪鄭永祖復脇從四千人來攻，復爲都指揮雍埜、蔣貴所捕殺，永祖及其徒十八人皆被生擒，斬首以五百餘級。而陳懋等兵始至建寧，茂七餘黨復糾衆燒燬建寧治，邀截糧道。保定伯梁瑤復率官兵民壯分道勦之，_(五)斬首九百級，生擒七十餘人。朝命陞劉福爲指揮使，授羅汝先沙縣丞。於是，右參將都僉事董興等擒賊黨僞指揮翁覓等四十八人，斬首七十餘級於建寧。按察副使邵宏譽擒僞都指揮朱文華等十二人於南平。江西指揮吳玉勦殺賊徒千餘，擒僞百戶朱勇貴及從賊三人，獲其木印、銅印、飛虎旗號於建陽。左都督劉聚生擒僞都督等官羅以寧等二十九人及其徒三十三人於南平、順昌、甌寧諸縣。保定伯梁瑤敗賊徒於武步舖，殺百餘人，焚之清風洞，截其舟二百於水口驛，開通福州道。而沙縣賊首陳政景等糾清流等縣強賊藍得降等攻圍汀州府，亦爲都督僉事況真等所敗。汀州知府劉能，推官王得仁又潛遣人邀其歸路，擒政景等八十餘人。寧陽侯懋、按察副使宏譽復攻鄧茂七家屬於沙縣之陳山寨，獲之，并僞都督黃宗富等百五十五人、沙縣賊首僞總兵、總都督魏繼南、閻世屯、鄧伯孫等五十七人。於是，福建賊悉平。方榜文之下也，御史瑄遣人揭榜於沙縣，賊徒俯伏跪拜新恩，悔罪有日矣，御史澄遣人止浙江、江西兵毋來。越五日，知賊無降意，乃馳趣

之。浙江御史以聞兵部，劾澄止軍縱賊。福建三司亦奏賊勢初起，御史柴文顯匿不以奏，養成今患，於是並下法司獄。文顯、澄俱論失機，上命磔文顯，籍其家，斬澄於市。而前此福建都指揮僉事鄧安等奏御史華起膚狀，華已出山東按察副使，前死矣。上命籍華家，妻女送浣衣局，男子盡發充鐵嶺衛軍。華之死，人言其飲毒云。是役也，禮科給事中王詔、葉盛等奏：「福建盜賊生發，皇上命都督劉聚、僉都御史張楷統官軍勦殺。各官自到建寧，笙歌爲樂，笑傲自如。楷以平時所和唐詩逼下建寧府刊行，其於軍政置在度外。皇上知其不足濟事，復命寧陽侯懋等往。大軍一臨，賊始喪敗。楷等心懷奸詐，圖榮身家，乃奏私其子應麟等有功。夫應麟既無領兵之名，焉有獲功之實。楷在彼所作《除夕》詩有云：『靜夜深山動鼓鞀，斯民何苦際斯時。』又云：『亂離何處覓屠蘇，濁酒三杯也勝無。』又云：『庭院不須燒爆火，四山烽火照人紅』等句，流傳京師，爲人鄙議。跡其如此，存心可知。」而寧陽侯亦言當指揮劉福追斬鄧茂七於延平時，楷自建寧馳至，威脇丁瑄奏冒功。六科十二道復連章劾楷贖貨喪師，罔上欺下，法宜逮治。又當賊急時，布政使宋彰奏乞刊行《將門八寶箴》於諸臣及其子弟，使朝夕記誦，以發忠勇。禮部尚書胡濙言：「彰爲方面正官，既不承流宣化，又安於先，不能運籌設策勦捕於後，罪已不容誅矣。顧歸咎軍職，掩飾己罪，且所言《將門八寶箴》鄙俚淺陋，《武經》諸書俱所不錄，不學無術，莫辨妍醜，乞俟賊平之日，行文逮治。」上並從之。而亡何，車駕北征，有土木之變矣。

景泰元年，鎮守福建崇信伯費釗奏：「沙、尤二縣遭賊羅丕、廖寧等復糾合餘黨千餘，劫掠居民，殺尤縣主簿、快手不知其數。命副都指揮仲福領南京官軍二千，都督高禮選驍達軍同往殺賊。其月，沙縣賊二千餘突入清流縣，殺死民人，燒燬房屋。閏正月，蔓延萬餘，劫掠鄉村。是年十二月，鎮守福建都督

僉事范雄奏：「臣等分兵進剿沙縣餘賊，凡斬首六百六十，生擒一百八十，招撫九千四百八十，械賊林居等送京師。」

汀州府

宋

紹興十四年十二月，汀賊華齊寇縣，安撫司遣兵捕之，爲所殺，其將佐趙成等復舉兵滅之。

紹定二年，汀、邵盜晏彪等起。三年，分黨破龍巖、長泰，遂繇漳境徑犯永春、德化。招捕使陳韓提兵督捕，汀境平。四年，韓至邵武，彪力屈，降，誅之。

元

至元十七年四月，汀、漳叛賊廖得勝等伏誅。十八年十一月，勅誅汀、漳陳吊眼首惡者，餘並收其兵仗，繫送京師。十九年，征蠻元帥完者都等平吊眼巢穴，吊眼父文桂及兄弟桂滿安納款，命護送赴京師。其黨吳滿、張飛迎敵，就誅之。

至正六年六月，汀州連城縣民羅天麟、陳積萬叛，陷長汀縣。福建元帥經歷貞寶、萬戶廉和尚等討之。八月，命江浙行省右丞忽都不花、江西行省右丞禿魯統軍合討天麟。九月，克復汀州。閏月，賊徒羅德用殺天麟、積萬，以首級送官，餘黨悉平。

皇朝

洪武二十年，盜鍾子人等寇長汀。

興化府

宋

太平興國三年，游洋民林居裔嘯黨作亂，自號西平王。時詔近地調兵，涵江人陳應功自請討賊，遂任前鋒，越溪谷鏖戰，死之。邑令黃禹錫同邑人陳僕射請乞兵於漕使楊克濟，討平之。十五年，山寇周老虎等犯仙游西鄉，武翼郎袁章力戰於磨石山，死之。又有丘析者，良家子，力戰於九座山下，親殺凶渠一人，賊遂退，後以深入，歿於陣中。

元

至正十二年，居民陳君信等陷仙游縣城，帥府經歷高本祖帥師至，君信走永春，縣尹盧琦獲之。

皇朝

弘治九年，廣業里資國寺僧徒烏七山作亂，虎捫梟磔，勢不可支。後營於興泰里，爲邑勇士魏昇所殺。

嘉靖四十三年九月，仙游撫賊蘇校、蕭學壽復叛，突入蓬壺。知縣謝裘召義士黃光甫合各都義兵禦之，戰於錦斗，擒斬過半。鄉民林鐸率兵助之，餘黨遁。謝知縣追至安溪，生擒殺死無遺。是年，倭復至永春，攻烏洋寨，黃光甫拒之於大埕，兵黃道、黃元六死之。賊復還仙游，遂爲賊總兵所破。

邵武府

元

至正間，建寧賊應必達召宜黃賊涂一、涂祐、新城賊重違等陷建、泰，吳按漸不花平之。

漳州府

宋

紹興十四年十二月，汀賊華齊寇漳州長泰，安撫司遣兵捕之，爲所殺，將佐趙成等死之。

淳熙十三年，草寇楊勛等五百餘人突入長泰縣境，民居官舍秋毫無犯。繼是，有華寇聞諸朝命，韓總管追捕獲俘首以獻。又有鹽商廖官、沈射等寇訖就招降。

紹定元年冬，鹽商寇龍巖近境，縣令趙善政調爐丁黃輝部槍手防捍縣治。輝到縣庭參謁，吏楊悅需求弗獲，白於令，以後至撻之。輝怒去，殺牛灑酒，集惡少夜殺舖卒，至縣廨抄掠無所獲，出西門劫居民馮氏，從龍門里過汀州界逸去。官司分路追躡，自次名而下皆就獲，獨輝賊網漏。繇是，有庚戌甲午之變。

淳祐四年七月，虎嶺寨兵湯興爲權縣丞廳差，至期不還，遂從凶徒吳七三聚黨行劫。至縣表政里白土張坊村，與巡尉鄉兵遇，殺巡檢官及弓兵等若而人。迨八月，吳七三之黨後至龍門里赤水坑東村，所過殺傷者甚衆。郡守章大任調兵掩捕，生擒湯興、吳七三戮於市，賊黨遂平。

元

至元十七年，陳桂龍據漳州，及唆都率兵討之，桂龍亡入畚洞。二十六年，畚民丘大老集衆千人寇長泰縣，福州路達魯花赤脫歡同漳路總管高桀討平之。十一月，漳州賊陳機察等八千人寇龍巖，執千戶張

武義，與楓林賊合。福建行省兵大破之。陳機察、丘大老、張順等以其黨降。後至元四年，漳州南勝賊李志甫作亂。六年，義士陳君用襲殺之。三月，赦脇從志甫之罪，褒贈軍將死者。是月，龍巖縣黃佐才獲志甫餘黨鄭子箕。佐才因與賊戰，妻子四十餘口皆遇害。

皇朝

正統十一年，龍溪縣強賊池四海等數百人出剽掠。

弘治四年，漳平賊溫文進反，糾安溪，攻陷郡治。副使司馬聖督官民兵討平之。七年，有北溪妖賊黃日金倡亂，知府陸金乘其未發，計擒滅之。

嘉靖二十五年，詔安縣白葉洞賊陳榮玉、劉文養反，寇二省。南贛軍門檄平和知縣謝明德率典史黃瑜，二十七年正月以象湖小篆鄉兵討平之。四十二年十二月，龍巖縣土賊蘇阿普、魯東田等聚眾數千人，屯於龍頭寨，殺死漳平縣知縣魏文瑞。四十四年四月，龍巖縣積年賊首魯東田、馬元湘等久住龍頭寨爲亂，兩院南贛會兵，巡海道周賢宣督同同知鄧士元、^(七)參將王如龍勦滅之，改其寨曰殺狐嶺。

何子曰：豺狼蛇虺鷹隼螟螣，天不絕其生，寧以承平之世，無亂離之民？然而，攬觀閩志，宋之葉儂、范汝爲，國朝之鄧茂七、溫文進輩，並以胥役臺隸激於時政嚴猛忽玩之過，轉盼生心。弭盜必先安民，豈不重有司耶。要以閩之上游，山郡也，山寇易逐。其下四郡，則瀕海溟渤無際，飄忽不時，禦之爲難，故夫其道在備。而備之人徒以委之儒將債帥，則棄之矣。夫民當其無事，困之以法，及其有事，委之儒將債帥，安望晏寧哉？安望晏寧哉？

贊曰：民之居常，蹙額疾首。及其爲變，戈鈍甲朽。子之不欲，盜則有在。賢聖之言，垂戒千載。

〔校記〕

〔一〕「開皇三十年」，按隋文帝開皇僅二十年，當綴。

〔二〕「七月」，各本原作「七日」，據弘治《八閩通志》卷八十五《拾遺》改。

〔三〕「追三官」，各本原作「遣三官」，據弘治《八閩通志》卷八十五《拾遺》改。

〔四〕〔五〕「保定伯」，各本原作「保寧伯」，據下文及《明史·梁瑄傳》改。

〔六〕「伯」字，各本原脫，據《明史·費劍傳》補。

〔七〕「巡海道周賢宣督同同知鄧士元」，據《萬安縣志·周賢宣傳》及《徐聞縣志·鄧士元傳》，當衍「同」字。

閩書卷之一百五十

南產志(二)

稻 五穀者，麻、黍、稷、麥、豆。《周禮》：揚州、荊州，其穀宜稻。閩屬揚州，當首稻矣。左思《三都賦》：國稅再熟之稻。宋馬益詩：「兩熟潮田天下無」，蓋美閩稻也。《說文》謂：稻爲梗、稷、稌屬也。稷，亦名秣。《字林》云：稷，黏稻，而梗稻不黏。今之食米皆梗稻，釀酒則稷稻也。《閩中記》云：閩人以梗稻釀酒，其餘蹂粉，歲時以爲糰粽粿糕之屬。福州曰梗，曰秣。春種夏熟曰早稻，秋種冬熟曰晚稻，歲一熟者曰大冬。山田冬種者曰早占，霜降後熟者曰天降來，曰薰提。與早稻同熟者曰黃芒，與晚稻同熟者曰占城，曰秣，又曰土秣。歲再熟者又曰金洲，曰白香秣，又曰糯。與早稻同熟者曰早秣，與晚稻同熟者曰晚秣，與大冬同熟者曰大冬秣。《湘山野錄》云：宋真宗以福建田多高仰，聞占城稻耐旱，遣使求其種，得一十石，以遺其民，使蒔之。此占城所繇名也。今八郡皆有占城稻。泉州曰早稻，曰早仔，曰師姑早，曰晚稻，曰大冬，曰寄種，曰青晚，曰占城稻，曰畚稻，曰白香，曰過山香，曰降來，曰大尖，曰小尖，曰中灌，曰新留，曰河南早，曰河南秋種，曰白柳，曰烏芒，曰林鳳，曰藿香，曰一秋紅，曰紅芒，曰天上落，曰八月白，曰蘇州紅，曰烏稻，曰金城早，曰栗殼，曰尤溪早，曰早秣，曰晚秣，曰大冬秣，曰赤莠秣，曰牛頭秣，

曰好穀，曰白秋秫，曰白占秫，曰花眉秫，曰虎皮秫，曰近山香秫，曰龍牙，曰班占。建寧曰六十日早，曰大糯，曰小糯，曰龍鳳早，曰半冬白，曰師姑早，曰九里香，曰大早，曰小早，曰天降早，曰爛泥早，曰七娘禾，曰小白禾，曰大白禾，曰小烏禾，曰大烏禾，曰野豬愁，曰無芒禾，曰真珠粟，曰麻子禾，曰公婆禾，曰銀珠秫，曰早禾，曰白禾子，曰烏禾子，曰厚芒禾，曰下馬看，曰白芒，曰黃穀，曰梗穀，曰白籼早，曰烏龍牙，曰紅糟秫，曰鋪城錦，曰溫州早，曰吳家傳，曰大師姑，曰小師姑，曰青絲禾，曰荔枝禾，曰猴尾秫，曰烏節秫，曰重陽秫，曰白芒秫，曰烏牙秫。延平曰秧歸，曰早子，曰金城早，曰江西早，曰天降，曰赤芒，曰白芒，曰赤殼，曰十溪，曰廖元山，曰早秫，曰晚秫，曰八月白，曰長芒，曰粟，山中野人間種之。汀州曰稻。興化曰早穀，曰糖，曰占穀，曰粟，曰青粱，曰黃粱。曰粱皆粟類。漳州曰早稻，曰晚稻，曰大冬稻，曰寄種，曰占稻，曰香稻，曰白柳，曰畚稻，曰糯稻。以上稻種不一，又八郡方言不同，有一種而異名者，具依本志列之如右。

黍 黍，暑也。《詩·名物》云：丹穀也。其類有黏、不黏，如稻之梗、糯。不黏爲飯，黏者亦名秫，以爲酒。古今註禾之黏者爲黍，以爲餽，謂之銀鏹。《楚辭》曰：秬枚蜜餌有銀鏹。按：黍，北人曰粱，浙人曰粟，泉中人有一種名稊，粒似黍而小。

稷 《說文》曰：五穀之長也。《月令》曰：中央土食稷與牛。五行土爲尊，故五穀稷爲長。閩中種稷殊少，惟明祀用之。《禮》：稷爲明粢。《左傳》：粢食不鑿。粢者，稷也。鑿，精細米也。《爾雅》亦謂粢稷。《本草》曰稊。《穆天子傳》：赤鳥之人，獻稊百載。《甌冶遺事》：稊米與黍相似，而粒大。按：此說是蜀黍也，北人曰高粱，泉曰番黍，浙人曰蘆稊。閩中山畝磽地，尚有一種穗如鴨脚，粒與黍相類，磨之

可以麪，其孚可以酒。

麥 《廣雅》曰：大，麴也，小，稜也。《本草》云：北方之麥，秋種冬長，春秀夏實，全備四時之氣，故無毒。南方之麥，冬種夏實，四時之氣不備，故有毒。有大麥，有小麥。有蕎麥，稈紅花白，實三稜而黑，秋花冬實。有穰麥，類麥，而殼稍異，福州曰米麥，泉州曰蔚麥，興化曰穰麥，福寧州曰玉麥，惟穰爲古名。

菽 《物理論》曰：菽，豆之總名也。有黃豆、白豆，可腐。有綠豆，可粉。有黑豆，可豉。有赤豆，有褐豆，有蠶豆，有紅光豆，有九月豆、畚豆。此外，又有豌豆、江豆、水豆、菜豆、樹豆、葛豆、藕豆、刀豆、皂夾豆、虎爪豆、蛾眉豆、蠶眼豆、蠶豆，可入蔬品，均豆也。

麻 八穀之良，其實爲苴。《詩》曰：九月苴苴，註麻實也。有黑麻、白麻。有胡麻，作角八稜，種出大宛，漢張騫得之。凡物自胡來者，皆曰胡，如胡荽、胡桃之類。一曰巨勝，兩頭尖銳，作角七稜，色純赤。二麻可爲飯，可爲油，俗云，必夫婦同種，乃茂。有大麻，可績布，《爾雅》所謂麻也。閩中名苧麻，績之曰縹，以成夏布，其用行天下。

芋 蹲鴟也，一名土芝。陶隱居曰：錢塘最多，閩、蜀、淮甸尤殖此種。《本草圖經》云：蜀川生，形團而大，狀如蹲鴟，謂之芋魁。閩中出者形長而大，小者如卵，生於芋魁之傍，食之尤美。有大種，有青芋，有紫芋，有真芋，有白芋，有連禪芋。

蕃薯 萬曆中，閩人得之外國，瘠上砂磧之地皆可以種，用以支歲，有益貧下。予嘗作《蕃薯頌》，可以知其概也。《頌》曰：一度閩海而南，有呂宋國。國度海而西爲西洋，多產金銀，行銀如中國行錢。西洋

諸國金銀皆轉載於此。以通商故，閩人多買呂宋焉。其國有朱薯，被野連山而是，不待種植，夷人率取食之。其莖葉蔓生如瓜蔓，黃精山藥、山蕓之屬，而潤澤可食，或煮或磨爲粉。其根如山藥、山蕓，如蹲鴟者，其皮薄而朱，可去皮食，亦可屬食之。可熟食者，亦可生食，亦可釀爲酒。生食如食葛，熟食色如蜜，其味如熟芋薺。生貯之，有蜜氣香聞室中。夷人雖蔓生不嘗省，然悛而不與中國人。中國人截取其蔓，忍許，挾小蓋中以來，於是，人吾閩十餘年矣。其蔓雖萎，剪插種之，下地數日即榮，故可挾而來。其初入吾閩時，值吾閩饑，得是而人足一歲。其種也，不與五穀爭地，凡瘠鹵沙崗皆可以長。糞治之則加大，天雨根益奮滿，即大旱不糞治亦不失徑寸圍。泉人鬻之，斤不直一錢，二斤而可飽矣。於是，耄耆童孺，行道鬻乞之人，皆可以食，饑焉得充，多焉而不傷，下至鷄犬皆食之。於是，何子開鏡石山房樹陰之隙地而種焉，而爲之頌曰：不需天澤，不冀人工，能守困者也。不爭肥壤，能守讓者也。無根而生，久不枯萎，能守氣者也。予向行江北，天大旱，五穀不登，民食草木之實亡厭，今乃佐五穀，能助仁者也。可以粉，可以爲酒，可祭可賓，能助禮者也。莖葉皆無可棄，其直甚輕，其飽易充，能助儉者也。耄耆食之而不患哽噎，能養老者也。童孺食之止其啼，能慈幼者也。行道鬻乞之人食之，能平等者也。下至鷄犬，能及物者也。其於士君子也，以代鹽焉，所以因其廉以廣施焉，所以助其惠而諸德備矣。而吾邑梁肉之家，猶駭焉而不敢食，食之則謂同於糞與賤，於是，何子掘而出之，浴之清泉，薦之潔鼎，乘之陶匏，沃以濁酒，而爲之歌曰：令珠而如沙，人以之彈鵲，令金而如泥，人以之塗腹，令朱薯而如玉山之禾，瑤池之桃，人以之爲不死之大藥。雖不死藥，不足佐五穀，吾亦不忍其禾玉山、桃瑤池，獨從羽人於丹丘，坐視下界之人瘁饑嗽嗽而不得一嚼。」

右穀食之屬。

薑黃 葉青綠而作有斜文，花白紅色，根盤屈而黃，類薑圓而有節。出邵武仙亭山。

菘菜 與蕪菁相類，梗長而葉不光者爲蕪菁，梗短葉潤厚而肥者爲菘。周頤所謂秋末晚菘是也。張九齡自函京携種歸曲江種之，閩中呼爲張相菘。曾師建記謂，北地無菘，南地無蕪菁，體性相似，而形狀不同，地上然也。

芥菜 《本草》曰：芥似菘而有毛，有青芥、紫芥、白芥、南芥、花芥、石芥。白者舊云自西戎來，名白胡芥。大抵南土多芥。取其子搗爲末，和醋食之，能使氣上昇，過後便自條暢。《埤雅》曰：望梅生津，食芥墜淚。

芥藍菜 《通志》曰：葉如藍而厚，青碧色，菜之美者。《興化志》謂：蜀中萬年青極相類，但此一年一種，萬年青累歲不易，味稍苦耳。

菠薐菜 又作波稜。劉禹錫《嘉言錄》：本出西域頗波國，訛頗爲波。《閩中記》以葉如波紋有稜，以義求之歟。按：波稜生北方者爲竹菠薐，莖長而爽。閩中者爲石菠薐，莖短而甘。

薤菜 蔓生，花白，莖中虛。摘其苗，土壓之輒活。一名薤菜。《遜齋閒覽》：本生東夷古倫國，蕃舶以甕盛之，故名薤菜。漳人編葦爲筏，作小孔浮水上，如萍根浮水面，莖葉皆出於葦筏孔，南方奇蔬也。

油菜 《通志》曰：葉如白菜，青色，根微紫，子可壓油，漳人呼爲油芥。

蔞菜 《齊民要術》曰：蔞，音罕，味辛。李時珍《本草綱目》云：蔞菜，冬月生田園間，柔梗細葉，三月開細花，黃色，結細角，內有細子。連根葉拔食之，味極辛辣。洪舜俞《老圃賦》：蔞有拂土之風，朱文

公飲後，輒以蔞莖供蔬品。

浮藤菜 《興化志》曰：葉圓而厚，藤相糾纏，子紫黑色，俗呼罈菜，取其和罈作羹爲佳。

苦益 宋劉暈詩：「雖無苦口味，暖益功稀比。菜苦不登盤，言忠多逆耳。」

蕨 《爾雅·蕨鼈》詩言採其蕨。《爾雅翼》曰：野人今歲焚山，則來歲蕨菜繁生，負荷者皆不肯食，云令人脚弱，名之以蕨，蓋謂蹶矣。其葉未抽時，搗其根可粉。皇朝政和令黃裳《採蕨詩》：「皇天養民山有蕨，蕨根有粉民爭掘。朝掘暮掘山欲崩，救死豈知筋力竭。明朝重擔向溪澗，濯彼清冷去泥土。夫春婦遽呼兒炊，饑腹雖充不勝苦。棠陰諸公知不知，朝夕思餐醴與肥。賑饑無策未足怪，胡忍剝我民膏脂？嗟予忝爲斯邑宰，致民多饑賴生泚。但願皇天憐爾苦，五日一風十日雨。雨順風調五穀登，蕨根滿山長不取。」清流人羅永恭《搗蕨歌》：「南村北村日卓午，萬戶喧囂不停杵。初疑五丁驅金牛，又似摧花拋羯鼓。原來村人搗蕨其，頃刻化作黃塵飛。一聲或高一聲急，聲聲透天徹地脉。婦男子侄爭獻力，傾筐漕漕流玉液。流玉液，還嘆息，今晨猶一炊，明朝無顆粒。山妻空倚門，癡兒號面壁。勤劬頻搗豈辭疲，全家擬療三時饑。堆盤炊熟紫瑪瑙，入口嚼碎明琉璃。溶溶漾漾甘如飴，但覺餒腹回春熙。息肩弛擔氣尚喘，荷鋤又入南山陲。君不見，晉安司馬食肉糜，艱難稼穡全未知。又不見，商山老人只茹芝，豈識有此風味奇。賢愚千載誰是非，我歌躑躑聊解頤。方今太倉徒爾爲，賑恤詔令聞見稀。蒼生如此困貧餒，安得斗米三四文錢時？」

紫菜 一名索菜。《吳都賦》綸組紫菜。舊志曰：其生黏帶石上，潮浸其散羣羣然，潮落復黏於石。嫩者撻取之而成索，長者摘取之則皆解散。生時正青，乾則色紫。近海諸邑皆有之，出福清尤佳，成葉如

非。

赤菜 《海物異名記》曰：海生而紫蔓，其大者爲鹿角菜，一名猴葵。《南越志》曰：猴葵，色赤，生石上，謂之鹿角，以其莖有岐也。

苔垢菜 紫菜取盡，就上復生苔衣，狀類浮垢。

藍菜 生海巖上，味甜。

石花菜 生海礁上，性寒，夏月煮之成凍。

鷓鴣菜 生海石上，散碎，色微黑。小兒腹中有蟲病，炒食能愈。

蠟菜 生海中邊沙地上，長半寸許，成簇面綠。

虎栖菜 生海石上，穗長二三尺許，葉如蘭蕙，微黑色。出漳浦。

羊栖菜 生海石上，長四五寸，微黑色。出漳浦。

鵝腸菜 生海石上，長四五寸，其薄如帶，色黃。漳浦多。

線菜 生海中沙地上，其長如線，色微紅。出漳浦。

神黛 生海邊泥泊上，葉蒼蒨如黛。歲饑，和米作粥食之。出漳浦。

海苔 綠色，如亂絲，生海泥中。其細嫩者名濕苔。

燕窩 皇朝王世懋《閩部疏》：燕窩菜，竟不辨是何物，漳海邊已有之。燕飛渡海中，翻力倦，則擲置海面，浮之若杯，身坐其中，久之，復啣以飛。陳懋仁《泉南雜記》：（三）閩之遠海近番處，有燕名金絲者，首尾似燕而甚小，毛如金絲。臨卵育子時，群飛近沙沙泥有石處，啄蠶螺食。有詢海商，聞之上番云，蠶

螺背上肉有兩肋如楓蠶絲，堅潔而白，食之可補虛損。已勞瘵，故此燕食之，肉化而肋不化，并津液嘔出結爲小窩，附石上。久之，與小雛鼓翼而飛，海人依時拾之，故曰燕窩。而予近聞之漳人，殊爲不然。燕窩，大海中有高山，冬月，群燕來巢其上。燕矢之厚，没人兩膝。春時生雛，羣之窩中。燕窩，貧夷領我中國貧人取之林中，捏搦窩毀子墜，顛覆闌干，燕之雌雄，群然悲鳴，傷物特甚。嗚呼！誰謂燕窩蔬房哉，生命之苦，過火燔刀割矣。蘇長公謂，雖八珍之美，投筯而不忍食此物！此志耶。

右蔬屬。

甜瓜 質長文微，有瓣，瓢黃色，俗呼黃瓢瓜。曹氏浮甘瓜於清泉，想卽此也。

土瓜 一名葛，食之醒酒。《爾雅翼》曰：鷄齊，一名鹿藿，一名黃斤。今之食葛，非爲締給者也。

《吳都賦》：食葛香。茅注曰：食葛，蔓生與山葛同，根特大，美於芋也。

右瓜屬。

荔枝 《本草圖經》曰：荔枝子，生嶺南及巴中，今泉、福、漳、嘉、蜀、渝、涪州、興化軍及二廣州郡皆有之。其品閩中第一，蜀川次之，嶺南爲下。《扶南記》：荔枝始傳於漢世，初惟出嶺南，後出。《四庫全書》所云：旁挺龍目，側生荔枝，是也。蜀中之品，在唐爲盛。白居易《圖序》論之詳矣。今閩中四郡所出特奇，而種類僅至三十餘品，肌肉甚厚，甘香瑩白，非廣、蜀比也。宋蔡襄著《荔枝譜》七篇，雖於今不備，蔡公閩人，不可不著之問產矣。第一篇：荔枝之於天下，唯閩、粵、南粵、巴蜀有之。漢初，南粵王尉佗以之備方物，於是始通中國。司馬相如《上林賦》云：答遼離支。蓋夸言之，無有是也。東京、交趾七郡貢生荔枝，十里一置，五里一候，晝夜奔騰，有毒蟲猛獸之害，臨武長唐羌上書言狀，和帝詔大官省之。魏文

帝有西域葡萄之比，^{〔五〕}世譏其謬論，豈當時南北斷隔，所擬出於傳聞耶？唐天寶中，妃子尤愛嗜涪州，歲命驛致，時之詞人多所稱詠，張九齡賦之以託意。白居易刺忠州，既形於詩，又圖而序之，雖髣髴顏色而甘滋之勝，莫能著也。洛陽取於嶺南，長安來於巴蜀，雖曰鮮獻，而傳置之速，腐爛之餘，色香味之存者亡幾矣，是生荔枝，中國未始見之也。九齡、居易雖見新實驗，今之廣南州郡與夔梓之間，所出大率早熟，肌肉薄而味甘酸，其精好者僅比東閩之下等，是二人者亦未始遇。夫真荔枝者也，閩中惟四郡有之。福州最多，而興化軍最爲奇特，泉、漳時亦知名，列品雖高，而寥寥無紀。將尤異之物，昔所未有乎？蓋亦有之，而未始遇乎人也。予家莆陽，再臨泉、福二郡，十年往還，道繇鄉國，每得其尤者，命工寫生，稗集既多，因而題目以爲倡始。夫以一木之實，生於海濱巖險之遠，而能名徹上京，外被夷狄，重於當世，是亦足貴者。其於果品，卓然第一，然性畏高寒，不堪移植，而又道里遼絕，曾不得班於盧橘、江橙之右，少發光采，此所以爲之嘆惜，而不可不述也。第二篇：興化軍風俗，園池勝處，維種荔枝，當其熟時，雖有佗果，不復見省。尤重陳紫，富室大家，歲或不嘗，雖別品千計，不爲滿意。陳氏欲採摘，必先閉戶高牆，入錢度鐸，錢與之，得者自以爲幸，不敢較其直之多少也。今列陳紫之所畏以例衆品：其樹晚熟，其實廣上而圓下，大可徑寸有五分，香氣清遠，色澤鮮紫，殼薄而平，瓤厚而瑩，膜如桃花紅，核如丁香母，剥之凝如水精，食之消如絳雪，其味之至，不可得而狀也。荔枝以甘爲味，雖百千樹莫有同者。過甘與淡，失味之中，維陳紫之於色香味自狀其類，此所以爲天下第一也。凡荔枝皮膜形色一有類陳紫，則已爲中品。若夫厚皮尖刺，肌理黃色，附核而赤，食之有查，食已而澀，雖無酢味，自亦下等矣。第三篇：福州種殖最多，延馳原野，洪塘、水西尤其盛處，一家之有，至於萬株。城中越山當州署之北，鬱爲林麓。暑雨初霽，晚日照

囉，絳囊翠葉，鮮明蔽映，數里之間，焜如星火，非名畫之可得，而精思之可述，觀攬之勝，無與爲比。初著花時，商人計林斷之以立券，若後豐寡，商人知之，不計美惡，悉爲紅鹽，水浮陸轉以入京師，外至北戎西夏，其東南舟行新羅、日本、流求、大食之屬，莫不愛好，重利以醢之。故商人販益廣而鄉人種益多，一歲之出，不知幾千萬億，而鄉人得飲食者，蓋鮮以其斷林鬻之也。品目至衆，唯江家綠爲州之第一。第四篇：荔枝食之，有益於人。《列仙傳》稱，有食其華實爲荔枝仙人。《本草》亦列其功。葛洪云：蠲渴補髓。所以唐羌疏曰：「未必延年益壽。」蓋云雖有其傳，豈果能哉。亦諫止之詞也。或以其性熱，人有日嗽千顆，未嘗爲疾。卽少覺熱，以蜜漿解之。其本堅理難老，今有三百歲者，枝葉繁茂，生結不息，此亦其驗也。第五篇：初種畏寒，方五七年，深冬覆以護霜霰。福州之西三舍曰水口，地少加寒，已不可殖。大略其花春生，簌簌然白色。其實多少，在風雨時與不時也。有間歲生者，謂之歇枝；有仍歲生者，半生半歇也。春花之際，傍生新葉，其色紅白，六七月時，色已變綠，此明年開花者也。今年實者，明年歇枝也。最忌麝香，或遇之，花實盡落。其熟未更採摘，蟲鳥皆不敢近。或已取，蝙蝠、蜂、蟻爭來蠹食。園家有名樹，旁植四柱小樓，夜棲其上以警盜者。又破竹五七尺，搖之蒼蒼然，以逐蝙蝠之屬。第六篇：紅鹽之法。民間以鹽梅滷浸佛桑花爲紅漿，投荔枝漬之，曝乾色紅而甘酸，可三四年不蟲，修貢與商，人皆便之，然絕無正味。白曬者正爾，烈日乾之，以核堅爲止。畜之甕中，密封百日，謂之出汗。去汗耐久，不然，踰歲壞矣。福州舊貢紅鹽、蜜煎二種。慶曆初，太官問歲進之狀，知州事沈邈以道遠不可致，減紅鹽之數，而增白曬者，兼令漳、泉三郡亦均貢焉。蜜煎，剥生荔枝，管去其漿，然後蜜煮之。予前知福州，用曬及半乾者爲煎，色黃白，而味美可愛，其費荔枝減常歲十之六七。然修貢者皆取於民，後之主吏利其多以賁賂，

曬煎之法不行矣。第七篇：陳紫已下十二品，有等次。陳紫因治居第平窳坎而樹之，或云厥上肥沃之致。今傳其種子者，皆擇善壤，終莫能及，是亦賦生之異也。江綠，大較類陳紫而差大，獨香薄而味少淡，故以次之。其樹已賣葉氏，而民間猶以爲江家綠云。方家紅，可徑二寸，色味俱美，言荔枝之大者皆莫敢擬。歲生一二百顆，人罕得之。方氏子名葵，今爲大理寺丞。游家紫，出名十年，種自陳紫，實大過之。小陳紫，其樹去陳紫數十步。初，一家并種之，及其成也差小，又時有種核者，因而得名。其家別居，二紫亦分屬東西陳焉。宋公荔枝，樹極高大，實如陳紫而小，甘美無異。或云陳紫種出宋氏。世傳其樹已三百歲，舊屬王氏，黃巢兵過，欲斧薪之，王氏媼抱樹號泣，求與樹偕死，賊憐之，不伐。宋公名誠。公者，老人之稱，年餘八十，子孫皆仕宦。《太平廣記》：王媼荔屬宋氏，名宋香。既被巢寇下斧以後，結實雖千萬，一一若有斧痕。藍家紅，泉州爲第一。藍氏兄弟，圭爲太常博士，丞爲尚書都官員外郎。周家紅，獨立興化軍三十年，後生益奇，聲名乃損，然亦不失爲上等。何家紅，出漳州。何氏世爲牙校，嘗有郡將全樹買之。樹在舍後，將熟，其子日領卒數十人，穿其堂房，乃至樹所，其來無時，舉家伏藏，即伐去而不忍，今猶存焉。法石白，出泉州法石院。色青白，其次於藍家紅。綠核，頗類江綠，色丹而小。荔枝皆紫核，此以綠見異。出福州。圓丁香，丁香荔枝皆旁蒂，大而下銳，此種體圓，與味皆勝。虎皮以下三十品無等次。虎皮者，紅色，絕大，繞腹有青紋，正類虎斑，嘗於福州東山大乘寺見之，不知其出處。牛心者，以狀言之，長二寸餘，皮厚肉澀，福州惟有一株。每歲貢乾荔枝，皆調於民，生吏常以牛心爲準，民倍直購之以輸。予嘗黜而不用。玳瑁紅，荔枝上有黑點，疏密如玳瑁斑，福州城東有之。硫磺，顏色正黃，而刺微紅，亦小荔枝，以色名之也。朱柿，色如柿紅而扁大，亦云朴柿，出福州。蒲桃荔枝，穗生，一朵至一二百，將熟多破裂。凡荔

枝，每顆一梗，長三五寸，附於枝。此等附枝而生，樂天所謂朶，如蒲桃者，正謂是也，其品殊下。蚶殼者，殼爲深渠，如瓦屋焉。龍牙者，荔枝之變怪者，其殼紅，可長三四寸，彎曲如爪牙，而無瓢核，全樹弗變。非常有也，興化軍轉運司聽事之西嘗見之。水荔枝，漿多而淡，食之燭渴。荔枝宜依山，或平陸有近水田者，清泉流溉，其味遂爾。出興化軍。蜜荔枝，純甘如蜜，是謂過甘，失味之中。丁香荔枝，核如小丁香，樹病或有之，亦謂之癭核，皆小實也。大丁香，出福州天慶觀。厚殼紫色，瓢多而味微澀。雙髻小荔枝，每朵數十，皆並蒂雙頭，因以目之。真珠，剖之純瓢，圓白如珠，荔枝之小者止於此。十八娘荔枝，色深紅而細長，時人以少女比之。俚傳閩王王氏有女第十八，好噉此品，因而得名。其家今在，城東報國院旁猶有此樹云。將軍荔枝，五代間有爲此官者種之，後人以其官號其樹，而失其姓名之傳。出福州。釵頭顆，紅而小，可間婦人女子之側簪纓之側，故特貴之。粉紅者，荔枝多深紅，而色淺者爲異，謂如傅朱粉之飾，故曰。中元，紅荔枝將絕纔熟，以晚重於時。予嘗於七月廿四日得之。火山，本出廣南，四月熟，味甘酸而肉薄，生梗如枇杷，閩中近亦有之。山在梧州。右三十二品，言姓氏尤其著者也，言州郡記所出也，不言姓氏、州郡、四郡或皆有也。襄作是譜在嘉祐四年秋，明年春手書於泉山安靜堂。《福州志》：荔枝性畏高寒，郡西北境皆不可種。連江之南雖有植者，其熟差晚，過北嶺始大盛。有一品紅，荔中極品。有狀元紅，顆極大，味清甘，亦荔中第一。有桂枝，_(六)皮粗厚，大如鷄子，味甘。有中冠，體圓核小，皮光而薄，味清而甘，視桂林差小，成熟時香聞數里，鳳岡所產爲最。有金鐘，形如鐘，皮略粗厚，色如硃砂，味甘，大亦類桂林，俱以六月熟。有勝畫，皮厚刺尖，味甘，肉豐大如桂林。七月熟，出長樂縣六都者爲最。有鷄母引子，朵數十枚，大小錯出，其大者核小，小者無核。七月熟，樹在城門山宋侍郎鄭公湜墓前。有鳳池

超，實圓味甘，出尚幹鄉故御史林公錢家。其次佳口馳蹄，長大而甘柔。有金樓，上銳下方，色深黃栗玉，似金樓而圓，刺尖。有金線，界其中。有鑲玉，皮粗厚，味甘濃。有紅綉鞋，實小而尖，形如角黍，核如丁香，味極甘美。有龍牙，色紅，長一寸許，上下俱方。有天柱，以樹極高大名。有滿林香，皮微黃，味甘香，倍於衆品。有鵝卵，皮光無刺，色紅。有蜜丸，味甘肉厚，俗呼肉丸。有白蜜，皮粉紅，甘如蜜。有鵝肝，實扁味甘，色紅無核。已上俱以六月熟，品之最佳者。其中品曰鰻頭，皮粗厚，味甘，大如鰻頭。曰磨盤，大如鷄子，近蒂處甚平。曰馬先白，其熟最早，味不甚甘。曰松栢蕾，皮厚而粗，味澀，大如松子。曰將軍帽，實如松蕾，皮厚肉澀。曰醋甕，色微黃，味酸。更有異品曰綠珠，或名結綠，俗呼爲綠荔枝，實如山榛，無核，味最清，至熟時，實與葉無辨，惟鳳岡有之。曰星毬紅，枝條生葉，葉比他種差厚，色紅而不絳，蒂根於臍，銳者如瓜，扁者如橘，圓者如鷄子，頤者如皂莢，殊形詭狀，核皆如丁香，亦有無核者。食之甘脆有韻，奪其枝而植者，竟莫能逮焉。出靈岫里，今永慶里亦有之。又有山荔枝數種，曰勝江萍，皮光味甘，或呼爲勝江陳、淨江瓶，俱此種。曰鵲卵，皮薄實圓，斑如鵲卵，味微酸，七月熟，此山枝中之佳品也。曰牛膽，顆極大，一握僅三四枚，出水西桐坑，此山枝中之異品也。曰山中冠，實大而圓，荔將盡始熟，味微酸澀。曰山金鐘，實大微長。曰中秋綠，色綠，味微酸，熟最後，此山枝之中品也。《泉州志》：晉江多荔枝，五月熟者爲火山，肉薄味酸，不佳。六月熟者有早紅，有桂林，有金鐘，有白蜜，有狀元紅之類，俱佳品也。七月熟者俱山荔枝，品類數十，殼多粗厚，佳者良有風韻。王十朋爲泉州守，有《荔枝詩》八章，一曰陳紫，一曰江綠，一曰鰻玉，一曰大將軍，一曰玉堂紅，一曰奪先紅，一曰七夕紅，一曰白蜜。《興化志》：蔡君謨《荔枝譜》謂名家不過十有二品，前志謂譜中所論已不復有，今惟有玉堂紅，出於蔡宅，狀元紅，出於楓

亭者特珍。按：狀元紅舊名延壽紅，宋元豐間，狀元徐鐸公所植也。公與楓亭薛奕以文武雙魁，遂結婚媾，故授其種於薛，而楓亭之地宜荔，因擅其名。玉堂紅在南廂下林，宋陳太下手植居第之果也，非出蔡宅。莆田荔枝名品皆出天成，雖以其核種之，終與其本不相類。宋香之後無宋香，所存者孫枝爾。陳紫之後無陳紫，過牆則爲小陳紫矣。《筆談》謂：焦核荔子，土人能爲之。取本木去其大根，火燔令焦，復植於土，以石壓之，令勿生旁枝，其核自小。里人謂：不然，此果形狀，變態百出，不可以理求，或似龍牙，或類鳳爪，釵頭紅之可譬，綠珠子之旁綴，是豈人力所能加哉！初，方氏有樹結實數千顆，欲重其名，以二百顆送蔡忠惠公，給以當歲所產止此。公爲目之，曰方家紅，著之於譜。印證其妄，自後華實雖極繁茂，逮至成熟，所存者未嘗越二百，遂成語識。又《惠安邑志》：果實之類，與百穀相消長，荔枝、楊梅大熟，其年五穀多荒，諺曰：「山中紅，田裏空。」予謂不然，荔枝火種也，花不耐雨，雨多則花落，荔枝大熟，必其年不雨耳。宋劉屏山詩：「縱班盧橘材非偶，不近長安憶愈香。」

龍眼 《圖經》曰：龍眼木高二丈許，似荔枝，葉微小。凌冬不凋，春末夏初生細白花，七月而實成。殼青黃色，文作鱗甲，形圓如彈丸，核若無患而不堅，（七）肉白有漿，甚甘美。其實極繁。荔枝纔過，龍眼即熟，故南人名爲荔奴，一名益智，以其味甘歸脾。又《蜀本》：能除蠱毒，去三蟲。張岳《惠安志》：大者名龍眼，次名人眼，小者名鬼眼，俗不識別，總謂龍眼。陳懋仁《泉南雜記》：（八）龍眼甘香溢牙齒間，嚼者多不知厭。出長樂者大可寸許，最佳，名長樂員。泉州近出英山，亦其亞也。宋劉屏山詩：「香剖蜜脾知約勝，價輕魚目爲生多。」

李 有胭脂李，福州蒸晒最嘉。李子之味酸甘。

柑 《圖經》：木高二三丈，葉與枳無辨，刺出莖間，夏初生白花，六月、七月而成實，至冬黃熟可噉。舊說小者爲橘、爲橙，大者爲柚，孔安國注《尚書》「厥包橘柚」：小曰橘，大曰柚，皆爲柑也。謝眺《酬王督安》詩：「南中蘭橘柚，何知鳴鳥飛。」《柑通志》有酥柑，有佛酥柑，一名佛頭酥，有脂柑，出連江，名連江柑；有里尾柑，出福清縣，以地名。《橘通志》有鏡橘，一名鏡柑，有連江橘，以地名；有酒橘，有四時橘，有剪橘，有猴橘，一名橘花，有洞庭橘，有匾橘，一名塌橘，有里尾橘，出福清縣，亦以地名。《泉志》：金橘有二種，形圓者曰金棗，皮香肉酸。又有金豆，俗呼羊矢橘，生山林中，蜜煎良佳。莆弘治志：莆中有紅柑、青柑。唐時，本地有沙橘，嘗人貢。近時天下之柑，以浙之衢州、閩之漳州爲最。漳人食甘盡一托盤，如泉人食荔枝矣。

酸棗 出福州、建寧、福寧，建寧以爲糕。

香櫞 氣芬郁襲人衣。又有形似人手者，名佛手香櫞。

橄欖 《圖經》曰：橄欖似木櫨子樹而高，端直可愛。秋晚實成，實如生訶子，無稜瓣，皆反垂向下，先生者向下，後生者漸高。木既高峻，采難緣梯，但刻其根下方寸許，內鹽於中，一夕皆落，木亦無損。

《藥性賦》云：泉州橄欖能消酒。《本草》：一名諫果，謂其始澀後甘，猶逆耳忠言然。《惠安志》：小者名丁香橄欖，大者名柴橄欖。小者尤香，出福州柑簾洲。（九）

金斗 葉似橄欖而長，實紅色，味甘酸。

椎 科子也，曾師建記作「錐」，謂之末銳於錐，此擬其形似。末言：宋志以「錐」作「椎」，蓋從木也。按「椎」，古「槌」字，《戰國策》、《史記》凡「槌」皆作「椎」，獨新編《百音篇海》云：椎，直近切，樹名，似山

桂。不言其有子也。今按：此果是科樹所生，江東人呼科樹爲株樹，因呼其子爲株子。閩人呼爲錐者，聲相近矣。興化郡北一里許有地曰椎林，荒歲特蕃，貧民賴之。

羊桃 一名楊桃，形如碌磚，味甘酸，實出柯幹上，非若他果綴枝而生。產福、興、福寧。

餘甘 《海物異名記》：菴摩勒果，瑩如珠，食之餘味始甘，能蠲蠱毒。山谷以其先苦後甘，名之曰敢諫子。出州莆，產莆中定庄者佳。

黃彈子 《祥符圖經》云黃檀子，《海物異名記》云黃檀子。實如彈丸，葉如山桂而香。又云：本出越王祭壇側，曰王壇子。楊郁賦：果則龍目、荔枝、王壇、丹橘。

菩提果 花如冠蕤，葉長而尖，實圓而長，實內虛核，當虛處，其味甘香，莆人謂之糖捐。或云西域有此果，故曰菩提。福州最多。

倒黏子 開花淡紅，結子如乳頭，倒黏於樹，色紫味甘。一名丹黏子，一名逃軍糧，泉人謂之，冬年以其可以度年故。廣人取以釀酒，謂之稔酒。

右果屬。

吉貝 木綿也，閩人謂之吉貝。本名古貝，曰古終，曰吉貝者，古貝之訛也。《南史》謂出林邑，于陁利等國，傳至閩中。其木高七八尺，種五六年即枯，枯即芟之，至春，其根復生嫩葉。其實有覆蓋，其殼如檳榔，分爲四瓣或三瓣，中有茸絮如鵝毳，茸中有核。遇烈日，絮乃開，采而聚之，或彈以竹弓，或絞以輪車，是爲木綿花矣。宋謝枋得詩：「嘉樹種木綿，天何厚八閩。厥土不宜桑，蠶事殊艱辛。木綿收千株，八口不憂貧。」

茶 宋時，建州之茶名天下，以建安北苑爲第一，而今武夷貴矣。北苑茶，語具建寧鳳凰山下。咸平初，丁謂爲閩漕，撰《建安茶錄》，劉昇慶曆初在吳興撰《北苑拾遺》以補之。祥符初，周絳知建州，以陸羽《茶經》不載建安，作《補茶經》。皇祐中，蔡襄有《試茶錄》進御，歐陽公跋其後。朱子安拾丁、蔡之遺，作《東溪試茶錄》。東溪，建地名也。呂惠卿有《建安茶記》。建陽熊蕃叔茂撰《宣和北苑貢茶錄》。蕃子克義茂，益寫其形製而傳之。建安黃儒撰《品茶要錄》，元祐中，蘇東坡跋其後。蔡襄進錄序：「臣前因奏事，伏蒙陛下諭臣：先任福建轉運使日，所進上品龍茶最爲精好。臣退念：草木之微，首辱陛下知鑒，若處之得地，則能盡其材。昔陸羽《茶經》不第建安之品，丁謂《茶圖》獨論採造之本，至於烹試，曾未有聞。臣輒條數事，簡而易明，勒成一篇，名曰《茶錄》，伏惟清閑之宴，或賜觀采，臣不勝惶恐榮幸之至。」上篇論茶色。茶色貴白，而餅茶多以珍膏油去聲。其面，故有青黃紫黑之異。善別茶湯，正如相工之視人氣色也，隱然察之於內，以肉理潤者爲上。既已，末之黃白者受水昏重，青白者受水鮮明，故建安人鬪試以青白勝黃白。香：茶有真香，而人貢者微以龍腦和膏，欲助其香。建安民間試茶，皆不人香，恐奪其真。若烹點之際又難，珍果香草其奪益甚，永不當用。味：茶味主於甘滑，惟北苑鳳凰山連屬諸焙所產者味佳。隔溪諸山雖及時加意製作，色味皆重，莫能及也。又有水泉不甘，能損茶味，前世之論水品者以此。藏茶：茶宜蒔葉，而畏香藥，喜溫燥，而忌濕冷。故收藏之家以蒔葉封裏人焙中，兩三日一次，用火當如人體溫溫，則禦濕潤，若火多，則茶焦不可食。炙茶：茶或經年，則香色味皆陳，於淨器中以沸湯漬之，刮去膏油一兩重乃止，以鈴箝之，微火炙乾，然後碎碾。若當年新茶，則不用此說。碾茶：碾茶先以淨紙密裹槌碎，然後熟碾。其大要，旋碾則色白，或經宿則色已昏矣。羅茶：羅細則茶浮，粗則水浮。候

湯：候湯最難，未熟則沫浮，過熟則茶沉。前世謂之蟹眼湯者，過熟湯也。況餅中煮之不可碎，故曰候湯最難。煇蓋：凡甌點茶，先須煇蓋令熱冷，則茶不浮。點茶：茶少湯多，則雲脚散，湯少茶多，則粥面聚。建人謂之雲脚粥面。抄茶一錢，先注湯，「二」調極均，又添注入，環迴擊沸湯上蓋，可四分則止。視其而色鮮白，著蓋無水痕爲絕佳。建安鬪茶，以水痕先沒者爲負，俟久者爲勝。故古較勝負之說，曰相去一水兩水。下篇論茶器。茶焙：茶焙編竹爲之，裹以蒭葉，蓋其上以收火也，隔其中以有容也。納火其下，去茶久許常溫溫然，所以養茶色香味也。茶籠：茶不入焙者，宜密封裹，以蒭籠盛之高處，不近濕氣。砧椎：砧椎蓋以碎茶。砧以木爲之，椎或金或鐵，取於便用。茶鈴：茶鈴屈金鐵爲之，用以炙茶。茶碾：茶碾以銀或鐵爲之。黃金性柔，銅及鎗石皆能生銹，不入用。茶羅：茶羅以絕細爲佳，羅底用蜀東川鵝溪畫絹之密者，投湯中揉洗以羈之。茶盞：茶色白，宜黑盞。建安所造者紺黑，紋如兔毫，其坯微厚，煇之久熱難冷，最爲要用。出他處者或薄或色紫，皆不及也。其青白盞，鬪試家自不用。茶匙：茶匙要用擊拂有力，黃金爲上。人間以銀鐵爲之。竹者輕，建茶不取。湯瓶：瓶要小者，易候湯，又點茶注湯有準。黃金爲上，人間以銀鐵或瓷石爲之。歐陽公跋：「茶爲物之至精，而小團又其精者，錄序所謂上品，龍茶者是也，蓋自君謨始造而歲貢焉。仁宗尤所珍惜，雖輔相之臣，未嘗輒賜。惟南郊大禮致齋之夕，中書樞密院各四人共賜一餅，宮人剪金爲龍鳳花草貼其上，兩府八家分割以歸，不敢碾試。宰相家藏以爲寶，時有佳客，出而傳玩爾。嘉祐七年，親享明堂齋夕，始入賜一餅。余亦忝與，至今藏之。余自以諫官供奉仗內，至登二府，二十餘年纔一獲賜，而丹成龍駕，舐鼎莫及，每一捧翫，清血交零而已。因君謨著錄，輒附於後，庶知小團自君謨始，而可貴如此。」而蘇東坡又有《葉嘉傳》，若韓文公傳毛穎者。蓋蔡忠惠

所錄建安之茶，而蘇文忠傳則武夷茶也。按：宋時，貢茶製造品式多端，而皇朝武夷不過貢茶斤耳。嘉靖中又變價造解，列聖不貴遠物之意，不跨千古以上哉。又有茶油之茶，建、劍、汀、邵多有之，而連城爲第一。

杉 古字作𣎵，亦音杉。《爾雅》曰：披杉。註云：似松，可以爲船及棺材，作柱埋之不腐。建、延、汀、邵、福寧爲多，是插而生者。江淹頌：「桐梓舊麗，松栝稱奇。焉如茲品，獨秀青崖。群木斂望，雜草不窺，長入煙氣，永參鸞螭。」

樅 亦曰杜松，葉如側栢。

櫟 木可爲器，最奈久遠。

櫟 亦可爲棟宇，然久則蠹腐，用不及杉。其白皮着人肌膚最刺撓，山中人或煮其汁合諸毒藥以射虎。

水綿 類杉，修幹而細葉，郡城內外凡濱水處多植之。

檉杉 略似水綿，而木理輕鬆，心赤色。江淹頌：「木貴冬榮，檉實寒色。停黛峰頂，插翠石側。碧葉菴藹，頽柯翕絕。方陋筠檟，遠笑荆棘。」

刺桐 說見《泉州建置志》。《五燈會元》曰：福州荔枝，泉州刺桐。《輿地紀勝》：泉城初築時，環郡皆植刺桐，號桐城。初夏開花，極鮮紅。如葉先萌芽，花後發，則其年五穀豐登，否則，反是，故謂之瑞桐。宋丁謂詩：「聞得鄉人說刺桐，葉先花發十年豐。我今到此憂民切，只愛青青不愛紅。」

桐 桐之爲木，諸家說不一。《爾雅》云：梧桐。《輿化志》：曰白桐，一曰岡桐。竊意桐有四種。花葉

不相見，花不結子，材中琴瑟，《禹貢》嶧陽孤桐也。《興化志》：白桐是一種，不花不子，與油桐相類。《興化志》：岡桐是一種，子可食，與中琴瑟者，即《爾雅》所謂梧桐也。一種可壓油，則謂之油桐，今泉州所種多油桐。

楮 即穀樹也。江東所產者結實，閩所產者不結實。其皮可搗爲紙，亦可治爲衣爲食。

榕 榕陰極廣，以其能容，故名曰榕。《海物異名記》云：「（一）或作櫨，言材不中梓人也。有二種：一種矮而盤桓，其鬚着地復生爲樹。一名赤榕，上聳高大，此樹生至福州而止，故福州號爲榕城。諺云：榕不過劍。」

櫟 考《玉篇》無此字，詢其鄉人，讀如靚音。其樹頗高，大葉略似桂葉。其子如苦櫨，圓而稍長，鄉人去其殼而磨之，料理作凍，亦可食也。出邵武。

菩提樹 菩提樹即佛經所謂菩提，其子用爲念珠。泉州舊志：城中承天寺一株，大十餘圍，高數十丈，葉略如梨葉而大。秋深葉茂，郡人剪取，用灰水浸去浮皮，其脂輕透如紗，染紺色，爲燈極鮮明可賞，曰梧桐燈。

相思 似廣花梨木。昔宋大夫韓憑妻甚美，宋康王奪之，憑自殺。妻乃陰腐其衣，王與登臺，自投臺下，左右攬其衣，衣不勝手。遺書於帶曰：「願以屍與韓合葬。」王怒，埋之，一塚相對。經宿，塚上各生一文梓，根交枝連，有鳥如鴛鴦棲於樹，朝夕悲鳴，人因呼梓樹爲相思木。江淹頌：「竦樹碧潤，卧根石林。日月斷色，霧雨恒陰。綠秀八炤，丹實四臨。公子不至，山客徒尋。」

檀 葉似槐。

檄 生山中，葉與子似茱萸。《爾雅》云：「椒檄醜菜，桃李醜核。」言桃李屬皆內核，椒檄屬皆外菜也。

欖 字亦作欖。其木有刺，子朶生如茱萸，辛辣如椒檄。

棠梨 泉人名加冬梨。

棟 《東皐雜錄》：江南自春至夏有二十四風信，梅花最先，棟花最後。樹有雌雄，雄者根赤，無子，雌者根白，有子。

栳 結實似梨，小而酸澀。大者三圍，木理細膩，堅緻視楠過之。

木櫨 葉如橄欖而小，實可浣垢，今釋子多取其子爲手珠。《本草》謂之無患子，俗呼墨圓子。

水楊 葉圓潤而赤，枝條短硬，多生水岸。

金荆 《閩中記》：木堅有文彩，可爲床榻器用。江淹頌：「江南之山，連障連天，旣抱紫霞，亦漱絳煙。金荆嘉樹，涵露宅仙。誇節詎及，幽意誰傳。」

黃連茶 本高二三丈，葉似槐而尖長。春初芽始生，可治以代茗飲，亦爲茹味香美。俗又呼涼茶樹。

加條 《閩中記》：其葉可用磨犀角、象牙。《惠安志》曰吉釣藤，卽道家降真香，生深山中，以枯老紫色爲貴，或卽一樹也。又名美龍藤。

槲 葉如加條差小，皮鱗皺粗厚，因以得名，

百牙 木理極堅白，可爲器玩。

石楠 葉如枇杷，有小刺，凌冬不凋，人多植庭宇間，陰翳可愛不透。其木堅勁，可爲斧柯。

檉 葉細而枝柔，夏花，粉紅如栗，一名西河柳。

羅漢松 葉長而狹，色蒼秀可愛，凌冬不凋。

鐵樹 葉紅，而幹如鐵。

右木屬。

竹 李明珍曰：（三）竹惟江河之南有之，故曰九河鮮有，五嶺實繁。有貓竹，方言謂之麻，可以椽，可以器，削之可以刀。其葉夏月可以裹角黍。江南竹，粗大堅直，筍冬生。慈竹，古名子母竹。斑竹，永福縣鶴洋多產之。紫竹，小而色純紫。苦竹，筍苦而味佳。淡竹，其葉可以藥。石竹，可以器。筋竹，可以弓弩。苦油竹，可以鎗。箭竹，可以箭。赤竹，可以刺舡。方竹，可以杖。桃枝竹，可以席。豁竹，可以筍。長枝竹，可以絲。秋竹，可以篋。含朶竹，可以樊。箬葉竹，其葉可以篷。人而竹，如面。釣竹，如釣。金絲竹，如絲。蘆竹，如蘆。鳳尾竹，如鳳。勒竹，枝上有刺，中心堅塞，枝幹相交。蟲竹，有蟲焉，叢生如蘆，每節生蟲，如新蟬之未翼。外無竅隙，隨竹而長，竹將枯，乃穴傍出。福、興、泉、漳之間，以竹爲器，延、建、汀、邵之間，以竹爲紙。竹之筍，福、興、泉、漳之間，烹而饌之；延、建、汀、邵之間，蒸而蕘之，鹽而糟之。余嘗游永福縣竹匝，地漫山離，有間斷至隔絕數里者。問之，汀、邵間皆然，一大奇也。又福安縣有雷驚竹。

甘蔗 呂惠卿言：凡草皆正生竊出，惟蔗側種，根上庶出，故字從庶也。嵇含作竿蔗，謂其竿如竹竿。《離騷》、《漢書》皆作柤，字通用也。許慎《說文》作蔗，（二）蓋音之轉也。《本草圖經》：有兩種，赤色

名崑崙蔗，白色名荻蔗。出福州以上，皮節紅而淡，出泉、漳者皮節綠而甘。其幹小而長者名菅蔗，又名蓬蔗，居民研汁煮糖，泛海鬻吳越間。糖有二種，曰黑糖，曰白糖，有雙清，有潔白，煉之有糖霜，亦曰冰糖。有蜜片，亦曰牛皮糖，其法先取蔗汁煮之，攪以白灰，成黑糖矣，仍置之大甕漏中，候出水盡時，覆以細滑黃土，凡三遍，其色改白。有三等，上白名清糖，中白名官糖，下名齋尾。其所出之水名糖水矣。官糖取之再行烹煉，劈鷄卵攪之，令渣滓上浮，復置瓷漏中，覆土如前，其色加白，名潔白糖也。其所出之水名潔水矣。又取烹煉成糖霜，蜜片矣。甕漏器如帽盔，底穿一眼，出水其處也。初，人莫知有覆土法。元時，南安有黃長者，爲宅煮糖，宅垣忽壞，壓於漏端，色白異常，遂獲厚貲。後遂効之他糖。諸郡皆有潔冰，蜜片獨出於泉。蜜片，元人名沙裡別，胡語也。

右苞屬。

人參 《本草圖經》曰：人參生上黨山谷及遼東。今江東諸州及泰山皆有。又有自閩中來者，名新羅人參。又有沙參，出海濱，泉崇武所大岞山下有之。

土檳榔 出邵武丹臺山。

枸杞 《本草》：泉州者尤佳。

牛膝 《本草圖經》曰：牛膝生河內山谷及臨朐。今江淮間、粵閩中亦有之。

藍實 《圖經》曰：藍實有數種，有木藍，出嶺南，不入藥。有菰藍，可以爲澱者，亦名馬藍，《爾雅》所謂箴馬藍是也。有蓼藍，但可染碧，不堪作澱，醫方所用者也。又福州有一種馬藍，四時俱有葉，類苦益菜，土人連根採之，焙搗下筵，^(一五)酒服錢七，治婦人敗血甚佳。

石菖蒲 《福州志》：石菖蒲生石磧上，葉有脊如劍者爲真，其無脊者名溪蓀，生下濕地。大根者名昌陽，人藥以生石上一寸九節者良。今黃蘗山龍湫崖下瀑布飛濺處生者絕佳，然非神全不爲，濺悸不能採也。江淹《草木頌》曰：「藥虛實品，爰乃性輔。却病衛福，融邪養正。縹色外研，金光內映。草經所珍，仙圖是詠。」

使君子 李時珍《本草經》曰：嵇含《南方草木狀》謂之留求子。原出海南，交趾，今閩之邵武、蜀之眉州皆種之。其藤如葛，繞樹而上，葉青如五加葉。五月開花，一簇二三十葩，紅色，輕盈如海棠。其實長寸許，五瓣合成，有稜。先時半黃，老則紫黑，其中仁長如榧仁，色味如栗。

霍香 《南州異物志》云：霍香出海邊國，形如都梁，可著衣服中。江淹《草木頌》曰：桂以過冽，麝以太芬，摧阻天鑄，夭折人文。詎及霍香，微薰攝靈，百仞養氣青霄。

越王餘算 《異苑》曰：晉安有越王餘算，葉白者似骨，黑者似角，云是越王行海，作籌有餘，棄於水中而生。《海藥》云：謹按《異苑》記，昔晉安越王因渡南海，將黑角白骨算籌所餘棄水中，故生此，遂名算。朱，鹹，溫，主治水腫浮氣，結聚宿滯不消、腹中虛鳴。

七紅山 《圖經》曰：七紅山生福州及南恩州山野中。福州生者作細藤，似芙蓉葉，其葉上青下白。根如葛頭，薄切用米泔浸一宿，更用清水浸一宿，搗服之，可治勞瘵。

石韋 《本草圖經》云：一名石皮，叢生石上，葉如柳，背有毛，而斑點如皮，故名。福州自有。種石皮，三月開花，採葉煎湯浴，去疰風。亦有生古瓦上者，名瓦韋。

剪刀草 《圖經》曰：剪刀草，五、六、七月採葉，正、二月採根。一名慈菰，一名白地栗，一名河鳧

茨。爛搗其莖葉如泥，塗傅諸惡瘡腫及小兒游瘤丹毒，以冷水調此草，膏化如糊，以鷄羽掃上，腫便消退，其効殊佳。福州有種小異，三月開花，四時採根葉，亦治癰腫。

香麻 《圖經》曰：香麻生福州。四季常有苗葉而無花，不拘時月採之，土人以煎作浴湯，去風甚佳。

鷄項草 《圖經》曰：鷄項草生福州。如紅花，葉上有刺，青色，亦名千針草。根似小蘿蔔，枝條直上。三四月，苗上生紫草，八月葉凋，十月採根，洗焙乾碾，羅爲散，服治下血。

紫金牛 《圖經》曰：紫金牛生福州。味辛，葉如茶，上綠下紫，實員如丹珠。根微紫色，八月採，去心曝乾。皮似巴戟，主時疾隔氣，去風痰用之。

石垂 《圖經》曰：石垂生福州山中。三月有花，四時採子焙乾，生搗蜜丸，用治蠱毒甚便。

瓊田草 《圖經》曰：瓊田草生福州。春生，苗葉無花，三月採根葉焙乾，土人用治風，生搗羅蜜丸，服之。

建水草 《圖經》曰：生福州。枝葉似桑，四時常有，土人取其葉焙乾研末，煖酒服，治走疰風。

龍牙草 出福州。治痢最神。《本草》謂卽馬鞭草，非也。

小青 《圖經》曰：福州出。三月生花，當月採葉，葉生搗碎，治癰瘡甚効。

獨脚仙 《圖經》曰：生福州，山林傍陰泉處多有之。春生苗，至秋冬葉落。其葉圓，上青下紫，脚長三四寸。夏採根葉，連梗焙乾爲末，治婦人血塊。

紫金藤 《圖經》曰：生福州山中。春初單生葉，青色，至冬凋落。藤似枯條，採其皮晒乾爲末，治丈

夫腎氣。

南藤 生依南樹，故號南藤。莖如馬鞭，有節，紫褐色，一名丁公藤。生南山山谷。《南史》：解叔謙，雁門人。母有疾，夜稽顙祈告庭中，聞空中云：「好取丁公藤。」訪醫及《本草》，皆無有。至宜都山中，見一翁伐木云，是此藤。拜泣求之，并得漬酒法。受畢，失翁所在。母疾遂愈。《圖經》曰：南藤即丁公藤也，生南山山谷，今出泉州、武榮州。

赤孫施 亦名酸漿，亦名鳩酸、雀兒酸。生福州。葉如浮萍草，治婦人血結。泉人謂鹹酸草。

笑菑 出晉江縣。俗名茗葉，蔓生，葉如薯而差大，味辛香。土人取其葉合檳榔并蚶殼灰食之。舊志：泉州檳榔爲禮是也。宋戴復古《寓泉南》詩：「寄跡小園中，自笑客異鄉。東家送檳榔，西家送檳榔，咀嚼唇齒赤，亦能醉我腸。南人敬愛客，以此當茶湯。」

石帆 生海底，高尺餘，根如漆色，至稍上漸軟，作交羅紋，梗大如筋，人以飾作珊瑚裝。左思《吳郡賦》：草則石帆水松。劉淵林註云：石帆生海嶼石上，草類也。無葉，高尺許，其花離樓相貫連，若死則浮水中。人於海邊得之，稀有見其生者。

右藥屬。

天竺桂 李時珍曰：天竺桂生南海山谷，功用似桂，皮薄，不甚辛烈。即今閩、粵、浙中山桂也。台州天竺最多，故名。繁花大樹，實如蓮子，天竺僧稱爲月桂。泉州舊志：巖桂一名木犀，一名七里香，色有黃有白，香氣酷烈，又有逐月開者，曰月桂。冬春開花，長穗銳尾，小白而香，又名鳳尾。置之書皮，能辟蠹，以薰茶，味甚佳。建寧人取其花槽之以點茶，亦佳。

紅花 《閩中記》：葉如荷蒿，花如刺結。秋深種，春末乘露採之，可以染絳。

山茶 花深紅色，冬盛開。福、泉、莆、漳歲底取爲軍持供佛。東坡詩云：「葉厚有稜犀甲健，花深少態鶴頭丹。」

酴醾 蔓生，承之以架。花白而香，春晚極盛。又有檀心紫色者，尤香。又有莖葉似酴醾而花差小者，曰木香。

玫瑰 亦名徘徊，有白、紫二色。翁承贊詩：「三株紅芍藥，一架紫玫瑰。」

密標 花紅千葉。六一居士《牡丹記》曰：「如密標緋桃，皆以名稱之。」是密標爲花，自宋有之。

金沙 亦玫瑰之流，而香不及。山谷詩云：「紫錦綵色似金沙。」

佛桑 本扶桑東海日出處有扶桑樹。此花光燄照日，其葉似桑，因以比之，後人訛爲佛桑也。一名照殿紅，乃朱槿別種花。有紅、白、黃三色，紅者尤貴。又有花開單瓣者，亦深紅可愛。

俱那衛 一作俱那異，僧舍多植之。樹高七八尺，其枝脆弱，葉狹而長，花紅，根似玉簪花而小。曾師建《閩中記》：南方花有北地所無者，闍提、茉莉、俱那異皆出西域，盛傳閩中，北地多寒，莫能植也。

長春 枝幹有刺，花紅，四時常開。

勝春 亦名鬬雪紅，又名月季。花如玫瑰，香、色次之，四時常芳。

水麗春 藤生，花如勝春，明媚有香。

杜鵑 一名躑躅，一名山石榴，一名映山紅。有深、淺紅及紫者。白居易詩：「九江三月杜鵑來，一聲啼得一花開。」蓋花開正屬杜鵑之候。

山丹 花 蒂百餘蕊，狀如綉毬，深紅色。一花四英，東坡所謂「錯落瑪瑙盤」是也。亦有粉紅者。四月開花，至八月尚爛熳。又有四時常開者。

茉莉 原出波斯國，移植南海。嵇含《草木狀》作末利，《洛陽名園記》作抹厲，佛經作抹利，《王十朋集》作沒利，《洪邁集》作末麗，泉州舊志作木麗，本胡語，隨人意會而已。楊慎《丹鉛錄》：《晉書》都人簪素花，卽今末莉花也。是花皆夜開，有單葉者，有重瓣者。又有一種曰蕃茉莉，葉如茉莉而華如素馨，合二者爲一，其香差薄。《歐治遺事》：果有荔枝，花有末麗，天下未有。

閩提 南海種，商舶傳人閩中。花皙白而香，勝如素馨，蓋巖桂之流品。《仙書》曰：閩提花春卽此，亦名麝茶。

素馨 李時珍曰：自西域移來，謂之耶悉名花，卽《酉陽雜俎》所載野悉蜜花也。枝幹裊娜，葉似末利而小，其花細瘦，四瓣，有黃、白二色，采花壓油澤頭甚香滑也。宋傅伯成詩：「昔日雲鬟鎖翠屏，只今煙塚伴荒城。香魂斷絕無人問，空有幽花獨擅名。」詩註云：素馨，南漢宮女名。

瑞香 枝幹婆娑，柔條厚葉。冬春之交，開花成簇，長三四分，如丁香狀，有黃、白、紫三色。其種有枇杷葉者，有楊梅葉者，有柯葉者，有毬子者，有攣枝者。花紫香烈。蘇東坡詞曰：「領巾標下瑞香風，驚起謫仙春夢。」

山樊 末高數尺，花春開，極香，莆人呼爲瑒花。瑒，玉名，取其白也。山谷更其名曰山樊，蓋土人取其葉以染，不假礬而成色，故以名耳。

滿堂紅 一曰花椰，一曰朱草。花穗生，淺黃色，香聞百步，開卽爲瑞。

半年紅 曾師建《閩中記》謂之渠那異。其種來自西域。木高丈餘，葉長而狹，自春徂夏，相續開花。又名夾竹桃，謂其花似桃，葉似竹也。

度年紅 幹高花久，自冬末涉春不少變。

越橘 樹如黃楊，花如瑞香而白，實如朱櫻。

真珠 花有單葉者，有千葉者。許將詩：「簌簌圓英淡粉粧，肯隨桃李媚春陽。金刀不到春風外，草密林深只白香。」

鳳尾 有二種。大者高丈餘，花穗生，黃心而白，莢長竟尺，若鳳尾然。一種高數尺，花疏而香勝，一名鳳柳，一名七里香，置書帙中可辟蠹。

御帶 枝長，花密如帶。

半丈紅 花如御帶而差大，一名棠棣。

鷹爪 藤生，花淡黃色，末銳似鷹爪，夏開，香如爛瓜氣。

蘭 有樹蘭，泉郡志曰：叢高成樹，其花碎點清香。有賽蘭，一名翠蘭，楊用修曰：賽蘭香小如金粟，特馥烈，戴之髮髻，香聞十步。佛經伊蘭卽此花也，西方以之供佛。王敬美《閩部疏》曰：賽蘭蔓生，樹蘭木生，其香皆與蘭埒，有紫蘭，詩所謂士女秉蘭者也。（六）《埤雅》曰：紫蘭至秋而紅。有拜節蘭，色微紫，以歲首開花。有吊蘭，花葉皆蘭，拔裏而懸之，不土自榮。泉郡志曰：是鳥啣蘭花於樹中寄生者。又建中有仙霞蘭，潘氏西山於仙霞嶺得之。漳中有貴妃蘭，紅色而小。有鶴頂蘭，似蘭而大。

紫羅傘 《本草圖經》名鳶尾。葉似射干，花色紫碧，不抽高莖，俗呼紫羅傘。其根卽鳶頭，亦入藥。

滴滴金 葉露滴地而生，秋開花，黃如金色。陶弼詩云：「九秋珠露滴成芽」。

金錢 花深紅色，圓薄如錢。

剪金紅 花圓如香，葉分數岐，如刀剪之狀。

罌粟 花有五色，實如罌子，如細粟，亦名御米。

御仙 一曰麗春花，有小罌如小罌粟。

聚八仙 狀類瓊花，八蝶簇一心。又有蝴蝶兩兩相對者，又有小蝶簇聚如碧玉者，出澗谷間皆曰玉蝴蝶。又有玉翼蟬、碧蟬。

寶相 藤生，花類酴醾，秀整過之。

玉屑 厥藤生，花狀如碎玉。

玉籠鬆 藤生，花微紅而圓。又一種花類葉尖，名醉楊妃。

袞繡毬 藤生，花一簇數十葉，其圓如毬，初開微帶粉紅色，開盡則白。

錦竹 一名石竹。叢生，高尺許，花如繡錦。李太白有「石竹繡羅衣」之句。俗呼天南竹。

剪金羅 花淡紅色，傍如剪刻。

黃雀兒 一名迎春。晏殊詩：「淺艷侔鶯羽，纖條結兔絲。」

金燈 莖直上，末分數枝，枝一花，光艷如燈。閩中呼爲天蒜，又呼爲花葉不相兒。

指甲 花小，如蜜色，可染指甲，過於鳳仙，一名七里香。此花至微小，乃漢帝扶荔宮已植之矣。石花屬。

芋 可以績，多產大田縣。

紫草 《爾雅》：藐苳可以染紫，一名苳苳。《丹鉛錄》云：苳，小草也，今但知爲苳刻之苳。藐，紫草也，今但知爲藐然之藐。

蛇麻 葉如青麻藤，蔓生籬落間，土人採爲麵用。

鼠麴 生平岡熟地，葉有白毛，黃花，可雜米粉作糗食之。

蕒 生有三稜，《爾雅》謂之蕒。江生者爲淡蕒，近者爲鹹蕒。土人採以捫屨織席，亦可爲績。

燈心 叢生澤地，莖圓細而直長，亦可爲席。

獨掃 《爾雅》曰馬箒。注云：可爲箒簞。

芒 似茅，可爲繩索、履屨，亦可爲箒。《邵武志》作苳。

石龍芻 俗名龍鬚草，可以織席。《本草綱目》曰：割草束曰芻。此草生水石之處，可以割束養馬，故謂之龍芻。《述異記》：周穆王東海島中養八駿處有草名龍芻，是矣。

鷄腸 一名繫縷，葉似苳菜而小，其莖作蔓，斷之有綠縷，細而中虛，以其似鷄腸，因名。

仙人掌 多貼石壁上，如人掌，能治腸痔瀉血。

虎杖 《爾雅》云：似苳草而大，可染赤，煎以爲飲，色琥珀。

吉祥 葉如萱而小，四時一色，生泉石中。山村人以插瓶祀先，雖在蔭宇，蔥翠不凋，家有吉事，定自開花，故名吉祥。邵武天池山有之。佛書：天授菩薩吉祥子，菩薩到貝多樹下敷草，東向西坐，所從來遠矣。

紫背 解一切蛇毒。

長生草 枝莖無根而生。

半邊蓮草 最小，苗高一、二寸，葉闊三分許，長不及三分。五、六月間開細白花，花偏一邊，無有圓者。邵武人搗爛調水以愈痢。

候潮草 草間有莢如榆莢，潮至則開，退則合。

仙草 生山谷中。搗爛絞汁，和麵粉煮之成凍。右草屬。

〔校記〕

〔一〕「南產志」下，各本原衍「上」字，據本書體例刪。

〔二〕「言忠」，各本原作「言中」，據文義改。

〔三〕「八」《東南雜記》，據今存世本，當作《東南雜志》。

〔四〕「後出」，據文義，當作「後出蜀」。

〔五〕「西域」，各本原作「西城」，據文義改。

〔六〕「桂枝」，下文作「桂林」。

〔七〕「核若無患而不堅」，疑作「核若無患而無不堅」。

〔九〕「福州柑簞洲」，疑作「福州甘簞洲」。

【一〇】「蕃子克義茂」，據《宋史·熊克傳》及道光《建陽縣志》卷十一《熊克傳》，熊克字子復。

【一一】「先注湯」上，各本原衍「錢」字，據文義刪。

【一二】《海物異名記》，各本原作《異物異名記》，據上、下文改。

【一三】「李明珍」，疑爲「李時珍」。

【一四】「《說文》作蔗」，各本原作「說作文蔗」，據文義改。

【一五】「下筵」，各本原作「下筵」，據文義改。

【一六】「秉蘭」，各本原作「秉蘭」，據文義改。

閩書卷之一百五十一

南產志(二)

五色雀 五色駁雜如樂官衣，俗呼聲音雀。宋紹興間，嘗集興化郡治榕木之上，或曰卽十二紅，十二爲群，中有一紅。

錦鷄 漳志：鷄屬。《博物志》曰：有美毛，自愛其采，終日映水。《圖經》曰：嚙藏肉綬，天晴則徐舒其綬，人謂吐錦。傅玄賦曰：「惟南州之令鳥，兼坤離而體珍。被黃中之正色，敷文象以飾身。鑒中流以顧影，睇雲表之清塵。」

白鷓 白質黑章紅頰，尾長數尺。《爾雅》所謂雉。郭註：江東呼爲白雉。《西京雜記》：閩越以獻漢高帝，帝厚賜之。

山鵲 俗呼山鵲。《爾雅》鵲山鵲。註：似鵲而有文彩，長尾，嘴脚赤。

鷓鴣 一名越雉，又名隨陽鳥。《南越志》：鷓鴣雖東西回翔，然開翅之始，必先南翥，亦胡馬嘶北之義。孟詵曰：此鳥乃天地之神，每月取一隻饗至尊，自死者不可食也。

鷓鴣 萬畢術曰：一名寒臯，斷舌可使言語。南唐李煜謂之八哥。《酉陽雜俎》曰：交時以足勾足，

鼓翼如翮狀，往往墮地。俗取其勾足爲媚藥。又有白色者差小，泉人謂之番鸚鵡。

信鳥 似鵲而小，能爲百禽聲，忽鳴而過庭簷間，其占爲有喜。莆志云：古謂使爲信。信鳥者，使鳥也。客至，則飛鳴爲信。又名進鳥，或曰反舌也，百舌也。

占吊 略似百舌，群飛鳴聒如云。吉吊俗呼噪林鳥。

探囊 似鷄而小，頂有五色囊。

山胡 大如鳩，蒼色，兩腮有圓點，黑白相映，翔跳不定，聲清，調如鶯。人籠蓄之。

畫眉 白眉褐質，好鬬善鳴，泉人以鬬賭金。《興化志》：聲似鶯而小，清圓可聽。

雷舞 蒼赤色，聞雷卽舞。

蠟嘴 其喙黃色。

紅裙 身綠尾紅，一名紅衣娘。

黃匡 似烏略小，首尾黑而翅黃。

雪姑兒 毛羽黑白相間。《物類志》：卽鵲鴿。

海鵲 方言魚鷹也。蒼色似鷗，攫魚食之。

鵲鵲 一名洿澤，大如蒼鵲，頷下有胡如囊，得魚則奮之。以其與鵲相類而有胡，故名鵲鵲。一名洿

河。

釣魚翁 如翡翠而小，常宿水邊，候魚取食之。

呼潮 色蒼似鵲，潮至則鳴。

鬼鳥 海中出。嘴、頭、脚俱長。海濱人群掩之，真所謂肉味不足當鼎俎，鷄肋不足安尊養，可憫甚矣。然所以得群掩者，掩其一則不呼不翅，以致大衆俱維。不知其愚乎，抑其自相毒誤也？

右羽屬。

黑羊 王世懋《閩部疏》：黑羊皮能療杖創，京師艱得，獨閩中盛產。白者曠見耳。獨汀無羊，遇祭祀從他郡倍直而鬻之。

麋 《爾雅》謂之麋章。麋，其總名也。牙而不噬，其性善驚，飲水見影輒奔走。

鹿 麋類，其皮以爲履舄，勝於衆皮。

狸 口銳身長，似貓。其種不一。有香狸，過處草水皆香。有玉面狸，面白色。有九節狸，尾有九節，脊毛可製筆心，其味皆佳。

山犬 狀類家犬，赤蒼色，好食果實。

山羊 《爾雅》名羴羊。生深山巖穴中，力能陟峻，皮可以鞣。

野猪 亦見山猪，似家猪，但腰細脚長，毛色褐，牙利如鎌刀。又有豪猪，毛黑如錐，鬃有白刺，大如筴，其端黑，怒則奮刺以射人。

鼠狼 住山野中，似鼠，善捕鼠。

竹鼯 蒼色如鼠，食蘆葦根，亦名蒼豚。王彪之《閩中賦》：竹則桃枝育蟲。注：有蟲，竹鼯也。《贊寧雜志》云：竹根有鼠，亦名稚子。人或竹刺入肉不可出者，啗此物立消，以其食竹也。邵武桃花嶺多竹，是鼠實多。

鼯鼠 形如鼠狼，蒼黑而小，尾多毛，善緣蘿藤走。《埤雅》云粟鼠也。取毫於尾可以筆，世謂鼠鬚粟尾者是。《莆陽志》謂之鼯鼠。

土崙 汀、邵所重，如鼠穴居，嘗薰而出之，其味肥厚。

鼯鼠 似蝙蝠而小，膏療耳聾。

右毛屬。

蝮蛇 蛇屬，身大而行紆徐冉冉然也。或曰鱗中有毛如髯。陶弘景言出晉安。《西陽雜俎》：蝮蛇長十丈，嘗吞鹿，鹿消盡乃遠樹，則腹中之骨穿鱗而出。養癰時肪腴甚美。劉恂《錄異記》：身有斑紋如故錦縵。春夏於山林中伺鹿吞之，蛇遂羸瘦，待鹿消乃肥壯也。其膽可藥。

海鱗 巨能吞舟，日中閃鬣若簸朱旗，噴沫飛洒成雨。其來也，移若山嶽，乍出乍沒。舟行相值，必鳴金鼓以怖之，布米以厭之。間有斃沙上者，梯而嚮之，剝脂爲油，脰船甚固。陸佃云：道健好動，故名鱗。

鯊魚 一名鮫，一名鮞，一名鰩。《圖經》曰：鮫魚，今南人但謂之鯊。是魚胎生，皮肉皆同，種類不一。有龍文鯊。有虎鯊，頭目凹而身有虎文。有鋸鯊，上脣長三四尺，兩旁有齒如鋸。有狗頭鯊，其頭如狗。有烏頭，二頰尾皆黑大，有百餘斤者，時或淺在海沙，人割其肉，潮至復去。其皮用湯泡淨沙，縷作膾。鬣鬣泡去外皮，存絲，亦用作膾，色品瑩若銀絲。有胡鯊，青色，背上有沙，大者長丈餘，小者三五尺，鼻如鋸。皮可縷爲膾，莖可以爲修，亦名鋸鯊。有劍尾，長似劍，可以莖。有烏鬣鯊，頰尾皆黑。有出人鯊，初生隨母浮游，出入母腹中。有時鯊，有肉無腹，大者剝其肉烹之，多油，可燃燄。有帽鯊，腮

兩邊有皮如戴帽然，又名雙髻鯊，頭如木枋，又名雙髻紅。有犁頭鯊，其頭如犁。有黃鯊，好食百魚，大者五六百斤，而龍文鯊爲最。此外，有青鯊、淡鯊諸種。而吹鯊別是一種，山溪小魚也，大如指，狹圓而長，身有黑點，嘗張口吹沙，其味美，故魚麗之，詩稱焉。

鱗 背有肉二片，乾之名金絲鯊，形味皆類鯊翅。

金鱗魚 一曰石首，浙人謂黃瓜，亦名黃魚。《爾雅》異名鰈。郭璞所賦：鰈鮒順時而往還。王羲之帖：石首鯊食之消瓜成水。此魚腦中有石如棋子，故名石首。閩中臘月爲盛，而浙中盛於夏月，是以名黃瓜。郭璞「順時往還」，蓋謂此也。又云：石首魚腦中有兩小石，而黃魚則白如棋子矣。醫家取以治石淋，肉能養胃，鰈能養精。又一種小者，朱口金鱗，長七八寸，名黃梅。又烏頰魚，石頭鱸，首亦有石。諸魚屬火，而金鱗、烏頰、石頭鱸與鯽魚俱屬土，可以療病。《吳地志》：石首魚至秋化爲冠鳧，今冠鳧頭中猶有石也。故王羲之又云野鴨，亦有云此魚所化。《異物志》：小者名鰮水，次名春來。

鰮 形如石首差大，鱗小口紅。

鯽魚 有海鯽。《酉陽雜俎》：東南海中鯽魚長八尺，食之宜暑而避風。或云稷米所化，故腹中尚有米色。

棘鰮魚 似鯽而大，其鰮如棘，紅紫色。《嶺表異錄》名吉鰮，泉州謂之髻鰮，又名奇鰮，或曰過臘，莆人謂之赤髻。《興化志》曰：赤髻似棘鰮而大，則二魚也。宋志：棘鰮與赤髻味豐在首，首味豐在眼，蒸葱酒爲珍，十月味尤佳。浙人屠本峻《海錯疏》：過臘頭類鯽，身類鰮，又類鯉，肉微紅，味美。尾端有肉，口中有牙如鋸，好食蚶蚌。臘來春去，故名過臘。

方頭魚 似棘鬣而頭方，味美。福州人謂之國公魚，言其方如國公頭上冠也。或云當作芳，言芳香也。

烏類魚 似奇鬣而形稍黑，當於大寒時取之。

黃鰲魚 略似奇鬣，身小而薄，其尾淡黃。

鰲魚 亦曰鴈魚，亦曰石桂魚，亦口水豚。鰲，鰲也，其體不能屈曲，如僵鰲也。鴈，鴈也，其紋斑如織網也。仙人劉憑常食石桂魚，桂，鰲同音，疑此魚也。其味如豚，故名水豚。溪鰲色蒼，海鰲色黃。《爾雅翼》曰：皮厚肉緊，特異常魚。斑文鮮明者雄也，稍晦昧者雌也。以索貫雄置溪畔，群雌來齧，曳之不舍，掣而取之，常得十數頭。

鱸魚 類鰲，能食諸魚。張季鷹所思者，隋煬帝謂金齏玉膾，江南佳味，蓋芼之以橙縷也。

魷魚 鱸之別種，圓厚短蹙，味豐。按《說文》，鰓皮有文。周成王時，揚州獻鰓，則魷當作鰓。

鰻魚 屠本峻《海錯疏》：鰻身類鱸，石首口潤，肉粗，腦骨脆而味美。大者長丈許，重百餘斤。四明諺云：「寧可棄我三畝稻，不可棄我鰻魚腦。」

烏魚 《本草》所謂鰮魚。澤首喙員，其質則縑。又有赤目烏，此魚產江南大江中，春時群來至湖打子，蓋魚子須跳擊乃出。大江無石，彭湖海石廉外，於此犯擊，方得出子。

魴魚 似烏魚而小，身員口小，赤目細鱗，味似魷子月，脂膏滿腹，尤佳。一名魴。又有撥尾蓋，魴魚之小者，已見莆田縣雙魚山。

鰮魚 似鰮而目大，似鯉而鱗粗，能以鬣刺水蛇食之。

青魚 似鯽魚差大。

鯽魚 屠本峻疏：鯽板身口小，項縮肥腴，少鯁。小者形圓曰鯽。又小者形圓曰斗底。又黃蠟樟，亦鯽也，鱗金點而差厚，小者名鯽鯢，以其好交群魚，若媾然，故名媾。又曰：魚游，群魚隨之，食其涎沫，有類於媾。又曰：昌，美也。閩中諺：山上鸞，海下鯽。又有鎗魚，身扁色紫，無鱗，以其首銳腹廣，尾細如鏢鎗，故名。又有黃多，似鯽差長，鱗細，黃赤色。

鱈魚 一名紫，一名鰲，一名鱈刀，一名魴，一名鱈，一名望魚。《本草綱目》：魚形如劑，食裂箴之刀，故有諸名。頭長而狹，腹薄而腴，多鯁，脊如刀刃，故名刀鱈。《山海經》云：食之可以已妬，與石首皆以三月、八月出，故江賦云：鰲鰲順時而往還。

鰻魚 蓋國家所珍，而閩海有之。又一種春漲溯溪流而上，月長一寸，至十月盈尺者，或曰卽子魚之別種。

鰻魚 似鰻，亦多鯁。鰻侈口而圓脊，鰻狹口而劍脊，二魚之美皆在腴。

鰻魚 如鰻而小鱗，名青鰻，又名青鱗，以其鱗脊俱青也。冬月味腴。

江鰻魚 三四月有之，味美，但小而多刺。淡鹹之間，江溪之滙，泉人謂之刺芒。

黃炙魚 似鰻而小，多腴細鱗。

黃魚 身扁薄而多鯁，味佳。

鰻魴魚 形扁而薄，邵武名鞋底魚，又名潔沙。潔，音撻，魚在江行，潔潔也。又名貼沙。《吳越春秋》：東海王餘或是乎？左目明，右目晦昧，今閩廣以此魚名比目，不知比目又一魚也。

比目魚 比，並也，魚各一目相合乃行。《爾雅》：東方有比目魚，不比不行，其名曰鰈，是也。段氏《北戶錄》謂之鰈，《吳都賦》謂之魴。《上林賦》謂之魴。鰈，猶鰈也。鰈，兼也。魴，相介也。魴，相肱也。閩廣名鞋底，《臨海志》名婢徒。《臨海風土記》名奴屠。《南越志》名版。《南方異物志》名若葉，皆因形也。

馬鮫魚 青斑色，無鱗，有齒。又名章魴。連江謂之章胡。閩人方言：「山食鷓鴣羹，海食馬鮫鮓」，蓋兼美之。鰈細口，扁身而圓，無鱗無腸。馬鮫銳口，圓身而長，無鱗有腸。又一種名濶腰，一種名青貫。

鰻魚 似馬鮫而小，有鱗，大者僅三四寸。又有溪鰻。
毒魚 其皮可以磋。

魴魚 黑魴形如團扇，以其首似燕，名燕魴。

牛魚 尾如牛尾，味美在肝，俗呼鯢魚。口在腹下，無鱗，軟骨，紫黑色，尾長於身，毒能螫人。

鱸魴魚 背厚長，有蜺，大者二三斤。

水蓋魚 背差薄於鱸，剝之多水。

斑車魚 背上有斑，肉粗，味腴，大者三四百斤，腹中有肚，其味更美。

鱸魚 雌生卵，雄吞之成魚。其卵如鰕卵大。青色，無鱗，首有石如枕，去之乃不腥。俗呼松魚，泉州名成魚。其名鱸魚，或謂魚之庸，常以供饕餮食者。

黃貂魚 似燕而嘴尖，土人薹以爲鰕偽作燕。按魴種不一，而骨肉並同。諸魴以黃貂爲第一。

彈塗魚 大如拇指，鬚鬣青斑色。生泥穴中，夜則駢首朝北，一名跳魚。《海物異名記》：捷登若猴，又名泥猴矣。

白鰓魚 似跳魚而鰓白。

飛魚 頭大尾小，有翅，善跳。《吳都賦》：文鯨夜飛而觸網，是已。福人名緋魚，以其色紅如緋。海燕魚 有肉翅，能飛。

鰓魚 長七八寸，骨柔無鱗，類錢之半，有五色文。唐李柔人閩稱此魚爲銀羹，水母爲玉膾。

白鰓魚 形圓薄，類錢，一名金錢鰓。

鰓魚 板身多鰓而肥美。《爾雅》謂之當鰓。

黃雀魚 似鰓而小，冬月最盛。宋志以爲黃雀所化。

白鰓魚 《興化志》名白澤。《海物記》曰：群生，隨波潮縮在澤，故曰白澤。即今所謂白鰓。

青鰓魚 類黃雀而不甚大。

帶魚 身薄而長，大者至五六尺，其形如帶，銳口尖尾，僅一脊骨，無鰓無鱗，人夜爛然有光。北風嚴寒，其來尤盛，一釣則啣尾而升。泉人以大北風爲惡，亦曰惡魚。小者名帶柳，味差不及帶。

銀魚 其色如銀，一名鰓殘，一名王餘。《爾雅翼》：王餘長五六寸，身圓如筋，潔白無鱗，但目點黑。《博物志》：吳王食膾，棄餘中流，化而爲魚，今猶呼膾殘魚也。

鰓魚 大小形狀並同銀魚，但喙尖有一小黑骨如鍼爲異。《泰山經》云：其狀如鰓，其喙如針。

鰓魚 廣人呼爲綿魚，福寧人名爲新鰓。大者長尺餘，如灰管，大亦名火管鰓。浙東以風之，謂之風

蜆。

琵琶魚 身狹如琵琶。

鬪潮魚 乘波霧集，故名。

丁香魚 福州人重之如白小矣。藁之則名魴，曰丁香魴。

江魚 生溪海之間，肉白易腐，獨同安筭管港挺可魴也，曰筭管脯，泉人重之。

鰻鱺魚 有海鰻，又名慈鰻鱺、狗魚，又云鰻魚。能上山食菅苗，蛟噴之輒死。李時珍曰鰻鱺，舊

注：音漫黎。按許慎《說文》，鱺與鰻同。趙辟公《雜錄》亦云：此魚有雄無雌，以影漫於鰻魚，則子皆附於鰻鱺而生，故謂之鰻鱺。與許說合，當以鰻音爲正。曰蛇，曰鰻，象形也。

油筋魚 生海淖中，長如筋，周身是油，味佳。

塗龍魚 生海泥中，如鰻，長尺餘，味佳。

沙筋魚 長尺餘。《玉融志》：其狀如簪，故又名塗釵。《嶺表錄異》云：生海岸沙中，春時吐苗。

散魚 細如米粒，可爲鮓。

鹿角魚 《海物異名記》：芒角持戴在鼻，小者醃爲鮓，味甚佳。大者長五六寸許，其皮可以角錯，亦謂之鹿角魚。

耍魚 其狀纖細，又曰黃絲耍。

楓葉魚 《海物異名記》：海樹霜葉，風飄浪翻，腐蜚化厥質爲魚，名楓葉魚。

鸚鵡魚 《華夷考》：魚青綠，口曲而紅，似鸚鵡口。

嘉酥魚 其味在脊，出福清縣。

蠔魚 生蠔中，食蠔，豐肉少骨。

梭魚 似蠔魚稍大，如織梭，豐肉脆骨。

鏡魚 《閩中記》：眼圓如鏡，水上翻轉如車，方言云車魚。

火魚 隨潮蔽江，結陣而來。

蠟魚 大者長五六寸，白質黑文，美，少鯁。

沫魚 梅雨時，海水凝沫而成。雪色無骨，其大如筋。

鰻魚 河豚也，亦名鰻夷，亦名噴魚，亦名鮭，亦名鰻鮐。在海中者，其子大毒，食禁也。

已上鹹水。

鯢魚 一名鰻魚，郭璞作鰻。其性舒緩，故曰鯢，曰鰻，俗名草魚。《本草綱目》曰：江閩之畜，飼之以草。

金魚 李時珍曰：金魚有鯉、鯽、鰕、鰻數種，鰕尤難得，獨金鯽耐久。前古罕知，惟《博物志》云：出勃婆塞江，腦中有金，蓋亦訛傳。《述異記》載，晉桓冲游廬山，見湖中有赤鱗魚，即此也。自宋始有畜者，今則處處養玩矣。春末生子於草上，好自吞啗，亦易化生。初出黑色，久乃變紅，又或變白者，名銀魚。亦有紅白黑斑相間無常。而金鱸魚最佳，魚三尾，如蝦，身赤尾金，王弇州名爲朱魚。又有寸金魚，出寧德七都。

石斑魚 生南方溪澗水石處，長數寸，白鱗黑斑。浮游水面，聞人聲則劃然深入。僧行儒言：建州

有石斑魚，好與蛇交。南中多隔蜂窠，窠大如壺，常群螯人。土人取石斑魚就蜂側炙之，標於竿上，向日，令魚影落其窠上。須臾，有鳥大如燕數百，互擊其窠，窠碎落如葉，蜂亦全盡。

抱石魚 背偃腹平，無鱗，如指大，貼於山溪石上。安溪縣以爲佳品。

石伏魚 伏於溪石上，舊興化縣有之。

重唇 頭大尾小，無鱗，長三寸許，生石穴中。

已上淡水。

右鱗屬。

鰲 鰲之爲物介，而中圻厥，色青黑，其足十二，眼在背上，口在腹下。雌常負雄，獲雌則得雄。雌或脫去，終亦就斃。《吳都賦》謂之乘鰲是也。尾銳而長，觸之能刺擊人。在海中，每遇風至，舉尾扇風，俗呼鰲帆。陸佃《埤雅》：「視鵠創拖，觀鰲擊帆，是也。」韓退之《南食》詩：「鰲實如惠文，骨眼相負行。」蓋謂鰲實圓細如惠文冠所綴珠然也。其血蔚藍，實可以醢，介可以杓。

蜎 似蟹而大。《埤雅》云：「蜎蚌，大者長尺餘，隨大潮退殼，一退一長。兩殼至強，能與虎鬪。又有斑文如虎者，曰虎蜎，泉人曰虎獅。」

蠟 《蟹譜》亦曰橫江，又曰白蟹。蜎殼圓而色青，蠟殼尖而有紫點，蜎螯光圓，蠟螯有稜而長，蜎四時常有，蠟二三月有之。

蟹 《爾雅翼》曰：「蟹八跪而二螯。折而容俯，故謂之跪；倨而容仰，故謂之螯。字以解者，隨潮甲解也。螯，蟹兵也，所以自衛。折其螯，隨後更生，故曰龍易骨，蛇易皮，麋鹿易角，蟹易螯。呂亢守台州，

作《蟹圖》，凡十有二種：一曰蝤蛄，二曰撥棹，三曰擁劍，四曰彭蠡，五曰竭朴，六曰沙狗，七曰望潮，八曰倚望，九曰石礪，十曰橫江，十一曰蘆虎，十二曰彭蜩。圖所謂蝤蛄，卽蜩也；所謂橫江，卽蠟也。各長可尺餘。蜩殼圓而色青，蠟殼尖而有紫點。蜩殼光圓，蠟殼有稜而長。又有斑文如虎者，曰虎蜩，泉人謂之虎獅。擁劍，一作竭步，一作桀步，一作歇步。作桀步者，以其橫行，作竭與歇者，謂其行數步則舉螯而拱。彭蜩生埭田傍，介在鹹淡水間，螯色鮮紅，鉗作白色。又有金錢蟹，亦在鹹淡水間，漳志引《北戶錄》曰：蝤蛄小螯，大如貨錢以證之，而云中有黑膏，醃食甘美。又有石蟹，形小殼堅。有步倚，宋志：海濱人謂之浮倚，泉人名曰蝤蛄，蓋圖所謂倚望也。有千人擘，宋志云：狀如小蟹，人力劈之不開。又有一螯大一螯小，穴於海濱，潮退而出，見人卽匿人穴，泉人謂之赤脚蟹，莆人謂之港蟹。有寄生，生在蠟房蚌蛤腹中。郭璞江賦：瓊結腹蟹。《西漢書·地理志》：鄞縣有鮓埼亭。顏師古註：鮓，音結，蚌也，長一寸，廣二分，有小蟹在其腹中。埼，曲岸也，其中多鮓，故以名亭。

牡蠣 一名蠣蛤，一名牡蛤，《異物志》名古賁。陶隱居云：是百歲鵬所化，今出東海，永嘉、晉安皆好。道家方以左顧者是雄，故名牡蠣，右顧則牝蠣耳。生着石，皆以口在上，舉以腹，向南視之口邪，向東則是。陳藏器曰：天生萬物皆有牝牡，惟蠣是鹹水結成塊然，不動陰陽之道，何從而生？經言，牡者應是雄爾。宗奭曰：言牡非謂雄也，且如牡丹，有牝丹乎？（三）是物無目，更何顧盼。李時珍曰：蛤蚌之屬，皆有胎生、卵生，獨此化生，純雄無雌，故得牡名。堅石相向，附之而生。惟福寧州插竹附之，其房礪礪相連，名礪房也。泉州東石澳者佳。初生如拳石，四面漸長，有一二丈者，巖巖如山。每一房內輒有肉一塊，大房如馬蹄，小者如人指面。每潮來，則諸房皆開，有小蟲人，則和之以充腹，是名蠣房，亦名蠔袍，亦

名蠔山。海人取之，或連鑿其房，炙以烈火，候房開取肉。韓退之詩：「蠔相黏爲山，百十各自生。」又一種生海中，大如杯，口草鞋礪。又一種大蠔，房數倍，五六月有之，名曰黃蠔。宋劉子翬《食蠔房》詩：「四」
「蠔房生海隅，堅頑宛如石。其中儲可欲，雖固必生隙，嵌岳各色藏，礪礪相附積。終逢霹靂手，妙若啓局鏽。鑽灼諒難堪，曷不吐餘瀝。南庖富腥盤，豈惟此稱特。吞航大絕倫，梯檣萬夫食。針鱗九牛毛，小嚼逾千百。光螺暈紫斑，籃膏湛金色。水母脆鳴牙，章舉懸疣密。烏黏力排界，貼石不可索。妾魚戲浮波，媚鮓雌雄匹。蟹躁輒橫驚，隨縮常畏出。車螯不服箱，馬蛟非駿跡。江瑤貴一柱，嗟豈棟梁質。骨柔競愛鱧，多鯁鱗乃斥。蚶虹鮭赤文，肉黑魚之賊。鱗鱗鯉鯉，鱸鮓鰕魴鯽，鱸庸而鮓小，瑣冗難盡述。包涵知海量，長養荷天德。貪生族類繁，失地波濤窄。網罟人創禍，甘鮮已爲厄。紛然均可口，流品當別白。微物倘見知，捐軀不足惜。」

車螯 蛤之大者，殼厚微黃，肉堅，含漿不放。陳藏器曰：其大者即蜃也。能吐氣爲樓臺，春夏依約島溼常有此氣。梁元帝啓曰：車螯味高食部，名陳物志。其小者曰蜃白。《異魚圖贊》：海物惟錯，車螯蠔蚶，眉目內缺，鑊殼外絨。

蚶 殼中有肉，紫色而滿腹，以其味甘，故從甘。《嶺表錄異》曰：南人名空慈子，唐盧鈞尚書作鎮嶺南，改爲瓦屋子，以其殼大有稜，如瓦然也。《爾雅》曰魁陸。《海物志》曰天鸞。漳中陳翼飛云：蚶少時稜多，漸大漸少，至絕大者止有三稜，如車之渠，色明如蚌，治之則車渠也。惠安、莆田有大蚶廟。

蛤 殼有斑文，名花蛤。《禮記》曰：雀入大水爲蛤。唐人以充貢。又有紫色而長大者名紫蛤，出連江，似蛤而小。殼薄白色者名白蛤，出福清。又形類紫蛤而大者曰海紅。

蛤蜊 殼白厚而圓。海上人云：蛤蜊、文蛤皆一潮生一暈。《淮南子》曰：若土方捲龜殼，而食蛤蜊。

沙蛤 亦曰車蛤。皇朝王世懋《閩部疏》曰：海錯出東四郡者，以西施舌爲第一，本名車蛤，以美見謚。陳懋仁《泉南雜記》：西施舌殼似蛤而長，外色若水蚌殼，肉色如孔翠肉，白似乳，形酷肖舌，濶約大指，長及二寸，味極鮮美。舌本有數肉條如鬚然，是其飲處。

蜆 形似蛤蜊而白，合口處色黑。又有一種曰蜆蜊。

沙虱 狀如蜆蜊，而殼差薄，漳志一名沙屑，一曰沙雪，又名沙白，漳人最重之。又有一種粗者名泥屑。

土坯 《泉南雜記》：北方謂泥磚，曰土坯。晉江有介屬亦曰土坯，綠殼白尾，其旁有毛。

紅粟 泉志：似蛤而小，色白微紅。

海蛤 殼爲風濤所洗，自然圓淨。

江珧柱 韓退之謂馬甲柱。蘇子瞻以配荔枝。福州人謂之馬砧。萬震贊江瑤柱句：厥甲美句，王音裕，肉柱膚寸，名江瑤柱。又今之馬甲柱，古曰玉珧，厥名之珍，海圖所標，昔人賞之，謂美無涯。取數南果，以配荔枝。

海月 海蛤類也。一名蜃鏡，形圓如月，亦謂海鏡。土人鱗次之爲天窗。謝靈運詩「揚帆采石華，挂席拾海月」是也。《海物異名記》：一名茗葉盤。石華，方言謂之石電，高廣寸許。李善曰：石華附石，肉可啖。

蠃 耘海泥若田畝然，淡雜鹹淡水，乃濕生，如苗，移種之他處，乃大。長二三寸，殼蒼白頭，有兩巾出殼外。所種者之畝，名蠃田，或曰蠃埕，或曰蠃蕩。福州、連江、福寧州最大。又有竹蠃，似蠃而圓，類小竹節，其殼有文。有石蠃，生海底石孔中，長類蠃，圓尖，上小下大，殼似竹蠃，而更紅紫。石孔原小，及蠃生漸大，孔亦隨大，海人用小鐵鑿鑿石取之。出鎮海衛。

空豸 《海物記》：揚筆如凌漸，甲絕薄者爲空豸。泉人言：白蝦空豸，是天與醋大，蓋價薤物肆，貧民以爲甘。莆人名曰泥星。

石蛙 福曰龜脚，曰黃蠃，泉曰仙人掌，莆曰佛瓜，舊志皆是。但石蛙又是一種。《荀子》：東海有紫結，卽石蛙也。江淹《石蛙賦題》：又名紫蠃，春而發華。故江賦有「石蛙應節而揚葩」之語。而謝朓詩亦云：「紫蠃曄春流」。今按春而發華者，春月肉吐在外，秋冬則否。

石決明 附石生，惟一殼，無對。大者如手，小者如兩三指，旁有數十孔。

鰓魚 似登萊而小，有味苦者謂之苦鰓。《異魚圖譜》：鰓句似蛤句，無鱗有殼。一面附石石，叶音錯。細孔雜雜，或七或八。按：人藥品者以七孔八孔爲佳，九孔十孔不堪用也。鮓魚名鰓魚，此物亦是鰓魚。

蠃 生海中，附石。殼如鹿蹄，殼上肉下，大者如雀卵。

老蚌牙 《福州志》：似蚌而味厚，一名牛蹄，以形名。

蛇 福州、福寧爲多，殼薄味甘，與蚌一類。

石磷 形如簪笠，殼上肉下。

淡菜 《本草》曰東海夫人，亦名殼菜，亦名海蚌。《異魚圖讚》：東海夫人，淡菜有殼。形雖不典，而益帷簿。求以象類，堪爲一噓。又有一種形似淡菜而小，名沙箭，福州曰烏稔，泉州曰蠔，曰泥蜆。

蛤青 似蚌而殼薄，青色。

翠翠 似蚌而殼翠。

蝦 有赤蝦、黃蝦、沙蝦、水港蝦、斑節蝦、白蝦、泥蝦、梅蝦、狗蝦、蘆蝦。蘆蝦云蘆花所變。梅蝦云梅雨時出。泥蝦云稻花所發，暴而薰之，小者揉之曰蝦米，鉅者對插之曰對蝦，嘗以供御。其大者名蝦魁，《嶺表錄異》曰：前兩脚大如人指，長尺餘，上有芒刺，鉅硬，手不可觸。腦殼微有錯，身彎環，亦長尺餘。熟之紅色。一名蝦杯，一名龍蝦。宋志：大者有五色。《閩部疏》曰：龍蝦置盤中猶蠕動，長可一尺，其鬚四縮，長半其身。目睛凸出，上隱起二角，負介昂藏，體似小龍，尾後吐紅子，色奪榴花，真奇種也。次者名蝦姑，《開元遺事》載其名，狀如蜈蚣，尾如僧帽，泉人謂之青龍。其絕小者名苗蝦，《海物異名記》謂之醬蝦，細如針芒，聚若淖泥，可鹽而醬之。又有寄生蝦，寄生空螺中，能負之而行。

螺 蠡也。海蠡也，虫之蠡形者也。其種不一，曰香螺，亦曰流螺，大如甌，長數寸，其壓獨燒則真，雜衆香燒之便益芳芬，《本草》謂之甲香，以泉州者爲上。曰鈿螺，光彩如鈿，可飾鏡背。曰黃螺，殼硬色黃，其味珍。曰花螺，殼有斑點，味勝黃螺。曰黏螺，曰米螺，小粒如米。曰紅螺，肉可醬。曰蓼螺，其辛如蓼。曰梭螺，殼細長，文如雕鏤。曰竹螺，殼文粗，味清香。曰紫貝螺，紫色，有斑點。漢文帝時，南越王獻紫貝五百，是也。俗謂之研螺，以研紙光滑便作字。曰鸚鵡螺，狀若鸚鵡，堪作酒杯。曰鸚鵡螺，殼小而厚，黑色，泉人端午食之，云可明目。曰泥螺，軟殼，大如指，多涎，有膏。泉人謂之麥螺，以麥熟而

生。莆人醃之，名香螺。又有土貼，卽浙人名土鐵也。曰馬蹄螺，曰指甲螺，俱以形似名。曰江橈，卽指甲之大者，《漳志錄》：殼白，尾形如船橈。曰醋螺，出福州洪塘江，去殼醃之，味佳。曰莎螺，形如竹螺，味微苦，尾極銳。又坑澗中有潦螺。

海膽 殼圓如盂，外密結刺，內有膏，黃色，土人以爲醬。舊志又有石槌，注云：形圓色紫，有刺，人觸之則刺動搖，疑卽海膽，而異其名也。

水龜 一名龍虱。

右介屬。

烏鰂 一名烏賊，一名墨魚，一名纔魚，大者名花枝。陶隱居云：是鸚鵡所化，口脚俱存，猶然相似。是魚腹中有墨。海人云：秦皇帝東游，棄算袋於海，化爲此魚。其形一如算袋，兩帶極長，墨猶在腹也。又云：性嗜烏，每暴水上，有飛鳥過，謂其已死，便啄其腹，則卷取食之，故名烏賊。其云纔魚者，《南越志》：烏賊有時遇風，遠岸則蚪前一鬚爲矴，近岸則黏前一鬚爲纔。又云：腹中血及膽如墨，可以書。鰂者，則也，以書文字爲世則也，故曰烏賊。懷墨而知禮，又名海若。《白事小史》又名河伯。從事晒乾者，閩浙謂之明府。其骨曰海螵蛸。《呂氏春秋》注引古月令曰：九月，寒烏入水化爲烏鰂，魚之人月令七十二候者惟烏鰂爾。陳時，天台智顗禪師請禁海際捕魚滬，宣帝勅答曰：「此江旣無烏賊珍珠，宜依所請。」觀此，見烏賊之味爲食珍矣。

柔魚 似烏賊而長，色紫，漳人晒乾食之，其味甘美。

鎖管 或云卽柔魚，第差小爾。又有一墨斗，似鎖管而小，亦能吐墨。又有猴染，大於墨斗，小於鎖

管。

鯨魚 一名望潮魚。廣南有蟹亦名望潮，蓋名同質異。紫色，腹圓，有腹無頭，頭在腹下。多足而長，皆環口上。有圓文星聯凸起腹內。有黃褐色，質如卵黃，有黑如烏鰂墨，有白粒如大麥，味皆美。又有石拒，似鯨魚，（五）一名八帶，大者至能食豬。居石穴中，人或取之，能以足黏石拒人。又有章舉，一名紅舉，似烏賊而差大，味更珍好。韓退之《南食》詩：「章舉馬甲柱，鬬以怪自呈。」又有塗婆，章舉別名，似石拒而帶短。

鮑 一名蚌，一名水母，皮切作縷，名水母線。《本草》謂樗蒲魚，亦謂之鮑，亦作鮑。《北戶錄》謂：蚌，（六）一名石鏡，海漚所結也。色正白，濛濛如沫，又如凝血，縱廣數尺，有知識，無腹臟頭目，所處隨東西，不知避人，借蝦爲目。柳子厚詩：「待目尚憐蝦」是也。腹下有物如懸絮，群蝦附，啞其涎沫，猶蛩蛩之與駝驢也。

海粉 狀如綠毛龜，無介純肉，背有小孔，海粉出焉。晴明收之，則色綠，陰雨收之，則色黃。

沙蠶 生汐海沙中，如蚯蚓，泉人美謚曰龍腸。又有土鑽，似沙蠶而長。

右鹹水之蟲。

石鱗魚 一名石崙魚，蛙屬。皮斑肉白，味美。是生高山深澗，晝伏竄中，夜居山頭石頂。捕者不可預相告語，密摘黃曆首一葉納竈中，卽抱松明火照之，魚尤不敵，遂不能動。泉州德化縣爲多。

右淡水之蟲。

何子曰：韓退之謂閩越地肥衍，有山川禽魚之樂。閩中山川汧渌奧鬱，其氣候恒暖，稻則再易，葉則寡凋，故其草木最盛。海於天地又最鉅，物含淹卵育，不可圖狀，余志南產，亦一傳奇矣，惟上云乎哉！

贊曰：閩在南方，火離之宅，樹無凋條，物靡希革。騰遑凋晰，滋華媚澤，量谷充園，被臯布澤。爰有大海，爲江河伯。異產殊形，羞厨薦客，或膾或烹，以醢以腊。筵陋重肉，美兼累跖。昌黎有賦，致雍是籍，備載於篇，飛蟲是獲。

〔校記〕

〔一〕「南產志」下，各本原衍「下」字，據本書體例刪。

〔二〕「烏頭」，據文義，當作「烏頭鯢」。

〔三〕「有牝丹乎」，各本原作「有牡丹乎」，據文義改。

〔四〕「劉子量」，各本原作「劉子量」，據弘治《八閩通志》卷六十五《人物》改。

〔五〕「鯉魚」，各本原作「鯉魚」，據文義改。

〔六〕「蚌」，各本原作「蚌」，據文義改。

閩書卷之一百五十二

舊德志(二)

福州府

晉末，妖賊孫恩作亂於會稽，宋高祖劉裕爲司馬討敗之，恩於臨海投水死，餘衆推恩妹夫盧循爲主。桓玄欲且緝寧東土，以循爲永嘉太守。循雖受命，寇暴不已。玄復遣高祖東征。時循自臨海入東陽，玄復遣高祖破循於東陽。循奔永嘉，復追破之，斬其大帥張士道，追討至於晉安，循浮海南走。傅亮從武帝平閩中詩曰：「鞠旅揚城，大蒐徐方。旆旌首路，元戎啓行。弭一作擊。楫洪河，總轡崇岡。」（寰宇風俗記）：泉郎，卽此州夷戶，亦曰游艇子，乃盧循之餘。晉末，循爲劉裕所滅，遺種逃叛散居山海，厥類尚繁。唐武德八年，都督王義童遣使招撫，得其首領周造、麥細陵等，並授騎都尉，令相統攝，不爲寇盜。貞觀十年，始輸半課，其居止常在船上，兼結廬海畔，隨時移徙，不常厥所。船頭尾尖高，當中平濶，衝波逆浪，都無畏懼，名曰鳥船。

晉永嘉二年，中州板蕩，衣冠始入閩者八族，所謂林、黃、陳、鄭、詹、丘、何、胡是也。王氏父子據有全閩，雖號不知書，然一時浮光士族多與之俱南。其後頗折節下士，開學館，以育才爲意，所以閩之風聲氣

習，浸與上國爭列。其從子王廷嗣者，以道義自任，蓋當時目之爲唐五經，而內翰范淳夫嘗爲立傳。

唐顧況《上古之什補亡訓傳》十三章，其十章曰：「困，哀閩也。閩俗呼子爲困，（二）呼父爲郎罷，其詩曰：『困生閩方，閩吏得之。乃絕其陽，爲臧爲獲。致金滿屋，爲髡爲鉗，如視草木，天道無知。我罹其毒，神道無知，彼受其福，郎罷別困。吾悔生汝，及汝既生，人勸不舉，不從人言，果獲是苦。困別郎罷，心摧血下，隔地絕天，及至黃泉，不得在郎罷前。』」

宋陳襄將終，妻子環泣，求所以語後者。公索紙書「先聖先師」四字，付子而絕。《行狀》。

富丞相當國日，引陳襄述古爲上客，述古所以告富公者，盡仁義也。有不悅富公者造爲五鬼之說，而襄在其一。夫流言待無知而傳，至智者則止矣。以富公之賢，其門無善士？以述古之賢，肯爲人作鬼乎？《呂氏家塾記》。

宋陳烈，與盱江李觀同赴蔡襄飲，時正春，營妓皆在後園賣酒，襄因命妓佐飲，烈已不樂。酒行歌作，烈踰牆而遁。觀座上賦詩，有「山鳥不知紅粉樂，一聲檀板便驚飛」之句。後烈聞之，投牒於襄云：「李觀本無士行，輒造賓筵，詆釋氏爲妖狐，指孟軻爲非聖。按吾聖經，非聖人者無法，合依教律，肆諸市朝。」《道山清話》。

陳烈，幼與蔡君謨同硯席，後君謨鎮福唐，勵精爲郡，嚴肅吏治，毫髮不容。一日，先生往見，維舟庭下，聞公嚴察，遂不往謁，留詩曰：「溪山龍虎盤，溪水鼓角喧。中宵鄉夢破，六月夜襟寒。風雨生殘樹，蛟螭喜怒瀾。慇懃祝舟子，移棹過前灘。」庭吏錄詩以呈，公見，遽命以記謝過曰：「先生旣以詩誨之，不若耳提面教之也。」先生竟去，公爲之少霽威。《翰府名談》。

鄭俠，聞子侄誦孔繁之義曰：「弗諉者，弗忘君之惡，弗過者，弗過之朝，弗告者，弗告君以善。顧人之於善有憊憊之不忍也，故永矢以絕之。」俠嘆曰：「是何言歟！古之人在猷猷不忘君，況於賢者。一不見用，而忿戾若是哉？蓋弗諉者，弗忘君也，弗過者，弗以爲君過也，弗告者，弗以告他人也。」其存心如此。（福清縣志）。

葉相國向高《金陵重修一拂祠記》：「一拂先生者，吾邑宋上《流民圖》鄭公俠也。罷官，餘一拂，故稱一拂先生。祠此者，以嘗從其父監稅江寧，讀書清涼寺後，人卽地祠焉也。嘉定中，易先生名爲介，祠名仍稱一拂，以此邦人習焉也。祠久廢，太史焦公言於督學使者饒公，重新之，使僧典灑掃。亡何，僧私焉，余與少宰晉江李公逐其僧他所，復之。焦公率諸生白於京兆，以春秋致祭祠下，修舊典也。」

胡銓乞斬秦檜，竄新州，一時士大夫莫敢與立談，獨王盧溪廷珪詩而送之。檜怒，以訕謗流夜郎。又有朝士陳剛中，三山寓公張仲宗，亦以作啓與詞爲餞而得罪，時論譴之。（程史）。

黃直卿《與李道傳書》：傳，字貫之，隆州井研人。「向來同學之士，今凋零殆盡。閩中則潘謙之、柄，三山人。楊志仁、復，福安人。林正卿、學素。林子武、變孫。俱三山人。李守約、閩相。李公晦，方子。俱邵武人。江西則甘吉父、節。黃去私、張元德，洽。江東則李敬子、燭。胡伯量、泳。蔡元思，浙中則葉味道、賀孫。潘子善、時舉。黃子洪，士毅其先莆田人。大約不過此數人。年來得尊兄并太府陳寺丞密，莆田人。相與接續，尤覺此道之孤也。」（勉齋文集）。

元安南國王陳日暎，故謝升卿，閩人博徒也，美少年，亡命邕州。交趾相率閩人貿易邕界上，見升卿，異之，與偕歸，納爲王昀女婿。昀老無子，死，王女主國事，因以與其夫。而升卿變姓名爲陳日暎。

皇朝林濂作《閩中三公》詩。《開府張公岳》：「開府元凱倫，特達廟廊器。代工感熙明，濟世懷深志。直道諒難容，險阻方歷試。長驅百萬師，深人不毛地。鬼方難已夷，魏闕戀空積。霖雨晦遐陬，前軍大星墜。青編勛業崇，赤縣經綸秘。千載峴山碑，行道空垂淚。」《太宰李公默》：「太宰風塵表，盛名自弱冠。揮麈吐清言，登壇弄柔翰。振羽覽德輝，高舉凌霄漢。既懷人倫識，復負經濟幹。蛾眉不見容，貝錦紛爲患。淒涼梁獄書，惻愴東門歎。啓事有遺規，皇猷無共贊。精忠諒若存，耿耿南箕煥。」《司馬張公經》：「司馬文武才，磊落萬夫望。平生覽穰苴，笑談在帷帳。雲擾亂江東，據鞍一何壯。未寒息壤盟，已速中山謫。哀哉誰爲明，功高不相讓。鶴唳寧復聞，弓藏空惆悵。三軍氣暗嚼，雜虜戈相向。千秋麟閣勳，終記青冥上。」

同安洪侍郎朝選《贈侍郎鄭世威》詩：「我昔懷古人，夢寐想見之。行行半海內，如何所見希。偉哉陶元亮，讀書誦其詩。斯人何真樸，千古見光儀。當其饑寒迫，出仕良云宜。及至耻折腰，歸去復奚疑。雅性本耽酒，舉杯不復辭。若還不得酒，吟哦亦自怡。去留曾不悵，心事固易知。淳風邈不作，高駕亦難追。安知千載後，公也嗣音徽。長翮憂宇宙，昂然孤鶴姿。又如松與柏，衆卉伏以卑。往昔蒞大藩，高論固蔽蕤。自知不諧俗，歸卧一茅茨。性亦嗜醇酒，杯至不停揮。酒酣大筆落，屹屹森戟旗。時來通塞異，脫履登君墀。抗章復塞謬，立論亦恢奇。今歲得賜歸，還向江海湄。昔如雲無心，今如鳥倦飛。宛然兩陶公，千載結襟期。」

葉學士向高《林季公傳》：「先大父女弟四，其季適同邑林鏡水翁，有三子，伯質卿，仲昆卿，季乃丙卿。伯忍而強，崎嶇仲。仲謹避不敢抗。季念均吾兄也，而弱者魚肉，不能平，稍左右仲。伯遂舍仲而囑

季。家故饒，至分異，仲、季乃不能具薪爨。季稱貸營十二，去而之燕，竟用賈興至千金。生平倜儻任放，既稍贏，則益自發舒，好游俠，斜遇當意，揮擲不少靳。姬劉者，有聲曲中，貴游爭慕之，一見季歡甚，求事季。季破數百緡取之。或問劉：「世欲得卿多矣，何委季也？」劉曰：「季能爲人負，不能負人，此所以委季也。」季既得劉，不復問賈事。族子上舍生某破產落魄，多負人金，季念之甚籍，完鏹付之曰：「謹視出人，吾從酒人游耳。」某遂悉季橐償負。他日，季歸，視其橐空，且復有他負，皆坐季。季困甚，則語劉：「吾且暮溝中，相隨斃，亡爲也。若仍歸平康耳。」劉涕泣不去。季大喜，勉起修故業，更歲餘，復稍給。待族子如初，復代爲入貲，授楚郡幕。復數年，季廢賈，再貧。入楚訪幕，會幕已奪官，貧不能歸，徙家他所。季抵幕，相慰藉，謂幕曰：「吾實以貧來，乃今知若貧甚我也，復何言！」因出券還幕，捫袖中得十金，仍舉贈之，竟徒手歸。而生平所善孝廉林某者，復坐事敗，負季且千金。其子走闕下，欲上書訟父冤，亦徒手無一錢，與諸孝廉故者，皆自引匿。季獨延至家，衣食之，爲徧請諸貴人。事雖不白，人以是重季。季先後所貸與入不下數千金，償者僅十二，坐是益困，客吳楚閩粵間，而劉死矣。季聞慟絕，疾馳抵燕，日夜哭，刻玉爲主，題其背曰：「人時倒郎懷，出時對郎面，隨郎南北與東西，芳草天涯堪遶遍。勝寫丹青圖，勝粧水月殿，玉魂與香魄，都在這一片。願作巫山枕畔雲，願作盧家梁上燕，莫似生前輕別離，教人看作班妃扇。」少年輩嘲季是章臺枯柳，何鍾情若是。季事劉氏母謹於劉在日。而季之伯氏既逐季，產亦隨盡，竟坐殺人死獄中。季大傷，遂挈家歸，撫其孤。或謂季：「忘伯舊日哉？」季曰：「是忘母親也。」三交歡諸公，然無所請謝，值因時，突煙絕，終不向人開口，行歌自如。太史宛陵沈公、樵李馮公、漢陽蕭公皆與季善，游於布衣歡，一日，至漢陽訪蕭，留飲十日。復之粵西，其從兄婿薛雲綬爲藩幕，強留不能得，

僦舟東下。行再舍，舟人陳亞三掠其資，殺季及僕與其同舟三人，沉屍於江。亞三等素往來行劫桂林、蒼梧間，吾友蒼梧司理林君廉得，捕治之，搜囊得玉主，大驚：「此吾邑人林丙卿物。豈丙卿西游見殺耶？」亞三情得咋舌死，窮索餘黨，盡伏辜。開府戴公檄藩幕行求死者屍，其他皆糜爛，獨季顏面如生，肌肉無損，觀者駭異。當道咸哀憐季，且以季非緣玉主葬魚腹耳，此劉之報季於冥冥也。劉母聞季死，長號而絕。生平識季面者，談及無不隕涕。

泉州府

唐常袞，有文章高名，嗜誘後進，一見歐陽詹，比爲芝英。

唐韓昌黎《歐陽生哀辭》：歐陽詹，世居閩越。自詹已上，皆爲閩越官，至州佐縣令者累累有焉。閩越地肥衍，有山泉禽魚之樂，雖有長材秀民通文書吏事與上國齒者，未嘗肯出仕。今上初，故宰相常袞爲福建諸州觀察使，治其地。袞以文辭進，有名於時，又作大官，臨蒞其民，鄉縣小民有能誦書作文辭者，袞親與之，爲主客之禮，觀游宴饗，必召與之。時未幾，皆化翕然。詹於時獨秀出，袞加敬愛，諸生皆推服。閩越之人舉進士縣詹始。建中、貞元間，余就食江南，未接人事，往往聞詹名閭巷間，詹之稱於江南也久。貞元三年，余始至京城舉進士，聞詹名尤甚。八年春，遂與詹文辭同考試，登第，始相識。自後，詹歸閩中，余或在京師他處，不見詹久者，惟詹歸閩中時爲然，其他時與詹離率不歷歲，移時則必合，合必兩忘其所趨，久然後去。故余與詹相知爲深。詹事父母盡孝道，仁於妻子，於朋友義以誠，氣醇以方，容貌巖巖然。其燕私善謔以和，其文章切深，喜往復，善自道。讀其書，知其於慈孝最隆也。十五年冬，余以徐

州從事朝正於京師，詹爲國子監四門助教，將率其徒伏闕下，舉予爲博士，會監有獄，不果。上觀其心有益於余，將忘其身之賤而爲之也。嗚呼！詹今其死矣。詹，閩人也，父母老矣，拾朝夕之養以來京師，其心將以有得於是而歸爲父母榮也，雖其父母之心亦皆然。詹在側，雖無離憂，其心不樂也。詹在京師，雖有離憂，其志樂也。若詹者，所謂以志養志者歟。詹雖未得位，其名聲流於人人，其德行信於友朋，雖詹與其父皆可無憾也。詹之事業文章，李翱既爲之立傳，故作《哀辭》，以舒予哀，以傳於後，以遺其父母而解其悲哀，以卒詹志云。求仕與友兮，遠違其鄉。父母之命兮，子奉以行。友則既獲兮，祿實不豐。以志爲養兮，何有牛羊。事實既修兮，名譽又光。父母欣欣兮，常若在傍。命雖云短兮，其存者長。終要必死兮，願不永傷。友朋視疾兮，藥物其良。飲食孔時兮，所欲無妨。壽命不齊兮，人道之常。在側與遠兮，非有不同。山川阻深兮，魂魄流行。祀祭則及兮，勿謂不通。哭泣無益兮，抑哀自強。推生知死兮，以慰孝誠。嗚呼哀哉兮，是亦難忘。

《閩川名士傳》：歐陽詹，字行周，泉州晉江人。弱冠能屬文，天縱浩汗，貞元年登進士第。舉關試，薄游太原，於樂籍中因有所悅，情甚相得。及歸，乃與之盟曰：「至都當相迎耳。」卽灑泣而別，仍贈之詩曰：「驅馬漸覺遠，迴頭長路塵。高城已不見，況復城中人。去意既未甘，居情諒多辛。五原東北晉，千里西南秦。一屢不出門，一車無停輪。流萍與繫瓠，早晚期相親。」尋除國子四門助教，住京。籍中者思之不已，經年得疾，且甚，乃危粧引髻刀而匣之，顧謂女弟曰：「吾其死矣，苟歐陽生使至，可以是爲信。」又遺之詩曰：「自從別後減容光，半是思郎半恨郎。欲惜舊時雲髻樣，爲奴開取縷金箱。」絕筆而逝。及詹使至，女弟如言，徑持歸京，具白其事。詹啓函閱之，又見其詩，一慟而卒。故孟簡賦詩，序曰：「閩越

之英，惟歐陽生以能文擢第，爰始一命食太學之祿，助成均之教，有庸績矣。我唐貞元年己卯歲，曾獻書相府論大事，風韻清雅，詞旨切直。會東方軍興，府縣未暇慰薦。久之，倦游太原，還來帝京，卒官靈臺。悲夫，生於單貧，以徇名故，心專勤儉，不識聲色。及茲筮士，未知洞房纖腰之爲蠱惑。初抵太原，大將軍宴席上，有妓北方之尤者，屢目於生。生感悅之，留賞累月，以爲燕婉之樂盡在是矣。旣而南轅，妓請同行，生曰：『十目所視，不可不畏。』辭焉，請待至都而來迎，許之乃去。生竟以蹇連不克如約，過期，命甲遣乘密往迎妓。妓因積望成疾，不可爲也。先天之夕，剪其雲髻，謂侍兒曰：『所歡應訪我，當以髻爲貺。』甲至得之，以乘空歸，授髻於生。生爲之慟然，涉旬而生亦歿。則韓退之作《何蕃書》所謂歐陽詹生者也。河南穆玄道訪予，常嘆息其事。古樂府詩有華山畿《玉臺新詠》，有廬江小吏更相死，或類於此。暇日，偶作詩以繼之云：『有客非北逐，驅馬次太原。太原有佳人，神艷照行雲。座上轉橫波，流光注夫君。夫君意蕩漾，卽日相交歡。定情非一詞，結念誓青山。生死不變易，中誠無間言。此爲大學徒，彼屬北府官。中夜欲相從，嚴城限軍門。白日欲同居，君畏仁人聞。忽如隴頭水，坐作東西分。驚離腸千結，滴淚眼雙昏。本達京師迴，駕期相追攀。宿約始乖阻，彼憂已纏綿。高髻苦黃驪，危鬢如玉蟬。纖手自整理，剪刀斷其根。柔情託侍兒，爲我遺所歡。所歡使者來，侍兒因復前。收淚取遺寄，深誠祈爲傳。封來贈君子，願言慰窮泉。使者迴復命，遲遲蓄悲酸。詹生喜言施，倒屣走迎門。長跪聽未畢，驚傷涕漣漣。不飲亦不食，哀心百千端。襟情一夕空，精爽旦日殘。哀哉浩然氣，潰散歸化元。短生雖別離，長夜無阻難。雙魂終會合，兩劍遂蜿蜒。大夫早通脫，巧笑安能干。防身本苦節，一去何繇還。後生莫沈迷，沈迷喪其真。』

蔡確《送將歸賦》：昔人之言秋意也，曰若在遠行，登山臨水送將歸。此其平日游子之所悲，怨慕悽愴，尚不能自支，而況於予乎！戀高堂之慈愛，積三歲之違離。余親屬子，以待我行，且復命於庭闈。其送子也，乃在粵嶺之南，溟海之西，洗亭之側，灩水之湄。出門踴躍以將別，仰天涕泣之交頤。浮雲爲我變色，行路爲我齋咨，而況於予乎！予方省愆念咎，蠶食布衣，鬢如秋霜，形如槁枝，子見吾親，勿以告之。明明二聖，仁如天也。雷霆雨露，固有明也。孤臣放逐，久當憐也。晨夕定省，歸可期也。子告吾親，其以斯也。昌乎天下之險，處乎人跡之稀，觸氛霧以深人，仗忠信而不疑。以余之故而兩走乎萬里，嗟如子者其誰？周楚之郊，余親所棲，瞻彼白雲，余留子馳，安得借翰於鴻鵠，徑從子而奮飛也。《困學紀聞》云：文鑑取蔡確《送將歸賦》，猶楚辭後語之取息夫躬。

呂惠卿知延州，始陝西緣邊漢蕃兵各自爲軍，每戰以蕃兵爲先鋒，而漢兵城守，伺便出戰。惠卿始合爲一，先蒐捕守兵，而出其選鋒以戰，隨屯置將，且條約束。上會蕃部屈余也將入寇，惠卿以近日帥臣多養威恃重，乃將牙兵按邊，啓師於東郊，趨綏德，抵無定河，歷十有八日乃還。

呂惠卿紹聖中復知延州，途出西都，時程頤居里，謂門人曰：「吾聞呂吉甫，未識其面。明旦西出，必經吾門，且一覘之。」迨旦，了無所聞。詢之，則已過去久矣。頤歎曰：「從者數百，人馬數千，其能使悄然無聲，馭衆如此整肅，立朝雖多可議，才亦何可掩也！」夏人復入，將以全師圍延安，惠卿修米脂諸砦以備寇。寇至，欲攻城，則城不可近；欲虜掠，則野無所得；欲戰，則諸將按兵不動；欲南，則懼腹背受敵。留二日，即拔柵去。

呂惠卿與蘇子瞻同在館中，惠卿爲安石進用，而子瞻外補，遂相仇。惠卿貶，子瞻謫辭極詆之。惠卿

至貶所，謝表有曰：「龍鱗鳳翼，固絕望於攀援；蟲臂鼠肝，一冥心於造化。」子瞻於邸報見之，笑曰：「吉甫終會作文字。」（百川學海）

劉後村曰：考亭論荆公、東坡門人，寧取呂吉甫，不取秦少游，其說以爲吉甫猶看經書，少游翰墨而已。孫鴻慶覲序其文，謂辭嚴義密，追古作者。

宋朝以欽器賜傅伯壽，其家今尚寶藏。

宋幼主過泉城，宋宗室欲應之，守郡者蒲壽庚，閉門不納。及張世傑回軍攻城，宗室又欲應之，壽庚置酒延宗室，欲與議城守事，酒中盡殺之。泉志：蒲壽庚，其先西域人，總諸蕃互市，居廣州，至壽庚父開宗徙於泉。壽庚少豪俠無賴，咸淳末與其兄壽成平海寇有功，累官福建安撫、沿海都制置使，景炎年授福建廣東招撫使，總海舶。景炎入海，航泉州港，分淮兵二千五百人，命壽庚將海舟以從。壽庚閉門拒命，與州司馬田真子上表降元。明年七月，張世傑自海上回攻城，壽庚遣其黨孫勝夫詣杭求唆都援兵，自與尤永賢、王與、金泳協謀拒守，盡殺淮軍，宗子之在城者。攻凡九十日不下，世傑解去。壽庚進昭勇大將軍、閩廣都提舉福建廣東市舶事，改鎮國上將軍、參知政事。勝夫等各進官有差。初，壽成自宋時仕至知吉州，逆計宋事已去，辭不赴。壽庚迎降及殲淮兵，宗子，皆壽成陰爲之謀。事成，乃佯著野人服，入法石山，若無與其事者。壽庚長子師文，尤暴悍嗜殺，淮兵、宗子之死，師文力居多。元以壽庚有功，官其諸子若孫，多至顯達。泉人避其薰炎者十餘年，元亡乃已。皇朝太祖禁蒲姓者不得讀書人仕。

皇朝蔡文莊清《密箴》五十條：一口，光風霽月其心胸，海濶天高其器宇，鳳文麟趾其威儀，玉振金聲其詞語。又曰，試將曾子與、閔子騫之言萃爲一編，清心展誦，何其氣象之至誠，怛惻而溫然。咄咄汝清，

今日正須學子與與子騫。又曰：曾子與，魯中之敏也；閔子騫，無爲之有爲也；君子胡不慥慥爾！又曰：勸君莫著半點私，但用半點私，終無人不知。勸君莫用半點術，但用半點術，終無人不識。君不見巍巍溫公律身嚴，與人忠赤，心質神明，素行孚交童。又曰：范陽張氏曰：一念之善，則天地神祇、祥風和氣皆在乎此。一念之惡，則妖星厲鬼、凶荒札瘥皆在乎此。咄咄爾清，三復乎斯語。又曰：聖賢無心占便宜，終則盡天地便宜事都歸聖賢做；彼計較目前便宜者，究竟便宜都不得。又曰：程夫子曰：「德盛者言自傳。」然而，繼之曰：「文盛者言亦傳。」則愚竊以爲未然，是又將待我以柳宗元。又曰：德之威人也，重矣哉；誠之鑑物也，豫矣哉。君子貴知務。又曰：必使小人不忍以其所爲而疑我之爲之也，乃爲信於人。又曰：劉器之謫潞州時，小人有爲部使者，郡中事無巨細皆詳考，竟不得其纖毫，至過往驛券，亦無法外者。部使亦嘆服之。嚴哉！嚴哉！又曰：韓魏公稱司馬溫公大忠大義充塞天地，橫絕古今，但當與有志之士同有執鞭之願。嗚呼！丈夫豈不在自立哉！又曰：毋徒嚶嚶然曰古之人！古之人！古之人也，只似爾七八尺之身。毋徒嚶嚶然曰吾欲云云。吾欲云云，則即此目前一啓齒，一舉足，皆道所存。又曰：程先生每教人靜坐，李先生亦教人靜坐，以驗夫喜怒哀樂之未發時，氣象爲何。如此可以養心，可以養氣，可以照萬物，而處之各得其宜。又曰：培夜氣，引旦氣，善用其氣，造化在我。又曰：莫虛勞著步，莫虛放出声，久之自閒適，蕩蕩復平平。又曰：元城於「不妄語」三字，力行七年而後成。上蔡別伊川一年，（五）方只去得個矜字。而明道少年之獵心猶不覺，其躍然於十二年之後也。堅苦強忍作工夫，古之人皆然。又曰：古人有言，一身之利無謀也，而利萬世者則謀之。嗚呼！國家之所以作養人材，聖賢之所以注望後學，意良在是。又曰：宇宙之間三不朽，身心之外，悉皆虛言。出於爾而忘之乎？爾今年幾何矣？又曰：

朱子曰：惟君子然後知義理之所必當爲，與義理之必可恃。利害得失既無所入於其心，而其學又足以應事物之變，是以氣勇謀明，無所懾憚，不幸蹉跌，死生以之。噫！豈不堂堂然真大丈夫哉！又曰，程子曰：人能將這一箇身公共放在天地，萬物一般樣看，則有甚妨碍？大哉，言乎西銘之見也。又曰，程子曰：君子之志，所慮豈止其一身，直慮及天下千萬世。小人之慮，一朝之忿，曾不遑恤其身。噫！清不肖，親爲小人之事矣。程子斯言可念也。又曰，進取功名易，變化氣質難，痛須加猛省，莫負好衣冠。又曰，樂莫樂日休，憂莫憂多求。古之人雖疾雷破山而不震，雖貨以萬乘而不辭，惟胸中一點堂堂者常有，以屹砥柱於中流。又曰，胡五峰云：知人之道，驗之以事，而觀其詞氣。從人反躬者，鮮不爲君子。任己蓋非者，鮮不爲小人。噫！爾尚敬爾心術，慎爾行事，而和厚爾詞氣。檢點之功，有一未至，將不逃於明者之一照，而爲遠近所嗤譏。又曰，器度要宏，識見要精，趣味要清。又曰，食服常溫，一體皆春。心氣常順，百病自遯。又曰，周子之幾，超凡之梯。張子之豫，作聖之據。程朱之敬，立身之命。又曰，清不清，負爾名，介不介，義安在。又曰，山居不欠薪，舟行不欠水。更有便於是，人心不欠理。又曰，戒爾重其言，言欲亮而貞，更於我也不重，則人之聽之也輕。惟古之聖賢兮，率然隻語達天聲，垂之後世而爲經。又曰，心術正大，舉動光明，如青天白日，乃不自負生平。又曰，善言者自簡，善應者自定。君不見，鐘不叩則不鳴，水不止則不瑩。又曰，善處事者不勞而自辦，善守己者不勞而自清。又曰，長注念於遠大，而實地則在乎目前。夫惟能踐實地於目前，是以能垂聲光於綿綿，而可以上報乎君親師，與夫先聖先賢。又曰，有道德者必不多言，有信義者必不多言，有才謀者必不多言。夫未有多言而不妄者也。又曰，天之助人善也，至快至周，而天之報人惡也，亦至信至密。又曰，澄其心於淵瑩之天，奉其身於光明之地。言則

無一字之遺，而亦無一字之贅。動則如萬鈞之弩，一發便中其機會。此蓋古之人也。又曰，師道閉門處，老瞞獨睡時，用之得其道，造化無藏機。又曰，古昔聖賢所樹立，並明日月照天地，非義一毫絕胸中，能做得人間事。又曰，俗云一刻值千金，學者當如此用心。《易》曰：天行健，須是見得真實切己。又曰，以篤實信天下，以大節竦天下，以器量包天下，以學識周天下，以規模駕天下，以實才猷，實事業副天下。於乎！豈不真烈烈世之大丈夫哉！又曰，先民云：善愛其身者，能使百年爲千載。汝清壽決不能百年，不早爲自愛計，將復何待？又曰，若是真學問文章，須見於威儀之際與夫日用之常。若是真道德性命，須見於治家之法與夫當官之政。又曰，欲爲一世經綸手，止熟數篇緊要書。又曰，格天之功興於衽席，溺身之悔誤於詞章。又曰，聖哲之卧，要亦有思，不在身心，則在天下。又曰，若能做好人，仇家不得嗔。不能做好人，朱均無至親。又曰，以楊勉仁之勳而謚文敏，以李原德之望而謚文達。吁！敏乎，達乎，其公論之不没乎！又曰，有數大恩不可忘，天也，地也，君也，親也，師也，凡匡吾過惡而負吾所不及者也。按：此吾十條，乃公當時所出以示楊公廉者，人始知公有載，今《文清集》不載，豈公以少年之作不存稿耶？

陳紫峰先生琛，儒士時讀書月臺書館。僉憲建平宗公璽來鎮泉，急致先生爲子師，具書幣使節推沈公珂來迎。先生曰：「是召我也。」固不至。宗公聞而愧之，乃自見先生於書館。先生屹然安坐，賓師之禮，不少屈諛，不少假托。《陳紫峰言行錄》。

陳紫峰爲刑部主事，每語人曰：「理刑之道，當以誠實惻怛之意爲之審實求生，唯急於致刑辟，則人有不得其死者矣。」又曰：「有斷然之法，有當然之理，又有自然之情。法固因天理人理而爲之節制者，然以一定有限之法，安足以盡事端無窮之變哉？」以母老乞改南都，得戶部雲南司。尋差監淮安舟稅，嚴水

聞啓閉之禁，以革私弊。小舟舊不入閘，從傍梁往來者悉弛其征，人人稱便。而漕院之撫淮安者微欲有所干撓，先生曰：「若議王道之純，則鈔關可以無設，而洿池數罟，豈仁者所忍爲。此古學道君子所以不肯爲條例司官，必盛德如程明道，乃能不以爲浼。而庸拙如區區者，將如之何哉？茲正額不虧，而多取贏餘爲功，區區不忍也。」其人愧屈。此出泉州舊志，而淮人至今傳誦，謂先生於正稅既足之後，大開關門，恣商人來往，惟與賓客談學賦詩而已。部尚書責先生廢事，先生移書部尚書：「若論王道之純，則鈔關可以無設，若充類之盡此，非禦人之盜乎？」此語允嚴。

吳尚書東湖廷舉於陳紫峰爲前輩，以道義意氣忘年相友。一日，上疏乞歸，而猶掌部篆，先生以詩諷之：「此去看花猶半吐，何人完璧肯遲留。」東湖公亦傾心相咨，自述其所以不卽行之故，而曰：「知己寥寥，誰可告去處？」惟先生道明德立，於生交雖淺，而愛則深，教曰宜速，生不日行矣，教曰宜遲，生如諸老言，便候朝報也。」門人蔡存徵事述。

先生反身自檢，少不慊志，痛自刻責，或爲之箴，或爲之誡，朝夕觀省。常誦《孟子》「三自反」之言，謂其英氣太露，終不如顏子淵、程伯淳之氣象深厚，尤爲可愛，故其詩曰：「春風面目對人好，秋水心情到處安。英氣有些還害事，銘盤朝夕願希顏。」又曰：「未能一日勤三省，每到中宵念百非。何物獻甘翻作苦，幾時戰勝得心肥。」又作誡曰：「斯人亦人，我何埃塵。尤物爲媒，斷喪吾真。若不猛克，俯仰愧作。一戰而勝，夢寐亦樂。」

張襄惠岳《與陳紫峰書》：少年時，閱人未多，經事不熟，以爲吾兄者，亦今人中之有時望者耳。及再歷憂患以來，所見士大夫，功名富貴之際，沒溺輾轉，寢失初心，雖平時知己，亦未有能免者。如吾兄之高

識遠韻，真所謂翱翔千仞之表者也。

張襄惠公岳，以二十歲登解閣中，其時天下省會皆有中官鎮守，舉子例合參謁，則皆踧見，公長揖而已。中官恚曰：「今歲解元豈琉球生耶？」

林希元作《面皮薄歌》，其題曰：「利見齋分巡，自稱面皮薄，不會做無廉耻事，深契予心，歌以自慰。人生莫得面皮薄，皮薄一事最不着。心頭纔有半分虧，十分面赤害羞辱。官中不曾持一文，歸來稱貸無所獲。常時或可強支持，凶年無錢那得穀。宗姻知我別稱貸，爲我所累多怨讟。始信厚皮之人百做美，爲馬爲牛皆不避。歸來金銀滿箱篋，腴田美宅任意置。凶年上荒田宅賤，此時仍獲萬倍利。相爾面皮太薄人，苦樂何啻差萬里。如今欲作厚皮人，富貴榮華可立致。只爲面皮生定不可易，欲作令人復羞死。不如且留一箇名，好與後人上青史。見齋，見齋，當世之人面皮幾尺厚，何爾與我獨相似。」

丹陽有陳少陽先生祠，祀宋大學士陳東也。鐵鑄汪伯彥、黃潛善赤體跪庭下，長可三四尺，泥苔滅膝，推不可動。嘉靖戊戌，南安鄭普以無錫令人爲南戶部，舟泊祠下，登堂瞻拜畢，守祠者出紙筆求聯句，普題云：「一片忠肝，千古綱常可托；荒庭虜膝，平生富貴何爲？」二像應筆而仆，頭抵階石，石爲斷。時張黃門選、黃二守希雍在焉，咸駭異之。

尚書顧東橋璘《贈別王道思序》：天將興一代之文，必生天資絕出之賢，力學好古以成其業。今予觀海內若王子道思其人也。道思弱冠舉進士，爲郎。讀書過目成誦，文詞爛然。嘗主廣東試，刻文甚奇，余以故志其名。今年來爲南禮部郎中，余稱其試文，乃蹙然曰：「公罔某邪？某初學文，好擬古，最先六經《語》、《孟》，已而學左氏，又之遷、固。試文則是物也，殆揚雄所謂雕蟲技乎。近乃愛昌黎，日見其難及，

不知昔者何視之易也。」璘驚曰：「有是哉。今英賢並易昌黎文，而淺晦庵於道。子睿質強氣，遜志如此乎！」再會，則又曰：「古聖人必有學，後世咸失其傳。故秦漢而後，雖純德篤行之士盛矣，終不可以稱聖。豈所謂得其門者或寡乎？」子斂枉向之曰：「子絕出人也。」

洪侍郎朝選《王遵巖集序》：君雖習學詞藝，而孜孜講學，日與青衿士談論繢繹，而門戶廣濶，見者無不容受。交際親賓，親疏泛愛，去者方休，來者接軌。夜則讀古書，課家事，作東答四方賓友，略無懈怠頹墮之意。書一日十餘行下，一經手，未嘗再觀。書至千百餘卷，君蓋無所不觀，而亦未嘗再觀。余嘗翻其架上書，書無一卷完者，讀竟，即為人竊去，君亦不復顧也。

王遵巖《與弟少卿惟中書》：來書所問詩作，豈容易談？第一要有學問，次亦要才力不弱。吾向贈宋仲石詩，如起句「洛陽橋外路萬里」，指長安。今贈唐婁江，如「帝心嘉勞來，戶口不虛增」，結句如「相送情無已，寧因感遺肝。莫倚鸞鳳志，今當作鸞鷹」。皆不容易得，然知之者少矣。舊歲與方洲游山詩，句句俱是風格不涉陳套，不守言筌，然方洲亦未解其妙也。如「取路非高足，人山力復餘。畏景在城市，聊茲息茂陰」此等起語，如「堪嗟二畝半，促促邑中居。明歸應復望，惆悵使顏衰」此等結句，總是唐人中翻來，都是史漢文氣，一字一句都健。吾詩自覺於古人合處不如文，文則有全篇合，或有過之者，詩則不能如此。然今人窺我門戶則猶未耳。

泉人陳伯亮《筆記參考》：陳公讓，舉嘉靖辛卯鄉薦第一，登壬辰進士。觀部政時，孝宗敬皇帝康皇后尚無恙，尊居太子宫，有弟張延齡，推恩得封建昌侯，以門客劉東山有機警，任為腹心，不計養虎自為患也。東山以此盡得延齡不法狀，因睚眦隙，盡發奏之。上方鑒漢、唐外戚患，法繩無宥。遂賜東山

第，彰其能發奸也。一時威聲震京師，氣餒公卿，爪牙遍都市，流毒窮里巷。出乘高馬，頭頂員帽，旗尉前導，後騎數十，塵埃滾滾，不避公卿。而公卿耻見，遙望其塵，托徑他往，諺云：「可歎真可歎，公卿避東山。」陳公積忿於心，未有言職。嘉靖十六年，以紹興推官陞御史，巡視東城。會東山與父劉孜爭淫，徑敢挽弓射父，其父躲，箭着牆轉跳，致傷母舅沈雲。地方呈送，陳公得此喜曰：「繩之有名矣。」不論其平日不法，直據射父一事而勾攝之。京師駭愕曰：「滿朝許多官尚避東山，一御史敢攝之，何妄也！」東山自知所犯大法，出避其鋒，以圖自解。陳公索急，却於保寧衛獲到，招成，具送法司。東山多方孽陳公短，無所得，獨因陳公娶妾杜氏，遂假此名誣奏乃張延齡戚屬，（七）謂陳公素厚延齡。又測上意知陳公名，其本不書名，只云陳御史。上不知爲陳公，詔下錦衣獄訊鞫，膚體爲裂。又計公冤必白，不若就獄殺之，獄中官校懼禍及己，勢必自諱不言殺，而言病也。出不意，突入陳公禁所，罵曰：「蠻子會拏人，爲何亦在這裏用法！」直打其腦。公得有神助，一躲，用脚將東山踢倒，反罵曰：「汝但知我有文章中解元，豈知我有武藝除奸賊也！」衆校覺知，將東山擁歸本禁。陳公不遭毒手，天也。賴有聖明留心治道，一日問輔臣李公時：「此幾月爲何不見御史陳讓言事？」李對，方知。及公辯疏，命下復公職，沒東山產，廷杖荷校死。死日，京師無分貴賤，咸欲識陳公面，見必共指曰：「此是除劉東山之陳御史也！」惜乎鄭端簡《吾學編》全遺陳公顛末，而載《外戚封侯傳》云：「延齡被東山所奏，下詔獄。錦衣指揮王佐力爲推鞫，及坐東山重罪，下法司。唐龍、王廷相、屠僑等言東山情罪深重，竟荷校死。」繇此言之，則東山坐誣，延齡當無罪矣，何爲載延齡繫御史獄，嘉靖二十五年死西曹，如此文意相左耶。嘉靖十七年，上追思聖考睿宗獨葬承天顯陵，欲遷與皇妣章皇后合葬天壽山。雖出上意，亦輔臣夏公言贊決也。令沿途經畫駐蹕行宮，綜理隨

駕宇舍，百務周備，刻期畢集，計費不貲。大議業成，無異說，獨陳公抗疏諫止勿遷，引舜葬九疑、二妃不從，謂合葬非古也。上覽疏，讀至「有云葬者，藏也，欲人不得見也」。今出聖考玉魄於母孕之地，如取其胎，雖梓槨重封，錦囊百裹，在陛下亦不能無疑，於是上心爲動，即召夏公語曰：「朕觀此數語，精神亂了。這秀才亦會讀書，朕欲用他。」在夏公有忠君愛民惜財之心，因聖衷萌動，當隨獻至誠之語，而成聖德之美也。夏却應云：「御史雖會讀書，迂濶難用。」聖聽是之，不復再語。夏公出，又私讓陳公曰：「縱才如賈誼，生今無用。」即削陳公職爲編氓。及聖躬到承天謁陵，驗其綰繻氣結，津液味香，在猶豫間，有測聖意者上疏諫止，而收其功。上悟，不遷。徒竭一番財命，皆因夏公一言憤事。定國古不信欺。

禮部尚書黃鳳翔《異夢記》：萬曆己丑冬至前二日，余以叨貳春省，將祇事郊壇，齋宿署中。是夜，與僚長東阿于公、富順李公擁榻玄譚，宵分乃罷。既就枕，四壁閤寥，鼾睡甚適。忽夢有遞刺者，余誰何之，則曰：「于尚書使者也。」開函睇視，弗覩名姓刺中，第有二語云：「空山一淚憑誰寄，萬古孤雲祇自愁。」讀竟遽覺，心自駭愕，通宵不寐。晨起，具述以告二公，乃于公訝曰：「所謂于尚書者，非眼中人耶？」余慙悚無以對。少選浙江上奏椽來呈，副封則巡撫中丞傅某所題疏也。其疏略曰：「伏覩故少保兵部尚書臣于謙，當睿皇北狩，景帝嗣統之日，內修外攘，盡瘁竭誠，俾九鼎既危而獲安，鑾輅既去而獲返，忠甚盛也。遭萋菲之構，竟死非辜。睿皇旋復悔之。聖聖相承，後先昭雪，贈官賜諡，建祠吳山，恩華備矣。維時棟事者弗克將順德意，易名肅愍，未愜衆心，乞聖明裁改，以章顯勲，慰幽魂。」于公覽疏，顧謂予曰：「夢徵矣。幽明感通，一至是耶！顧少保公獨見夢于公，何也？」蓋予嘗陟吳山之陽謁少保祠，爲詩弔焉，良謂有一面之識乎？乃爲二公誦予詩有「主聖臣忠」語。于公歎曰：「公爲少保公知己舊矣。」比疏下，于

公請改謚曰忠肅，聖天子俞之。於是，輿論稱愜，謂足妥少保公九京云。

詔安沈鈇《李卓吾傳》：李載贊，字宏甫。嘉靖三十一年鄉薦，授共城教諭，以文章擢國子，歷禮部司務。從豫章李材、蘭谿徐用檢講學都門，譚論數日耳，而二公咸服其聞道早而見道卓，因自號卓吾，謂顏子嘗苦孔之卓，道之卓爾，具在吾人，何苦之與有？久之，厭京師浮繁，乞就留都，擢刑部員外郎中。天臺耿定向督學南畿，以學倡畿南士。白下李士龍、焦竑其最著者，載贊日與定向、焦、李闡明道學，窮晷繼夜，寢食靡輟也。亡何，出守姚安。姚安雖邊郡，載贊日以道德教化，鑰迪繩率，夷俗丕變。而載贊且倦游矣，上書掛冠歸。道經楚黃，定向弟定理者，潛心學道人也，聞載贊風，強留之。時江陵相方嚴驛遞禁，載贊空囊不能歸，遂居黃安州。人士踴躍來學，而友山周思敬甚心相契者。顧載贊夙年厭章句，而討論身心，以章句爲吾道糟粕也。今則祛身心，而探索玄妙，以身心吾道形象也。玄妙道脈，吾家鮮譚之，惟佛氏獨得旨趣，成斯道鼻祖者。且曰：「道原自真率，存一去妄心，便非真境矣。道原自快樂，存一戒懼心，便非樂境矣。老氏靜虛，莊氏逍遙，皆從此勘破者。」定向有四求未能論，載贊駁之曰：「子臣弟友，吾人分內物也，何待干求。添一求，便著一色相，非道本體矣。」士之好奇者翕然以爲真的，且簡易可從也。定向憂之，每於論議中明經旨以端士心，於行事間加檢束以挽士習。兩家門徒標榜角立，而耿、李分敵國，此曰：「吾師聖人也。」彼亦曰：「吾師聖人也。」載贊曰：「彼以耿爲南方聖人乎？吾將爲西方聖人矣。」於是，辭妻別女，歸泉削髮爲方外士，角巾髡首，日携同志遨遊。巷陌縉紳衿珮驟覩駭異之，謗聲四起。黃郡太守及兵憲王君亟榜逐之，謂黃有左道誣民惑世，捕曹吏持載贊急。載贊入衡州，過武昌。其入衡州，予方爲衡丞，來過之。至武昌，則訪公安袁六休、袁小修二兄弟。二袁以語藩司晉川劉公東星，

樞謁之，驚語人曰：「是活佛再現者。」延人會城，館穀之。楚省上諭然爭拜門牆，高者樂其玄虛可以略訓詁，卑者樂其簡便可以忘拘檢。江夏潘廣文延主講席，載贊勉赴坐，不交一譚。出過市中，群少年唱飲屠室，酣歌徹天，手招載贊人。載贊不辭，偕群少年暢飲而歸。或訝之，載贊曰：「廣文會講，假借人膽也。少年聚飲，自得天機也。」劉公人掌內臺，而載贊歸麻城，缺招耿公曰：「李先生信禪，稍戾聖道，顧天地間自有一種學問，逃墨歸楊，歸斯受焉，此聖賢作用也。」於是耿、李再晤黃安，相抱大哭，各叩首百拜，叙舊雅，歡洽數日而別。載贊抵麻城，卜室龍湖寺中，鳩率好義者，大修佛殿，飾如來諸祖像。日著書談道，聽說者日益夥。間有室門女流持齋念佛，亦受業焉，雖不躬往，訂於某日某時受戒，先致篋帛，甫反候，宦女在家合掌拜，載贊在寺亦答受之。坐是喧闐郡邑，符卿周公弘禴曰：「李先生學已入禪，行多誕，禍不旋踵矣。」會馮應京來為楚僉憲，毀龍湖寺，置諸從游者法。載贊再往白門，而焦竑以翰林家居，尋訪舊盟南都，士更靡然嚮之，登壇說法，傾動大江南北。北通州馬經綸以御史謫籍，延載贊抵舍，焚香和南，執弟子禮，而燕冀人士望風禮拜尤盛。語稍徹禁中，諫垣張問達以彈章聞矣，有旨逮繫。載贊發憤，遂自刎歸寂。所著有《藏書》四十卷，《說書》、《焚書》各二卷，《初譚》四卷，而佛經諸書不與焉。所著《藏書》，論古今君相人物皆鑒於儒先，如以武氏為聖后，馮道為賢臣。漳人薛士彥讀而喜之，謂：「是聖賢學問也。善用之，可以建事業。不爾，恐蹈於權謀術數爾。」時部議併毀其書刻，而世人喜其高奇，反以盛傳於世。

公安袁中道《李溫陵傳》末言：公為人真有不可知者。本絕意仕進也，而專譚用世之略，謂天下事決非好名小儒之所能為。本狷潔自勵，操若冰霜人也，而深惡枯清自矜、刻薄瑣細者，謂其害必在子孫。本屏絕聲色，視情慾如糞土人也，而愛憐光景，於花月兒女之情狀亦極賞玩，若借以文其寂寞。本多怪少

可，與物不和人也，而於士之有一長一能者，傾注愛慕，自以爲不如。本息機忘世，槁木死灰人也，而於古忠臣義士、俠兒劍客存亡雅誼、死生交情，讀其遺事，爲之咋指研案，投袂而起，泣淚橫流，痛哭滂沱而不自禁。若夫骨堅金石，氣薄雲天，言有觸而必吐，氣無往而不伸。排榻勝己，跌宕王公，孔文舉調魏武若稚子，稽叔夜視鍾會如奴隸。鳥巢可覆，不改其鳳味；鸞翮可鍛，不馴其龍性；斯所繇焚芝鋤蕙，銜刀若慮者也。嗟乎！才太高，氣太豪，不能埋照涵俗，卒就囹圄，慚柳下而愧孫登，可惜也夫！可戒也夫！

〔校記〕

〔一〕「舊德志」下，各本原衍「上」字，據本書體例刪。

〔二〕「閩俗呼子爲囡」，各本原作「閩呼俗子爲囡」，據文義改。

〔三〕「是忘母親也」，據文義，當作「是不忘母親也」。

〔四〕「閩廣都」下，疑脫「督」字。

〔五〕「上蔡」，各本原作「上祭」，據文義改。

〔六〕「康皇后」，據《明史·后妃傳》，當作「孝康皇后」。

〔七〕「誣奏乃張延齡戚屬」，各本原作「誣奏張乃延齡戚屬」，據文義改。

閩書卷之一百五十三

蓄德志二

建寧府

宋楊文公億，以文章擅天下，而剛勁寡合，有譖之真宗者。一日，在學士院，忽夜召見於一小閣，深在禁中。既見，賜茶，從容顧問。久之，出文稿數篋以示之，云：「卿識朕書蹟乎？皆朕自起草，未嘗命臣下代作也。」億惶恐不知所對，頓首再拜。出，乃知必爲人所譖，繇是佯狂，奔於陽翟。（歐陽文忠集）

楊大年每欲作文，則與門人賓客飲，博投壺，弈棋，語笑諠譁，而不妨構思。以小方紙細書，揮翰如飛，文不加點，每盈一幅，則命門人傳錄，頃刻之際成數千言，真代文豪也。

陳軒以龍圖閣直學士帥成都，徙長安，乞鄉郡，知福州。時建陽士大夫年踰八袞者九人：曰傅朝請者，名鎔，字範民，八十七；曰王朝請者，名恕，字百達，八十六；曰王承奉者，名奎，字光明；曰劉承奉者，名顏，字幾叔；曰陳奉議者，名夫，字剛中，各八十三；曰李奉議者，名師，字元質，八十二；曰呂大夫者，名蒙，字蒙儒，八十六；曰呂奉議者，名義，字仲儀，其二缺。於是，王朝請倡効洛陽故事，爲九老會，相與作詩記。東陽之盛軒亦年八十，聞之，移書願預，且乞更名十老。後弗克，遂卒於官。

張天覺、熙寧中爲渝州南川宰。章子厚經制夔夷，狎侮州縣吏，無人敢與共語。部使者念獨張可亢之，檄至夔。子厚詢人才，使者以告，卽呼人同食。張著道士服，長揖就坐。子厚肆意大言，張隨機折之，落落出其上。子厚大喜，延爲上客，歸而薦諸王介甫，遂得召用。政和六年，張在荆南，與子厚之子致平一帖云：「老夫行年七十有四，日閱佛書四五卷，早晚食米一升、麵五兩、肉八兩，魚酒佐之，以此爲常。亦不服煖藥，唯呼吸氣晝夜度而已。數數夢見先相公，語論如平生，豈其人在天仙間，而老夫定中神游，或遇之乎？嗟乎！安得奇男子如先相公者，快吾胸中哉！」

蘇東坡《送章惇出守湖州》詩：「方丈仙人出渺茫，高懷猶愛水雲鄉。功名誰使連三捷，身世何緣得兩忘。早歲歸休心常在，他年相見話偏長。只應未報君恩重，清夢時時到玉堂。」又：「絳闕雲臺總有名，應須極貴又長生。鼎中龍虎黃金賤，松下龜蛇綠骨輕。雪水未渾纓可濯，弁峰初見眼應明。兩巵春酒真堪羨，獨占人間分外榮。」《菊坡叢話》言東坡二詩甚嘉。前詩言其出渺茫而終貴顯，後詩言其好爐火而餌茯苓，皆善諛也。子厚得詩，不樂數日。

胡文定安國，負傑出絕異之資，見善必爲，必要其成，知惡必去，必絕其根。自幼少已有出塵之趣。登科後，同年宴集，飲酒過量，是後終身不復醉。嘗好弈棋，先令人責之曰：「得一第，德業竟止是弈耶？」後不復弈。爲學官京師，同僚勸之買妾，事既集，慨然歎曰：「吾親侍養千里之外，曾是以爲急。」遽寢其議，亦終身不復買妾也。在長沙日，行部過衡，岳愛其雄秀，欲一登覽，已戒行矣，俄而思曰：「非職事所在。」卽止。罷官判南，僚舊餞行於渚宮，呼樂戲以待，而交代楊龜山具朝膳，留公，鮭菜蕭然，引觴徐酌，置《語》、《孟》案間，清坐講論，不覺暮晷。壬子赴闕，過上饒，有家居從臣治饌延公，飾姬妾，請奉酒爲

壽。公蹙然曰：「二帝蒙塵，國步杌隳，豈吾徒燕樂日！」其人報而止。辭受取舍，一介之微，必度於義。恬靜簡嘿，雖宴閑獨處，未嘗釋手。每晨昏，子弟定省，必問所業，有合意則曰：「士當志於聖人，勿臨深爲高。」見怠慢不處，必囑蹙曰：「流光可惜，無爲小人之歸。」子弟或近出宴集，雖夜已深，猶未寢，必俟其歸，驗其醉否，且問其所集何客，所論何事，有益無益。以是爲常。士子有自遠來學者，隨其資性而接之，大抵以立志爲先，忠信爲本，以致知爲窮理之漸，以敬爲持養之要。每誦曾子之言曰：「君子愛人以德，小人愛人以姑息。」

胡原仲說文定少時性最急，嘗怒一兵士，至親毆之。兵輒抗拒，無可如何，遂回入書室中作小冊，盡寫經傳中文有寬字者於冊上。此後，遂不復性急矣。

問文定與秦檜厚善之故，曰：秦嘗爲密教，翟公異知密州，薦試宏詞。游定夫過密，與之同飯於翟，奇之。後康侯問人才於定夫，首以秦爲對，云其人類文若。又云無事不會。後京城破，虜欲立張邦昌執政，而下無敢有異議，惟秦抗論，以爲不可。康侯益義其所爲，力言於張德遠諸公之前。後秦自虜中歸，與聞國政，康侯屬望尤切，嘗有書疏往還，講論國政。康侯有詞掖經筵之召，則秦之薦也，然其雅意堅不欲就。是時，已窺見其微隱一二，有難處，故以老病辭。後來秦做出大疏脫，則康侯已謝世矣。（朱子語類）

章廈奏致堂先生：胡寅天資凶勃，敢爲不義。寅非安國之子，不肯爲親母持服，此其不孝之大罪也。寅初傳會李綱，後又從趙鼎建明不通鄰國之問。其視兩宮播遷，如越人視秦人肥瘠。後來梓宮既還，皇太后獲就孝養，寅乃陰結異意之人，作爲記文，以爲今日仕進之人將赤族而不悟，此其不忠之大罪

也。遂有新州之命。

皇朝陳絳《金壘集》：胡致堂，康侯弟之子也。初生，其母以多男欲不舉，時康侯未子，而康侯夫人取而子之。既長，俾自絕於本生，不爲心喪，止服世父之服。致堂遵行之。致堂本生母沒，亦不解官持服，《斐然集》中有與秦丞相書，言之甚悉。卒爲右正言章厦所劾，謫置新州，蓋檜意也。致堂每讀史，亦惓惓發明：爲人後者，義謂不得復顧其私親，蓋斬以自見而不悟。康侯自有子，其爲人後者雖爲其父母期，而心喪必終三年，蓋情之所不能違，而亦禮之所許者。曾大儒君子，不辯此乎？晉賀群婦陶，其弟喬，婦無子，乞群小息率於孩抱，子字之。及期，喬妾張生子纂，驃騎將軍顧榮謂群曰：「喬已有男，宜使率還。」後群亡，率漸長成，向喬乞還，表於朝，母陶復有辭。尚書張閭絀於議，令率還陶。竊意致堂宜尋率比，不然，與爲人後亦可畏耳。

張南軒見胡仁仲，仁仲辭以疾。他日，見孫正孺而告之。孫道五峰之言曰：「渠家好佛，宏見他說甚。」南軒方悟前此不見之因，於是，再謁之，語甚相契，遂授業焉。南軒曰：「棖若非正孺，幾乎迷路。」

黃幹《朱文公行狀》：先生見之行而修諸身者，其色莊，其言厲，其行舒而恭，其坐端而直。其閒居也，未明而起，深衣幅巾方履，拜於家廟以及先聖，退坐書室，几案必正，書籍器用必整。其飲食也，羹食行列有定位，匕箸舉措有定所。倦而休也，瞑目端坐，休而起也，整步徐行。中夜而寢，既寢而寤，則擁衾而坐，或至達旦。威儀容止之則，自少至老，祁寒盛暑，造次顛沛，未嘗有須臾之離也。行於家者，奉親極其孝，撫下極其慈。閨庭之間，內外斬斬，恩義之篤，怡怡如也。其祭祀也，事無纖鉅，必誠必敬，小不如儀，則終日不樂。已祭，無違禮，則油然而喜。死喪之祭，哀戚備至，飲食衰絰，各稱其情。賓客往來，無

不延遇，稱家有無，常盡其歡。於親故，雖疏遠必致其愛，於鄉閭，雖微賤必致其恭。吉凶慶吊，禮無所遺，賑恤問遺，恩無所闕。其自奉則衣取蔽體，食取充腹，居止取足以障風雨，人不能堪而處之裕如也。

慶元三年，竄趙汝愚於永州，中外震駭。於是，群小附和侂冑以攻偽學。太府寺丞呂祖儉以論救丞相，貶韶州。先生自以蒙累朝知遇之恩，且尚帶從臣職名，義不容默，乃草封事數萬言，極陳奸邪蔽主之禍，因以明丞相之冤。子弟諸生更進迭諫，以爲必自賈禍。先生不聽。蔡元定人諫，請以善決之，遇遜之同人。先生默然退，取奏稿焚之，更號遜翁，遂辭職名，並乞致仕。不允。

慶元六年三月，先生素有足疾，比年加以痞隔之證，醫者頗用駛藥。乙未夜，爲諸生說《太極圖》。庚申夜，復說《西銘》。辛酉，改《大學·誠意章》。午刻疾甚，不能興。癸亥，諸生人問疾，先生勉以相倡率下，堅苦工夫，牢固着足，方有進步處。甲子，命移寢中堂。諸生復人問疾，因請曰：「先生疾革矣，萬一不諱，當用《書儀》乎？」先生搖首。曰：「然則當用《儀禮》乎？」亦搖首。「然則以《儀禮》、《書儀》參用之。」乃領之。意若索紙筆，然握筆已不能運。少頃，置筆就枕，誤觸巾，目門人使正之，揮婦女毋得近。諸生揖而退。良久，恬然而逝。是日，大風拔木，洪流崩崖。《名臣言行錄》。

張南軒平生所資而期於明道救世者，晦翁一人而已。其規切晦翁之語，如曰：「聞兄在鄉里，因歲歉請於官，得米儲之，春秋償所取之息，不過備耗。或者妄有散青苗之譏，兄聞之，作而言曰：『介甫獨有散青苗一事是耳。』奮然欲作《社倉記》以述此意。某以爲此則過矣。是乃意之所加，不自知其偏者也。又來者多云。會聚之間，酒酣氣逸，悲歌慷慨，如此等類，恐皆平時血氣之習未能消磨，不可作小病看。」又慮元晦學行爲人所尊敬，眼前多出己下，平時只是箴規他人，見他人不是，覺己是處多。他人亦憚元晦辯

論之勁、排闥之嚴，縱有所疑，不敢以請，深恐諛言多而拂論少，異日流弊不可免。念世間相知，孰踰元晦，切磋之義，敢後他人。《黃氏日抄》。

吳氏壽昌曰：先生每觀一水、一石、一草、一木稍清陰處，竟日目不瞬，飲酒不過兩三行，又移一處。大醉，則跌坐高拱。經、史、子、集之餘，雖紀錄、雜說，舉輒成誦。微醺，則吟哦古文，氣調清壯。某所聞見，則先生每愛誦屈原《楚騷》、孔明《出師表》、淵明《歸去來辭》，并杜子美數詩而已。《朱子語類》。

門人楊道夫聞鄉曲射利者多撰造事跡，以投合言者之意，亟以書告朱子，報曰：「死生禍福，久已置之度外，不煩過慮。」又曰：「今爲辟禍之說者，固出於相愛，然得某壁立萬仞，豈不益爲吾道之光。」《朱子語類》。

「或有人勸某當此之時，宜略從時。某答之云：『但恐如草藥，鍛煉得無性了，救不得病耳。』」劉晏見錢流地上，想是他計較得熟了，如此，某如今看聖人之心成片從面前過。」《朱子語類》。

嘉定二年，詔賜朱熹謚太常博士，章傑上議，請謚曰文忠。尚書吏部員外郎兼考功郎官劉彌正覆議：「謚，古也；複謚，非古也。謚法曰：謚生於行者也。苟當於其行，一字足矣，奚複哉？故侍講朱公沒於爵，未得謚，上以公道德可謚，下有司議所以謚。謹獻議曰：六經，聖人載道之文也。孔氏沒，子思、孟軻更述其遺言以待斯世，文幸未墜，漢末諸儒采收以資文墨。鄭司農、王輔嗣輩又老死，訓詁謂聖人之心真在句讀而已。隋唐間，河汾講學已不涉聖賢閭奧。韓愈氏復出，特其文近道爾。蓋孔氏之道賴子思、孟軻而明，子思、孟軻之死，明者復晦。繇漢而下，闇如也。及本朝而又明，濂溪、橫渠剖其幽，二程子宿其光，程氏之徒噓其焰，至公聖道燦然矣。公之學，以誠持中，敬持外。其於書，舍六籍則諸子曲說不

得于其思。其於道，不敢深索也，恐入乎幽；不敢過求也，恐汨其統。讀書初，貫穿百氏，終也縮以聖人之格言，自近而入微，繇博而歸約。原心於眇忽，析理於錙銖，采衆說之精而遺其粗，集諸儒之粹而去其駁。嗚呼，醇矣哉！孟氏以來，不多有也。公中科第猶少也，薄游徑隱，閉門潛思。朝廷每以好官召，公莫能屈，不得已而出，惟恐去之不早。自官簿書考者九，而閑居者四十餘年，山林之日長，問學之功深也。平居，與其徒磨切講貫，皆道德性命之言，忠敬孝愛之事。繇公學者，必行己莊，與人信，居則安貧而樂道，仕則尊君而愛民，重名節而愛出處，合於古而背於時。若此者，真公之學也。嗚呼！師友道喪，人各自是，公力扶聖緒，本末宏濶，而弄筆墨小技者以爲迂。癯於山澤，與世無競，而汨沒朝市者以爲矯。自童至耄，動以禮法，而駢弛於繩墨者嫻以爲誕。世嘗以是病孔孟矣，公何恨焉！初，太常議以文忠謚公，按公在朝之日淺，正主庇民之學鬱而不施，而著書立言之功大暢於後，合文與忠謚公，似矣而非也。有功於斯文，而謂之文，簡矣而實也。本朝歐、蘇不得謚文，而得者乃楊大年、王介甫。介甫經學非醇也，其事業亦有可恨。楊公正復文士爾，文乎？豈是之謂乎？世多評韓愈爲文而非也。《原道》謂軻之死不得其傳，斯言也，程子與之。公晚爲韓文立考異一書，豈其心亦有合歟？請以韓子之謚謚公。」奉聖旨：「依。」

理宗寶慶三年丁亥正月，贈太師，追封信國公。誥詞：天之未喪斯文，以方冊之具在，書者所以載道，歷古今而罕明。惟我宋之化成，有二程之傑出，雖博極群經而窮理，必提挈要指以示人，故於《論語》、《大學》之傳，與夫子思、孟軻之作，常誨人而不倦，俾學者之易知。沿襲既訛，本真浸失，嗣興道統，允屬儒先。具位熹，極高明而道中庸，多聞見而守卓約。凡《六籍》悉爲論述，於《四書》尤致精詳，紛然衆說之

殊，折以聖人之正。朕自親學問，灼見淵源，常三復於遺編，知有補於治道。載惟一節，歷事四朝，早錫榮爵，晚登榮從，始終之際，待遇弗渝。然而，學士隆名博聞，美謚備舉，當時之茂典未充，列聖之盛心是用，析圭五等之尊，定位三公之冠，申加禮贈，式究前猷。噫！身沒言存，所恨丘原之難起，源深澤遠，實同義理之無窮。尚其不忘，歆此嘉命。

紹定三年庚寅九月，改封徽國公。誥詞云：饗明堂而霑澤，具有彝章，謂故國以移封，式尊儒道。昔屢舉褒揚之典，茲再疏追襚之恩。眷我宗工，若時明訓。具位熹，傳孔孟之學，抱伊傅之才，講道以致知格物爲先，歷萬世而無弊，著書以抑邪興正爲本，關百聖而不慚，阜陵知之，而有廉靜之褒，寧廟用之，而賴論思之益。非漢唐諸子所可擬議，於伊洛二老尤能發揮。肆予訪落止之初，深有不同時之恨。每閱《四書》之奧旨，允爲庶政之良規。雖已加禮贈之崇，然未盡憲章之善。適逢禋歲，載錫嘉名，爵之父母之邦，位以公師之品，豈專踵故，式表教忠。噫！指書社而封，斯道遂明於今日；卽桐鄉而祀，厥光瓊異於前聞。有赫其靈，尚淑爾後。

元至正二十一年一月，改封齊國公。誥詞云：聖賢之蘊載諸經義理，實明於先正風節之厲。垂諸世褒崇，豈間於異朝。不有鉅儒，孰膺寵數？故宋華文閣待制，累贈寶謨閣直學士、太師，追封徽國公，謚文忠，挺生異質，蚤擢科名。試用於郡縣，而善政孔多；迴翔於館閣，而直言無隱。權姦屢擯，志慮不回。著書立言，嘉乃簡編之富，愛君憂國，負其經濟之長。正學久達於中原，渙號申行於仁廟。詢諸僉議，宜易故封。國啓營丘，爰錫太公之境土；壤鄰洙泗，尚觀尼父之宮牆。緬想英風，載欽新命，可追封齊國公，餘並如故。

皇朝景泰七年，欽降建安致祭朱子祝文：某年月日，曾係翰林院五經博士某，祇奉朝命昭告於先祖太師徽國文公曰：惟公德盛仁熟，理明義精，布諸方冊，啓我後人。屬茲仲春秋，謹以牲帛醴儀，用申常薦。尚享。

楊敬仲謂真西山曰：「希元有志學問，顧未能忘富貴利達，何也？希元恍然不知所謂。」先生徐曰：「子常以命訊日者，故知之。夫必去是心，而後可以語道。」余按：此語與張南軒所規朱文公者一律。宋家諸儒，其嚴如此。文忠《跋楊文元公行狀》。

勉齋黃氏曰：西山在朝，屢進危言，力扶大義，公論藉以開明，善類爲之踊躍。

真文忠公帥潭，將之任，詣蔡仲默作別。戶庭潔幽，竹樹茂美，如適君平、子陵之居。伯季聯席，衣冠偉然，如圖續中見古人物。李敬子公晦、蔡元思繼至，引觴命醉，名論輒發，雜以辯爭，竟日散去，不知別離之可重也。

延平府

宋胡文定公《與宰相書》曰：「龍圖閣直學士致仕楊公時，造養深遠，燭理甚明，混跡同塵，知之者鮮。行年八十，志氣未衰，精力少年，殆不能及。上方嚮意儒學，日新聖德，延禮此老，置之經席，朝夕咨訪，裨補必多。至如裁決危疑，經理世務，若燭照數計，而龜卜又可助相府之忠謀也。」又《答明應仲書》：「楊先生世事殊不屑意，雖袒裼裸裎，不以爲浼。」見《胡文定公文集》。

陳了翁雖閑居，容止常莊，言不苟發，雖盛暑見子孫輩，未嘗不正衣冠。一日，嘗與家人語，家人戲問

是實否。公退自責數日，豈嘗有欺於人也，何爲有此問？

了翁有斗餘酒量，每飲不過五爵，雖會親戚，間有歡適，不過太白滿引，恐以長飲廢事。每日有定課，自鷄鳴而起，終日寫閱，不離小齋。倦則就枕，既寤即興，不肯偃仰枕上。每夜必置行燈於床側，自持就案，人或問公：「何不呼喚使者？」公曰：「起止不常，若涉寒暑，則必動其念，此非可常之道，偶吾性安之，故不欲勞人也。」

朱子《與廖子晦書》云：東坡在湖州被逮時，面無人色，兩足俱軟，不能行，求人與家人訣，而使者不聽。雖伊川先生謫涪陵時，亦欲人告叔母，而不可得。惟陳了翁被逮，聞命即行。使人駭之，請其人治行裝，而翁反不聽。奇哉！奇哉！願子勉旃。《晦翁文集》。

羅仲素先生曾祖文弼，祖世南，父神繼，皆隱身不仕。先生簿博羅，卒官，年六十四。子敦叙，早卒，無嗣。紹興壬子，州學落成，八月上丁，先生以太守周綰之命，領袖諸生宗昇、張元償、符□行釋菜禮，（二）有洙泗斷斷氣象。舍人呂本中以詩叙之，龜諸夫子廟壁。先生山居，有顏樂齋、寄傲軒、邀月亭、獨寐龕、白雲濯纓亭，每賦詩以自樂。

羅先生晚就特科，授博羅簿，卒官。無嗣，喪不得歸者數年。族人羅友爲惠州判官，遣人扶護歸，至汀州，遇寇竊發，遂敢於郡之開元寺。又數年，門人李愿中始爲歸葬於羅源黃際坑之原，母夫人墳側。然先生族弟革，題先生《集二程語孟解》卷後云：享年六十有四，自廣回，卒於武平縣。龜山先生《答胡康侯書》亦云：仲素死於道。後書又與前說不同，未知孰是。上道振年識。〔三〕

李愿中先生，父煥，朝奉郎，贈右朝議大夫。子友直，鉛山縣尉，信甫，建安縣主簿。二子請迎先生

就養，先生自建安如鉛山，訪外家兄弟於昭武，過其門弟子，故人於武夷、潭溪之上，徜徉而歸。會國師玉山汪公以書袍車乘來迎，蓋將相與講所疑焉。先生因往見，至日疾作，遂卒於府治館舍。是年七十有一，隆興元年十月十五日也。汪公爲遺官護喪事，躬視殮具周悉。

文公先生曰：李先生終日危坐，而神彩精明，略無隕墮之氣。又曰：先生只是潛養思索，他涵養自是別，真所謂不爲事物所勝者。古人云：終日無疾言遽色，他真箇是如此。尋常人去近處，必徐行，出遠處，行必稍急。先生出近處也如此，出遠處亦只如此。尋常人叫一人，叫之一二聲不至，則聲必厲。先生叫之不至，聲不加於前也。又如坐處，壁間有字某，每常亦須起頭一看。若先生則不然，方其坐時，固不看也，若是欲看，則必起就壁下視之。其不爲事物所勝，大率若此。又曰：先生居處有常，不作費力事。所居狹隘，屋宇卑小，及子弟漸長，逐間接起，又接起廳屋，亦有小書室，然甚整齊瀟灑，安物皆有常處。其制行不異於人，亦常爲任希純教授延入學作職事，居常無甚異同類如也。真得龜山法門。

汀州府

宋吳簡言經巫山神女廟，題絕句云：「惆悵坐娥事不平，當時一夢是虛成。只因宋玉閑唇脂，流盡巴江洗不清。」是夜夢神女來見，口：「君詩雅正，當以順風爲謝。」明日解纜，一瞬數十里。

林氏，其先嘗爲郡守，罷任家居。一日，天忽雨錢，充積其家。林氏乃整衣冠，仰天而祝曰：「非常之事，必將爲禍。於此速止，林氏福也。」應聲即止，所收已鉅萬。

皇朝張顯宗，進士及第，建文時爲祭酒。靖難後，既歸附矣，尋以嘗募兵江西，謫戍興州。永樂五年，

起爲交趾左布政使。七年，卒官。《水東日記》載：張顯宗狀元及第時，高皇夢雙絲墜地。後爲祭酒，陞工部右侍郎，往江西起義兵，不知所終。寧化令懷集人陳統以爲顯宗之卒，因被召而仰藥發疽，而交趾之行，又以從征而往。蓋考其家乘及日記，遺事云然。而稱顯宗江西募兵之舉，此時有「千萬人吾往」之氣。被謫交州，從征交南，所以忍死問關不就匹夫之諒者，其志有在。至於新命甫加，遽爾卽世，似夷齊之耻周粟。清流人戶部郎鄧向榮亦稱顯宗蒙難，正志箕疇，以明首陽苦節，周鼎以尊。今考顯宗，洪武二十四年及第第二人，非狀元也。交趾布政使與從征交南，卒於官下與仰藥發疽，國載家乘未知孰的。第顯宗有《交趾夜坐偶成》詩云：「天外蟾光透短檣，寒瓊獨坐適幽情。園林花木多開落，寰宇英雄幾謝榮。莽操懿溫猶有跡，蕭曹房杜祇存名。鑒觀往事渾如許，何用紛紛智力爭？」令陳統稱顯宗遺文詞氣溫淳典雅，不露圭角，而獨微見其意於夜坐之聯，此充養有道之士。予以爲此詩無論服官從征，皆涉於訕，蒙召仰藥豈詩禍歟？姑志以待尚論者。

興化府

五代黃滔律賦，如《明皇回駕經馬嵬》云：「日慘風悲，到玉顏之死處；花愁露泣，認朱臉之啼痕。褒雲萬疊，斷腸新出於啼猿；秦樹千層，比翼不如於飛鳥。」《景陽井》云：「理昧納隍，處窮泉而詎得？誠乖馭朽，攀素綬以胡顏。」可喜也。《丹鉛總錄》。

宋慶曆初，歐陽永叔、余安道、王素俱除諫官，蔡君謨以詩賀曰：「御筆新除三諫官，喧然朝野競相歡。當年流落丹心在，自古忠良得路難。必有謀猷裨帝右，直須風采動朝端。世間萬事俱塵土，留取功

名久遠看。」三人以其詩薦於上，尋亦除諫官，時號爲一棚鶴。出《記聞》及上卷《見聞近錄》。

張堯佐以侄女爲修媛，一日而遷四使。御史唐介上疏，引楊國忠爲戒，復請逐文彥博而相富弼。

又言諫官觀望挾姦，而言涉宮掖，語甚切直。上趣召兩府，以疏示之，玉音甚厲，衆恐禍出不測。是時，襄立殿陛，卽進曰：「介誠狂直，然納諫容言，人主之美德，必望全貸。」介以此貶春州別駕，尋改英州。梅堯臣所爲《書竄》詩，其略曰：「卽敢救者誰，襄執左史筆。」謂此黨不容盛美，有所拂是也。魏隱居《東軒筆錄》。

蔡君謨《謝賜御書》云：臣襄，伏蒙陛下特遣中使賜臣御書一軸，其文曰「御筆賜字君謨」者。臣孤賤遠人，無大材藝。陛下親灑宸翰，推著經義，俾臣佩誦，以盡謨謀之道，事高前古，恩出非常。臣感懼以還，謹撰成古詩一首，以叙遭遇干冒聖慈，臣無任荷戴兢榮之至。朝奉郎、起居舍人、知制誥、權同判吏部流內銓、上騎都尉、賜紫金魚袋臣蔡襄上進：「皇華使者臨清晨，手開寶軸香煤新。法名與字發深旨，宸毫灑落奎鉤文。精神高遠照日月，執力雄健生風雲。混然氣質不可寫，乃知學到非天真。緘藏自語價希代，誰顧四壁嗟空貧。臣聞帝舜優聖域，皋陶大禹爲其鄰。吁俞勅戒成典要，垂覆後世如穹旻。陛下仁明加舜禹，豪英進用司鴻鈞。臣襄材智最驚下，豈有志業通經綸。獨是丹誠抱忠朴，常欲贊奏上古珍。又聞孔子《春秋》法，片言褒貶愚賢分。考經內省莫能稱，但思至理書諸紳。乾坤大施人洪化，將圖報効無緣因。誓心願竭謨謀義，庶裨萬一唐虞君。」

蔡端明博雅多識古物，於沂州城土中得所謂漢魏銅弩牙，以金銀錯花卉，分寸絕精妙。襄一見，證之以太甲往省括於度，則釋是固古射法皆設度者，此物也。劉敞、梅堯臣相與賦其事。

蔡襄《詠草》詩云：「時平生戰地，農情入春田。」王禹玉謂其言於教化，非「野火燒不盡，春風吹又生」之比。襄孫懌亦工詩，如「竹靜深留月，花多不辨香。曙分林影外，春盡雨聲中。」皆風人所膾炙。

余所見《茶錄》凡數本，嘗年乃見絹本，豈非自喜此作，亦如右軍之於《楔帖》，屢書不一書乎？公吏事尤高，發姦擿伏如神，而掌書吏輒竊公藏稿，不加罪，亦不窮治，意此吏有蕭翼之癖，與其他作姦犯科者不同耶？可發千古一笑。淳祐壬子十月望日克莊書，時年六十六。《劉厚村集》。（四）

世人臨書，全如崔瑗假作魏武，元溫貌類劉司空，亦可遮瞞俗眼。第恐爲匈奴使及劉家舊婢勘破耳。蔡公臨《轉授訣》，九分逼真，使率更見之，不能辨也。嗚呼！可謂藝之至者矣。《劉厚村集》。（五）

《法苑珠林》叙佛之初生云：開卍字於胸前，躡千輪於足下。又《占相部》云：如來至真常於胸前自然卍字，大人相者乃往占世禍除穢濁不善行。故予於《夷堅丁志》忠載蔡京胸字，（六）言京死後四十二年遷葬，皮肉消化已盡，獨心胸上隱起一卍字，高二分許，如鐫刻所就，正與此同。以大姦誤國之人，而有此祥，誠不可曉也。《容齋三筆》。

方翥試南宮第三場，欲出投卷，有物礙足，俯視之，卷子也。文殊通暢，不解何以不終卷。携取足成，併投之。翥既中第，亦不復省問。他年，翥爲館職，偶及此事。有客在坐，同年也，默不語。翌日，具冠裳造方，自叙本末，言：「試日病不能支，吾扶曳而去，試卷莫記所在，已絕望矣。榜出，乃在選中。大以爲疑，亦未敢洩。人京物色良是，借真卷觀之，真有續成者，竟莫測所以。今日乃知出君，君吾恩人也。」方笑謝而已。

林艾軒先生初補上庠，嘗就月試，考官夜得其文，聚同列以笑。少司成陳少南旦詰之，具曰：「非謔

也。卷有數語，誠可哂。」索視之，策以兵勢問，而先生之對有曰：「譬如嬰兒夜啼，拊之不止，啗之不止，卒然滅燭，伏戶下爲虎嘯狐鳴，則其喙如窒。」少南曰：「此輩當與太史公爭衡，必置首選。」長廳曰：「已得一人矣，幸次之。」少南曰：「毋使居人下，不然，寧黜之。」語頗侵司成，少南竟以此去國。先生聞而嘆曰：「甚矣，知己之難！」棄籍而歸，一意聚徒講道，不復試成均者十餘年。年五十，始以鄉書免，擢第。

《林竹溪稿》。

昔網山之事艾軒也，死則要經，忌則哭墓。樂軒之事網山也，亦然。至林侯希逸，則慨林、陳之後微絕，既祀樂軒於家廟，又白尚書并禁二墓樵採。歲時若遠游而歸，必墓祭，出處必命祝史以告。及牧斯土，復使邦人嚴奉而蒸嘗之。彼背師而從許行，與諱稱京房門人者，視侯宜少愧矣。《艾軒文集》。

陳文龍守興化，製「生爲宋臣」、「死爲宋鬼」兩大旗植軍門，巡城則命持前導。計議官李珙首倡軍民迎順，小校黃泰躍馬突至幕廳，稱有太皇太后詔，逼驅文龍出，併其家盡俘以去。見元帥唆都，以母老子幼感動之，文龍曰：「宋無失德，三宮北狩，二邸深人瘴煙，何必窮兵至此！我家世受國恩，萬萬無降理。母老且死，先皇三子岐分南北，我子何足關念！」情詞慷慨，唆都愁然改容。復唆都書曰：「平生讀書，但識《孟子》効死勿去句，《左傳》有殞無二句，他非所知也。」公六館盛名魁天下，不八年起登政府。時事且急，惟以皇帝所賜馬自隨，每攬轡輒於邑淚下。及被執薨，馬亦尋斃。

皇朝陳吉士實，永樂四年登林環榜進士，同邑人也，乃疏取狀元不公。成祖召詰之，對曰：「臣百問百答。」遂命解學士縉撰「百問策」一道，縉擬以「聖門七十二賢，賢賢何德，雲臺二十八將，將將何功」發策，及記里鼓論。上臨軒命林環、陳實對試。環條答詳悉，而實更詞義斐然，珠聯璧合。實竟以廷爭違

旨，發三邊衛永遠充軍。赴伍無何，卒。二子相繼淪沒，時從蕭勾軍頂補，然到伍輒死，本派逃亡粵徼，累及旁支。嘉靖間，有司始爲開免，實以廷爭狀元而得充軍，挾奇才，負奇氣，而罹奇禍，蓋奇也。聞實諸生時，上司某官謁文廟，屬實贊禮。時天大雨，某官擬拜階上，實高唱曰：「拜下，禮也。」某官趨下拜。已，升明倫堂聽講，命講《大誥》，蓋難之也。實復唱曰：「誥律，朝廷典章，當立聽。」衆官俱起立。實展讀舒雅，開說詳諦。某官竟不得坐，聽畢，默然而行。其奇傑多此類。

陳白沙以薦至京，林見素日造之講學。時當道久未有處白沙者，公上書尹太宰，謂山林遺逸之路不可自我而塞。尹公遂爲請試。公又勸白沙勿試，上疏乞歸，白沙服公有識。

林公見素，性簡儉，居官尤廉約，不取隸金，不費公廩。家居自製角巾野服，徜徉山水間，一時人士翕然効之。客至輒留，殺核數品，酒數行而止。

公在刑部，立朝僅十四月。暮年遭際，誓竭忠素以仰裨新政，尤以保終完名爲念。八疏乞休，賜勅以行，上夫祖饒都門外，道路爭嘆其賢。論者謂數十年來，大臣以禮進退、無瑕隙可議者，公一人已。

莆上林十道爲予言：林見素家居時，府縣朔望皆拜其門。有甥孫，陳公俊之孫也，縣役爲甲，胥欲脫不得，俊子教之曰：「可告舅祖。」其孫以告，見素曰：「俟朔望，頂平定巾來。」至期，府公人坐，俊孫衣巾侍立。見素退卻之，府公問是何人。見素曰：「此甥孫，陳公俊孫也。」府公退訪其故，乃知縣欲役之，里胥卽爲除之。俊子復教之曰：「里役既去，可謝舅祖。」陳從其計，送餉甚盛。見素一見，詰責，取杖笞之。又言：先輩莆中有建言守正被謫削籍，與宦歸而囊橐輕簡者，見素輒率諸紳出郭迓之。

陳公茂烈，爲吉安府推官，民歌之曰：「要無冤，對陳言。」有戴佩者，逼於償負，以田數畝託寺僧以養

母，誣人，馬逃去。償主、馬主告，分其田。公判曰：「戴佩既有存田養母之心，必無竄身棄母之事。且其母年高，不可奪其所養。」民感服而止。有方姓者，娶妾方娘，妻悍不能容，逼嫁之，果生男。及父死，歸嗣其業，族人爭之。君取其家女對驗之，狀貌無異，爭者始服。有寡婦某氏，豪家利其有而誣訟之。君斷令婦守志，且爲庇護其家。其辯冤誣，敦倫紀，有出於法紀之外者。

劉閔三歲喪父，其母訓之曰：「自吾爲而家婦，聞爾祖以孝得稱於鄉。祖母李氏嘗割股療親疾，爾父言之必流涕。爾曹無効之乎？」閔感奮自立，絕意科舉，大書於堂曰：「片言忘孝非君子，毫髮徇私是小人。」繩行矩趨，造次不苟。或疑其偽，曰：「我非偽。」或病其迂，曰：「我誠迂。」察其幽而要之，久始大服。賓於坐，則衆爲肅，行於途，則衆爲起。士大夫造其廬，必修容而後退。配陳氏，以失愛於母，出之外家，時年三十二，遂不別娶。後以陳無依從，二子迎歸，終身不共寢食。名重海內，遠方士有及門質疑者，廣信王郡守瑀遣人致幣圖其像以歸。

林貴七，景德里書街人。生宣德丁未，卒嘉靖己丑，壽百有五歲。郡守葉觀造廬分俸，兼有詩章之賜，同僚與鄉紳皆和之。朱永崇，黃石牆頭人，壽百歲。子良仁八十六，良德八十八，侄良善八十五，良典八十六，孫廷佐八十九，廷鳳八十五，曾孫子翼八十六，子源八十八。崇自爲聯句云：「眼前白髮皆孫子，門外青松是故人。」侄孫宏謹八十七。謹子宜獻九十六，宜清八十三，邦光九十九。光子時和，和子藩卿，俱八十二。卿子登雲，雲子子威，俱八十三。郡守朱袞扁邦光之堂曰「五世同春」。曾侄孫子錫七十八。錫長子光騰七十九，次子光遠八十一，應奎八十三，應舉八十，周翰八十二，應春、士鎮俱幾八十。今地名壽鄉云。朱弘謹，黃石琳井人，後徙涵江鄉，稱善士，壽八十六，妻林氏八十一。子灌與弟洛同壽七十年，

壽九十六，妻陳氏九十二。洛壽八十一，妻王氏九十四。黃公瑀扁所居曰「世壽堂」。方儀禹，杜塘人，郎中瀾從弟也。父儒官淑明，壽八十二，母康百有一歲。儀禹終日危坐，未嘗跛踣，生弘治丁巳，卒萬曆癸巳，壽九十七。長子如陵八十三，次子如翰見年八十三，如金見年七十五。張文昌以儒士進場三次，郡守朱衮嘗書「爲善最樂」旌之，年九十八。子秀，江西南浦遞運所大使，被寧濠繫獄。濠擒，復職，年八十八，及兄孫郡守重鄉薦。東華鄭伯玉以儒士進場二次，壽八十七，妻吳八十八。而二子端、清後先甲科，伯玉以清貴封主事，復以孫應聘貴贈尚書。長孫應科，忘機無著，焚香淨几外，百無所思，壽八十九。墓兜吳大猷，紳之侄，壽百歲，與物無忤，行疾如飛。一日，端坐而逝。醴泉里陳居俊，壽百歲，郡守陳王庭扁其堂。楚藩紀善吳騰，氣韻冲和，風致凝靜，致仕歸，惟杜門課孫讀書。無疾而知將逝，自挽有云：「老去竟何如，垂死夢中兩都賦，生來祇是寄，百年身外一浮雲。」遂瞑，時年九十有六。撫臺徐學聚爲建「清朝人瑞」坊。湘藩逸史林文豪，該博不群，其磊落英氣，至老不衰。春日自題於堂曰：「扶杖思觀德化成，堯禹逢時爲父老。新春欲問長生訣，商彭笑我尚嬰孩。」年九十有四。（興化志）。

莆自郡縣以來，長材秀民繇科目出者漸齒上國，至宋乾淳以後尤盛。皇明啓運，人文聿興，粵自洪武庚戌迄今嘉靖戊子，凡五十一舉，士繇鄉薦者千一百一十一人，登甲科者三百二十四人，狀元及第二人，探花四人，會元一人，會魁七人，解元二十五人，經魁四十人，視宋之盛殆又過之。鄭山齋《莆陽科第錄序》。

宋三百年間，舉進士者九百七十餘人，預諸科、特奏者六百四十餘人。其間魁天下者五人，登宰輔者六人，有文武并魁者，有魁亞聯擢者，其盛極矣。然此未足深羨也，仲昭獨慕其時元夫鉅人相繼而出，爲宰輔則相業光明，宗社嘉賴，爲諫官則議論忠讜，夷夏知名，或侍經筵則盡啓沃之職，或司民社則効撫

字之勞，臨大節則蹈鼎鑊而不顧，決大義則觸權奸而不恤，有倡關洛之學而不變士風者，有紹考亭之緒而深人理奧者。雖所遭不同，所就亦異，而其純正篤實之學，崇偉光大之行，皆卓乎其不可及也。黃仲

昭《鄉貢進士題名記》。

邵武府

《宋名臣言行錄》：舊制，御膳進一百二十器，淵聖減作四十器。上卽祚，又加裁省，其後早晚共止一羊，不過數品。巡幸東南，駐蹕郡縣，兵火之後，屋宇闕陋，雖久駐亦不增葺。中宮未還，妃嬪有名位者才二三人，其餘宮嬪并有職掌者通不及百人。而三丞相則不然，李綱私藏過於國帑，乃自厚奉養，侍妾、歌僮、衣服、飲食，極於美麗。每享客，般饌必至百品，遇出則廚傳數十擔。其居福州也，張浚被召，驢行一百二十合，合以朱漆銀鏤粧色，樣致如一，皆其宅庫所有也。呂頤浩喜酒色，侍妾十數，夜必縱飲。前戶部侍郎韓相家畜三妾，俱有殊色，名聞一時。相死，諸大將以厚賂取呂，用數千緡得一人，號三孺人，大寵嬖之。初則專預外事，公然交通韓氏，中外因以媒進。時呂已六七十歲矣。趙鼎起於白屋，有朴野之狀，旦拜相，驟爲驕侈。別起大堂，奇花嘉木，環植周圍。堂之四隅，各設大爐，爲異香數種，每坐堂中，則四爐焚香，煙氣氤氳，合於坐上，謂之香雲。又艱難以來，堂饌菲薄，鼎增厚十倍，日有會集，侍從將帥，下逮省寺官，日費香直數十緡，酒饌尚不計也。其後鼎坐臺疏落職，守泉，累章數千言，而乾沒都督錢十七萬緡，竊用激賞庫錢七十餘萬緡，奄有臨安府什物三千餘件，乃章中一事。命下，人皆謂鼎必辯，而不辯也。余按，宋家此時正士大夫卧薪嘗膽之秋，召賢士大夫而尚爲此，何望其他哉。

邵武地風密土厚，民多壽考。元時有率真會，黃鎮成諸人題序猶有存者。國朝成弘間，有願年會，皆於受生之日，書實咸集，陳俎豆，序少長，皓鬚龐眉，笑語歡洽，盡日而退。子弟執事甚恭，遇長者於途，必拱立以俟，既過乃行。圖形分贊，題詠頗多，郡守潘旦、王鑾，同知鄒武，教授周衡，教諭鄧祀，省元朱澗，皆爲之序，有集成卷。嘉靖間，亦有續願年會，擬迹前輩。天順、成化來，士講習古鄉射禮，每遇舉行，環射圃而觀聽者竟日不去，遠近興起，多來取法。

漳州府

宋秦檜既殺岳氏父子，其子孫皆徙重湖閩嶺，日賑米錢以活其命。紹興間，有知漳州者建言：「叛逆之後不應留，乞絕其所給，使盡殘年。」秦得其牘，令札付岳氏而已。士大夫爲官爵所鉤，用心至是，可謂狗彘不食其餘矣。不欲顯言其姓名，以爲縉紳之戒。

陳淳《上趙寺丞論淫祀》：「淳竊以南人好尚淫祀，而此邦尤甚。自城邑至村廬，淫鬼之名號者至不一，而所以爲廟宇者，亦何啻數百所？逐廟各有迎神之禮，隨月迭爲迎神之會。自人春首，便措置排辦迎神財物事例。或裝土偶，名曰舍人，群呵隊從，撞入人家，逼脇題疏，多者索至十千，少者亦不下一千。或裝土偶，名曰急脚，立於通衢，攔街覓錢，擔夫販婦，拖拽攘奪，真如晝劫。或印百錢小榜，隨門抑取，嚴於官租。陰陽人鬼不同途，鬼有何說，欲人之必迎？人有何見，知鬼之必歡迎？凡此皆游手無賴生事之徒，假此以括掠錢物，憑藉使用。內利其烹羔擊豕之樂，而外唱以禳災祈福之名。始必浼鄉秩之尊者爲簽都勸緣之衡以率之，既又挾群宗室爲之羽翼，謂之勸首。而豪胥猾吏又相與爲爪牙，謂之會幹。愚民無知，

畏禍懼譴，皆勉傾囊舍施，或解質舉貸以從之。今月甲廟未償，後月乙廟又至，後月丙廟、丁廟又復張，頤接踵廢。塞向墮戶之用，爲裝嚴祠宇之需，輟仰事俯育之恩，爲養哺上偶之給。錢既哀集富衍，遂恣爲無忌憚。既塑其王鬼之夫婦，被以衣裳冠帔，又塑鬼之父母，曰聖考聖妣，又塑鬼之子孫，曰皇子皇孫。一廟之迎，動以十數像，群輿於街中，且黃其傘，龍其輦，舖其座，又裝御直班以導於前，僭擬踰越，恬不爲怪。四境聞風鼓動，復爲俳優戲隊，相勝以應之，人各全身新製羅帛金翠。或陰策其馬而縱之，謂之神走馬，或陰驅其箒而奔之，謂之神走箒。男女聚觀，淫奔酣鬪，夫不暇耕，婦不暇織，而一惟淫鬼之玩，子不暇孝，弟不暇恭，而一惟淫鬼之敬。一歲之中，若是者凡幾廟，民之被擾者凡幾番。前後有司不能明禁，復張帳幕以觀之，謂之與民同樂，且賞錢賜酒，是又推波助瀾，鼓巫風而張狂之。至於朝嶽一會，復鄙俚可笑。嶽，泰山魯鎮也，立祠於諸州也，何因？國朝以帝封之。帝，以氣之主宰者而言，非有人之謂也。而人其貌也，且立後殿於其後也，何謂？自開闢已有是嶽，而以三月二十七日爲嶽生之辰者，又爲何據？闔境男女混雜，晝夜朝禮，入門則群慟，謂爲亡者祈哀，以爲陰府縲紲之脫慶。侍者亦預爲他日之祈，謂之朝生嶽。自以爲報親，而不知其爲辱親，自以爲修善，而不知其陷於惡，與前迎鬼者同一律，皆蠱壞風俗，混亂教化之尤者也。某愚區區，欲望台慈特喚法司聞具迎鬼諸條令，明立榜文，并朝嶽俚俗，嚴行禁止，仍頒布諸鄉下邑而齊一之。於以解人心之宿惑，而有風移俗易之美，省民財之妄費，而有家人足之道，實爲此邦厚幸。」又《上傳寺丞論淫戲》：「某竊以此邦陋俗，當秋收之後，優人互湊諸鄉保作淫戲，號乞冬。群不逞少年，遂結集浮浪無圖數十輩，共相唱率，號曰戲頭，逐家哀斂錢物，豪優人作戲。或弄鬼儡，築棚於居民叢萃之地，四通八達之郊，以廣會觀者。至市廛近地、四門之外，亦爭爲之。今秋

自七八月以來，鄉下諸村正當其時，在在滋熾，其名若曰戲樂，其實所關利害甚大。一，無故剝民膏爲妄費。二，荒民本業，事游觀。三，鼓簧人家子弟玩物，喪恭謹之志。四，誘惑深閨婦女出外，動邪僻之思。五，貪夫萌搶奪之姦。六，後生逞鬪毆之忿。七，曠夫怨女邂逅爲淫奔。八，州縣二庭紛紛起獄訟，甚至有假託報私仇擊殺人，無所憚者。若漠然不禁，波流風靡，豈不爲仁人君子德政之累。欲望台判按榜市曹，明示約束，并帖四縣各依指揮，散榜諸鄉保，申嚴止絕。如此則民志可定，民財可紓，民風可厚，民訟可簡，闔郡四境被賢侯安靜和平之福，甚大幸也。」

皇朝陳布衣真晟《乞召對疏》：「奏爲建言事。臣聞布衣廷對，苟無圖富貴之心，而直欲言天下事者，先儒許之，以爲可尚。引宋程頤氏，大儒也。爲布衣時，亦嘗不待朝廷招之問之，而自往上書乞召對。固有似於輕售其道者矣，厥後朱熹氏序頤年譜，亦不以爲非而錄之，豈非是又一道耶？臣卑鄙至愚，固不敢擬跡先儒，然竊願學程、朱萬一之學，而實無圖富貴之心也，故亦敢効程氏故事焉。且臣所以有言者，非敢自專也。奉明詔有『時政得失，許諸人直言無隱』之文，此聖朝大開言路，是欲盡天下之善以聞之也。臣竊以爲時政得失，固所當言，而風化者，時政之本，其得失則尤當言焉。但本領大事，非面陳不可，伏望陛下不忽臣爲卑鄙至愚，萬幾之暇，賜一召見，俾臣得一陳其鄙。臣欲所陳無他，止是欲正士習以淳民風，以復三代事，亦簡要而易行者也。臣昧死謹聞，伏候勅旨。」天順三年六月初六日投通政司，本月初八日早朝封進，是日晚奉聖旨：「禮部知道，欽此。」又《正風教疏》：「奏爲正風教事。臣竊惟今天下彌文矣，臣不敢更飾浮詞，輒陳鄙見。臣伏覩丁丑科廷試策，見聖制篇首之問有曰：『古之士，進以禮，退以義，爲上爲德，爲下爲民。今何其立功之志弱，利祿之心勝，奔競之風未息，廉介之節少著，其失安在？』」

臣卽是而觀，甚知陛下有思古慨今之意也。至其終篇，又曰：『今欲士正其習，民淳其風，庶幾三代之盛，必有以其道，務求切至之論，將擇而行。』此可見聖志將大有爲，可謂千載一遇之問，而天下萬世福慶也。

故臣謹採先儒之說爲小書一卷，題曰《程朱正學纂要》來上，亦竊効廷對之意也。大抵三代所以盛者，學校興，師道立，而心學正，教明於天下也。後世雖有學校之設，然專以科舉俗學爲教。俗學益盛，則心學益廢，無怪乎士習不正，民風不淳，而三代之治不復見斯世也。臣聞父師之論而得一說，謂可且就科舉之後補此一教，如程、朱所定三代學制之法，再假以一二年聖學工夫，然後除授。如此則俗學稍輕，正學自重，人相習尚，積成風化，不患三代之不能復矣。然此非臣之言，臣父師之議也；非臣父師之議，實《大學》所謂兼補之法也。雖或問，主於爲學者自補而言。然司教化者朝廷也，與學者自補其學於下，孰若朝廷通補一教於上，豈不週遍廣大，尤足以盡朱氏立法之意哉？況心學既明，不惟有以正士習於天下，尤足以示道統之真傳，俾皇家聖子聖孫常得見聞帝王心學有實下手做工夫，非但口耳講說，如漢唐宋元東宮之教而已。方今急務之大，又豈有急於預教東宮之聖學者哉？臣布衣至愚，且老羸風證瀕死之餘，萬無圖富貴之心，然奉明詔言得失，得失本末莫大於此，故願効一言，而歸死山林瞑目焉。伏望聖裁。無任昧死之至，謹具以聞。」天順三年六月初十日赴通政司投進，本月十二日晚奉聖旨：禮部看了來說，欽此。

予友章德懋議論頗有源委，似負經濟之略。布衣陳剩夫，閩中高士也。此二人者，俯而詢之，未必無分毫之助。羅倫《復張都憲書》。

閩中陳剩夫者，先生所知，不幸去年秋間死矣。其人雖未而，然粗聞其學術專一教人靜坐。此尋向上人也，可惜！可惜！陳白沙《與胡愈憲書》。

《慎獨記》：有延陳布衣先生以教子弟、開講於家之前堂者，適有邀先生飲，主人與偕。學母有愛子者，乘先生不在，詣堂以視，主人之妻與焉。遽巡至西軒，妻置業屨於床，俄報先生至，忘携以歸。主人請先生假寐，爲拂床，而業屨在焉。執入內，以先生有私，礪刃拉欲殺之。妻無以辯，悲號不自勝，曰：「願察之，果爾，死未晚也。」夜二鼓，先生方對書，主人執刃與妻至軒外，令妻作厚語叩門，而呼者三。先生不問，聲益促。先生曰：「夜闌，何崇乎！」妻曰：「予某之婦，欲問先生起居耳。」先生曰：「而夫不在，若是辱名教矣。亟歸，明當與夫言之。」主人垂長舌趨入內，驚駭咨嗟。先生初不知其情，旦促裝辭歸。主人率其族黨謝罪請留，先生卒不俟終日。嗚呼！疑似之跡不可辯者，受害多矣。非先生之至誠無二，其妻能免於死耶？

福寧州

宋陳普《古田女詩序》：「吾州近郭五六縣，士風悉如老杜所賦夔州女，而靡尤甚，每慚無以答四海兄弟之詰問。一日來古田，見傍縣一二十里內，於插秧時亦如之。以爲三時惟此時最忙，不可不爲夫、子之助也。其說甚善，而事則未可。愚以爲不如其已也，作詩以道之，幸其一聽。詩云：昔年過饒州，一事獨希差。清川浴婦人，以晝不以夜。上流濯垢膩，下流汲歸舍。供佛與事尊，共用如啗蔗。朝昏賣魚蝦，晴雨親耕稼。樵採與負戴，咸與夫並駕。流污浴豈非，失禮事可訝。我時適逆旅，一見爲汗下。欲言不可得，況敢加譏罵。靜惟天下事，無邊可悲咤。一從文王沒，聲教不踰華。巴兜與閩粵，至今愧華夏。男不耕稼穡，女不專桑柘。內外悉如男，遇合多自嫁。雲山恣歌謠，湯池任騰藉。插花作牙儉，城市稱雄霸。」

梳頭半列肆，笑語皆機詐。新奇弄濃粧，會合特物價。愚夫與庸奴，低頭受凌跨。吾閩自如此，他方我何暇。福州縣十三，余幸窮岸下。十里近郭縣，此俗獨未化。一日來古田，拔秧適初夏。青裙半絞札，水泥和撥逐。事事亦不惡，位分無假借。三王一帝年，人倫密無罅。冀方古當塗，豐水今滄瀾。見惡如豺狼，嗜禮如膾炙。固無期桑中，亦無舞臺榭。一國皆若狂，一年惟有蜡。盛年事耕織，斑白可休假。習見宜如常，驟異良以乍。勸君但勤鋤，茲事宜永謝。倘能用吾言，鷄豚願同社。」又李良王見賡有：「此風久矣。是乃方伯連率之職，吾輩且當從俗之說，再用前韻：北人見颶風，掀簸嗟真差。君子逢不若，白晝成黑夜。日月同一天，寧復殊次舍。禮義無乖夷，悅心悉如蔗。披沙欲出金，惡莠爲害稼。朝歌與勝母，賢者同回駕。中爲去偏倚，庸但無怪訝。安敢亢亢方，却無他仙下。禮不慮弗違，義不恤怒罵。恭惟秦漢前，禮樂止河華。七閩底處所，目不覩韶夏。食才美馬甲，衣僅知壓柘。應無雁幣聘，寧識棗修嫁。歷漢晉至唐，談口無可藉。令孜與思勗，畏作貂璫霸。弟從常袞來，始識不逆詐。珠玉滿面前，猶或迷光價。一二百年來，驕驕漸知跨。述古與介夫，各有詩書暇。晦翁黃勉齋，遂以教天下。昔時蠻隸國，今作齊魯化。沂風謫莫春，弦誦殷長夏。蹢躅多規行，穆穆親衡迓。方知地無偏，又喜才不借。獨餘男女俗，缺漏留微罅。未能秣駒漢，頗礙雪驢灞。有心卽知禮，有口皆思炙。男女旣冠笄，屋宇仍臺榭。朝夕曉清溫，春秋能社蜡。溱洧乘簡游，此日何可假。禮自標枝來，心無傾蓋乍。風流與衣冠，猶當軼王謝。田漁非女事，詩以告里社。」

謝阜羽《晞髮集》，詩皆精緻奇峭，有唐人風，未可例於宋視之也。予尤愛其《鴻門譙》一篇：「天雲屬地污流宇，杯影龍蛇分漢楚。楚人起舞本爲楚，中有楚人爲漢舞。鷗鵲淬光雌不語，楚國孤臣泣俘虜。」

君看楚舞如楚何，楚舞未終聞楚歌。」此詩雖使李賀復生，亦當心服。李賀集中亦有《鴻門讌》一篇，不及此遠甚，可謂青出於藍。元楊廉夫樂府力追李賀，亦有此篇，愈不及臯羽矣。其他如《短歌行》：「秦淮落日如沒鵲，白波搖空溼弦月。舟人倚棹商聲發，洞庭脫木如脫髮。」《建業水》云：「太白人月魚腦滅，武昌城頭鼓統統。」《海上曲》云：「水花生雲起如葑，神龍下宿藕絲孔。」《明河篇》云：「牽牛夜人明河道，淚滴相思作秋草。婺女城頭玩月華，星君冢上無啼鳥。」《俠客吳歌》云：「潮動西風吹杜荊，離歌入夜斗西傾。飲飛廟下蛇含草，青拭吳鉤入匣鳴。」《効孟郊體》云：「牽牛秋正中，海白夜疑曙。野風吹空巢，波濤在孤樹。」律詩如：「驛花殘楚水，烽火到交州。夜氣浮秋井，陰花冷壁田。山鬼下茅屋，野鷄啼芋蘿。戍近風鳴柝，江空雨送船。」《鄰逋燈下索，鄉夢戍邊回。柴關當太白，藥氣近樵青。暗光珠母徙，秋影石花消。下方聞夕磬，南斗掛秋河。」雖未足望開元、天寶之蕭牆，而可以據長慶、寶曆之上座矣。集多臯羽手抄，「溼」字多作「溼」，蓋从古字「溼」之省。史子堅《隸格》載漢碑有此字，觀者弗識，或改爲「沔」，非。

何子曰：《詩》云：「如彼飛蟲，時弋有獲。」《記》曰：「蛾子時述之」，其斯之謂歟！
贊曰：漱液擷芳，以廣六藝。爰擴舊聞，亦論其世。

〔校記〕

〔一〕「畜德志」下，各本原衍「下」字，據本書體例刪。

〔二〕「張元儋符」下，各本原闕一字。

〔三〕「上道振年譜普」，疑誤。

〔四〕〔五〕《劉厚村集》，據今存世本，當作《劉後村集》。

〔六〕「《夷堅丁志》忠」，據文義及洪邁《夷堅志》，當作「《夷堅丁志》中」。

閩書卷之一百五十四

我私志

何子喬遠曰：閩故有通志，弘治初黃公仲昭所撰。去之一百三十餘年，未有續者。萬曆庚戌歲，巡按御史山陰陸公夢祖，久候代不得，與都御史句章丁公繼嗣、都御史武進前方伯袁公一驥，慨然欲續成之，下諸郡縣，悉先修其本郡縣之志，上籍御史臺，而延諸公縉紳總之，則閩縣尚書林公煥主其事，予喬遠，與前都給事中林公材，今大理寺丞、前吏部郎董公應舉及諸公主之。陸公尋得代去，不果爲。提學副使慈谿馮公燧，則以郡縣所修書盡送予所，曰：「子其成之。」予起壬子之冬，以及丙辰之春，首尾五年，論次成書。而擷掇刪潤，予徒黃鳴晉、王有棟有力焉。客曰：「《華陽國志》、《襄陽耆舊傳》乎？」何子曰：「何敢望一書也？何景明之《雍大記》。廖鳴吾《楚紀》哉！」予志天文焉，沿弘治之舊也。仁宗皇帝以問三楊、蹇、夏諸公，猶未之知也，故沿弘治之舊也。予志方域焉，首郡縣，載沿革也；次都里，載版籍也；次列山川、陂塘、井泉、水利之屬，其間古跡、舊事、名人之所寓寄，方外之所游處，與夫登眺記乘之文，其可傳者，悉次於其下，使人一覽瞭然，無勞互證，是仿酈道元《水經》而爲之也。予志建置焉，凡城邑、壇廟、官署、學宮之所以興創，與夫有文字碑述可垂遠者也。予志風俗焉，倣《歲時風土記》而爲之也。予志

版籍焉，按之《大明會典》而舉其綱，其詳則籍之諸郡縣也。予志扞圉焉，武衛也。予志前帝焉，宋雖式微，出居於閩，尊正統也。予志君長焉，雖其踞有一隅，自非慈仁德茂，不足享世，其子孫敗亡，則驕與暴，不則中原有主也。予志文蒞焉，吾師帥也。有德於官者，則識其行事，不，亦考之前史，參之今獻，得其平生，則其當官，當不苟然也。有不職其官者，久遠則書之，不久遠者，吾不載其姓名，使其子孫見之曰：「吾父祖曾官於斯也，何其佚厥名也？」予志武軍焉，公侯干城乎。予志英舊焉，曰縉紳，曰弁輪，曰關柝，曰韋布，曰閭巷，曰僑寓，曰裔派，不遺善也。其於縉紳，有一善，未嘗不書之也，仕爲大臣，有名於世，有德於身者，未嘗不詳書之也。將來有修國史者焉，吾不詳其德誼行善，他日何以爲採掇之資也？予於前代縉紳，未嘗不採史書，求諸乘而詳之也。不知其人，不論其世，可乎？寥寥數言，誰復悉其道德行誼之實，氣節謀猷之人，政事文學之美也？予志方伎焉，藝之精者，未始不聖也。予志方外焉，《五燈會元》，以及道家之書，未嘗不括也。予志宦寺焉，宦寺多產於西北，而閩亦有人，至有功可扶國家者，烏得略之也？予志閨閣焉，女子之貞也，猶丈夫之死難，與夫幽人之抱獨也。有德之母，不見於世乎？何劉向《列女傳》亢其門也？予是以先賢女也，而後繼以烈女。予志島夷焉，非其向附於我，我倚爲藩屏，則其外患於我，而當豫防之也。予志靈祀焉，謂其禦災捍患，有功德於民也，亦必其閩人也。予志祥異焉，倣《春秋》也，亦沿夫舊志也。予志萑葦焉，是封豕長蛇，毒我鄉土，其衰也，亦有賢豪將吏，出而蕩滌之，其經略之方，亦著於此也。予志南產焉，不志南產，不名《閩書》也。予志畜德焉，賢人君子，業見正志之中，亦有其遺言往行，可師法者。或其非賢人君子也，而能取一世惡名以爲魁，是未必無機智才具、文章政事可稱述者也。或其雜事之異於見聞，與其人之未詭於正者，兼志焉。予志我私焉，予家有縉紳者，不敢以列

於縉紳，予家之間巷者，不敢以列於閭閻，予家之閭閻者，不敢以列於閭閻也。曰江山訓導，喬遠之五世祖也，諱安，字叔恭。領洪武丙子鄉薦，授開建教諭。國初，邑學無士中選，則謫其學官，坐改爲江山訓導。先祖通《毛詩》、《春秋》二經，爲文溫和清瑩。自江山奔母喪歸，既除服，涕出若初喪。曰儋州同知，喬遠之高祖伯父也，諱祐，字天錫。正統中，應貢人太學，授建陽衛經歷，陞儋州同知。先學校，興教事，除苛政。有訟立決，無繫者，決之時，必教戒而罪之，訟者不之州長，而之先高祖伯父。儋人通猖獗，數反覆爲變，先高祖伯父出榜文誘勸之，語以「天下無有白頭之盜，聖世無不內面之民」，民皆化爲良善。曰靖江教諭，喬遠之父也，諱炯，字思默。專精學《易》，治宋儒書，有名諸生，衰然爲後輩師表，士從游者以數百人。嘉靖中，應貢試內庭，世宗閱其文，手拔爲第一，授安福儒學訓導，以忠孝訓士，曰：「唐陽城曰：『學者，所以學爲忠孝也。』」擇周、程、張、朱四先生遺言之切於讀書者刻於學舍，以教生徒。從其邑先生鄒文莊守益講德論業。邑先輩少司寇彭公黯，名臣也，沒而未得祀學宮，先子首舉之。邑有百年之老，先子薦之賓席。僕夫楊復刲股療母，先子具羊酒其家，爲下拜。其他有濫乞鄉賢，不急在原之難者，嚴拒善誘，衆皆服且信。遷靖江儒學教諭，署以正，率人師保如臨於學齋，召諸生月試之。靖，僻邑，諸生爲時義外，史傳朦朧如，先子試目必先論策，後經義，以進其才識。邑科第久乏，自先子在官，遂有中選者。性至孝，早孤，孺慕不替，哀白修家譜，以識先德，嚴寢堂，以肅先祀。編次泉郡先哲之文章爲《清源文獻》；哀王文忠、真文忠二公守泉之文章、政教爲《溫陵留墨》，二書並刻於郡齋。有刑部員外郎，喬遠族父也，諱琚，字佩甫。舉嘉靖丁未進士，授刑部主事。受事提牢，哀矜切至，視護周旋。他日，楊忠愍繼盛以諫得罪繫獄，則族父之同年以次提牢矣，其人希權相意，嚴切閉禁，卽藥物微鮮輒使拒不通。族父屢爲請，

不得，歎曰：「世有匿媚事人至此！」徑入獄中見忠愍，慰藉之。忠愍大駭，曰：「公不顧禍福乃爾耶！」時同邑史朝賓爲刑部郎，忠愍屬其擬比，而史公輕之。上怒，降史公判州，族父復往慰藉，如所以慰藉忠愍者。居常，蒿目時事，自謂得行其志，上之當爲朝廷計安國事，外而得一郡守爲之，亦必使一郡之民戴利蒙恩，無不得其所，若退居田野，則讀書養性，以進於君子之域。竟以員外郎卒。口大理寺右評事，遠同母兄也，諱喬遷，字齊孝。萬曆丙子，以《禮經》舉鄉試第四人，授建陽學諭，曰：「此朱文公之鄉，吾敢不勉？」至，則以「宗朱」顏其堂。又口：「吾父靖江公，有《清源文獻》之書。小子不敏，敢從事焉，亦彙《潭陽文獻》，刻之學舍，以備邑故訓多士。」擢國子監學正，大司成諗其學問淹詳，委校二十一史。擢大理評事，卒京師。大宗伯黃公鳳翔序其文：「俊潔典亮，渠燠歐、曾。」是所得列於縉紳者也。有曰浚者，喬遠之叔祖也。兄早卒，有兄子一人，又二女也，皆零丁孤苦，莫必其命，而姊妹所出甥，亦凋瘵不堪。浚鬻繡爲業，本直少，不足自餬口，節哺省啜，並收養之。其所謂兄子二人，一曰喬遠之父也。有曰茂先者，喬遠從兄也。賣紙爲業，格前賣紙，格後讀書。見市上有鬻破故書者，以餘錢易之，雖零落不備，讀必終卷乃已。擇其可以修德養生者，裒而存之。其事後母至孝，母病，爲文禱神，乞延其壽考。後母所生女，與己子同時患痘，而後母女瘡甚，茂先密書疏，告關帝廟下口：「繼母年大，僅有一女，民子同痘，願民壯尚能生育，妹而不生，母無望已，若上蒼見禍，願以己子易妹之生。」竟子、妹同愈。其患痘子，曰夢駿，舉於鄉，人謂至行之報。是所得列於閭巷者也。喬遠有二世祖母，曰蕭仙奴，幼通《孝經》，歸吾二世祖原清，二十八而寡，有子曰道，曰安，撫教之。安舉鄉薦，而蕭母歎曰：「天而有知，毋俾吾兒爲州縣，恐其不通民政以病民。夫人若使領學官教士，則吾子能之。」後安授開建教諭，請迎養宦邸，不許，曰：「有汝家

賴藻之禮在。」喬遠有母曰林金保，慧敏通文，性至孝，早喪父母，哭之哀，鄰媼爲之輟食投筯，曰：「有此孝女！」歸吾先子，先子然一諸生，先母內經營，家以不困。從宦兩學舍，教子以學，教女以禮。先子篤先世之祀，先母手治潔蠲，未竣祀不敢食朝食。此所得列於閨閣之賢女者也。喬遠族父、員外郎琚之繼妻，曰吳扶陽，通經傳，莊事員外爲師友，不徒曰夫婦。其起居有度，交接有禮，誦詩閱史，鑒古訂今，能斷往事，揆世變，好稱引古人儼苦高潔之行，以壯員外之守官。員外沒，無子，吳氏爲立嗣，處治纖詳。選日見夫之親友，爲絕命書，自經而從之。其絕命之詞曰：「嗚呼！吾夫之亡，妾上無舅姑可守以孝，下無弱息可守以慈。安得顧戀殘生，不自引決？」參知王慎中歎其見之正，守之定，爲私易其名曰純節，善道吳氏烈女。嘉靖三十三年，賜旌表。喬遠有嫂曰王，爲先兄逮繼室。先兄，諸生也。王二十七而寡，靡子也。孝事舅姑，慈兄弟之子，年八十餘，有司頻旌焉。予有子曰九轉，爲邑諸生，有文學，不幸無年以死。死之二十餘日，子孫亦殤。予子婦曰王承靜，自經而殉之。先訓嘗士情詳，及時日，遍拜諸家長親友，亦如吳烈女。終後，端拱如生，手不下垂。其生時，事予至孝。臨死，曰：「昔者，嘗從學於女史矣。女媧補天，婦之死者，寧無補乎？」萬曆四十一年，賜旌表。嗚呼！此所得列於閨閣之烈女者也。

贊曰：漢太史令，自擬卜祝。世教朝常，有何綴屬？呂言蠶禍，羅失麟續。夫人有心，遂思隱約。我久幽問，尚友緬邈。外稽籍記，內諗鄉曲。如絲得繭，欲吐在腹。況有使幣，賁我邱壑。泛泰群氏，雜閱陳牘。遂次《閩書》，及我私族。

〔校記〕

〔一〕「刻於學舍」，各本原作「刻刻學舍」，據文義改。

〔二〕「臨死」下，當有脫文。

校點後記

我們不揣謏陋，承擔了《閩書》點校任務，並得到福建人民出版社的鼎力支持，將其列入《八閩文獻叢刊》出版規劃。

鑒於原著卷帙浩繁，內容廣泛，點校組由長期從事中國古代史教學、研究和對整理古籍有一定經驗的同志組成。依照慣例，整理工作自版本調查入手，而後擇善本復印成工作本（詳見《校點前言》），擬定《校點凡例》。校點工作採用分工合作的方式，即初稿由每人分卷校點，然後互換復校，每卷必經兩人以上校讀。為統一體例，設專人負責全書審閱通稿，特別是校記內容審訂、文字潤飾等。校對清樣時，仍以同樣方法對每一卷清樣進行校讀。目的在於以勤補拙，力求減少差錯。整個工作過程，同志們齊心協力，集思廣益，取長補短，並且不避寒暑，幾番分批奔赴福州，在福建省圖書館、福建師範大學圖書館等處復校善本，使任務得以順利完成。

點校組各成員任務分工如次：

王益強：一至七卷，七十二至八十一卷，一百一十一至一百一十五卷，共二十二卷。

侯真平：八至十七卷，共十卷。

婁曾泉：十八至二十七卷，一百一十六至一百一十八卷，共二十三卷。

顏亞玉：二十八至三十卷，一百三十五至一百四十一卷，共十卷。

陳明光：三十一至四十一卷，八十二至九十一卷，共二十一卷。

顏章炮：四十二至六十卷，一百四十三至一百五十四卷，共三十一卷。

王日根：六十一至七十一卷，共十一卷。

楊際平：九十二至一百一十卷，一百一十九至一百三十四卷，共二十五卷。

此外，由侯真平負責全書通稿以及撰寫《校點前言》、草擬《校點凡例》，審訂校記。顏章炮亦參與一百三卷至一百五十四卷通稿工作。全書校點任務的統籌安排，以及《校點前言》、《校點凡例》的審訂，則由本人負責。

福建人民出版社李瑞良先生和祝崗影、林斌同志，熱心支持這項工作，並認真審訂，提出許多寶貴意見，我們深表謝意。

清代學者王鳴盛說：「校理古籍，在於「祛其疑乃能堅其信，指其瑕益以見其美」。我們限於水平和經驗不足，自問未能做到盡祛其疑與指其瑕，也就難以達到信與美，其中難免存在缺點和錯誤，敬請專家和讀者多予指教斧正是盼！

婁曾泉謹識

一九九四年十二月

